

TIJA GAED BLONG
LAEF
LONG
KOMYUNITI

Yia 2



LAEF LONG KOMYUNITI

Tija Gaed



Yia 2

Ministri blong Edukesen mo Trening
Ripablik blong Vanuatu
2017

Ministry of Education and Training - Republic of Vanuatu

ISBN 978-982-9126-75-7



Title: Tija Gaed blong Lanwis mo Komyunikesen Yia 2



Education Support Program (Vanuatu)
is managed by Coffey on behalf of the
Australian Government

Supported by the
New Zealand Aid Programme

This Teacher Guide was developed with the support of the aid programs of the Governments of Australia and New Zealand provided through the Education Support Program (Vanuatu).

Raet blong buk ia i stap wetem Gavman blong Vanuatu.
© Ministri blong Edukesen mo Trening, Ripablik blong Vanuatu.

I no gat man i gat raet blong riprodusum buk ia o eni part blong buk ia. I no gat man i gat raet blong printim, salem, mekem fotokopi, transmitim long eni form, had kopi o sof (elektronik) kopi. Yu save mekem wan long olgeta samting ia antap nomo sapos we yu askem raet long pablisa (ol man we oli mekem buk ia) mo oli raet i kam mo givim raet ia long yu.

OI Konten

INTRODAKSEN	4
Strakja blong Tija Gaed	4
Silibas blong Matematiks	4
Taemtebol	5
Ol step blong planem wan gudfala lening program	8
Wanem hem i Inklusen o Inklusiv Edukesen?	10
 OL LENING AOTKAM MO INDIKETA	11
OI Stran	
Helti Laef	12
Laef Tugeta	14
Wei blong Laef.....	18
 OL LENING AKTIVITI	
Tem 1	
Ovaviu	21
Ol Aktiviti blong Muvmen mo Gem	25
Ol Aktiviti blong Visuel At	31
Tem 1, Wik 1–10	35–99
Tem 2	
Ovaviu	102
Tem 2, Wik 1–10	116–170
Tem 3	
Ovaviu	172
Tem 3, Wik 1–10	185–236
 OL APENDIKS	237
 GLOSARI	269

Introdaksen



Tija Gaed ia hem i wan gaed we i givhan long yu blong save *wanem* mo *hao* blong tijim blong mekem ol studen oli kasem ol aotkam we oli stap long Yia 2 silibas blong Laef Long Komyuniti. Hem i givim tu ol aedia blong asesmen blong mekem yu save luksave sapos tijing blong yu hem i efektif mo ol studen oli stap lan gud o no.

Gaed ia i blong givhan long yu blong mekem ol lesen plan. Yu save yusum ol aktiviti we oli stap insaed o yu save mekemap ol aktiviti blong yu folem situesen blong yu, be yu mas mekemsua se ol studen oli kasem ol Lening Aotkam. Mo tu yu save yusum Nasonal Silibas buk blong divelopem ol lesen mo aktiviti blong yu.

Strakja blong Tija Gaed

Ol Tem: Wanwan Tija Gaed i gat tri tem.

Ovaviu blong Tem: Wanwan tem i gat wan ovaviu we hem i givim wan samari blong wanem topik bae yu tijim long wanwan tem. Yu save yusum infomesen we i stap ia blong mekem plan blong program blong yu.

Ol Wik: Wanwan wik i gat 12 lesen long hem we i kavaremap ol 10 sabstran. Ol lesen ia oli gat:

Fokas blong aktiviti

Lening Aotkam

Ol risos

Vokabulari

Opotuniti blong asesmen

Rimemba, hem ia hem i wan gaed nomo. Ol aedia blong ol lesen oli sud soem olsem wanem nao wan studen i save kasem gud wan aotkam. Yu save mekemap ol lesen blong yu nomo mo ol asesmen aktiviti blong yu, blong givhan long ol studen oli kasem gud ol Lening Aotkam.

Silibas blong Laef Long Komyuniti

Long Laef Long Komyuniti silibas i gat tri stran mo 10 sab-stran. Ol stran nao oli talemaot ol bigfala tingting o wanem we yumi save kolem ol mein topik insaed long wanwan sabjek. Insaed long wanwan stran, i gat ol sab-stran o wanem we yumi save kolem ol sab-topik.

Ol sab-stran oli talem long yu wanem nao ol spesifik aspek blong lening yu nid blong tekem long planing mo tijing blong yu. Yu save luk ol stran mo ol sab-stran blong Laef Long Komyuniti long tebol ia.

Stran	Sab-Stran
Helti Laef	Helti Individuel mo Komyuniti
	Muvmen mo Gem
	Sefti
Laef Tugeta	Siviks mo Komyuniti Rilesensip A
	Siviks mo Komyuniti Rilesensip B
	Tekem plante kea long envaeromen blong yumi
	Spirituel mo Karakta Dvelopmen
Wei blong Laef	Kaljoral Heritej mo Aedentiti
	Visuel At
	Pefoming At

Long ol eria blong lan ia, i gat sam samting we i semak lelebet mekem se oli grup tugeta blong mekem wan sabjek. Yu save putum tugeta ol konsep blong lanwis mo matematik long ol stret eria taem oli stap yusum gaed ia.

Ol sab-stran oli soem ol nolej, skil mo andastanding we oli bildimap long ol defren level blong skul. Ol Lening Aotkam oli talemaot ol mein pat blong lening insaed long wanwan sab-stran long wanwan level blong skul. Oli stat long hem ia we i isi go kasem hem ia we i had. Eksampol: long Yia 1 oli isi lelebet, mo Yia 2 i moa had, mo oli go moa antap long wanwan level kasem Yia 6.

Wan tebol we i soem ol Lening Aotkam blong Laef Long Komyuniti i stap long en blong Introdaksen ia.

Yu save yusum ol Lening Aotkam blong mekemap aktiviti mo lesen plan blong yu. Buk ia i gat ol eksampol nomo blong aktiviti we oli yusum Lening Aotkam blong divelopem ol aktiviti.

Taemtebol

Folem Vanuatu Nasional Taemtebol Polisi blong ol Praemeris Skul Yia 1–6 (2013), sikis (6) aoa long wan wifik hem i blong tijim mo lanem Laef Long Komyuniti long Yia 2.

Wanwan skul i save jusum hao blong yusum sikis aoa ia; be jat we i stap long nekis peij hem i wan eksampol blong taemtebol we i soem hao blong seraotem ol sabstran blong Laef Long Komyuniti long wan wifik.

Hem i impoten blong tekem not se long Tusde long Lesen 4 i gat Helti Individuel mo Komyuniti mo Sefti. Folem lesen we i stap long buk ia bae yu tijim Helti Individuel mo Komyuniti wan wifik, afta yu tijim Sefti long nekis wifik, mo kontinu olsem. Hem i semak tu long Lesen 10 we bae yu tijim Siviks mo Komyuniti Rilesensip A o B.

Wan narafala impoten samting tu hem i blong save se bae yu tijim Pefoming At mo Visuel At tu

taem long wan wik olsem we i stap long ol lesen long buk. Mo i gat trifala lesen blong Muvmen mo Gem we bae yu tijim long wan wik. Ol narafala Sab-Stran bae i kamaot wan taem nomo long wan wik mo yu save luksave long ol lesen blong wanwan wik insaed long gaed.

Hem ia wan eksampol blong hao yu save putum ol lesen blong Laef Long Komyuniti i go insaed long program blong tijing blong yu. Afta i kam wan eksampol blong klas taemtebol long wan ful wik.

Taemtebol blong LLK (Eksampol nomo)

MANDE	TUSDE	WENESDE	TASDE	FRAEDE
Lesen 1 Spirituel mo Karakta Divelopmen 30 min	Lesen 4 (Wik 1) Helti Individuel mo Komyuniti 30 min Lesen 4 (Wik 2) Sefti 30 min	Lesen 6 Pefoming At 30 min	Lesen 9 Kaljoral Heritej mo Aedentiti 45 min	Lesen 11 Visuel At 30 min
Lesen 2 Pefoming At 30 min		Lesen 7 Visuel At 30 min		
Lesen 3 Muvmen mo Gem 20 min	Lesen 5 Lukaotem gud envaeromen blong yumi 45 min	Lesen 8 Muvmen mo Gem 20 min	Lesen 10 (Wik 1) Siviks mo Komyuniti Rilesensip B 30 min Lesen 10 (Wik 2) Siviks mo Komyuniti Rilesensip A 30 min	Lesen 12 Muvmen mo Gem 20 min

Eksampl blong Taemtebol blong wan ful wik

TAEM	MANDE	TUSDE	WENESDE	TASDE	FRAEDE
8:00am-9:05am	Lanwis mo Komyunikesen				
9:05am-9:25am	Muvmen mo Gem	Ekstra Kurikula Aktiviti	Muvmen mo Gem	Ekstra Kurikula Aktiviti	Muvmen mo Gem
9:25am-10:00am	Spirituel Karakta mo Dvelopmen	Lukaotem gud Envaeromen blong Yumi	Visuel At	Kaljoral Heritej mo Aedentiti	Visuel At
10:00am-10:15am	BREAK				
10:15am-11:20am	Lanwis mo Komyunikesen				
11:20am-12:00pm	Matematik				
12:00pm-12:30pm	LANJ				
12:30pm-1:15pm	Matematik				
1:15pm-1:45pm	Pefoming At	Saens	Saens	Saens	Ekstra Kurikula Aktiviti
1:45pm-2:15pm	Saens	Helti Individuel mo Komyuniti/ Sefti	Pefoming At	Siviks mo Komyuniti Rilesensip A/B	
2:15pm-2:30pm	KLINAP MO DIVOSEN				


Ol step blong planem wan gudfala program

Taem yu planem ol lesen, hem i impoten tumas blong yu lukluk gud long ol stran mo sub-stran blong jusum wanem blong yu tijim long wanwan lesen.

Long wanwan sab-stran i gat ol indiketa (oli stap long en blong Introdaksen ia). Ol indiketa oli eksampol blong ol samting we ol studen oli mekem blong soem se oli kasem gud, save gud mo andastanem gud ol aotkam.

Wanwan indiketa i no kavremap ful konten blong wan aotkam. Oli ol eksampol nomo mo yu save wokem sam moa indiketa we yu ting se hem i stret gud long level blong yia we yu stap tij long hem. Hemia i blong helpem yu save mesarem wan pat blong aotkam.

Jat ia i soem ol step blong folem taem yu wantem mekem wan tijing mo lening plan blong yu.



1. Wanem mi wantem ol studen blong lanem?

Lukluk long ovaviu blong i givhan long yu long wanem stret yu wantem ol studen blong yu oli lanem long tem ia. Luklukgud long ol Lening Aotkam we yumi wantem kasem mo ol indiketa blong olgeta. Ol indiketa ia nao bae oli givhan long yu blong save gud wanem nao ol studen oli mas save mo save mekem blong kasem ol aotkam.

2. Wanem mi save mekem blong ol studen oli save lan?

Stadi gud long ol aktiviti we oli raetem long wanwan wik. Yusum ol aedia ia blong givhan long ol studen oli kasem aotkam. Long level blong skul long Yia 1–3, yu sud tingbaot ol samting ia taem yu stap jusum hao nao yu save tijim ol studen.



Tijing i mas muv lelebet long pleplei insaed long klasrum i go kasem aktiviti we i moa fomal wetem strakja.



Hem i impotan tumas blong i gat lening we i aktif mo i holem ful atensen blong ol studen.



Yusum tijing we i klia gud blong tijim ol studen blong rid, raet, spel mo givhan blong leftistmap ol save blong ol vokabulari.



Yu givim ol studen plante opotuniti blong solvem ol problem, olsem yu stap askem ol simpol kwesten mo ol studen oli mas faenemaot ol ansa.



Bildimap ol skil blong wok tugeta long ol studen tru long ol pleplei, storian (diskasen) mo oli stap solvem ol problem.

Givim plante janis long ol studen blong lanem long eksperiens we oli save long olgeta, olsem tok wetem ol memba blong komyuniti blong olgeta o yusum materiel we oli yusum oltaem blong mekem lening aktiviti.

3. Olsem wanem bae mi save se ol studen oli stap lan?

Asesmen hem i wan proses we i hapen olwe nomo long taem blong tijing mo lening insaed mo aotsaed long klasrum. Hem i wan proses we i givhan long yu blong yu save faenemaot, putum tugeta mo givhan long ol narafala pipol blong save gud ol infomesen blong hamas nao studen i kasem folem ol Lening Aotkam.

Yu sud givim plante janis long ol studen long wan longfala period blong taem blong soem save blong olgeta long yu o hamas oli mekem folem ol asesmen we i stret long wan aotkam.

Stamba tingting blong ol asesmen long wan lesen hem i blong helpem lening blong ol studen. Ol kaen asesmen olsem ia yumi kolem Fomativ Asesmen o Asesmen blong Lan.

I gat infomol asesmen we i stap hapen olwe nomo long klas, mo yu save kasem fidbak kwik taem nomo. Eksapol: taem yu stap obsevem ol studen oli stap mekem wan eksesaes. Yu faenemaot wijwan studen i gat problem blong aktiviti ia. Afta yu givhan long hem stret long taem ia blong i kasem wanem we yu wantem hem i mekem. Hemia hem i Asesmen blong Lan.

Hem i impoten blong rikodem gud ol evidens we i soem se ol studen oli stap lan gud.

Yu save yusum ol infomesen ia blong givhan long yu blong mekem wan jajmen long pefomens blong wanwan studen long wan tem mo yia.

I gat ol aedia blong aeseasmen oli stap insaed long Tija Gaed ia. Yu save yusum ol aedia ia o yu save divelopem samfala blong yu blong yusum.

4. Hao nao ol studen oli bin lanem gud samting?

Yu mas yusum ol evidens we yu bin rikodem blong mekem jajmen long hamas samting nao ol studen blong yu oli bin lanem o kasem gud.

Gudfala planing bae i givhan long yu blong save stret wanem nao blong tijim mo wanem taem blong tijim. Jusum ol lening eksperiens we oli tekem tugeta ol lening nid blong ol studen long ol defdefren level.

Literasi blong Laef Long Komyuniti

Introdaksen blong niufala kurikulum i mekem strong tingting blong Vanuatu mo Ministri blong Edukesen blong leftistmap level blong rid mo raet (literasi) blong evri studen. Hem i impoten tumas se ol tija oli luk se oli mas divelopem literasi long klasrum blong olgeta.

Ol tija oli nid blong save se oli save divelopem literasi long evri pat blong kurikulum. Be evri sabjek i gat kaen fasin blong literasi we i stret long hem nomo. Tingbaot literasi blong ol defren sabjek ia taem yu stap mekem plan blong wok.

Literasi blong Laef Long Komyuniti i inkludum ol samting ia:

Hem i impoten blong soem ol ril objek o go tru long ol ril eksperiens blong gat moa save long wan topik.

Wanem hem i Inklusen o Inklusiv Edukesen?

Inklusiv Edukesen i minim se edukesen we evri boe mo gel oli lan tugeta long wan klasrum inkludum ol studen we oli gat disabiliti o spesel nid.

Inklusiv Edukesen i mekemsua se ol studen wetem disabiliti o spesel nid oli save go long skul long ol lokol eria blong olgeta mo ol tija oli mas welkamem mo inkludum olgeta long evri aktiviti blong skul, olsem ol narafala studen we oli nogat disabiliti o spesel nid.

I wan edukesen we i inkludum EVRIWAN – nomata long defrens long jenda, abiliti o disabiliti, relijen, kalja, bilif, posisen long sosaeti o bakgraon.

Studen hem i gat wan spesel nid taem hem i gat wan o sam long-tem problem long saed blong muvmuv, lukluk, harem samting, biheiv, mo fasen blong lan (rid, mekem matematik, solvem problem o andastanem tija blong hem).

Nating we oli studen oli gat ol disabiliti ia, oli save lan yet. Yumi mas wok wetem olgeta mo ol perens/ke/a teka/gadien blong faenem stret fasen we oli save lan long hem. Hem i impoten blong oltaem fokas long wanem studen i save mekem be i no long wanem we hem i no save mekem.

Yumi ol tija i mas tingbaot Inklusiv Edukesen o ol studen wetem ol spesel nid long ol skul or klasrum blong yumi. Insaed long ***Yia 1 Tija Gaed blong Lanwis mo Komyunikesen*** i gat moa toktok long Inklusiv Edukesen long saed blong ol polisi, ol defren kaen spesel nid, mo sam strateji we yu save yusum insaed long klasrum mo ol skul blong yumi blong mekemsua se evri studen i save tekpat long ol aktiviti mo lan tugeta.

Yumi evriwan i mas wok tugeta blong mekemsua se ol studen we oli gat spesel nid oli filim sef mo glad blong lan gud insaed long wanwan skul blong yumi long Vanuatu from olgeta oli save kam ol gudfala risosful pipol long ol komyuniti, sosaeti mo kaontri blong yumi.

Ol Lening Aotkam mo Indiketa



STRAN: HELTI LAEF

Helti individuel mo komyuniti					
Sab-stran	Yia	Bigining Yia 1	Yia 1	Yia 2	Yia 3
Lening Aotkam	HLH.B1.V1 Folem ol simpol rul blong haejin mo eksplorem hao blong stap helti mo sef	HLH.1.V1 Demonstretem ol helti praktis blong haejin, nutrisen mo kea long yu wan	HLH.2.V1 Demonstretem save blong helti praktis blong laef	HLH.3.V1 Dimonstretem ol simpol save mo skil long blokem sik mo enkarajem ol helti praktis blong laef	
OI Indiketa	Studen i soem se i kasem aotkam taem hem i wokem olgeta samting olsem:	<ul style="list-style-type: none"> ■ Folem ol simpol rul blong haejin ■ Luksave mo givim nem blong ol defren lokol frut mo vejtebol ■ Givim nem blong ol pat blong bodi ■ Aedentifaem taem man i hapi, no hapi, fraet mo sraaes ■ Soemaot klia filing blong hem ■ Stat blong kontrolem filing blong hem ■ Luksave filing blong hem wan mo rispektum narafala pipol ■ Soemaot selfkonfidens tru long plei mo interak wetem ol narawan 	<ul style="list-style-type: none"> ■ Folem ol simpol rul blong kolektiv haejin ■ Aedentifaem ol defren kategori blong ol kakae ■ Faenemaot ol haejin praktis blong ol defren bodi pat blong ol aotsaad pat blong bodi blong olgeta ■ Luksave mo givim nem blong olgeta ■ Diskraebem filing mo emosen blong olgeta wan hem ■ Kontrolem emosen blong olgeta long plante situesen ■ Luksave ol saen blong ol komon sik mo save hao blong privitem olgeta ■ Aedentifaem ol komon sik mo diskasem olesem wanem blong blokem ol sik ia ■ Save simpol haejin blong mekem kakae mo kakae 	<ul style="list-style-type: none"> ■ Aedentifaem mo diskasem ol rul blong haejin ■ Folem ol rul blong presonal haejin ■ Aedentifaem mo tokbaot ol risen from wanem nao yumi kakae long ol tri defren kaen kakae ■ Luksave ol defren stej blong gro blong wan human ■ Luksave mo rispektum emosen blong ol narafala pipol ■ Luksave ol saen blong ol komon sik mo taem wan i kasem kil ■ Diskasem hao blong helpem wan man o woman taem hem i isik o kasem aksiden 	

STRAN: HELTI LAEF

Muvmen mo Gem						
Sab-stran	Yia	Bigining Yia 1	Yia 1	Yia 2	Yia 3	
Lening Aotkam	HLM.B1.V1	Yusum bodi blong olgeta blong muv long ol defren wei	HLM.1.V1 Jenism smol ol muvmen blong olgeta folem ol defren envaeromen mo situesen	HLM.2.V1 Demonstretem kodinesen mo balens taem oli patisipet long ol defren aktiviti	HLM.3.V1 Impruvum fisikel abiliti blong olgeta taem oli tekpat long ol defren gem mo muvmen	
Ol Indiketa	Studen i soem se i kasem aotkam taem hem i wokem olgeta samting olsem:					
		<ul style="list-style-type: none"> ■ Muvum ol defren pat blong bodi blong olgeta long ol defren wei ■ Muvum bodi blong olgeta blong mekem wan samting ■ Folem instraksen long taem blong ol muvmen aktiviti ■ Balensem mo muvum bodi long ol defren wei ■ Tekpat long han mo ae kodinesen aktiviti 	<ul style="list-style-type: none"> ■ Jenism smol muvmen blong stret long envaeromen o situesen ■ Muv folem oda ■ Luksave ples blong pleplei mo ples we i stop long hem ■ Luksave mo andastanem lanwis blong daereksen mo posisen ■ Muv sef long wan ples i go long narafala ples 	<ul style="list-style-type: none"> ■ Koperet long gem wetem ol narafala ■ Folem ol rul blong ol simpol gem ■ Rispektrem rul blong gem mo ol narafala pilkinini ■ Tekpat long ol fisikel aktiviti ■ Praktism muvmen long ol defren wei ■ Demonstretem developmen blong kodinesen blong han mo ae ■ Pefomem wan aksen we oli save mesarem (resis, kwik, jam hae) 	<ul style="list-style-type: none"> ■ Muv fri long ol defren wei ■ Muvum sef ol ting ■ Yusum ol anwisi/toktok blong fisikel edukesen olsem gol mo refri ■ Luksave ol visuel simbol blong fisikel aktiviti olsem ovol bol, racket ■ Soemaot konfidens blong hemwan long samfala gem ■ Tekem step blong divelopem abiliti blong olgeta wan long sam gem ■ Soemaot kodinesen blong han mo ae long ol taem blong aktiviti 	<ul style="list-style-type: none"> ■ Kompit yu wan o wetem ol narafala ■ Jenism smol muvmen blong olgeta long ol defren envaeromen

STRAN: LAEF TUGETA

Siviks mo Komyuniti Rilesensip (A)					
Sab-stran	Yia	Bigining Yia 1	Yia 1	Yia 2	Yia 3
Lening Aotkam	LTR.B1.V1.A Luksave mo tokbaot ol rol blong olgeta long famle	LTR.1.V1.A Aedentifaem ol rol mo responsibili we oli gat long famle mo komyuniti blong olgeta	LTR.2.V1.A Karemaot gud ol duti blong olgeta long klasrum	LTR.3.V1.A Soem ol sosol responsibol bihevia wetem ol fren	
Ol Indiketa	<p>Studen i soem se i kasem aotkam taem hem i wokem olgeta samting olsem:</p> <ul style="list-style-type: none"> ■ Folem mo tokbaot ol rutin blong evriddei insaed long kitjin mo long haos ■ Aedentifaem hao oli save help long hom ■ Aedentifaem sam rol mo responsibili blong ol peren blong olgeta ■ Tokbaot ol rol blong ol pikinini long famle laef blong olgeta ■ Developem frensip mo mekem rilesensip wetem ol narafala pikinini ■ Aedentifaem hao blong solvem ol problem taem oli pleplei wetem ol narafala pikinini ■ Oli stap sea mo tekem ten 				

STRAN: LAEF TUGETA

Siviks mo Komyuniti Rilesensip (B)					
Sab-stran	Yia	Bigining Yia 1	Yia 1	Yia 2	Yia 3
Lening Aotkam	LTR.B1.V1.B	Luksave ol street famle blong olgeta mo wea ples oli kam long hem ta mo wea ples oli kam long hem	LTR.1.V1.B Aedentifaem rilesensip blong olgeta wetem ol memba blong famle blong olgeta	LTR.2.V1.B Diskraebem olsem wanem sam memba blong komyuniti i givhan long skul mo komyuniti laef	LTR.3.V1.B Soemaot ol skil mo attitud we oli meken oli kam ol responsibol memba blong komyuniti laef
Ol Indiketa		Studen i soem se i kasem aotkam taem hem i wokem olgeta samting olsem:			
		<ul style="list-style-type: none"> ■ Soem se oli kea long ol brata mo sista blong olgeta ■ Dimonstretem lav mo yuniti taem oli mekem ol ting tugeta wetem ol famle blong olgeta ■ Tokbaot hao blong givhan long ol nrafala pipol ■ Soem rispek long ol nrafala pipol, propeti mo ples ■ Soemaot ol famle laen taem oli talem ol kastom storian ■ Aedentifaem wanem i defren long niuklia mo ekstended famle ■ Soem se oli wantem helpem ol nrafala pipol ■ Obseverem mo givim opinion blong olgeta abaot ol ting mo wanem i tap hapen 	<ul style="list-style-type: none"> ■ Luksave stetas blong ol memba blong famle folem posisen blong famle strakja mo adresem olgeta long wan stret wei ■ Aedentifaem selebresen we oli save gud long hem mo ol mein laef invent ■ Luksave ol wei blong developem rilesensip wetem ol nrafala pipol ■ Soemaot rispekk long ol nrafala pipol ■ Eksplorem ol wei blong welkamem mo talem tata long ol pipol ■ Yusum rul blong gudfala wei blong toktok long nrafala pipol mo tu yusum rul blong bihev gud insaed long klasrum 	<ul style="list-style-type: none"> ■ Tokbaot ol memba blong komyuniti ■ Aedentifaem ol komyuniti memba olsem ol jif, pasta, tija, polis, mo luksave ol rol mo responsibiliti blong olgeta ■ Mekem niufala rilesensip wetem ol fren mo ■ Dimonstretem ol helti rilesensip wetem ol famle mo komyuniti ■ Eksplorem ol wei blong welkamem mo talem tata long ol pipol ■ Tokbaot ol wei blong stap gud tugeta wetem famle memba mo ol narawan insaed long komyuniti ■ Tokbaot mo tekpat long famle mo long ol komyuniti aktiviti ■ Diskraebem ol rilesensip we i tap bitwin famle, skul mo komyuniti 	

STRAN: LAEF TUGETA

Tekem plante kea long envaeromen blong yumi					
Sab-stran	Yia	Bigining Yia 1	Yia 1	Yia 2	Yia 3
Lening Aotkam	LTC.B1.V1 Tokbaot wanem nao i mekemap lokol envaeromen blong olgeta	LTC.1.V1 Tekem aksen blong lukaotem lokol envaeromen we oli stap long hem	LTC.2.V1 Lukaotem gud mo developem lokol envaeromen we oli liv long hem	LTC.3.V1 Developem ol skil blong sapotem mo lukaotem gud lokol envaeromen we oli liv long hem	
Ol Indiketa	Studen i soem se i kasem aotkam taem hem i wokem olgeta samting olsem:	<ul style="list-style-type: none"> ■ Luksave wan envaeromen we i klin mo wan envaeromen we i nid blong klinikim ■ Aedentifaem ol najoral fija blong envaeromen olsem ol tri, reva mo solwota ■ Eksplorem ol ples we ol anamol oli stap long hem olsem ol buluk, pig, dog, puskat, pijin, ol anamol blong solwota mo ol insek 	<ul style="list-style-type: none"> ■ Mekem lokol envaeromen blong olgeta i klin mo sef moa bitim bifo ■ Tokbaot se wan sef mo helti envaeromen i luk olsem wanem ■ Luksave ol hogud impak/ samting blong ol objek we i denjaras olsem ol plastik bag mo tin ■ Impruvum lokol envaeromen olsem talem long ol narafala pipol wanem nao i nid blong jenis 	<ul style="list-style-type: none"> ■ Soemtaot ol gudlfala fasin blong lukaotem ol anamol, insek mo plant ■ Soem wan attitud we i stret gud long ol marin risos ■ Talem sam solusen long wan lokol envaeromen problem ■ Save wanem hem i defren long ol doti we oli atifisel mo ol doti we oli organik weist ■ Aedentifaem ol risal blong yusum ol samting we i save spolem envaeromen 	

STRAN: LAEF TUGETA

Spirituel mo Karakta Developmen					
Sab-stran	Yia	Bigining Yia 1	Yia 1	Yia 2	Yia 3
Lening Aotkam	LTS.B1.V1	Eksplorem ol valiu mo bilif blong komyuniti we oli liv long hem	LTS.1.V1 Luksave sam komon relijes mo kastom bilif mo valiu long ol komyuniti blong olgeta	LTS.2.V1 Aedentifaem mo diskasem impoten kajoral mo relijes ivent long komyuniti blong olgeta	LTS.3.V1 Tokbaot olsem wanem ol valiu mo ol bilif oli gaedem ol pipol long wei we oli liv
Oi Indiketa		Studen i soem se i kasem aotkam taem hem i wokem olgeta samting olsem:			
		<ul style="list-style-type: none"> ■ Tekem pat long selebresen blong ol spesel ivent long relijen blong olgeta ■ Tokbaot ol defren relijes stori joenem blong prea from kakae mo singsing ol song ■ Tokbaot hao oli stap selebretem ol relijes ivent we oli spesel long olgeta ■ Soem se oli obej mo folem ol rul mo wanem we ol big man mo woman i taalem ■ Soem lav mo yuniti mo mekem ol ting tugeta ■ Soem se oli hones mo talemaot taem oli mekem wan samting ■ Soem se oli rispektet kastom long komyuniti 	<ul style="list-style-type: none"> ■ Tekpat long divosen, singsing mo prea long kakae ■ Rispektet bilif blong ol narafala dinomenesen mo relijen ■ Soemaot ol gudfala fasin Save sam relijes storian ■ Elsplenem sam long ol valiu ■ Soem lav blong narafala pipol mo long semtaem akseptem lav blong ol narafala pipol ■ Soem se oli rispektet ol narafala relijes bilif ■ Soem rispek long ol narafala pipol. 	<ul style="list-style-type: none"> ■ Aedentifaem ol relijes selebresen we i strap tekem ple evri dei, evri wik, evri yia mo wanwan taem mo diskasem from wanem oli impoten ■ Soem rispek blong bilif blong olgeta no blong ol narafala pipol ■ Luksave ol defren lanwisi mo kalja we oli konek long hem ■ Diskavarem kajoral envaeromen blong olgeta ■ Dvelopem wan responsibol attitud ■ Givim ol kastom nem taem ol bebe i bon ■ Luksave mo tokbaot sam fija ■ Serem wanem we oli gat wetem ol narafala pipol ■ Soem se oli obej/rispektet tija mo ol narafala pipol ■ Luksave mo rispektet bilif mo tradisional spirituel praktis blong olgeta mo blong ol narafala pipol 	

STRAN: WEI BLONG LAEF

Kaljoral heritej mo aedentiti					
Sab-stran	Yia	Bigining Yia 1	Yia 1	Yia 2	Yia 3
Lening Aotkam	WLC.B1.V1 Tingbaot ol kastom aktiviti we i komon long famle blong olgeta	WLC.1.V1 Aedentifaem mo soemaot save mo skil blong olkastom aktiviti long komyuniti blong olgeta	WLC.2.V1 Aplaem stret skil long sam kaljoral aktiviti long komyuniti	WLC.3.V1 Soem se i gat andastaning mo skil long plante kaljoral aktiviti mo eksplorem blong ol nrafala vilij o aelan	
Ol Indiketa	Studen i soem se i kasem aotkam taem hem i wokem olgeta samting olsem:	<ul style="list-style-type: none"> ■ Produsum saon yusum ol tradisional instramen mo muv folem saon ia ■ Lisen long ol kastom storian ■ Listim mo aktemaot ol tradisional storian ■ Talem ol tradisional storian ■ Givim nem blong sam tradisional kakae ■ Patisipet blong prierem ol lokol kakae ■ Tekpat long ol kaljoral seremoni ■ Luksave no diskasem ol defren seremoni long komyuniti blong olgeta ■ Soemaot rispek long ol nrafala pipol mo kaja blong olgeta 	<ul style="list-style-type: none"> ■ Aedentifaem wanem oli mekem afta we oli girap long morning, bifo oli go long skul, afta skul mo bifo oli go slip ■ Diskraebem sam aktiviti long komyuniti long Sande/Satede ■ Eksplorem ol kakae we oli kakae evri dei mo hem ia we oli kakae long ol lafet ■ Diskraebem hao blong sevem o wellkam wan strenja long famle blong olgeta ■ Aedentifaem wanem oli mekem bifo mo afta we oli kakae 	<ul style="list-style-type: none"> ■ Koperet mo avoidem raorao wetem ol pipol ■ Mekem wan aksen projek ■ Pefomem ol aksen long wan kaljoral ivent ■ Oli save long ol defren stej blong ol kaljoral developmen ■ Soemaot ol emosen tru long ol signal mo muvmen ■ Aedentifaem ol aktiviti we oli mekem long taem we bebe i bon, long taem blong maret mo long taem blong wan ded ■ Valiu mo yusum ol kaljoral aktiviti blong ol nrafala kaontri long rijen ■ Diskasem ol risen from wanem sam aktiviti i no alao long publik 	

STRAN: WEI BLONG LAEF

Sab-stran		Visuel At			
Yia	Bigining Yia 1	Yia 1	Yia 2	Yia 3	
Lening Aotkam	WLV.B1.V1 Yusum ol sens blong olgeta blong faenemaot ol vaereti blong ol at materiel mo ol proses	WLV.1.V1 Mekyus long ol najoral abiliti blong krieten wan samting mo save gud ol simpol teknik mo proses	WLV.2.V1 Yusum save mo skill blong talemaot ol aedia mo filing tru long at	WLV.3.V1 Soem ol skil, teknik mo imajinesen long ol at wok mo apisietem wok blong olgeta	
Ol Indiketa	Studen i soem se i kasem aotkam taem hem i wokem olgeta samting olsem:	<ul style="list-style-type: none"> ■ Akseptem ol materiel we oli gat mo olsem wanem blong yusum olgeta ■ Rispektet wok blong ol narafala pipol ■ Wok long tim ■ Yusum tul folem stret instraksen long at mo long deffren teknik blong pent ■ Yusum wan tul blong pent, tru long ol deffren aktiviti Mekem ol babol 	<ul style="list-style-type: none"> ■ Elksplorem najoral abiliti blong olgeta blong mekem at long pepa ■ Akseptem se ol tul oli no inaf mo olsem wanem blong yusum ■ Yusum droing olsem wan wei blong ekspresem wan samting Eksasaesem joes from ol proses mo materiel ■ Luksave ol propeti we oli stret long ol materiel blongmekem modeling ■ Luksave mo aedentifaem sam simpol ikaljoral fija long wok blong at 	<ul style="list-style-type: none"> ■ Soem abiliti mo imajinesen blong olgeta blong krieten wan samting yusum ■ Observev at long envaeromen blong olgeta ■ Yusum droing blong ol defren samting ■ Eksperemen wetem ol materiel, tul, lukluk mo glad long prodak blong olgeta ■ Yusum evri samting o pat we oli faenem blong krieten wan riufala wok blong at ■ Jusum ol tul mo materiel we i stret long wan situesen ■ Yusum rul blong tam blong operetem ol simpol tul 	<ul style="list-style-type: none"> ■ Yusum droing blong olgeta long plante samting yusum plante defren teknik ■ Krieten wan wok blong at long tu o tri daemens, wanwan o long grup, folem stret instraksen ■ Yusum, Yusum mo putum tugeta ol materiel mo tul ■ Yusum teknik blong ol narafala visuel at blong krieten wan wok blong at ■ Yusum ol lokol materiel blong mekem ol musik instrumen blong go wetem ol defren danis ■ Diskraebem mo komperem ol pija yusum stret vokabulari ■ Adaptet at blong olgeta folem materiel we oli ga

STRAN: WEI BLONG LAEF

Sab-stran		Pefoming At			
Yia	Bigining Yia 1	Yia 1	Yia 2	Yia 3	
Lening Aotkam	WLP.B1.V1 Tekpat mo soemaot glad hat long danis, drama mo miusik	WLP.1.V1 Soemaot ol skil we i kriativiti mo skil long danis, drama mo miusik	WLP.2.V1 Krietem mo pefomem ol aksen blong ekspresem olgeta tru long danis, drama mo miusik	WLP.3.V1 Developem skil blong aprisitem mo patisipet long danis, drama mo miusik wetem joi	
Ol Indiketa	Studen i soem se i kasem aotkam taem hem i wokem olgeta samting olsem:				
	<ul style="list-style-type: none"> ■ Pefomem ol simpol step wetem namba paten taem oli askem ■ Muv folem saon blong miusik ■ Aedentifaem strakja blong muvmen folem defren bit o ritem ■ Aedentifaem, developem mo riprodulsum of defren bit ■ Akseptem narafala olsem wan patna ■ Memoraesem wan raem, singsing mo fingga plei ■ Singsing olgeta wan o wetem ol narafala pipol ■ Lesen long ol narafala pipol ■ Aedentifaem mo riprodulsum wan simpol bit 	<ul style="list-style-type: none"> ■ Lisen long ol defren singsing blong Vanuatu mo blong ol narafala ples ■ Aedentifaem ol danis mo song blong kaontri blong olgeta mo blong ol narafala kaontri ■ Tekpat long rolplei ■ Muv folem ol strett instraksen ■ Lisen long ol defren kaen blong miusik mo ol defren song ■ Memoraesem ol simpol poem ■ Toltok long wan daealog ■ Mekemap wan rolplei blong ol aspek blong evridei laef 	<ul style="list-style-type: none"> ■ Ekspresem olgeta wan tru long singsing, poem mo raem ■ Ekspresem olgeta folem wan simpol bit o miusik, wetem o i no wetem ol instramen blong miusik ■ Mekemap wan aksen o muvmen blong wan bit o aksen long wan singsing ■ Gat ol gudfala attitud long lesen olsem koperet, sapot, akseptem mo rispek taem oli akt tugeta ■ Lisen long ol defren kaen blong miusik mo ol defren song ■ Pefomem wan aksen we i stret long rol blong wan plei o danis ■ Aedentifaem wan sirkwens long wan plei singing o danis blong perfomem 	<ul style="list-style-type: none"> ■ Lesen long tradisonal, miusik blong jos mo ol narafala miusik ■ Plei lokol instramen blong pefom long lokol miusik mo blong miusik blong ol narafala kaontri ■ Atendem mo tekpat long ol aktiviti ■ Tekpat long ol miusik ol invent ■ Developem kaljoral skil blong olgeta long miusik ■ Dimonstretem kontrol ova long voes blong olgeta mo posta blong olgeta taem oli singing ■ Pleplei rol blong olgeta long wan grup wok ■ Memoraesem ol raem mo song we oli lanem long klas 	

Tem 1



SAB-STRAN	SPIRITUEL MO KARAKTA DIVELOPMEN	PEFOMING AT	MUVMEN MO GEM	HELTI INDIVIDUEL MO KOMYUNITI	SEFTI
L	Lesen 1 30min	Lesen 2, 6 30 min	Lesen 3, 8, 12 20 min	Lesen 4 (W1) 30 min	Lesen 4 (W2) 30 min
Wik 1	Wan ples blong helpem laef blong yu	From wanem yu lisem long ol defren miusik?	Jusum ol aktiviti blong Muvmen mo Gem	Ol wei blong stap klin	Wik 1
		Hao yumi save mekem miusik!			
Wik 2	Relijes kalenda	Hoki Poki	Jusum ol aktiviti blong Muvmen mo Gem	Wik 2	Taem yu obei yu stap lukaotem yu
		Ol instramen blong plei miusik			
Wik 3	Wan relijes ivent – Ista	Mekem instramen	Jusum ol aktiviti blong Muvmen mo Gem	Hao blong wasem han	Wik 1
		Piknik Ku			
Wik 4	Taem blong digimaot yam	Malampa Eksasaes	Jusum ol aktiviti blong Muvmen mo Gem	Wik 2	Rul blong stap sef long klasrum
		Malampa Eksasaes wetem ol aksen			
Wik 5	Ol bubu oli storian	Yumi Yumi	Jusum ol aktiviti blong Muvmen mo Gem	Kea long ol aotsaed pat blong bodi	Wik 1
		Hanggri Namarae			
Wik 6	Ista Mande	Hed, Solda, Ni mo Tow	Jusum ol aktiviti blong Muvmen mo Gem	Wik 2	Save denja blong sam gem
		Mekem tin dram			
Wik 7	Palolo wom	Ol Sens	Jusum ol aktiviti blong Muvmen mo Gem	Hao blong klinim yu	Wik 1
		Hemia Wei blong Wasem Klos			
Wik 8	Ol tabu	Teouma Brij i stap Foldaon	Jusum ol aktiviti blong Muvmen mo Gem	Wik 2	Tekem responsibiliti long aksen blong yu
		Insi Winsi Spaeda			
Wik 9	Tekem not long ol mesej	Yumi Kam Tugeta Moa	Jusum ol aktiviti blong Muvmen mo Gem	Ol insaed pat blong bodi	Wik 1
		O Josefina			
Wik 10	Asensen Dei	Lanem ol song long lanwis blong olgeta	Jusum ol aktiviti blong Muvmen mo Gem	Wik 2	Save risal blong aksen blong olgeta



LUKAOTEM GUD ENVAEROMEN BLONG YUMI	VISUEL AT	KALJORAL HERITEJ MO AEDENTITI	SIVIKS MO KOMYUNITI RILESENSIP A	SIVIKS MO KOMYUNITI RILESENSIP B
Lesen 5 45 min	Lesen 7, 11 30 min	Lesen 9 30 min	Lesen 10 (W1) 30 min	Lesen 10 (W2) 30 min
Klasrum envaeromen	Jusum ol aktiviti blong Visuel At	Ges spika – kastom storian	Wanem hem i komyuniti	Wik 1
Ol wok long haos	Jusum ol aktiviti blong Visuel At	Hu i putum nem long yu	Wik 2	Wanem yumi serem long klasrum
I save roten o no	Jusum ol aktiviti blong Visuel At	Fas Praem Minista blong Vanuatu	Wan impoten pesen long laef blong mi	Wik 1
Wanem bae yumi mekem wetem ol doti ia?	Jusum ol aktiviti blong Visuel At	Wanem yu save luk long ol mani?	Wik 2	Ol wok long klas
Bonem plastic mo raba	Jusum ol aktiviti blong Visuel At	Laetem faea	Ol defren grup blong ol pipol long komyuniti	Wik 1
No sakem doti long ol wota sos	Jusum ol aktiviti blong Visuel At	Mekem lokol kakae: Tanna sup	Wik 2	Ol wok blong klas Pat 2
Lukaotem gud ol samting long bus	Jusum ol aktiviti blong Visuel At	Wanem i happen long wan mared	Hao oli tekpat i kam long laef blong skul	Wik 1
Mekem wan gareri blong flawa	Jusum ol aktiviti blong Visuel At	Mekem ol trap blong kasem faol o pijin	Wik 2	Ol wok blong klas Pat 2 i kontinu
Planem ol flawa blong putum insaed long klasrum	Jusum ol aktiviti blong Visuel At	Ol lokol meresin	Ol yang pipol oli kontribut i kam long skul	Wik 1
Klinim ol defren envaeromen long skul	Jusum ol aktiviti blong Visuel At	Planem kon	Wik 2	Ol wok blong klasrum: Ridim ol ripot mo tokbaot

OI Lening Aotkam blong Yia 2

Stran	Sab-Stran	Lening Aotkam	
Helti Laef	Helti individuel mo komyuniti	HLH.2.V1	Dimonstretem save blong helti praktis blong laef
	Muvmen mo Gem	HLM.2.V1	Dimonstretem kodinesen mo balens tru long patisipesen long ol defren aktiviti
	Sefti	HLS.2.V1	Aedentifaem mo diskraebem ol wei blong mekemsua se olgeta mo ol narafala wan i sef
Laef tugeta	Siviks mo Komyuniti Rilesen-sip (A)	LTR.2.V1.A	Karemaot gud ol responsibiliti blong olgeta long bihaf blong klas
	Siviks mo Komyuniti Rilesen-sip (B)	LTR.2.V1.B	Diskraebem hao sam memba blong komyuniti i kontribut long skul mo komyuniti laef
	Tekem plante kea long en-vaeromen blong yumi	LTC.2.V1	Protektem mo divelopem lokol en-vaeromen we oli liv long hem
	Spirituel mo Karakta Dvelop-men	LTS.2.V1	Aedentifaem mo diskasem impoten kaljorol mo relijes ivent long komyuniti blong olgeta
Wei blong laef	Kaljorol heritej mo aedentiti	WLC.2.V1	Aplae strel skil long sam kaljorol aktiviti long komyuniti
	Visuel At	WLV.2.V1	Yusum save mo skil blong talemaot ol aedia mo filing tru long at
	Pefoming At	WLP.2.V1	Krietem mo pefomem ol aksen blong ekspresem olgeta tru long danis, drama mo miusik

Tem 1 Ol Aktiviti blong Muvmen mo Gem

Muvmen mo Gem i stap long Lesen 3, Lesen 8 mo Lesen 12 evri wik. Jusum wan long ol lesen long wanwan tem ia blong mekem wetem ol studen. Mekemsua se yu kavremap evri skil ia blong lokomoto, objek kontrol mo stabiliti mo balens.

Hem i impoten tumas blong no fogetem blong mekem ol studen oli mas womap mo womdaon bifo mo afta long ol gem.

Aktiviti blong Womap (bifo long wan gem)

Yusum ol eksasaes we bae i mekem ol studen oli stap muvmuv be semtaem oli stap womem ol masel blong bodi blong olgeta stat long hed kasem tow blong olgeta.

Ol womap aktiviti i sud tekem klosap long 5 minit.

Aktiviti blong Womdaon (afta long wan gem)

Yusum ol eksasaes we oli mekem ol masel oli rilaks. Yu no muvmuv taem yu stap mekem strejing. Sidaon long graon blong mekem strejing hem i givhan moa.

Ol womdaon aktiviti i sud tekem klosap long 5 minit blong mekem ol masel oli kuldaon mo gobak nomol bakegen afta long wan gem.

Luk long **Apendiks 1:** Kad blong Womap mo Womdaon.

Not blong tija: Hem i importen tumas blong tingbaot ol studen we oli gat ol spesel nid o yusum wiljea o stik blong wokbaot, espeseli long ol aktiviti blong mekem aotsaed. Sapos yu gat sam studen we oli no save muv fri aotsaed, tingbaot wan narafala aktiviti blong mekem.

Aktiviti 1: Objek Kontrol

Ol Risos: Balong, wud, ol smol ston

Putum wan taget o wan mak olsem wan balong o wud long wan ples longwe lelebet long ol studen.

Ol studen oli tekem wan objek mo stonem taget o wan mak ia we i stap blong traem kasem.

Aktiviti 2: Objek Kontrol

Ol Risos: Wan balong we i no strong tumas mo i no save spolem ol samting insaed long klasrum
Ol studen oli stanap long saed blong desk blong olgeta. Wan studen i sakem balong i go long narafala wan. Sapos studen i sakem balong i no kasem gud narafala studen, hem i aot long gem mo go sidaon.

Sapos balong i go stret long wan studen be hem i no kasem balong ia, studen we i no kasem balong ia i mas aot long gem. Sapos wan studen i sakem balong i go long wan studen we hem i sakem balong long hem finis, hem tu bae i aot long gem. Ol studen oli no mas holem balong long taem, oli holem blong faev seken nomo mo sakem. Studen we i holem balong bitim faev seken i aot long gem tu. Givim wan taem blong faev minit blong plei mo olgeta we oli no aot

long gem oli win. Plei tu raon mo wina hemi olgeta we oli win tu taem.

Aktiviti 3: Stabiliti o Balens

Ol Risos: Wisel

Ol studen oli stanap long sekel. Tajem ol fo defren pat blong hed blong yu olsem hea, sorae, nus mo fored mo mekem wan defren aksen blong ol defren pat ia. Ol studen oli lukluk yu mekem afta oli mekem ol stret aksen taem yu tajem ol defren pat blong bodi ia.

Olgeta we oli mestem aksen oli aot long gem.

Eksampol: Taem yu tajem hed blong yu i minim ol studen oli jamjam i go raon long sekol. Taem yu tajem sorae i minim se ol studen oli leftemap han i go antap mo wokbaot long tow blong olgeta i go raon long sekol. Bloem wisel mo tajem wan pat blong hed blong yu. Taem ol studen oli harem wisel oli mas mekem stret aksen.

Aktiviti 4: Lokomoto

Ol Risos: Wan objek blong kilim olsem wan tin o blong blo olsem wan wisel

Kilim wan objek o blo long wisel mo ol studen oli wokbaot o resis raon long wan open spes. Taem yu stop blong kilim objek ia bae oli stanap kwaet long eni posisen we oli stop long hem. Yusum tu defren signal blong wokbaot mo resis. Eksampol: kilim tin slo o blo wisel longtaem i minim se wokbaot. Kilim tin strong o blo wisel sot nomo i minim se resis.

Aktiviti 5: Objek Kontrol

Ol Risos: Balong we i no strong tumas

Ol studen oli stanap wan meta longwe long wan stret laen. Oli stanap wan bihaen long narafala wan. Studen long fored i tekem wan balong mo pasem i go bihaen long studen we i stap bihaen. Studen long fored i no mas lukluk studen bihaen long hem. Taem studen bihaen i kasem balong hem i pasem i go long studen bihaen long hem mo gem i kontinu kasem lasfala studen.

Lasfala studen i ron wetem balong i go long fored mo pasem balong bageken kasem studen we i stap long fored i mas kambak long fored bageken.

Aktiviti 6: Stabiliti o Balens

Ol Risos: Ol studen

Stanap long wan sekel. Tugeta, mekem ol defren muvmen wetem han o leg blong yufala. Afta, ol studen oli kopi wanem we yu mekem. Askem wan studen i kam antap mo tekem ples blong yu blong mekem ol defren muvmen mo ol narafala studen oli mekem semak.

Stat slo afta go lelebet hariap kasem we i hariap. Faenemaot wijwan studen oli gat gud balens o stabiliti.

Aktiviti 7: Stabiliti o Balens

Ol Risos: Flaskad we yu mekem long katon

Raetem ol aksen wod long ol kad. Ol studen oli pikimap wan kad mo mekem aksen we i stap

long kad.

Aktiviti 8: Objek Kontrol

OI Risos: Baket, objek we i raon

Putum wan baket wan meta longwe long ol studen. Ol studen oli sakem eni objek we i raon i go insaed long baket ia.

Taem studen i sakem objek insaed long baket, muvum baket i go longwe lelebet. Oli save yusum tugeta han, afta oli yusum raet han nomo o yusum lef han nomo.

Aktiviti 9: Stabiliti o Balens

OI Risos: Flaskad we ol nem blong anamol oli stap long olgeta

Ol studen oli stanap long wan klia spes. Talem nem blong wan anamol olsem puskat, snek, buluk o ol narafala anamol.

Ol studen oli mas muv olsem anamol ia mo mekem noes olsem anamol ia.

Sapos wan studen i mestem aksen mo saon blong anamol ia, hem i aot long gem.

Givim janis long ol studen blong jusum ol defren anamol.

Aktiviti 10: Lokomoto

OI Risos: Katon o pepa

Raetem ol defren aksen toktok mo pestem long kona blong klasrum, olsem ron long semak ples, jamjam mo klapem han o wokbaot long fo leg. Serem ol studen long grup folem namba blong ol toktok we i stap long kona blong klasrum. Kilim wan objek mo talem long wanwan grup i go long ol defren kona blong rum. Grup we i kasem wan kona bae i mekem aksen we i stap long kona ia.

Mekem wan signal, ol studen oli mekem ol aksen long taem we yu givim long olgeta. Mekem signal bageken blong oli stop. Nambatri signal i blong oli muv i go long narafala kona.

Aktiviti 11: Objek Kontrol

OI Risos: Balong

Ol studen oli stanap wan meta longwe long olgeta long wan stret laen. Bae oli stanap wan bihaen long narafala wan. Studen we i stanap laswan i tekem balong mo pasem i go long studen we i stanap long fored blong hem. Studen long fored i no mas lukluk i go bihaen. Taem hem i luk balong i kam long fored hem i kasem. Afta hem i sakem balong i go long studen we i stanap long fored blong hem.

Gem i kontinu kasem fasfala studen long stat blong laen.

Letem ol studen oli save se bae i had blong no lukluk i go bihaen be oli mas traem blong kasem gud balong taem i kam long fored mo taem oli sakem balong i mas traem go stret long studen we i stanap long fored.

Aktiviti 12: Lokomoto

OI Risos: Jok o rop

Makemaot wan spes we i gat longfala blong 8 meta. Putum ol studen long grup blong fo o faev. Oli resis long grup blong olgeta kasem en blong laen mo kambak.

Aktiviti 13: Lokomoto

Ol Risos: Pepa, ten jea, maka

Raetem namba wan kasem namba ten long pepa mo putum bihaen long ol jea. Putum ol jea ia raon long wan sekel. Jusum wan lida blong stanap long medel blong ol jea ia. Lida i mas traem blong faenem wan emti jea blong sidaon. Ol narafala studen oli sidaon long jea blong olgeta mo oli mas save gud namba blong jea blong olgeta. Lida bae i askem long wan studen long jea se, "Yu laekem manggo o fis?"

Sapos ansa hem i manggo ol studen oli stanap mo jenisim ples blong sidaon. Be sapos ansa hem i fis, lida i askem se hamas fis. Studen we i givim ansa i givim namba blong fis folem namba blong jea nomo. Sapos hem i se tu fis, bae studen we i sidaon long jea tu bae i jenisim jea wetem tu studen we i sidaon long raetsaed blong hem. Lida i mas traem blong sidaon long wan long trifala jea ia.

Aktiviti 14: Objek Kontrol

Ol Risos: Rop, balong we i no strong tumas

Tufala student i holem wan rop we i no hae tumas long ol studen.

Tekem wan balong we i no strong blong ol studen oli sakem ova long rop ia. Wan grup i stanap long wan saed blong rop mo narafala grup i stanap long narafala saed long rop.

Oli sakem balong ova long rop mo olgeta long narafala saed rop i sakem balong i kam bak long olgeta. Mekemap ol simpol rul blong gem ia, olsem:

Sapos wan grup i mestem balong wan poen blong narafala grup.

Wanwan grup i save tajem balong tri taem nomo, afta balong i mas go ova long rop.

Aktiviti 15: Stabiliti o Balens

Ol Risos: Wisel, tu kon o narafala maka

Putum tufala kon ia mo eksplenem long ol studen wanem blong mekem. Blo long wisel mo ol studen oli maj long wan stret laen. Han blong olgeta i mas swing long semak daerekSEN nomo, wan i go long lef mo wan i go long raet. Studen we i mestem step blong hem o han blong hem i no folem semak daerekSEN i aot long gem.

Aktiviti 16: Lokomoto

Ol Risos: Wan open spes blong plei long skul

Not blong Tija: Mekem ol studen oli pikimap ol ston o stik long fil bifo gem ia.

Tekem ol studen oli go aotsaed long wan open spes. Resis long fored mo ol studen oli resis folem yu. Taem yu stop, ol studen oli mas stop tu. Studen we i stap ron yet i aot long gem mo go sidaon.

Aktiviti 17: Objek Kontrol

Ol Risos: Balong

Jusum faev studen blong ron blong kasem balong kasem evri studen i gat janis blong kasem balong taem yu sakem. Sakem wan balong mo ol studen oli ron blong kasem balong ia. Oli save kasem long tufala han o kasem long wan han nomo. Studen we i mekem balong i foldaon i aot long gem.

Aktiviti 18: Stabiliti o Balens

OI Risos: Ol studen

Ol studen oli stanap. Taem yu se “Stat” ol studen oli mekem tu defren aksen. Olsem: oli rabem bel blong olgeta mo wesil. Taem yu se “Stop”, oli mekem defren aksen.

Aktiviti 19: Lokomoto

OI Risos: Bag raes be foldem i go smol blong Klas 2 i save yusum

Givim bag raes long ol studen. Wanwan studen i go insaed long bag raes ia. Oli jam long ples i go long wan narafala ples.

Aktiviti 20: Objek Kontrol mo Lokomoto

OI Risos: Balong

Tufala studen i stanap faev meta longwe long tufala. Ol narafala studen oli stap long medel blong tufala. Wan studen long en i sakem balong i go long narafala studen long narafala en blong kasem balong ia. Ol studen long medel oli traem kasem balong ia.

Kaontem hamas studen oli kasem balong long tufala studen ia mo jusum nara tufala studen blong sakem balong. Tufala studen we namba blong kasem balong i smol oli win. Sapos taem i no inaf ol narafala studen oli save mekem aktiviti ia long nekis lesen.

Aktiviti 21: Lokomoto

OI Risos: Tri slipa

Putum tri slipa wan meta longwe long trifala. Ol studen oli jam tri step. Fasfala step long fasfala slipa, narafala step long nambatu slipa mo las step long lasfala slipa.

Aktiviti 22: Objek Kontrol

OI Risos: Balong we i no strong tumas

Tu studen i stanap faev meta longwe. Ol narafala studen oli stanap long medel blong olgeta. Wan studen long en bae i traem blong stonem ol studen long medel. Ol studen long medel oli mas traem blong trikim balong. Sapos balong i kasem wan studen, hem i aot long gem.

Aktiviti 23: Stabiliti o Balens

OI Risos: Wan open spes long skul

Ol studen oli stanap mo mekem ol arier aksen, olsem oli swingim han i go bihaen, wokbaot arier i go bihaen mo lukluk long fored mo jam i go bihaen. Studen we i mekem gud ol arier aksen ia i wina blong gem ia.

Aktiviti 24: Lokomoto mo Stabiliti o Balens

Ol Risos: Longfala rop

Tu studen i holem rop mo tanem. Ol narafala studen oli jam. Mo tu yu save karem ol smol rop mo givim long wanwan studen blong jam.

Aktiviti 25: Objek Kontrol

Ol Risos: Balong

Ol studen oli stanap tri meta longwe long olgeta.

Wan i sakem balong i go long narafala studen. Hem i kasem balong mo pasem i go long narafala studen. Studen i aot long gem sapos i mekem balong i foldaon o i brekem tri meta ia.

Aktiviti 26: Stabiliti o Balens

Ol Risos: Wan open spes long skul, tu maka

Makemaot wan stret laen. Wanwan long ol studen oli wokbaot arier long stret laen kasem en blong laen. Taem oli kasem en blong laen oli wokbaot kambak long stat blong laen mo wokbaot arier bageken seken taem. Oli save wokbaot blong tu raon o long wan taem we yu givim mo fanemaot hamas raon oli mekem.

Aktiviti 27: Lokomoto o Objek Kontrol

Ol Risos: Balong blong futbol, ol maka blong makem gol mo eria blong plei futbol insaed

Makemaot wan spes we oli save plei futbol long hem. Seremaot ol studen long tu grup mo oli plei futbol. Wanwan grup i mas mekem 10 pas bifo oli save traem blong skorem wan gol.

Aktiviti 28: Lokomoto mo Objek Kontrol

Ol Risos: Balong, ol maka

Makemaot tu laen blong oli resis folem laen mo sakem balong. Wan studen i tekem balong mo resis. Narafala fren blong hem i resis wetem hem.

Studen A i sakem balong i go long Studen B mo studen B i sakem balong i go bak long hem. Mekemsua se balong i no foldaon.

Aktiviti 29: Stabiliti o Balens

Ol Risos: Ol maka

Makemaot wan eria. Ol studen oli jam olsem frog go kasem en blong mak mo jam i kambak.

Studen we i jam gud olsem wan frog mo kasem mak fastaem i wina.

Aktiviti 30: Lokomoto

Ol Risos: Ol maka, wan open spes long skul

Makemaot wan eria blong sikis meta. Ol studen oli resis long wan mak i go long narafala mak.

Tem 1

Oi Aktiviti blong Visuel At

Visuel At i stap long Lesen 7 evri wik. Jusum wan long ol aktiviti we i stap ia blong mekem wetem ol studen.

Hem i impoten tumas blong tingbaot ol studen we oli gat ol spesel nid o yusum wiljea o stik blong wokbaot, espeseli long ol aktiviti blong mekem aotsaed. Sapos yu gat sam studen we oli no save muv fri aotsaed, tingbaot wan narafala aktiviti blong mekem.

Aktiviti 1: Dro

Oi Risos: Buk blong olgeta

Ol studen oli go aotsaed mo faenem wan samting we oli laekem mo oli sidaon mo droem samting ia. Taem oli finis oli go bak insaed mo soem long fren blong olgeta wanem oli bin droem. Afta oli talem long fren blong olgeta from wanem oli laekem samting ia.

Tekem not long ol studen we oli gat spesel nid mo no save go aotsaed. Oli save droem eni samting we oli laekem o givim piya long olgeta blong luk mo droem hemia we oli laekem.

Oli kalarem piya blong olgeta wetem stret kala blong hem.

Aktiviti 2: Dro

Oi Risos: Wan objek we evri studen oli save luk gud

Ol studen oli sidaon long wan sekel mo yu putum wan objek long medel, olsem vas blong flawa, tamtam or basket. Ol studen oli luklukgud long objek ia. Wanwan studen bae i diskraebem hao nao hem i luk objek long ples we hem i sidaon long hem. Afta oli droem wanem oli luk.

Aktiviti 3: Dro

Oi Risos: Ol pensel, graon, glu, sanbij, lif, jakol , pen, pis blong ol wud, pepa, sisis, kala

Ol studen oli jusum wanem oli yusum blong mekem piya blong olgeta. Oli droem eni samting we oli tingbaot.

Aktiviti 4: Kolaj

Oi Risos: Pepa, glu

Go aotsaed mo kolektem sam samting we oli faenem raon long skul yad mo karem i kambak insaed long klasrum.

Wan studen wetem spesel nid we i no save go aotsaed i save wok wetem wan fren blong hem blong tekem wan objek blong hem. Hem i save tekem wan objek i kam long haos long moning. Askem ol studen blong sotem ol objek oli go long tu grup: olsem hemia we i laef mo hemia we i no laef.

Afta, ol studen oli mekem wan kolaj long wan samting we i stap long wan narafala sabjek, eksampol Wan Bigfala Taro long Lanwis lesen.

Aktiviti 5: Dro

Ol Risos: Pepa

Ol studen oli sidaon kwaet, sarem ae mo tingbaot wan ivent we oli bin pat long hem we i mekem olgeta i harem gud mo i mekem olgeta i no save fogetem. Droem wan pijs we i soem taem ia mo raetem wan smol taetol blong pijs ia.

Aktiviti 6: Dro

Ol Risos: Pepa

Go aotsaed mo karem faev defren lif blong mekem pijs blong olgeta. Oli putum ol lif aninit long pepa blong olgeta olsem we oli laekem. Afta, oli rabem antap long pepa wetem jakol o pensel o kala blong mekem wan pijs.

Aktiviti 7: Toktok

Ol Risos: Ol frut we oli save serem

Bifo long lesen ia, rere long sam bokis we i fulap long ol defdefren frut.

Ol studen oli wok long ol smol grup. Wan memba blong grup i mas sarem ae blong hem mo pusum han i go insaad long bokis mo filim wan frut we i stap insaad. Studen ia i traem diskraebem wanem hem i filim mo ol narafala long grup blong hem oli traem talem nem blong frut ia.

Taem oli talem stret ansa bae hem i karemaot frut ia. Afta narafala memba i mekem semak kasem we i nomo gat frut insaad long bokis.

Letem olgeta i go aotsaed mo kakae ol frut ia aninit long wan tri. Oli sakem skin blong frut ia long kompos.

Aktiviti 8: Dro mo kolaj

Ol Risos: Pepa, sanbij, sid, sodas (luk Glossari) mo glu

Studen i putum han blong hem long pepa. Tekem wan pensel mo droem roan long han blong hem. Putum glu long evri ples insaad long han we oli bin droem. Afta putum sanbij, graon, sid o sodas antap long glu blong i fas. Putum wok blong olgeta blong i drae gud mo putum long displei.

Aktiviti 9: Kala

Ol Risos: Pijs blong kalarem, ol kala

Givim wan pijs mo askem ol studen blong kalarem. Olgeta i mas kala long stret kala blong objek ia mo kala insaad nomo long laen. Oli raetem nem blong olgeta samples long pijs ia.

Aktiviti 10: Dro

Ol Risos: A4 pepa

Putum wan bigfala pijs long blakbod, afta givim A4 pepa long ol studen blong droem pijs ia we i stap long blakbod.



Aktiviti 11: Konstraksen

OI Risos: Ol defdefren saes blong emti plastik botel, tin blong limonad o narafal smol kontena; ol sid, smolsmol korel o raes
Askem ol studen oli wok long smolsmol grup blong mekem wan seka.
Ol grup oli jusum wan kontena mo wanem blong fulumap long kontena ia we i save mekem noes.
Afta oli lisen long ol noes mo oli singsing wan song mo plei long instramen we oli bin mekem.

Aktiviti 12: Kala

OI Risos: Waet pent, ol maka, ol wota kala
Bifo lesen ia, askem ol studen oli karem ol ston i kam long klas. Oli mas faenem wan blak ston we i gat wan flat saed. Ol studen oli pentem flat saed blong ston i waet mo livim i stap blong drae gud.
Long lesen ia, givim ol ston i go long ol studen blong mekem ol defren paten wetem ol kala maka mo wota kala.

Aktiviti 13: Kolaj

OI Risos: Ol defren drae lif, glu, pis blong katon o pepa o niuspepa
Ol studen oli go wokbaot raon long skul mo karem ol defren drae lif i kam insaed long klasrum. Givimaot pepa o pis katon long wanwan studen. Ol studen oli droem wan objek long pepa o katon ia.

Aktiviti 14: Konstraksen

OI Risos: Smol stik, bambu, string o rop
Ol studen oli wok long smol grup.
Putum ol materiel long tebol long fored. Ol studen oli luk long ol objek ia mo tokbaot wanem nao oli save bildim wetem ol objek ia. Afta, oli pikimap ol aetem oli nidim mo go bildem objek blong olgeta.
Afta, oli talemaot long klas wanem nao oli bin mekem mo wanem yus blong objek ia.

Aktiviti 15: Pent

OI Risos: Olfala tisot, apron o dres, paoda pen (red, blu, yelo) stik o bras blong miksim pent, wota
Ol studen oli karem wan olfala tisot blong olgeta we oli save pentem – oli mas askem ol peren blong olgeta fastaem.
Tugeta miksim tri kala pent wetem wota: red, blu mo yelo.
Ol studen oli foldem ol tisot blong olgeta long eni dareksen o long wan paten. Afta oli putum tisot ia long wan niuspepa o lif laplap. Ol studen oli pusum wan pat blong tisot long kontena blong wan kala. Tekemaot mo skwisimaot pent we i stap ron. Afta pusum wan naraftala pat blong tisot insaed long kontena blong wan naraftala kala.
Taem oli finis tekem i go aotsaed mo putum long gras o hangem long fanis blong skul blong oli drae.

Aktiviti 16: Pent

Ol Risos: Paoda pent (red, blu, yelo), wota, pent bras o skin blong kokonas o feta blong faol, tri smol kontena blong miksim pent, A4 pepa
Givimaot tu kala i go long wanwan grup. Ol studen long grup oli miksim tufala pen wetem wota. Yusum bras, feta blong faol o pis blong skin blong kokonas blong pusum insaed long wan kala. Pusum wan nrafala bras i go long nrafala kala. Putum tufala pen long saed blong A4 pepa mo yusum wan nrafala bras blong miksim tufala. Talemaot long evriwan wanem kala nao i kamaot.

Aktiviti 17: Dro

Ol Risos: Pis blong ol defren aelan kakae we i tan olsem yam, taro, kumala, wota taro, grin banana; tri o lif blong laplap; kaliko o angkejif
Karem pis blong ol kakae mo putum long tebol. Askem ol studen blong sarem ae blong olgeta long wan kaliko mo oli testem wan smol pis blong wanwan long ol kakae ia. Oli talem long yu wanem kakae nao oli kakae. Oli mas talem slo blong nrafala fren blong olgeta oli no harem.
Afta bae oli droem pi ja blong kakae we oli kakae mo kalarem wetem stret kala blong olgeta. Oli save kontiniu blong testem ol nrafala kakae we oli no testem yet.

Aktiviti 18: Skalpja

Ol Risos: Sel, kaliko, mat, ol buk blong rid
Ol studen oli wok tugeta blong mekem mo flasem riding kona blong klasrum blong olgeta.

Aktiviti 19: Konstraksen

Ol Risos: Skin blong kokonas, glu, sisis, rop
Ol studen oli go wokbaot raon long skul mo faenem sam samting we oli save yusum blong mekem wan man o woman. Oli tingbaot wanem blong yusum olsem bodi o hed blong hem, hea mo klos, mo karem i kam bak long klasrum.
Afta, oli mekem sep blong wan man o woman wetem wanem we oli tekem. Taem oli finisem bae oli givim wan nem blong man o woman blong olgeta.

Aktiviti 20: Kolaj

Ol Risos: Niuspepa, magasin, foto blong wanwan studen
Askem ol studen blong karem wan foto o pi ja blong olgeta i kam long klas.
Ol studen oli katemaot hea, klos, bodi, sus, mo ol nrafala pat blong ol nrafala pipol long ol niuspepa o magasin. Afta, oli putum glu long foto blong olgeta mo pestem long medel blong wan A4 pepa.
Putum glu long pi ja blong hea we i katemaot long magasin mo pestem long hea blong hem long foto. Mekem semak samting wetem long ol nrafala klos o pat blong bodi we hem i wantem jenism.

Tem 1 – Wik 1



Lesen 1: Spirituel mo Karakta Divelopmen (30 min)

Fokas blong Aktiviti: Wan ples blong helpem laef blong yu

Vokabulari: Jos, gudfala, fasin, miting ples

Not blong Tija: Invaetem wanwan memba blong ol jos o defren relijen we ol studen long klas oli go stap wosip long hem wan o tu dei bifo long lesen ia. Wanwan memba ia i save wan jos lida, ol peren, yut o wan big brata o sista.

Givim welkam long ol defren jos memba mo talem long ol studen wijwan jos o relijen ol invaeted ges ia i kam long hem.

Talem se wanwan grup i sidaon mo storian wetem memba blong jos blong hem. Wanwan grup bae i tokbaot wanem bae oli talem abaot jos blong olgeta i go long ol narafala studen blong oli save moa abaot jos blong olgeta. Wanwan grup bae oli storian blong faev minit.

Ol kwesten we ol invaeted ges i save askem long ol studen:

Hu i stap go long jos? From wanem yu go long jos?

Yu laekem blong go long jos o relijen yu wan o oli stap fosem yu?

Sapos yu no go long wan jos o relijen, hu nao i stap tijim yu abaot ol gudfala fasin blong laef?

Sam samting we oli save tokbaot blong oli serem long klas oli: wea ples jos o miting ples i stap long hem, ol taem blong ol jos aktiviti blong olgeta, mo wanem dei oli go long jos long hem mo samfala moa samting we oli ting se ol narafala i no save abaot jos blong olgeta.

Talem long ol studen se, “Leftemap han blong yu sapos yu stap wosip long jos o relijen blong” (talem nem blong jos o relijen).

Taem ol studen we oli go wosip long semak jos o relijen oli putum han i go antap, sendem olgeta blong go luk invaeted memba blong jos blong olgeta.

Yu wok wetem ol studen we oli no go long eni jos nating, olgeta tu oli tokbaot wea ples nao oli lanem ol gudfala fasin. Tokbaot ol gudfala fasin ia.

Afta askem ol defren grup i talem sam impoten samting abaot jos blong olgeta. Wanwan grup i gat tu minit nomo blong tokbaot jos, relijen blong olgeta o narafala ples we oli stap kam tugeta blong lanem ol gudfala fasin.

Askem long ol studen, “Wanem wan samting we yu lanem long jos o relijen o wan nara ples we i helpem laef blong yu?”

Opotuniti blong Asesmen: Ol studen oli talem sam impoten samting abaot jos o grup blong olgeta.

Lesen 2: Pefoming At (30 min)

Fokas blong Aktiviti: From wanem yu lisem long ol defren miusik?

Ol Risos: Gita o wan narafala instramen we yu save plei

Vokabulari: Gita, bit, klapem, instramen, snapem finga

Ol studen oli singsing *Halo*.

Singsing wan song we oli lanem long Yia 1 wetem ol studen. Plei wan instramen we yu save plei. Sapos yu no save plei wan instramen askem wan studen blong kam plei.

Kwesten blong askem long ol studen:

- Hu i laekem blong stap singsing? From wanem yu laekem blong singsing?
- From wanem yufala i jusum song ia?
- Wanem kaen miusik yu stap lisem long hem?
- Wanem taem nao yumi stap lisem o harem long ol defren miusik?

Serem ol studen oli go long tri o fo grup mo sanem olgeta i go aotsaed mo rere long wan song we evriwan i laekem. Afta long faev minit oli kambak insaed.

Askem wanwan grup blong singsing long song blong olgeta. Taem oli stap singsing bae yu stopem olgeta taem yu ting se ol narafala fren blong olgeta i harem finis fulap pat blong song ia. Askem ol fren blong olgeta blong traem talem taetol blong song mo nem blong man o woman o grup we song i blong olgeta.

Ol studen oli singsing *Tata*.

Opotuniti blong Asesmen: Luk se ol studen oli singsing gud long song blong olgeta.

Lesen 3: Muvmen mo Gem (20 min)

Jusum wan aktiviti long pej 27-32

Lesen 4: Helti individuel mo Komyuniti (30 min)

Fokas blong Aktiviti: Ol wei blong stap klin

Ol Risos: Wan bigfala pepa o katon o wan smol mat, ol kala pensel o kreyon, ol maka, ol A4 pepa, eksampol blong saen (**Apendiks 2**)

Vokabulari: Wei, klin, doti, defren, rul

Ol studen oli go long grup blong faev. Wanwan grup i tokbaot ol wei blong stap klin oltaem we oli tingbaot. Wanwan grup i talemaot long klas ol wei blong stap klin we grup blong olgeta i tokbaot. Raetem ol defren wei ia long bod.

Talem wanwan grup blong droem wan wei blong stap klin. Serem ol studen bakegen sapos i gat nid blong i stret long namba blong ol wei blong stap klin we grup blong olgeta ol studen oli kamap wetem.

Soem eksampol blong wan saen mo askem se, “Taem yu luk saen ia i talem wanem long yu?”

Lisen long ol ansa blong ol studen. Talem se hemia nao wanem yu wantem olgeta i mekem; wan saen we taem ol pipol o studen i luk oli save wanem i minim o i stap talem long olgeta.

Go raon long ol grup blong helpem wanwan grup i kamap wetem ol naraefala saen mo toktok blong ol saen ia. Oli mas kalarem gud ol saen blong olgeta.

Taem oli finis wanwan grup bae i tokbaot saen blong olgeta.

Afta oli pestem ol rul ia i go long wan jat we taetol blong hem i “Rul Blong Stap Klin” blong i stap rimaendem evriwan. Putum jat long wol blong evriwan i save ridim evri dei.

Opotuniti blong Asesmen

Askem ol studen: Wanem sam fasin we yumi wanwan i save mekem blong yumi stap klin oltaem? Hao nao yumi save mekemsua se envaeromen o ples we yumi stap long hem i klin oltaem?

Lesen 5: Tekem plante kea long envaeromen blong yumi (45 min)

Fokas blong Aktiviti: Klasrum envaeromen

Ol Risos: Ol tul blong klinim klasrum olsem: brum, sam smol pis blong kaliko, baket, paoda sop, mop o wan kaliko blong yusum olsem mop, rek, basket blong pikimap doti o wilbara, sam kontena blong putum flawa o planem flawa, wan o tu mat

Vokabulari: Klasrum, envaeromen, klinim, lukaot gud, waepem, dastem, brum

Not blong Tija: Askem ol studen blong karem wan klos blong wok aotsaed. Yu save givim not long ol studen oli karem i go blong givim long ol parens blong olgeta.

- Askem ol studen: From wanem nao yumi mas klinim gud envaeromen blong yumi olsem klasrum blong yumi?

Tokbaot ol ansa blong ol studen. Afta serem ol studen oli go long grup blong fo studen long wan grup. Wanwan grup bae i klinim wan pat blong klasrum. Bifo oli stat bae oli tokbaot hao nao bae oli klinap. Taem evriwan i save wanem blong mekem, oli stat klinim eria blong olgeta. Go raon long wanwan grup mo lukluk gud hao oli stap klinap. Givhan long olgeta long hao blong mekem gud wok blong olgeta taem oli stap wok.

Opotuniti blong Asesmen: Ol studen oli wok gud tugeta blong klinim gud eria blong olgeta.

Lesen 6: Pefoming At (30 min)

Fokas blong Aktiviti: Hao yumi save mekem miusik!

Ol Risos: Smol balong olsem wan balong blong kriket, pepa balong o balong we oli mekem long lif blong kokonas; trifala kad blong bit (**Apendiks 3**)

Vokabulari: Bit, saon, mekem, miusik, soem

Soem Bit 1, “Tan tan tun un”, we oli bin lanem long klas wan.

Askem long olgeta :

Hu i save mekem bit ia wetem klap?

Askem long klas blong wan i mekem bit ia. Afta mekem wetem ol studen.

Soem tufala narafala bit long ol bit kad. Folem ol step ia blong tijim tufala bit ia.

Mekem saon nomo

Mekem saon nomo tugeta wetem ol studen

Ol studen oli mekem saon nomo

Mekem saon mo klap

Mekem saon mo klap tugeta wetem ol studen

Ol studen oli mekem saon mo klap

Klap nomo

Klap nomo wetem ol studen

Ol studen oli klap nomo

Askem long ol studen:

Yu ting se yumi save mekem miusik wetem ol defren pat blong bodi blong yumi?

Hu i save mekem miusik o wan saon wetem fingga, han, maot, tang, leg o fut blong hem?

Mekem miusik wetem sam pat blong bodi blong yu olsem, fingga, han, maot, tang, leg mo fut. Sakem balong i go long wan studen mo askem hem blong mekem wan saon wetem wan pat blong bodi blong hem. Studen ia i mekem wan saon afta sakem balong i go long wan narafala fren blong hem i mekem wan saon wetem wan narafala pat blong bodi. Bae balong i pas i go long fo defren studen blong oli mekem ol defren saon.

Afta askem olgeta i go long tri smol grup:

Fesfala grup i mekem sam saon wetem maot mo tang blong olgeta folem Bit 1

Nambatu grup i mekem sam saon wetem fingga mo han blong olgeta folem Bit 2

Nambatri grup i mekem sam saon wetem leg mo fut blong olgeta folem Bit 3

Givim smol taem blong oli praktisim. Go raon long wanwan grup mo givhan sapos oli nidim help. Afta taem oli redi oli presentem long fored blong klas.

Taem ol studen oli redi, askem wan grup blong kam mekem ol saon we oli bin praktis long hem. Sapos taem i no inaf ol narafala grup bae oli presentem blong olgeta long nekis dei. Evri grup i mas prisentem wanem oli praktisim long hem.

Opotuniti blong Asesmen: Lukluk mo lisen long hao ol studen oli mekem ol defren saon folem bit wetem ol pat blong bodi blong olgeta.

Lesen 7: Visuel At (30 min)

Jusum wan aktiviti long pej 33-36.

Lesen 8: Muvmen mo Gem (20 min)

Jusum wan aktiviti long pej 27-32

Lesen 9: Kaljoral heritej mo Aedentiti (30 min)

Fokas blong Aktiviti: Ges Spika – Kastom Stori

Ol Risos: Invaetem ol olfala blong kam talem wan kastom storian blong komyuniti o wan aelan long Vanuatu o invaetem ol apu blong olgeta we i livim wetem olgeta sapos yu stap long taon eria

Vokabulari: Kastom, storian, lanem, laekem

Introdiusum ges spika long klas mo Ol studen oli talem halo long ges spika. Talem wanem hem i kam blong mekem. Askem ges spika i talem moa abaot hem wan mo kontinu blong talem kastom stori long klas.

Askem long ol studen:

- Wanem nao ges spika i storian long hem?
- Wanem nao oli lanem long stori ia?
- Wanem pat blong stori ia nao oli laekem?

Afta long storian, oli droem wan piya blong wan pat blong stori ia.

Askem ol studen:

- Yu laekem lesen blong tedei? From wanem?

Talem tangkiu long ges spika mo evriwan i klapem han blong olgeta.

Opotuniti blong Asesmen: Askem ol studen blong tokbaot wan pat blong stori we oli laekem tumas wetem fren blong olgeta.

Lesen 10: Siviks mo Komyuniti Rilesensip B (45 min)

Fokas blong Aktivti: Wanem hem i komyuniti?

Ol Risos: Ol ges spika, prinsipol blong skul, wan narafala tija, wan jif, mo wan pasta.

Vokabulari: Komyuniti, komon, semak, samting, serem

Infomesen blong tija

Komyuniti hem i wan grup blong ol pipol we oli liv long wan ples mo serem wan komon o semak samting. Oli save serem wan haos blong wan miting o wan narafala aktiviti, wan semak yunifom, wan wei blong laef, wan bilif o tingting, wan pesen olsem wan papa mo wan mama, wan lanwis, wan ples, wan lida, o sam narafala moa samting.

Ol komyuniti we yumi pat long hem, hem i viley o eria blong yumi, skul blong yumi, jos blong yumi mo samfala moa we yumi wanwan i pat long hem.

Long viley o eria blong yumi, i gat ol jif; long skul, i gat ol prinsipol; long jos komyuniti, i gat ol pasta o pris.

Mekem lesen ia i olsem ol konferens we i stap hapan long TV:

Lukaotem toktok long konferens ia.

Welkamem ol ges spika, talem hu ol ges spika ia mo olgeta i lida long wanem eria long laef.

Talem long ol studen se ol ges spika bae oli tokbaot “Wanem hem i komyuniti” long ol defren situesen blong olgeta.

Ol ges spika oli introdusim olgeta.

Ol studen oli sidaon kwaet mo lisem gud long ol ges spika taem oli stap toktok.

Givim taem blong askem kwesten long ol ges spika. Ol studen tu oli save askem kwesten.

Sam kwesten blong save askem ol ges spika:

- Taem yu harem toktok ia, “komyuniti” hem i minim wanem long yu?
- Wanem sam samting we i mas stap blong mekem wan gudfala komyuniti?
- Wanem sam gudfala samting we yu faenem long komyuniti blong yu?
- Wanem i save hapan sapos wan man o woman i wantem mekem wok blong wan narafala man o woman long komyuniti?
- Wanem i hapan taem evri man i luksave mo mekem ol wok blong olgeta?

Talem tangkiu long ges spika from taem blong hem we hem i save kam blong tokbaot “Wanem hem i komyuniti” wetem ol studen.

Evriwan i klapem han blong soem tangkiu blong olgeta mo stanap taem ol spika oli go.

Askem ol studen:

- Wanem nao yu lanem taem ol lida o hed blong ol defren komyuniti ia oli stap givim toktok blong olgeta?
- Taem wan man o woman i liv hem wan nomo hem i wan komyuniti o no?



Askem ol studen blong raetem o droem wan samting we oli lanem long ol toktok blong ol lida long buk blong olgeta.

Opotuniti blong Asesmen: Ol studen oli serem wanem oli bin lanem tedei long ol spika. Mo oli save serem tingting blong olgeta abaot “Wanem i Komyuniti” afta we oli harem ol spika.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 1 – Wik 2



Lesen 1: Spirituel mo Karakta Dvelopmen (30 min)

Fokas blong Aktiviti: Relijes kalenda

Ol Risos: Ol defren pijs blong ol relijes ivent (**Apendiks 4**)

Vokabulari: Ista, Krismas, Gud Fraede, Ista Mande, ivent, relijes

Askem long ol studen:

Hu i save talem wan relijes ivent we hem mo famle blong hem i stap selebretem
evri yia olsem Ista mo wanem moa?

Soem ol pijs long ol studen. Miksim ol studen long defdefren jos o relijes bakgraon. Afta ol
studen oli tokbaot wanem ivent nao ol pijs i soem. Wan grup bae i tokbaot wan pijs nomo.

Kwesten blong askem ol studen:

- Taem yu luk pijs A, hem i soem wanem relijes ivent?
- Yu stap selebretem dei ia wetem famle blong yu?
- Yumi selebretem taem ia long wanem taem o manis blong yia?
- Wanem nao yufala i stap mekem long taem ia?
- Hu i no stap selebretem wan long ol ivent ia nating? Wanem nao yufala i stap
mekem long taem ia?

Askem ol studen blong droem wan relijes ivent we oli laekem blong selebretem.

Askem ol studen wanem oli lanem long lesen ia.

Opotuniti blong Asesmen: Luk se Ol studen oli save sam long ol pijs blong ol defren relijes
ivent we yumi stap selebretem.

Lesen 2: Pefoming At (30 min)

Fokas blong Aktiviti: Hoki Poki

Ol Risos: Jat blong song Hoki Poki (luk **Apendiks 21**)

Vokabulari: Raet, lef, leg, hip, solda, han, fut, am

Askem ol studen hu oli laekem blong singsing ol song.

Ol studen oli singsing wan song we oli bin lanem long Yia 1, we hem i: *Hoki Poki*

Ridim fastaem. Afta poentem ol toktok blong song mo askem ol studen blong ridim.

Putum jat blong *Hoki Poki* i go long bod. Poentem ol wod mo ol studen oli ridim. Afta oli stanap, singsing mo mekem aksen blong song ia. Oli save singsing tu narafala song we oli bin lanem long Yia 1.

Askem ol studen:

Hu i enjoem lesen blong tedei?

From wanem yu laekem lesen ia?

Eni studen i save ansarem kwesten be oli mas putum han i go antap fastaem.

Opotuniti blong Asesmen: Lukse ol studen oli singsing gud ol song we oli lanem long Yia 1.

Lesen 3: Muvmen mo Gem (20 min)

Jusum wan aktiviti long pej 27-32

Lesen 4: Sefti (30 min)

Fokas blong Aktiviti: Taem yu obei yu stap lukaotem yu

OI Risos: Vanua Rida blong Nes blong Honet, wan bigfala pepa we taetol ia “Taem yu obei yu stap sef” i stap long hem, ol smol pis blong pepa, jat blong song blong O.B.E.I (luk **Apendiks 21**)

Vokabulari: Nes, honet, obei, sef, stikim, glad

Askem long ol studen:

- Hu i save talem wan samting we papa mo mama blong hem i talem long hem blong no mas mekem be hem i no lisen mo i gohed blong mekem afta i kasem wan trabol?

Askem sapos eni studen i save storian blong *Nes blong Honet*. Askem long klas blong wan i talem stori ia. Ridim stori ia sapos oli no save stori ia yet. Askem kwesten long ol studen blong olgeta tu i tekpat blong talem storian ia.

Askem ol kwesten long ol studen:

- Hu i smol gel ia long stori ia?
- From wanem mama blong Woi i soemaot nes blong honet ia?
- Wanem nao Woi i mekem we i no stret?
- Yu ting se Woi i lanem wan samting o no?
- Wanem nao yu lanem long stori ia?
- Sapos wan big man/boe o wan big woman/gel i talem long yu blong go stilim wan faol blong wan narafala man, bae yu obei long hem o no? Sapos yes o no, from wanem?

Long bigfala pepa we “Taem yu obei, yu stap sef” i stap long hem, droem pijs blong Woi long medel blong pepa ia.

Askem ol studen blong raetem nem blong olgeta mo wanem oli lanem long stori ia long ol smol

pis blong pepa we yu givim long olgeta. Afta oli pestem pepa blong olgeta long bigfala pepa.

Singsing *O.B.E.I.*

Opotuniti blong Asesmen: Lisen long ol ansa blong ol studen long ol kwesten.

Lesen 5: Tekem plante kea long envaeromen blong yumi (45 min)

Fokas blong Aktiviti: Ol wok long haos

Vokabulari: Klinim, klasrum, eria, waepem, dastem, brum

Askem ol studen:

- Hu i save tingbaot wanem yumi mekem las wik?
- Wanem nao yu bin lanem taem yufala i stap klinim eria blong yufala long klasrum?

Talem olgeta se, insaed long wan klasrum i semak nomo long haos blong yumi. Long klasrum i gat wan tija mo long haos i gat wan papa mo mama o singel peren nomo o apu man o woman o wan angkel o anti, big brata o sista o wan narafala famle.

Long klasrum i gat plante studen mo long haos tu i gat ol pikinini. Yumi evriwan i help blong lukaotem mo klinim haos we yumi stap long hem. Hemia i semak tu long klasrum.

Tokbaot wetem ol studen ol wok we ol pipol long wan haos i mas mekem blong lukaotem gud mo klinim haos blong olgeta. Lisen long ol ansa blong ol studen mo raetemaot long bod.

Enkarajem ol boe blong mekem ol aktiviti we ol gel oli stap mekem mo ol gel blong mekem ol aktiviti we ol boe oli stap mekem.

Aksem ol studen blong fulumap wan tebol olsem ia long buk blong olgeta. Askem olgeta blong raetem ol wok ia long stret ples long tebol.

Eksampol:

Papa	Mama	Brata	Sista
Karem bebi	Bolem ti evri moning	Wasem ol plet	Karem faeawud

Raetem ol wok ia wetem ol studen tugeta long tebol long bod. Ol studen oli save mekem wok blong olgeta mo raetem ol wok ia long stret ples long tebol long buk blong olgeta.

Opotuniti blong Asesmen: Obsevem ol diskasen mo luk se oli klia long ol duti, mo i gat sam duti we i no blong ol gel nomo blong mekem.

Lesen 6: Pefoming At (30 min)

Fokas blong Aktiviti: Ol instramen blong plei miusik

Ol Risos: Woksit blong ol defren instramen (**Apendiks 5**)

Vokabulari: Instramen, busbes, seka, bongo, yukalele, gita, dram, elektrik dram, kebod, miusik

Askem ol studen:

Hu i save plei wan instramen blong miusik?

Eni famle blong yu save plei wan instramen?

Hem i stap plei blong wanem?

Askem ol studen.

Hu i save talem ol nem blong instramen we yumi yusum blong plei miusik?

Hao nao yu plei ol instramen ia?

Yu ting se oli mekem instramen ia long Vanuatu?

Ol studen oli givim ol ansa blong olgeta.

Givimaot woksit blong ol studen oli matjem nem blong instramen i go long pija blong hem. Tokbaot wanwan pija wetem ol studen. Ol studen oli wok wanwan o tutu. Oli faenem nem blong ol instramen mo raetem stret namba blong nem long bokis. Ridim mo poentem ol nem blong ol instramen long pepa fastaem.

Makem ol wok blong olgeta taem oli finis. Ol studen oli pestem pepa i go long buk blong olgeta.

Opotuniti blong Asesmen:

Ol studen oli majem stret nem blong instramen i go long pija blong hem.

Fokas long Literasi

Raetem namba long stret bokis blong pija blong instramen.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral heritej mo aedentiti (30 min)

Fokas blong Aktiviti: Hu i putum nem blong yu?

Ol Risos: Wan anamol blong yu olsem dog o puskat

Vokabulari: Nem, mining, angkel, anti, mama, papa, apu man, apu woman

Not blong Tija: Wan dei bifo long lesen ia, askem ol studen blong go askem ol parens o apu o hu we i stap lukaotem olgeta blong talem hu i putum nem blong olgeta mo from wanem pesen ia i givim nem long olgeta.

Karem wan dog o puskat blong yu i kam long klas. Askem ol studen se wanem nem blong anamol ia mo hu i putum nem long hem? Lisen long ol ansa blong ol studen.

Talem ol studen se long kastom blong yumi i gat ol wei we yumi stap putum nem long ol bebe we i jes bon. Sam long yumi i gat kastom nem mo nem we oli putum long yu long jos. Tudei bae yumi harem hu i putum nem blong yu mo from wanem hem i putum nem ia long yu.

Askem ol studen:

- Hu i laekem nem blong hem?
- Putum han i go antap sapos yu gat bitim tu nem? Yu laekem evri nem ia?
- Hu i no laekem nem blong hem?
- From wanem yu no laekem nem blong yu?

Karem Ol studen oli go sidaon aotsaed aninit long wan tri. Askem ol studen blong stanap mo serem long klas hu i givim nem long hem mo from wanem hem i givim nem long hem.

Askem ol studen:

- Wanem nao yu bin lanem taem fren blong yu i stap serem hao hem i karem nem blong hem?
- Hu i glad long nem we oli putum long nem?

Opotuniti blong Asesmen: Ol studen oli save serem infomesen long ol narafala abaot nem blong hem.

Lesen 10: Siviks mo Komyuniti Rilesensip A (45 min)

Fokas blong Aktiviti: Wanem yumi serem long klasrum

Ol Risos: Pija blong tu defren klasrum envaeronmen (**Apendiks 6**)

Vokabulari: Serem, semak, samting, klasrum, tija, bod

Askem ol studen:

- Wanem yu lanem long las lesen blong Siviks mi Komyuniti Rilesensip A?

Askem ol studen blong sidaon long mat. Holem tufala pija i go antap blong evri studen i save lukluk. Talem ol studen blong lukluk pija be no mas toktok blong wan minit. Afta long wan minit, askem wanem long tufala pija ia i semak mo wanem we i no semak. Askem wan studen

blong ridim kwesten we i stap antap long pej o ridim tugeta wetem ol studen.

Ol studen oli talem wan samting we i semak mo wan samting we i no semak long tufala pija long wan narafala fren. Askem ol studen blong talem wanem fren blong olgeta i faenem long tufala pija ia.

Ol kwesten blong askem ol studen:

- Olsem wan komyuniti, yumi serem sam samting, wanem ol samting long fes pija we oli semak long klasrum blong yumi? Wanem hem i defren?
- Insaed long Klasrum A, wanem samting we ol studen mo tija oli serem?
- Hem i semak long Klasrum B?

Askem ol studen:

- Sapos yu gat plante kala be fren blong yu nogat, bae yu serem o no?
- From wanem?

Opotuniti blong Asesmen: Ol studen oli aedentifaem ol samting we oli semak mo wanem we oli no semak.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 1 – Wik 3



Lesen 1: Spirituel mo Karakta Divelopmen (30min)

Fokas blong Aktiviti: Wan relijes ivent – Ista

Ol Risos: A4 pepa

Vokabulari: Ista, Gud Fraede, Ista Sandei, Ista Mande, selebretem, tingbaot, pablik holidei

Not blong Tija: Sam relijen mo jos oli no selebretem Ista. Sipos sam studen long klas blong yu oli no selebretem Ista telem oli tokbaot aktiviti we oli mekem long taem ia.

Askem ol studen:

- Hu i stap selebretem Ista wetem famle blong hem?

Talem long ol studen se: Long kalenda blong Vanuatu, Gud Fraede mo Ista Mande oli ol pablik holidei. I minim se sapos ol pipol we oli stap wok long gavmen blong Vanuatu oli gat holidei blong tingbaot dei ia. Hemia i hapen olsem from Vanuatu i wan Kristian kaontri.

- Wanem nao yumi tingbaot long taem blong Ista?

Talem long ol studen, “Ista i stat long Gud Fraede kasem Ista Mande. Long sam relijen, wan wil bifo Ista, we i stat long Pam Sandei i go kasem Gud Fraede, wik ia oli kolem Holi Wik (yu save soem long wan kalenda o droem kalenda long bod mo eksplenem).

Long raon long wol, ol pipol oli selebretem Ista long ol defdefren wei. Samfala wei we oli selebretem Ista i olsem sam ples oli lukaotem eg, sam ples oli selebretem Ista wetem Ista Bani we hem i wan rabet, sam oli maj long Ista. Mo tu i gat ol spesel kakae we oli stap kakae long Ista we i defdefren raon long wol.

Askem ol studen blong jusum wan fren blong hem bae i storian long fren ia abaoit wanem hem wetem famle blong hem oli stap mekem long Ista. Hem i save tokbaot wanem oli bin mekem long las Ista. Tokbaot wanem kaen kakae oli kakae, wanem aktiviti oli mekem, wanem kaen klos oli werem, mo samfala samting moa. Afta fren blong hem i talem storian blong hem.

Givim wanwan pepa long ol studen blong oli raetem taetol ia: “Famle blong _____ (nem blong fren blong olgeta) i selebretem Ista.”

Taem oli finis talem storian blong olgeta, bae oli droem wan piya we i soem wanem fren blong hem wetem famle blong hem oli stap mekem long Ista.

Opotuniti blong Asesmen: Ol studen oli droem wan piya blong soem wanem fren mo famle blong hem i stap mekem long Ista o long dei ia.

Lesen 2: Pefoming At (30 min)

Fokas blong Aktiviti: Mekem instramen

Ol Risos: Sel blong kokonas, ol emti botel blong taska, rababan, emti baket, dis, plet, ol lid blong botel blong Taska, sid blong kristmas tri, tin blong sof drink, ol sid o smol ston, sam smol stik, stik blong lif blong kokonas we yumi stap yusum olsem brum o wan smol bunbun stik we i strong, wan smol naef, kom blong hea, sisis, glu, ol defdefren saes blong emti tin, tri nil mo wan hama o ston blong laplap

Vokabulari: Sid, tin, botel, emti, kokonas, stik, nil, dis, plet, baket, saes

Askem ol studen:

- Hu i save plei wan instramen blong miusik?
- Wanem instramen nao yu save plei?

Putum ol samting we bae oli nidim blong mekem wan instramen long wan hip long wan tebol. I sud gat fo grup olsem minim se wanwan grup bae i mekem wan instramen.

Ol studen oli wok long grup blong fo o faev. Askem wan kwesten we grup we i givim stret ansa fastaem bae i kam faswan blong karem ol samting blong olgeta blong mekem instramen blong olgeta. Oli jusum nekis grup blong go karem ol samting mo oli mekem olsem kasem las grup.

Taem oli karem ol samting ia i go long tebol blong olgeta bae wanwan grup i tokbaot wanem instramen bae oli mekem mo olsem wanem nao bae oli mekem instramen ia wetem ol samting we oli gat.

Opotuniti blong Asesmen: Ol studen oli yusum ol samting we yu givim blong mekem wan instramen.

Lesen 3: Muvmen mo Gem (20 min)

Jusum wan aktiviti long pej 27-32

Lesen 4: Helti individuel mo Komyuniti (30 min)

Fokas blong Aktiviti: Hao blong wasem han

Ol Risos: Sop, klin wota, klin tawel

Vokabulari: Wasem, sop, klin, wota, fingga, han

Askem long ol studen se:

- Hu i stap wasem han evri taem bifo hem i kakae o taem hem finis yusum toelet?
- From wanem yumi mas wasem gud han blong yumi bifo yumi kakae?
- Wanem bae i hapen sapos yumi no wasem han blong yumi afta yumi yusum toelet?
- Wanem yumi mas yusum blong wasem gud han?

Taem oli finis blong tokbaot ol kwesten antap, evriwan i go long ples we bae oli wasem han blong olgeta. Soem long ol studen hao blong wasem gud han. Evri studen i mas mekem wetem yu. Afta oli wasem han oli seksekem han blong olgeta blong oli drae.

Askem ol studen:

- From wanem yumi nomo yusum wan klin tawel blong waepem han blong yu afta yu wasem han olsem bifo?
- Sapos yu stap long wan ples we i nogat sop bae yu yusum wanem blong wasem gud han blong yu?

Opotuniti blong Asesmen: Luk se ol studen oli wasem gud han blong olgeta.

Lesen 5: Tekem plante kea long envaeromen blong yumi (45 min)

Fokas blong Aktiviti: I save roten o no ?

Ol Risos: Ol doti we oli save roten mo ol doti we oli no save roten, olsem paket Twisti, pepa blong loli

Vokabulari: Roten, plastik, botel, glas, doti

Makem tufala tebol wetem “i save roten” mo “i no save roten”.

Putum ol doti we yu pikimap long wan ples long fored. Leftemap wan samting mo askem ol kwesten ia:

1. Wanem hemia?
2. Wanem bae yumi mekem long doti ia sapos yumi wantem envaeromen blong yumi i klin?
3. Samting ia i bin laef o i kam long wan laef samting?
4. Yu ting se i save roten o no? From wanem?
5. Wanem tebol bae yufala i putum long hem?

Putum ol doti ia long tebol blong ol studen. Bae tu o tri studen i tokbaot ol doti ia we yu putum long tebol blong olgeta. Givim smol taem blong oli tokbaot ol samting ia mo putum ol samting ia long stret tebol.

Askem long ol studen:

- Wanem ol samting we i no save roten mo wanem ol samting we i save roten?

Pikimap wan samting long wan long tufala tebol ia mo askem olgeta:

- Hu i putum samting ia long tebol ia?
- From wanem yufala i putum samting ia long tebol ia?

Talem long ol studen se wanem we i kam long wan laef samting bae i roten mo wanem we i no kam long wan laef samting bae i no save roten.

Talem olgeta blong wasem han blong olgeta gud from oli holem ol doti ia.

Opotuniti blong Asesmen: Luk se oli putum ol doti long raet tebol.

Lesen 6: Pefoming At (30 min)

Fokas blong Aktiviti: Piknik Ku

Ol Risos: Jat blong singsing Piknik Ku (luk **Apendiks 21**)

Vokabulari: Reva, maonten, solwota, lukluk, fren, gudfala

Askem ol studen oli singsing *Halo* we oli lanem long klas wan.

Askem ol studen: Hu i laekem blong go long piknik?

Afta talem long olgeta se bae oli lanem wan singsing we taetol blong hem i *Piknik Ku*.

Tijim singsing ia folem ol step ia:

1. Ridim song tru.
2. Afta hem i ridim wan laen tru, ol studen oli ripit bihaen long hem.
3. Askem wanem song ia i abaot. Tokbaot wanem song i abaot.
4. Singsing long song ia tru wan taem.
5. Singsing wan laen afta ol studen oli singsing bihaen long hem.
6. Singsing tugeta wetem ol studen.
7. Soem ol aksen blong song ia long ol studen.
8. Mekem aksen tugeta wetem ol studen.
9. Ol studen oli mekem olgeta nomo.

Afta ol studen oli jusum wanem bae oli jenisim wod ia wetem: reva, ol hil mo solwota i go long hem mo singsing bakegen yusum ol niufala toktok ia.

Opotuniti blong Asesmen: Luk se ol studen oli singsing mo mekem gud aksen blong song ia.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral heritej mo aedentiti (30 min)

Fokas blong Aktiviti: Fas Praem Minista blong Vanuatu, Let Walter Lini

Ol Risos: Pija blong Let Fata Walter Hayde Lini, map blong Vanuatu (**Apendiks 7**)

Vokabulari: Fas, praem minista, Vanuatu, Pentecost, aelan

Askem ol studen: Hu i save fas Praem minista blong Vanuatu?

Mekem ol studen oli sidaon long mat long aninit long wan tri mo hem i soem pija blong Let Fata Walter Hadi Lini. Tokbaot man ia wetem ol studen. Askem ol kwesten ia taem yu tokbaot man ia.

Askem olgeta:

- Hu i save man ia?
- Wanem nem blong hem?
- From wanem yumi se “Let” long fored blong nem blong hem?
- Hem i wan impoten man o no? From wanem?
- Wanem dei yumi gat holidei blong tingabaot hem?
- From wanem oli jusum dei ia?
- Hu i save talem se hem i blong wanem aelan long Vanuatu?
- Hu i save poentem aelan blong Pentecost long map blong Vanuatu?

Pestem pija long wol. Raetem klos pasej long bod afta askem ol studen blong raetem i go long buk blong olgeta mo raetem ol ansa long ol raet spes. Taem oli finis oli tekem i go long tija blong makem.

Klos pasej	Ol wod o smol smol toktok blong raetem long spes
Let _____ hem i _____ Praem Minista blong Vanuatu. Hem i kam long aelan blong _____. Hem i bin ded long _____ 1999. Yumi selebretem dei ia blong tingbaot hem mo ol gud wok we hem i bin mekem. Ol man Vanuatu oli save hem olsem _____ _____.	Papa blong Independens 21 Februari Pentecost Walter Lini fas

Opotuniti blong Asesmen: Ol studen oli raetem ol ansa long stret spes



Lesen 10: Siviks mo Komyuniti Rilesensip B (45 min)

Fokas blong Aktiviti: Wan impoten pesen long laef blong mi

OI Risos: Woksit blong “Wan impoten pesen long laef blong mi” (**Apendiks 8**)

Vokabulari: Impoten, pesen, pem, klos, skul fi, givim kakae, lavem

Askem ol studen:

- Hu i gat sam pipol we oli impoten tumas long olgeta?
- Hu nao i moa impoten pesen long laef blong yu?

Tokbaot wan impoten pesen long laef blong yu mo from wanem hem i impoten long laef blong hem. Askem ol studen blong talem ol samting we i mekem pesen ia i impoten long laef blong hem.

Askem ol studen: Wanem nao i mekem pesen ia i impoten long laef blong hem?

Givimaot ol woksit long wanwan studen. Eksplenem woksit ia long ol studen. Oli save putum wan foto blong pesen ia sapos oli gat. Helpem ol studen blong komplitem woksit blong olgeta.

Taem oli finis, oli tokbaot impoten pesen blong olgeta long wan fren. Askem tri studen we oli wantem talem long klas abaot impoten pesen blong olgeta blong stanap mo tokbaot impoten pesen ia.

Opotuniti blong Asesmen: Ol studen oli raetem stori abaot impoten pesen long laef blong olgeta.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 1 – Wik 4



Lesen 1: Spirituel mo Karakta Divilopmen (30 min)

Fokas blong Aktiviti: Taem blong digimaot yam

Ol Risos: Ol A4 pepa

Vokabulari: Digimaot, yam, sekomsaes, mared, blesem, jos

Infomesen blong Tija

Klosap Ista evri yia bae yumi digim ol yam we yumi bin planem.

Sam aelan oli digim yam fastaem bifo Ista araon long dei
blong ol jif we hem i namba faev Maj.

Yam hem i wan spesel kakae long kalja blong yumi.

Hem i spesel from yumi yusum plante blong mekem ol wok long kastom
blong yumi olsem pem woman long taem blong mared,
givim kakae i go long ol jif mo ol pasta blong jos,
long taem blong sekomsaes, mo samfala moa.

Bifo yumi yusum ol yam ia, yumi karem i go long jos o long ol jif blong oli blesem.

Sam yam bae yumi putum i stap blong planem bakegen.

Soem wan yam long ol studen o tekem olgeta i go blong luk wan garen blong yam

Askem ol studen:

- Hu i laekem blong kakae yam?
- Hu i no laekem blong kakae yam? From wanem?

Askem ol studen blong mekem aktiviti ia:

Wokbaot mo tokbaot

Rul blong aktiviti ia hem i blong wan studen i lisen nomo mo no toktok taem fren blong hem i
stap talem storian blong hem. Afta tufala i jenis. Bae ol studen oli kambak afta faev minit. Long
aktiviti ia bae oli talem long fren blong olgeta abaot taem we oli bin luk o go blong help blong
planem o digim yam.

Sapos sam studen i neva gat ekpiriens ia, oli save talem long fren blong olgeta from wanem oli neva planem o digim yam.

Afta faev minit taem oli kambak long klas. Askem sam long olgeta blong talem wanem ol fren blong olgeta i talem long olgeta.

Askem sam kwesten long hem ia we i stap toktok mo sapos hem i no save ansa blong kwesten, hem i save askem fren blong hem we i bin talem storian long hem blong i help blong ansarem kwesten.

Afta oli droem pijsa blong storian blong fren blong olgeta mo raetem wan sentens abaot pijsa ia.

Opotuniti blong Asesmen: Ol studen oli talem ekperiens blong olgeta long fren blong olgeta.

Lesen 2: Pefoming At (30 min)

Fokas blong Aktiviti: *Malampa Eksasaes*

Ol Risos: Jat blong *Malampa Eksasaes* (luk **Apendiks 21**)

Vokabulari: Eksasaes, ni, leg, graon, bihaen, tanem, solda, han

Askem ol studen blong stanap mo muv i go long wan ples we oli save bendaon. Mekem “Simon i se” wetem ol aksen we i stap long song ia.

Talem wanem song blong oli lanem long lesen ia, we hem i wan song blong eksasaes. Taem oli go long lesen blong *Muvmen mo Gem* bae oli save yusum.

Putumap jat blong song ia long bod. Talem hu i raetem song ia. Yu save jenisim ol wod long song ia blong i stret long provens, aelan o skul blong yu.

Folem ol step ol step blong tijim singsing ia. Ol step ia i stap long Wik 3 Lesen 6.

- Askem ol studen: Hu i laekem song ia?

Afta ol studen oli singsing *Tata*.

Opotuniti blong Asesmen: Luk se oli singsing gud song ia.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Sefti (30 min)

Fokas blong Aktiviti: Rul blong stap sef long klasrum

Ol Risos: Eksasaes buk mo pensel blong olgeta, wan bigfala pepa mo ol defren kala maka.

Vokabulari: Sef, denja, narafala, mi, aktiviti

Askem ol studen:

- Hu i save talem wan samting we papa o mama blong hem i talem long hem blong no mas mekem taem hem i stap long haos?

- From wanem oli no wantem yu blong mekem samting ia?

Tekem smol taem blong tokbaot wetem ol studen wanem we oli no mas mekem long haos mo ol rison from wanem oli no mas mekem ol samting ia.

Askem wanwan studen blong tingbaot wan samting we oli no mas mekem long klas we bae i no sef long hem wan mo ol narafala studen tu long klas. Oli raetem poen ia long buk blong olgeta. Askem olgeta blong tokbaot wanem oli bin tingbaot wetem wan fren. Afta tufala i talem long klawanem tufala i bin tokbaot.

Raetem ol poen blong olgeta long bod. Ol studen oli ridim wanem we oli bin kamap wetem. Askem kwesten long ol studen mo Ol studen oli leftemap han mo eksplenem. Kontrolem diskasen.

- Askem ol studen: From wanem poen ia i mas kam wan sefti rul?

Ol studen oli talem ol rul mo yu raetem ol rul ia i go long wan bigfala pepa blong i kam **SEFTI RUL BLONG KLASRUM**. Putum jat ia i go long wol blong ol studen oli save ridim evri dei bifo oli statem lesen.

Askem ol studen blong droem wan samting we oli no mas mekem long klas long buk blong olgeta.

Opotuniti blong Asesmen: Ol studen oli talem from wanem oli jusum ol rul ia.

Lesen 5: Tekem plante kea long envaeromen blong yumi (45 min)

Fokas blong Aktiviti: Wanem bae yumi mekem wetem ol doti ia?

Ol Risos: Ol doti we oli bin yusum long Wik 3, Lesen 5.

Vokabulari: Bonem, yusum, bakegen, narafala, berem, mekem, sakem

Not blong Tija: Bifo lesen i stat, putum tufala grup blong doti long fored. Serem ol doti long wan tebol i go long tu grup blong mekem fo grup blong doti; tu grup blong ol doti we i save roten mo tu grup blong doti we i no save roten. Ol studen oli tokbaot wan o tu doti nomo.

Serem Ol studen oli go long fo smol grup. Putum wan hip blong doti long wanwan tebol blong wanwan grup.

Ol studen oli go tru wanwan doti mo tokbaot wanem blong oli mekem wetem doti ia.

Karem wan doti we i save roten mo wan we i no save roten olsem wan pepa we oli raet blong hem finis mo wan emti plastik botel blong wota. Pasem i go long ol studen blong holem mo lukluk gud.

Askem ol studen, blong save kipim envaeromen blong yumi i klin oltaem, wanem bae

yumi mekem wetem:

- pepa ia?
- emti plastik botel ia?

Givim smol taem blong ol studen blong tokbaot ol doti we i stap long tebol blong olgeta. Afta oli soem ol doti ia long klas mo oli talem wanem bae oli mekem wetem ol doti ia.

Askem ol studen:

- Plante taem yumi sakem ol samting we yumi save yusum bakegen, ol doti ia wijwan long olgeta yumi save yusum bakegen?
- Wanem kaen doti nao i save mekem envaeromen blong yumi i luk nogud?
- Wanem kaen doti i save helpem graon blong yumi?

Tokbaot smol ol ansa blong ol kwesten ia wetem ol studen.

Sendem ol studen oli go wasem gud han blong olgeta wetem sop.

Opotuniti blong Asesmen: Lisen long ol studen oli talem long klas wanem bae oli mekem wetem ol doti ia.

Lesen 6: Pefoming At (30 min)

Fokas blong Aktiviti: Malampa Eksasaes wetem ol aksen

OI Risos: Jat blong Malampa Eksasaes (luk **Apendiks 21**)

Vokabulari: Aksen, eksasaes, benem, tajem, tanem, stretem
Ol studen oli singsing *Halo*.

Yusum ol aksen blong Malampa Eksasaes blong mekem gem blong “Simon i se” wetem ol studen.

Singsing fas pat blong song ia blong givim tun blong song ia bakegen sapos oli fogetem.
Singsing song ia wan taem wetem ol studen. Askem ol studen blong stanap.

Folem step ia blong mekem asken blong song ia:

Singsing wan laen blong song mo mekem aksen semtaem.

Singsing wan laen mo mekem aksen blong hem wetem ol studen.

Ol studen nomo i singsing wan laen ia mo mekem aksen blong hem. Lukluk gud olgeta taem oli stap mekem mo givim komen long ol studen taem oli stap singsing mo mekem aksen blong song.

Taem i kam long kores, mekemap ol aksen we i stret long ol leta long nem we yufala i bin jusum.

Taem ol studen oli kasem aksen, talem blong oli singsing mo mekem aksen olgeta nomo.

Opotuniti blong Asesmen: Luk se ol studen oli save singsing song ia mo mekem gud aksen blong hem.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral heritej mo aedentiti (30 min)

Fokas blong Aktiviti: Wanem yu save luk long ol mani?

Ol Risos: Kot of Ams (armoirie) blong Vanuatu (**Apendiks 9**), ol pepa mani o giaman mani ia: 10,000vt, 5000vt, 2000vt, 1,000vt, 500vt, 200vt; 100vt koen, 50vt koen (luk long **Apendiks** blong tija gaed blong Matematik blong Yia 2); wan sped o wanem oli save **yusum blong digim hol blong planem yam, tri hed blong yam**

Vokabulari: Krab kokonas, yam, turis bot, pijin, bubu sel

Leftemap wan 50vt koen mo soem long ol studen. Pasem koen i go long studen blong evriwan i save luk piya long tugeta saed blong goen. Afta pasem 100vt koen bakegen long ol studen.

Askem ol studen: Wanem piya yu luk long tufala saed blong tufala koen mani ia?

Lisen long ol ansa blong ol studen.

Putum ol studen oli go long tri grup mo serem ol mane i go long ol grup ia. Givim wan pepa mani i go long long wanwan grup. Talem long ol studen blong lukluk gud ol mani ia long tugeta saed.

Askem ol studen:

- Wanem yu save luk we i gat long tugeta mani?
- Eni wan i save wanem oli singaotem piya blong man ia we i holem spia?
- I gat wan toktok long piya ia, hu i save ridim?
- Long tingting blong yufala long grup, toktok ia i minim wanem long yufala?

Talem long ol studen se saed ia we i gat man i holem spia, yumi kolem “hed” mo narasaed blong koen yumi kolem “tel”.

Askem wanwan grup blong talem wanem oli luk long narasaed blong mane. Raetem wanem wanwan grup i talem long bod. Askem olgeta blong talem se ol piya ia i minim wanem mo wanem ol piya ia i save minim long ol studen.

Kolektem bak ol mane ia.

Tekem Ol studen oli go aotsaed long ples blong garen o wan ples we yu jusum blong yufala i planem yam ia long hem. Soem hao blong digim gudfala hol blong yam mo mekem graon i sopsop gud.



Ol studen oli wok long tri grup blong digim hol, mekem gud bed blong yam mo planem. Taem yufala i finis planem yam, evriwan i wasem gud han.

Opotuniti blong Asesmen: Luk se oli save prierem gud bed blong planem yam.

Lesen 10: Siviks mo Komyuniti Rilesensip A (45 min)

Fokas blong Aktiviti: Ol wok long klasrum

Ol Risos: Ol fasin blong mekem jat blong “Ol wok long klasrum” (**Apendiks 10**), olsem ol smol skwea pis strong pepa o kaliko, mat o bigfala pis blong kaliko o bigfala pepa, ol pis blong bambu o ol stik blong aeskrim, ol kala

Vokabulari: Sendem, talem, givim, sakem, helpem, mekem, duti

Talem long ol studen: Long las lesen blong yumi, yumi bin luk tu piya blong klasrum mo yumi luk se i gat sam samting long klasrum we yumi serem.

Askem olgeta:

- Yu ting se i impoten blong yumi serem ol samting we yumi gat long klasrum? From wanem?
- Yu ting se i gud tu blong yumi serem ol wok long klasrum blong yumi? From wanem?

Talem long ol studen se i gat evri dei rosta blong brum mo klinim klasrum i stap finis we yumi evriwan i gat taem blong yumi blong mekem. I gat sam narafala duti we ol studen oli save mekem blong helpem tija blong mekemsua se klasrum blong olgeta i wan klin mo gudfala ples blong lan.

Talem wan eksampol blong wan duti blong klasrum olsem klasrum mesenja. Hem i wan responsibiliti we wan studen i mekem we yu save sendem hem blong tekem mesej i go long wan narafala tija o long ofis.

Oli save mekem ol duti ia blong wan o tu wikafta oli save jenisim.

Askem ol studen blong tingbaot wan duti we hem i save mekem long klas. Afta askem olgeta evriwan blong talem mo yu raetem long bod. Raetem sam responsibiliti we yu ting se i sud gat long klas blong yu.

Wok wetem ol studen blong mekem wan jat blong ol wok blong ol studen oli insaed long klasrum. I gat wan eksampol blong wanem blong mekem i stap long **Apendiks 10**.

Taem oli finis, putum ol nem blong ol studen long ol duti we olgeta i wantem mekem mo putum antap long wol.

Talem long ol studen se wok we nem blong olgeta i stap long hem bae olgeta oli mekem ol wok ia kasem en blong tem. Afta tu wik, bae oli raetem long wan pepa hao oli bin mekem wok blong olgeta, mekem se oli mas mekem gud ol wok we nem blong olgeta i stap long hem.

Ol studen oli mas klinimap ol doti we olgeta oli mekem.

Opotuniti blong Asesmen

Talem wan responsibiliti blong klas

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 1 – Wik 5



Lesen 1: Spirituel mo Karakta Divelopmen (30 min)

Fokas blong Aktiviti: Ol bubu oli storian

Ol Risos: Wan papa mo wan mama, wan 20vt koen, sam A5 pepa we i inaf long evri studen

Vokabulari: Storian, laef, sidaon, lisen, kwaet

Not blong Tija: Bae i gud sapos ol invaeted ges ia i wan bubu man wetem waef blong hem. Tufala invaeted ges i talem storian long laef blong tufala blong ten minit. Bae tufala i stat long taem tufala i bon kasem tede. Tufala ges spika i save karem ol foto blong olgeta blong bifo blong soem long ol studen o priperem wan foto taem laen blong storian wetem.

- Askem ol studen: Wanem pijs i stap long koen blong 20vt?

Talem: Long 20 vt koen blong yumi, i gat wan pijs we i soem wan bubu man i stanap mo i gat sam man mo wan pikinini i sidaon Yu ting se oli stap mekem wanem?

Talem long olgeta, “Tedei yumi gat tu bubu blong yumi we oli stap wetem yumi blong talem storian blong laef blong tufala long yumi. Yumi save welkamem long ol invaeted ges long klas.”

Askem ol studen blong klapem han blong givim welkam long tufala.

Askem tufala invaeted ges ia blong talem nem blong tufala, tufala blong wea, hamas yia tufala i gat mo hamas pikinini tufala i gat mo sapos tufala i gat apu finis.

Afta tufala i toktok finis, talem long ol studen blong lisen gud long storian blong tufala mo lanem sam samting long laef blong tufala from afta long storian bae oli talem wanem oli lanem long laef blong tufala.

Talem se bae bubu man bae i talem storian blong hem long ol boe mo bubu woman i talem storian blong hem long ol gel. Givim taem nao blong tufala i storian long ol studen.

Afta long storian oli talem “tangkiu” long tufala ges spika ia mo klapem han blong soem tangkiu.

Givim ol smol pis pepa long ol studen blong raetem wanem oli lanem long storian blong tufala bubu ia. Bae oli statem sentens blong olgeta olsem: “Long storian blong Bubu (nem blong bubu ia), mi lanem...” Askem olgeta blong ridim wanem oli raetem.

Opotuniti blong Asesmen: ol studen oli raetem wanem oli lanem long storian blong tufala bubu ia.

Lesen 2: Pefoming At (30 min)

Fokas blong Aktiviti: Nasonal Antem blong Vanuatu, *Yumi Yumi*

Ol Risos: Jat blong Nasonal antem blong Vanuatu (luk **Apendiks 21**)

Vokabulari: Glad, nasonal, antem, Vanuatu, God

- Askem ol studen: Wanem taem nao yumi stap singsing long nasonal antem?

Oltaem yumi stap singsing nasonal antem taem yumi pulum flag i go antap long ol taem olsem Independens Dei, mo long sam skul long taem blong skul asembli mo wan studen i pulum flag i go antap.

- Askem olgeta: Hu i save singsing nasonal antem blong yumi?

Putum jat blong nasonal antem i go antap long bod. Ridim stat long kores mo tokbaot wanem nao i minim. Ol studen oli talem wanem i nasonal antem i minim.

Nating sapos ol studen oli save gud nasonal antem finis, be i gud blong putum jat blong singsing i go long bod blong ol studen oli luk ol toktok blong song ia.

Tijim nasonal antem folem ol step long Wik 3, Lesen 6 blong givhan long ol studen oli save gud nasonal antem.

- Askem: Wanem nao yumi sud mekem taem yumi singsing long nasonal antem?

Ol studen oli soem stret fasin blong hao blong singsing long nasonal antem.

Singsing *Tata*.

Opotuniti blong Asesmen: Ol studen oli save singsing long Nasonal Antem blong Vanuatu.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Helti individuel mo Komyuniti (30 min)

Fokas blong Aktiviti: Kea long ol aotsaed pat blong bodi

Ol Risos: Eksasaes buk blong ol studen

Vokabulari: Kea, aotsaed, pat, wok, mekem, leg, nus, bel, ae, leg, maot, ni

Askem evriwan blong sarem ae blong olgeta mo soem ol defren pat (aotsaed pat) blong bodi blong olgeta.

Singaotem ol aotsaed pat blong bodi mo ol studen oli tajem pat we yu singaotem. Mekem olsem kasem yu mo studen i go tru long evri pat blong bodi. Jekem se evriwan i stap poentem ol stret pat blong ol bodi blong olgeta.

Taem oli poentem raet pat, askem:

- Wanem wok blong pat blong bodi ia?
- Wanem nao yumi save mekem blong lukaotem gud pat blong bodi ia?

Raetem ol sentens ia long bod mo askem ol studen oli kopi olgeta mo raetem ansa blong hem long buk blong olgeta.

Ol sentens:

1. Mi yusum _____ blong mi blong mi save smelem wan naes flawa.
2. Mi yusum _____ blong mi blong mi save benem leg blong mi.
3. Mi yusum _____ blong mi blong mi kakae laplap.
4. Mi yusum _____ blong mi blong mi save ridim wan buk.
5. Mi yusum _____ blong mi blong mi wokbaot olbaot.

Ol ansa: Ni, nus, maot, bel, ae, leg

Putum pijsa blong bodi blong smol boe long bod. Raetem ol nem blong ol pat we ol studen oli talem stret long jat.

Not blong Tija: Tekem not long ol studen we oli gat spesel nid we maet oli yusum ol defren pat blong bodi blong olgeta, o ol sapoting objek, blong mekem samting. Eksampol: Yusum wiljea blong muv raon, o lisem long wan noes blong lanem wan samting long klas blong wan studen we i no save lukluk.

Opotuniti blong Asesmen: Ol studen oli save ol ekstenol pat blong bodi mo wok blong olgeta.

Lesen 5: Tekem plante kea long envaeromen blong yumi (45 min)

Fokas blong Aktiviti: Bonem plastik mo raba

Ol Risos: Ol defren samting we oli mekem long plastik o raba olsem plastik botel, plastik bag, slipa, paket blong Twisti mo biskit, raba, ruler, kala, pensel, ol plet, kap, baket mo samfala moa we yumi stap yusum

Vokabulari: Plastik, raba, wil, paket, bonem, sotkat

Askem ol studen: Long lesen blong las wik yumi bin tokbaot wanem blong yumi mekem wetem ol doti. Hu i tingbaot lesen ia?

Pikimap plastik botel long tebol mo askem sapos i wan gud aeedea blong yumi bonem botel ia o no.

Askem ol studen from wanem hem i wan gud aeedea mo from wanem hem i wan no gudfala fasin blong bonem plastik botel.

Askem olgeta:

- Wanem kala blong smok taem yu bonem plastik o raba?
- Smok ia i smel olsem wanem?
- Wanem kala blong smok taem yu bonem ol lif?

Ol studen oli wok wetem wan fren blong serem tingting blong olgeta long topik ia. Afta askem olgeta blong oli serem ol tingting blong olgeta long klas.

Raetem ol tingting blong studen anda long taetol ia:

- Gud saed blong bonem plastik mo raba
- Doti saed blong bonem plastik mo raba

Tokbaot wetem ol studen gud saed blong bonem plastik o raba, olsem: doti i finis kwik; yusum wil blong trak blong bonem wan stampa blong wan tri we yu wantem se i aot kwiktaem, mo samfala moa sapos i gat.

Talem long ol studen se hem nogud blong mekem doti i lus kwiktaem from smok blong hem i nogud mo i save mekem yumi sik. Yumi no sud mekem olsem.

Ol studen oli save droem wan pijs we i soem ol sef wei blong sakem raba o plastik.

Opotuniti blong Asesmen

Ol studen oli talem ol nogud saed blong bonem plastik mo raba.

Lesen 6: Pefoming At (30 min)

Fokas blong Aktiviti: Hanggri Namarae

Ol Risos: Jat blong song blong *Hanggri Namarae* (luk **Apendiks 21**), ol kad blong bit (**Apendiks 3**)

Vokabulari: Hanggri, namarae, nalam, swim, aninit, swish, gudfala

Ol studen oli singsing *Halo*.

Mekem bit wetem saon mo klapem han mo ol studen oli mekem semak. Mekem tri bit wetem saon, klapem han mo tin dram tugeta wetem ol studen.

Putum jat blong song long bod blong evriwan i save luk mo ridim. Folem step long Wik 3 Lesen 6 blong tijim song ia. Afta, singsing song ia wan taem mo mekem aksens blong hem, ol studen oli lukluk nomo wanem yu stap mekem.

Naoia mekem aksens mo singsing wetem ol studen. Afta letem ol studen oli singsing mo mekem aksens olgeta nomo.

Serem ol studen oli go long tri grup. Wan grup i mekem bit wetem klap mo mekem saon long maot, wan grup i mekem bit wetem tin dram mo wan grup i singsing *Hanggri Namarae*.

Askem ol studen:

Yumi bin singsing song ia i gud o no?

Sapos no, wanem bae yumi mekem blong yumi singsing moa gud nekis taem?

Ol studen oli singsing *Tata*.

Opotuniti blong Asesmen

Ol studen oli singsing gud mo mekem aksens.



Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral heritej mo aedentiti (30 min)

Fokas blong Aktiviti: Laetem faea

OI Risos: Drae lif blong kokonas, wan bokis blong matjis, sam smol pis blong stik, mo sam bigfala wud lelebet, wan bus naef, fo A4 pepa, pensel o wan smol maka.

Vokabulari: Masis, kokonas, lif, stik, wud, faea, hot, denjares

- Hu i save hao blong mekem faea blong boelem tea o kukum kakae?

Talem long ol studen se faea i wan denjares samting we yumi no mas pleplei wetem. Wan bigfala man o woman i mas stap wetem yu taem yu wantem laetem faea.

Serem ol studen oli go long tu grup blong tokbaot trifala kwesten ia. Wanwan grup i tokbaot wan kwesten. Givim smol taem blong oli tokbaot kwesten blong olgeta.

- From wanem wan bigfala man o woman i mas stap wetem yu taem yu wantem laetem faea?
- From wanem faea i wan denjares samting?
- Wanem sam samting yu mas mekem i stret bifo yu laetem faea?

Givim tu A4 pepa blong oli raetem ol ansa blong tufala kwesten blong olgeta long wanwan pepa. Wan pepa i blong wan kwesten. Go raon mo lisem long wanem oli stap tokbaot mo helpem olgeta blong raetem ol ansa blong olgeta long ol pepa.

Oi studen oli presentem ol ansa blong olgeta long klas. Tokbaot ol ansa blong olgeta.

Daon i gat sam impoten ansa we ol studen oli save tingbaot taem oli stap tokbaot ol kwesten blong olgeta:

- Wan bigfala man o woman i stap taem yu wantem laetem faea, no laetem faea yu wan.
- Oli no sud yusum plastik bag blong raes, kontena blong bata o bebi blong wil blong trak blong statem faea.
- Oli no mas yusum bensin mo alkol blong laetem o statem faea from tufala samting ia i kasem faea kwiktaem mo i save bonem nogud olgeta.
- Mekemsua se ples blong laetem faea i nogat ol drae wud mo drae lif i stap klosap o eni narafala samting we i save kasem faea kwiktaem.
- Taem win i strong, laetem faea blong kuk insaed long kitjin.

- Taem win i strong mo ples i drae no laetem faea blong bonem garen.
- Faea i save kilim laef mo spoilem evri samting.
- Lukaot long klos blong yu taem yu stap laetem faea.

Go aotsaed wetem ol studen long bus kitjin o long wan ples we i sef blong laetem faea.

Talem mo soem long ol studen wanem yu nidim blong laetem wan faea, ol impoten samting blong tingbaot mo mekem bifo yu laetem faea mo wanem yu mas mekem long taem blong laetem faea.

Opotuniti blong Asesmen

Luk se ol studen oli save ol samting blong tingbaot taem oli laetem faea. Ol studen bae oli raetem “i sef” o “i no sef” long en blong ol toktok ia:

- Yu laetem faea yu wan.
- Yu yusum bensin o alkol blong statem faea.
- Taem win i strong, laetem faea blong kuk insaed long bus kitjin.
- Drae lif mo wud i stap klosap long faea.
- Statem faea wetem drae lif blong kokonas.

Lesen 10: Siviks mo Komyuniti Rilesensip B

(45 min)

Fokas blong Aktiviti: Ol defren grup blong ol pipol long komyuniti

Ol Risos: Sam A3 pepa, sam kala pensel o kreton, pensel blong ol studen, sam piya we i soem ol defren memba blong komyuniti we oli stap mekem sam aktiviti olsem ol mama, ol yut, ol totel monita, ol papa, ol praemari skul studen, mo samfala moa

Vokabulari: Mama, yut, papa, studen, grup, defdefren, futbol tim

Talem long ol studen:

“Long bifo las wik yumi bin tokbaot wan impoten pesen long laef blong yumi mo hao nao impoten pesen ia i bin kontribut long laef blong yu.”

“Tedei bae yumi tokbaot ol defren grup blong ol pipol long komyuniti blong yumi mo hao nao oli stap kontribut long laef blong komyuniti. Insaed long ol viley o komyuniti blong yumi i gat ol defren grup blong ol pipol mo oli mekem ol defren wok blong kontribut i go long laef blong komyuniti blong yumi.”

Soem ol piya mo askem wanem grup ia mo wanem aktiviti oli stap mekem. Askem ol studen blong wanem grup ia long komyuniti blong olgeta. Raetem ol grup ia long bod.

Wok wetem ol studen blong tokbaot hao **ol studen blong praemari** oli kontribut long laef blong komyuniti.

Eksampol:

- Rakem ol lif raonem haos
- Klinim sospen long solwota
- Kasem wota long wel, reva o tank
- Singsing nasenol antem taem wan impoten man i kam long vilej
- Plei ol spot blong ol peren oli watjem long wan selebresen
- Mekem salusalu blong hangem long ol invaeted ges
- Karem mesej i go long wan narafala man

Not blong Tija: Raetem ol aktiviti ia i stret long konteks blong yufala.

Afta serem ol studen oli stret long namba blong ol grup blong ol pipol we oli gat long bod. Givim wanwan pepa long wanwan grup mo wanwan grup i mekem list blong hao ol grup ia oli givhan long laef long komyuniti.

Go raon long wanwan grup blong harem wanem oli stap tokbaot mo helpem olgeta blong raetem long pepa blong olgeta. Afta oli droem tri wei we grup blong pipol ia i mekem blong kontribut long laef blong komyuniti blong olgeta aninit long ol poen blong olgeta.

Kolektem ol pepa blong olgeta blong putum i go antap.

Opotuniti blong Asesmen: Lisen long ol studen oli talem wei we grup blong olgeta i kontribut blong komyuniti long olgeta.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 1 – Wik 6



Lesen 1: Spirituel mo Karakta Divelopmen (30 min)

Fokas blong Aktiviti: Ista Mande

Vokabulari: Mande, Sandei, selebretem, Ista, piknik, rus

Not blong Tija: Sam religen mo jos oli no selebretem Ista Mande. Ol studen ia oli save tokbaot wan nrafala aktiviti we oli mekem long taem ia.

Askem ol studen:

Yufala i bin mekem wanem long Ista Mande?

From wanem yumi selebretem Ista Mande?

Talem long olgeta se yumi selebretem Ista Mande nomo from Ista Sande ia stap long wan Sande i mekem se oli muvum holidei ia i go long Mande. Evri pablik holidei we i foldaon long Sande bae i muv i go long Mande.

Askem, “Wanem i hapen long Ista Sande mekem se yumi stap tingbaot mo selebretem?”

Askem ol studen blong talem storian blong olgeta long hao oli bin selebretem Ista Sande long wan fren blong hem we i sidaon klosap long hem. Afta fren blong hem i talem wanem oli bin mekem long Ista Mande.

Taem oli finis oli droem wanem we oli bin mekem long dei ia mo raetem wan sentens blong go wetem.

Helpem olgeta blong raetem ol sentens blong olgeta.

Opotuniti blong Asesmen: droem ol piya blong wanem oli mekem long ol dei ia.

Lesen 2: Pefoming At (30 min)

Fokas blong Aktiviti: *Hed, Solda, Ni mo Tow*

Ol Risos: Jat blong song blong *Hed, Solda, Ni mo Tow* (luk **Apendiks 21**)

Vokabulari: Hed, solda, ni, fingga, leg, ae, (sorae), maot, nus, tow (fingga blong leg)

Talem long ol studen se long las wik oli bin lanem ol defren pat blong bodi, hao blong lukaotem mo wanem ol wok blong olgeta. Tedei bae oli singsing abaot ol pat blong bodi ia.

Putumap jat blong song long bod mo askem hu i save song ia. Tijim singsing ia folem ol step blong tijim wan song we i stap long Wik 3, Lesen 6.

Opotuniti blong Asesmen: lisem long ol studen oli singsing gud song ia mo tajem stret pat blong bodi we oli talem.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Sefti (30 min)

Fokas blong Aktiviti: Save denja blong sam gem

Ol Risos: Magasin, niuspepa, sisis, glu, tu bigfala pepa

Vokabulari: Hae, lo, risk, gem, defren, rul

Askem ol studen hu i laekem blong pleplei ol gem mo askem olgeta blong talem sam gem we oli save.

Mekem wan lis long bod. Go tru long lis ia mo talemaot ol gud saed we ol gem ia i mekem gud long bodi blong olgeta.

Wok wetem ol studen blong aidentifaem wanem nao ol risk taem oli plei gem ia.

Askem : Wanem nao oli save mekem blong no kasem aksiden taem oli stap pleipie long ol gem ia?

Givimaot ol niuspepa mo magasin mo askem ol studen blong katemaot ol piya blong ol defren gem we oli save faenem. Ol studen bae oli yusum ol piya ia we oli katemaot blong mekem wan kolas long ol defren gem ia.

Tokbaot tufala wod ia mo eksplenem gud mining blong tufala. Afta, ol studen oli putum ol gem ia aninit long tufala taetol ia:

- Hae risk
- Lo risk

Opotuniti blong Asesmen: ol studen oli save putum ol gem oli go long stret taetol.

Lesen 5: Tekem plante kea long envaeromen blong yumi (45 min)

Fokas blong Aktiviti: No sakem doti long ol wota sos

Ol Risos: Ol kiaman anamol blong solwota (oli stap long Numerasi Kit)

Vokabulari: Solwota, doti, totel, dolfin, kaofis, selfis

Not blong Tija: Yu save oganaesem klinap long sanbij, ples blong pleplei o wan pak, rod, krik, bus, reva, wota sos o yad blong skul. Hemia i dipen long ples we yu stap long hem. Yu save wok wetem komyuniti blong yufala blong oganaesem wan klinap long viley long Envaeromen Wik o wan narafala taem.

Talem long olgeta se long las lesen, yumi bin tokbaot from wanem yumi stap bonem ol samting weoli mekem long plastik o raba olsem plastik botel, plastik bag o slipa mo from wanem yumi no masbonem ol samting ia.

Askem olgeta:

Hemia i wan gudfala wei ia blong karemaot doti long yad blong yufala? From wanem?

Plante long yumi tu i stap yusum solwota o krik o reva olsem ol ples blong sakem doti blong olgeta. Yu ting se fasin ia i gud ia? From wanem?

Infomesen blong Tija

Taem yumi sakem doti long solwota yumi stap posenem mo kilim ol laef samting blong solwota olsem ol fis, ol selfis, ol korel, ol sta fis, ol namarae, ol totel, ol kaofis,

ol dolfin mo fulap narafala laef samting we oli liv long solwota.

Yumi sud neva sakem balun long solwota, balun hem i kalaful be taem yu lego i flot long solwota, be hem i wan denja long laef blong ol anamol long solwota olsem totel. Totel i save kakae mo solem daon balun from taem hem i luk i stap flot, hem i ting se hem i wan kakae so taem hem i kakae bae balun i save fas o blokem trot blong hem mo bae hem i ded.

Taem yumi gat pati o piknik long solwota mo oli pleplei wetem balun, yumi no mas sakem ol brokbrok balun long solwota. Yumi mas putum long wan plastik o basket mo tekem i gobak long haos blong sakem i go long stret ples blong doti.

Ol doti long envaeromen blong yumi hem i denjares long laef blong ol anamol mo ol plan long solwota o reva mo yumi tu. Yumi mas pikimap ol doti bifo oli go daon kasem reva mo solwota mo kilim ol laef blong ol laef samting insaed long reva mo solwota.

Tokbaot ol plastik doti wetem ol studen mo afta yu save tekem ol studen oli go long ples we yu jusum blong oli pikimap ol doti we i denja blong ol anamol mo fulumap long ol bag o basket o plastik blong doti mo putum long ples blong putum o sakem doti.

Afta oli go wasem gud han blong olgeta.

Opotuniti blong Asesmen: Tokbaot from wanem yumi no mas sakem doti long solwota, reva, krik mo wota sos.

Lesen 6: Pefoming At (30 min)

Fokas blong Aktiviti: Mekem tin dram

Ol Risos: Kad blong bit, ol defren saes blong emti tin, wan smol stik, emti plastik blong raes, skoj, naef, string, sel blong kokonas

Vokabulari: Saon, pat, raes, emti, tin, stik

Not blong Tija: Jusum wan aktiviti we i stret long envaeronmen blong yu. Askem ol studen blong karem wan emti tin mo wan emti plastik blong raes o tu sel blong kokonas mo wan smol stik long haos i kam long skul wan dei bifo lesen ia. Yu save

jusum blong mekem kokonas kastanet we bae yu nidim string, wan smol stik, naef blong mekem hol long sel blong kokonas, tu sel blong kokonas.

Ol studen oli singsing *Hed, Solda, Ni mo Tow* wetem ol aksen.
Soem tin dram we yu bin mekem finis mo askem se samting ia i wanem?

Askem ol studen blong rere long wan tin mo smol stik blong olgeta we bae oli karem i kam. Soem hao blong kavremap en blong tin we i open wetem emti plastik blong raes mo selotaep. Mekemsua se plastik blong raes i mas taet gud. Ol studen oli lukluk gud wanem yu stap mekem.

Givim skoj long wanwan studen. Go raon blong luk se Ol studen oli stap mekem stret mo helpem olgeta we oli no save hao blong mekem gud. Taem oli finis, soem hao blong plei tin dram.

Kilim saed mo aninit blong tin mo askem sapos saon blong tufala i semak o no?

Yusum tin dram ia you save:

- Plei fas folem fas kad blong bit
- Plei tugeta wetem ol studen
- Ol studen nomo i plei
- Plei tufala narafala bit; plei long saed, en mo kona blong tin

Talem tu se ol defren saes blong tin i gat ol defren saon. Plei fas bit semak wetem tu tin blong defren saes. Askem ol studen se tufala narafala bit bae i nidim hamas defren saes blong tin.

Talem wanem saes blong tin blong mekem wanem pat blong bit olsem:

tan = ol smolsmol tin

tata = midel saes blong tin

un = bigfala saes blong tin

Plei trifala bit wetem ol defren saes tin wetem ol studen.

Opotuniti blong Asesmen: Luk se ol studen oli mekem gud tin dram blong olgeta.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Mekem lokol kakae: Tanna sup

Ol Risos: Sospen, faeawud, masis, dis, krab kokonas, busnaef, smol naef, pila blong poteto, wan mit w i stret, faeawud, klin wota, aeian blong kuk, anian, lai o galik, karot mo kabis, kumala, maniok, tu klin ston blong laplap, ol plet mo spun blong inaf long evriwan

Vokabulari: Klin, sospen, spun, naef, faea, faeawud, kabis, kumala, mit

Not blong Tija: Wan dei bifo long lesen ia, talem o givim wan not blong famle long ol studen blong oli karem ol kakae blong kukum olsem: kumala o maniok, kabis, karot, anian, aelan kabis o ol narafala kabis, drae kokonas, wan mat, wan bag o basket blong lif kokonas, faea wud.

Askem olgeta:

Hu i laekem blong kakae aelan kakae?

Hu i no laekem mo from wanem?

Serem ol studen oli go long ol grup ia, mekemsua se ol studen wetem ol spesel nid oli tekpat tu.

Grup 1: Olgeta blong laetem faea

Ol studen oli putum faeawud long wan ples we oli ting se i stret olsem oli lanem long las lesen. Oli putum gud aeian blong kuk long ples ia. Ol studen oli kolektem sam smolsmol stik blong statem faea. Stap wetem ol studen taem blong laetem faea. Taem faea i laet, oli putum sospen wetem wota mo mit i go blong i boel.

Grup 2: Olgeta blong karemaot skin blong ol kumala mo maniok

Putumdaon wan mat long ples we i klin. Putum ol kakae long wan basket blong lif kokonas o wan bag we bae oli tekemaot skin blong ol kakae i go long hem. Givim ol pila blong ol studen oli karemaot skin blong ol kumala. Sapos pila i nogat, bae yu nomo i karemaot skin blong kumala. Stap wetem ol studen taem blong tekemaot skin blong maniok.

Ol studen oli fulumap wan dis wetem klin wota blong wasem ol kakae we oli karemaot skin blong hem. Ol studen oli wasem gud ol kakae mo putum long wan narafala klin dis. Katem ol kakae i smolsmol blong i tan kwik. Talem long olgeta se bae kakae i tan mo kwik taem yu katem i smolsmol.

Grup 3: Olgeta blong klinim karot, anian, mo lae.

Klinim ol anian, wasem mo katem i smolsmol. Klinim lae, wasem i klin mo kilim i sofsof wetem tu klin ston blong laplap we i oli wasem i klin gud. Klinim ol karot, wasem gud afta katem long smolsmol pis. Putum evriwan long wan klin dis mo kavrempa wetem wan klin kaliko o lif blong laplap.

Grup 4: Olgeta blong skrasem kokonas.

Putum gud skrasem kokonas long wan jea we i naf blong ol studen. Putum wan klin dis blong skrasem kokonas i go long hem. Soem long olgeta hao blong skrasem kokonas. Givim janis long olgeta blong skrasem kokonas be sapos oli no save, bae yu jes finisim. Miksim wetem wota mo skwisimaot melek blong kokonas i go long wan narafala klin dis mo kavrempa gud. Talem long ol studen blong oli stanem long wan sef ples mo luk wanem bae yu stap mekem.

Askem ol studen:

- From wanem yumi putum mit i go long sospen fastaem?
- Wanem nao bae i go long sospen? From wanem?
- Hao nao yumi save se kakae ia i tan?

Ol studen oli singsing *Taem blong Kakae* taem oli stap wet long kakae blong i tan o taem yu stap kasem kakae i go long plet blong olgeta.

Ol studen oli singsing song ia:

Bifo yumi Kakae

Yumi mas talem se,

“Tangkiu God, tangkiu God”

Long gudfala kakae ia

Amen

Afta, evriwan i kakae tugeta long lanj.

Opotuniti blong Asesmen

Luk hao ol studen oli help blong mekem wok long grup blong olgeta.

Lesen 10: Siviks mo Komyuniti Rilesensip A

(45 min)

Fokas blong Aktiviti: Ol wok long klas Pat 2

Ol Risos: Jat blong Ol wok long klasrum wetem ol nem blong olgeta i stap long ol defren wok, wan folda blong putum ripot blong ol wok blong ol grup blong Wik 4 kasem Wik 10 i go long hem.

Vokabulari: Responsibiliti, duti, klasrum

Not blong Tija: Lesen ia hem i folem nomo long Lesen 10 blong Wik 4. Lesen ia hem bae i go kasem Wik 8 mo Wik 10. Ol studen bae oli raetem ripot long Fraede blong Wik 5, 7 mo 9 mo bae oli raetem ripot blong Wik 6, 8, mo 10 long Lesen 10 blong ol wik ia.

Letem ol studen oli save se stat long bifo las wik mo kam kasem las wik, oli bin stap karemaot ol wok blong olgeta long klasrum we nem blong olgeta i stap long hem blong mekem.

Askem ol studen:

- Hu i bin enjoem hem taem hem i stap mekem ol wok ia?
- Wanem nao yufala i save luk se i kam moa gud afta we yumi bin statem blong mekem ol wok ia?
- Hao nao yufala i bin oganaesem yufala blong wok long tu wik we i go?

- Yufala i ting se yufala i bin mekem wan gudfala wok? Yes o no? From wanem?
- From wanem nao yumi stap mekem ol wok ia long klasrum blong yumi?
- Wanem nao yu bin lanem long ol responsibiliti ia?
- Yu ting se sapos oli givim wan moa duti long yufala, hao nao bae yu mekem naoia?
- Yu ting se yu save mekem kaen wok olsem tu long haos blong yu? From wanem?

Tokbaot ol kwesten we i stap mo lisem long wanwan grup blong givim ansa blong olgeta. Taem wanwan grup i ripotem ol ansa blong olgeta, talem tangkiu long olgeta from ol gudfala ansa blong olgeta.

Ol studen oli wok wetem ol grup memba blong raetemap wan ripot long ol **duti** we oli bin mekem long pas tu wik.

Eksampol:

Oi memba blong grup	Dan, Sussie mo Joe
Deit	12/04/16 kasem 22/04/16
Responsibiliti:	Fren Flaengfokis: Talem long ol fren we oli absen wanem oli bin mestem.
Mak blong grup	J
Wanem nao grup i bin mekem	Mifala i jusum blong givim wan gud[J]from mifala i bin helpem ol fren blong mifala blong oli save long wanem we oli bin mestem taem oli no kam long skul. Mifala i bin helpem fulap fren. Ol nem blong olgeta fren ia hem i Meri, Sam, Pita, Jon mo Tom. Mifala i glad tumas blong mekem wok ia.
Wan samting blong mekem i kam gud moa	Wan samting we mifala i nid blong mekem i kam gud moa hem i blong toktok gud long ol fren mo soem gud ol wok.

Mak blong asesem wok blong grup

⌚..minim i gud	Evriwan long grup oli bin wok gud long tim blong karemaot duti mo oli mekem wetem wan gudfala hat.
⌚..minim i nidim blong mekem i gud moa yet	Sam memba nomo oli stap mekem wok blong grup.

Kolektem ol ripot mo putum insaed long wanwan folda blong wanwan grup. Putum ol folda long wan ples we ol narafala grup i save ridim wanem ol narafala grup oli bin raetem.

Opotuniti blong Asesmen: Jekem sapos wanwan grup i raetem ripot.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 1 – Wik 7



Lesen 1: Spirituel mo Karakta Dvelopmen (30 min)

Fokas blong Aktiviti: Palolo wom

Ol Risos: Wan map blong wol, pijs blong palolo wom

Vokabulari: Palolo, wom, Oktoba, Novemba

Not blong Tija: Lesen ia blong palolo wom bae i stret blong ol skul we i stap klosap long solwota. Long yu we skul blong yu i stap farawei long solwota yu save jusum wan aktiviti we i defren olsem taem blong lukaot wael pig o faol o fis blong reva o lukaotem flaengfokis.

Askem ol studen:

- Hu i testem palolo wom finis?
- Hu i laekem tes long hem?
- Hu i no laekem tes blong hem?
- Hu i no testem nating?

Talem long ol studen se palolo wom oli faenem long hamas ples nomo long wol. Ol ples ia i gat Indonesia, Vanuatu, Fiji, Samoa mo American Samoa.

Ol pipol oli kukum palolo long ol defren stael mo kakae mo sam oli kakae we i no tan. Palolo i kamaot sot taem nomo. Oli kamaot long las taem we mun i sep olsem banana long manis blong Oktoba mo Novemba. Sam ples oli mekem ol net blong kasem palolo.

Ol studen oli droem palolo wom long buk blong olgeta. Oli raetem tri wod o sentens we i diskraebem ol wom ia aninit long pijs blong palolo wom. Oli save raetem abaot tes, filing, smel o lukluk blong hem.

Kolektem ol buk blong olgeta blong jekem wok blong olgeta.

Opotuniti blong Asesmen

Luk se ol studen oli raetem tri wod o sentens we i tokbaot ol wom ia.

Lesen 2: Pefoming At (30 min)

Fokas blong Aktiviti: *Ol Sens*

Ol Risos: Jat blong *Ol Sens* song (luk Apendiks 21)

Vokabulari: Ol sens, ae, sorae, nus, maot, lukluk, harem, smelem, kakae

Ol studen oli singsing *Halo*.

Askem ol studen: Hu i save song ia *Ol Sens*?

Ridim song ia mo spendem smol taem olsem tu minit blong tokbaot hem.

Askem ol studen: Song ia hem i tokbaot wanem?

Folem ol step blong tijim song blong tijim song ia.

Opotuniti blong Asesmen: Luk se ol studen oli tajem ol stret pat blong bodi.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Helti Individuel mo Komyuniti (30min)

Fokas blong Aktiviti: Hao blong klinim yu

Ol Risos: Pija blong pat blong bodi (**Apendiks 11a**)

Vokabulari: Klinim, gud, sop, wota, klin

Singsing *Hed, Solda, Ni mo Tow*.

Talem long ol studen se evri pat blong bodi i impoten tumas from oli gat ol defren wok blong olgeta so hem i impoten tumas blong yumi mas lukaotem gud bodi blong yumi.

Serem Ol studen oli go long seven smol grup foler ol defren pat blong bodi ia. Askem ol studen hao nao yumi sud stap klinim yumi speseli ol pat we oli lukluk long hem.

Wanwan grup i tokbaot hao blong klinim gud ol pat blong bodi ia. Givim smol taem blong oli tokbaot long grup blong olgeta afta askem olgeta blong talem long bigfala grup.

Mekemap raem blong ol defren bodi pat wetem ol studen.

Eksampol:

Nalaus i droem nus long Matus

Opotuniti blong Asesmen: Ol studen oli raetem nem blong ol defren bodi pat.

Lesen 5: Tekem plante kea long Envaeromen blong olgeta (45 min)

Fokas blong Aktiviti: Lukaotem gud ol samting long bus

Ol Risos: Kolektem ol samting we oli liv long bus o karem ol pija blong ol anamol

Vokabulari: Pijin, wael, anamol, ol plan, lised

Bifo yu tokbaot olsem wanem blong lukaotem gud ol laef samting we oli stap long bus, askem ol studen blong wok long tu o tri grup.

Askem long ol studen blong oli talem nem blong ol laef samting we oli stap liv long ol bus long Vanuatu o long ol bus blong aelan o viley o komyuniti blong olgeta.

Talem long ol studen se ol bus blong yumi i fulap long ol laef samting, evri samting we oli laef oli stap gro mo oli stap jenis. Ol laef samting long bus hem i ol plan mo ol anamol olsem, pidjin, ol wael faol, ol buluk, nanigot, pig, dog, lised, snek, mo fulap narafala moa.

Taem yumi go long bus yumi mas tingbaot ol laef samting ia:

- Yumi no mas katem ol tri long bus blong nating nomo.
- Sapos yumi katemdaon wan bigfala tri, yumi mas planem wan narafala wan blong tekem ples blong hem.
- Yumi katemaot ol rop we oli klaem kavremap wan tri o wan smol tri.
- Yumi no stonem ol pijin.
- Sapos yumi wantem kakae pijin yumi tekem inaf nomo blong yumi save kukum mo kakae.
- Yumi no mas kakae ol pijin evritaem, givim taem blong oli putum eg blong gat ol bebi pijin. Yumi mas mekem i semak wetem ol narafala wael anamol.
- Yumi no mas laetem faea long bus blong nating nomo. Sapos yumi laetem faea yumi mas mekemsua se i ded gud bifo yumi gobak long haos.

Tekem ol studen oli go aotsaed blong planem wan tri long skul. Planem wan frut tri o wan komesel tri olsem sandelwud o mahagoni, kokonas, kakao, kofi o wan narafala tri we i gat valiu long hem.

Oli mas lukaotemgud ol tri ia; oli mas stap wasem gud stampa blong hem mo katemaot ol gras we i gro bigwan raon long stampa blong ol tri ia.

Opotuniti blong Asesmen: Tokbaot hao blong lukaotem gud ol wael anamol long bus.

Lesen 6: Pefoming At (30 min)

Fokas blong Aktiviti: *Hemia Wei blong Wasem Klos*

OI Risos: Jat blong song *Hemia Wei blong Wasem Klos* (luk **Appendix 21**), ol trifala kad blong bit (**Apendiks 3**)

Vokabulari: Wasem, brum, rakem, waepem, klinim, hangem

Klapem ol bit ia mo ol studen oli mekem semak.

Talem se song ia i tokbaot ol defren wok we yumi stap mekem long klasrum mo long haos tu.

Poentem ol wod blong song long taem blong singsing. Singsing wan laen mo ol studen oli singsing folem yu.

- Askem ol studen blong tingbaot aksen we i stret long ol wod. Singsing bakegen wetem ol studen mo mekem ol aksen. Taem i kam long “Evri Mande moning” ol studen oli klapem han i stret long ol silebol blong ol wod ia.
- Askem ol studen blong talem wan wok blong oli singsing olsem; hangem klos, rakem lif, brum long flo, waepem jea, klinim ples, mo samfala moa. Oli tingbaot

wan wok blong singsing blong ol narafala dei blong wik. Singsing wetem ol studen mo mekem aksen blong ol wok we ol studen oli talem.

- Askem: Wanem sam wok we yumi no bin singsing long hem?

Ol studen oli talem sam long ol wok ia. Talem se bae oli singsing ol wok ia long nekis lesen.

Ol studen oli singsing *Tata*.

Opotuni blong Asesmen: Luk se evriwan i mekem stret aksen blong wod.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30min)

Fokas blong Aktiviti: Wanem i hapan long wan mared?

Ol Risos: Fo envelop we insaed i gat ol foto o piya blong ol defren pat blong ol mared o ol sentens we i talem ol defren pat blong wan mared, fo tin o kontena blong putum flawa, lif o riben long olgeta

Vokabulari: Mared, kastom, pat, rere, kukum, kakae, pem, blokem

Askem ol studen:

- Wanem wan samting we yu bin lanem taem yumi rere long ol kakae, kukum mo kakae Tanna sup blong yumi?

Lisen long ol ansa blong ol studen mo tokbaot lelebet ol ol ansa blong olgeta. Talem long olgeta se long lesen ia bae oli lukluk long wanem i hapan long wan mared.

Askem olgeta:

- Hu i luk wan mared finis?
- Yu bin stap long saed blong man o saed blong woman we i mared?
- Wanem nao yu bin mekem?

Lisen mo tokbaot wanem ol studen oli talem.

Serem Ol studen oli go long fo grup mo givim envelop long wanwan grup. Askem olgeta blong luk ol piya o ol sentens mo putum long oda long wei we oli ting se wan mared i sud tekples olsem. Afta, jekem ol wok blong olgeta mo askem sapos evriwan i agri long oda ia.

Askem wanwan grup blong mekem wan flawa blong mared we woman we i mared i holem. Oli

go long tebol we ol flawa, lif, rop, riben i stap long hem mo jusum ol flawa blong yusum. Taem oli finis oli putum long kontena long tebol blong olgeta.

Opotuniti blong Asesmen

Luk se Ol studen oli wok tugeta blong mekem wan flawa blong mared.

Lesen 10: Siviks mo Komyuniti Rilesensip B

(45 min)

Fokas blong Aktiviti: Hao oli tekpat i kam long laef blong skul


Ol Risos: Ol A4 pepa o eksasaes buk blong olgeta nomo

Vokabulari: tekpat, mama, papa, yangfala, praemari studen, jif, jos lida

Talem long las lesen, yumi bin tokbaot ol defren wok we ol defen pipol long komyuniti i stap mekem blong tekpat i go long komyuniti blong olgeta. Long lesen ia bae yumi tokbaot hao ol defren pipol blong komyuniti i kontribut i kam long skul.

Priparem pepa blong ol studen olsem hemia daon be ol spes i emti nomo.

Eksampol:



Serem ol studen oli go long faev grup mo askem wanwan grup blong jusum wan grup blong ol pipol long komyuniti (olsem ol yangfala, ol mama, ol papa, ol jif, ol jos lida) blong mekem semak.

Ol studen oli wok long ol grup blong olgeta. Wanwan studen i gat wan pepa blong raet. Afta oli serem ol poen i go long wanwan long olgeta blong raetem long pepa blong olgeta. Ol studen long wan grup i givhan long eni memba we i faenem i had lelebet blong raetem blong hem.

Taem oli finis oli serem long klas sapos i gat taem yet. Be sapos taem i no inaf bae oli serem long wan narafala taem.

Putumap wok blong olgeta i go antap blong oli save go stap ridim.

Opotuniti blong Asesmen

Luk se ol studen oli tokbaot mo raetem long pepa ol wok blong ol defren grup long komyuniti.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 1 – Wik 8



Lesen 1: Spirituel mo Karakta Dvelopmen (30 min)

Fokas blong Aktiviti: Ol tabu

Ol Risos: Fo bigfala pepa, 4 mak, pensel, ol kala pensel

Vokabulari: Tabu, namele lif, ol notis, ol fanis

Talem long ol studen se las wiken yumi tokbaot Palolo wom we i kamaot long en blong manis blong Oktoba mo Novemba. From hem i kamaot long tufala taem ia long wan yia ol pipol oli meksua se oli karem fulap olsem oli save. Be long ol narafala anamol we i stap long ol bus o solwota o reva yumi ol pipol i mas gat kontrol long hem.

Wan wei blong gat kontrol hem i ol tabu we ol jif o olgeta blong envaeromen i stap putum blong yumi, ol pipol i mas rispektem ol laef samting long bus, solwota mo reva.

Wanwan man o woman tu oli stap putum tabu long ol propeti blong olgeta olsem garen, flawa, graon mo sam moa narafala samting blong olgeta.

Serem ol studen oli go long fo grup.

Serem fofala kwesten ia i go long wanwan grup:

- Wea ples nao yu bin luk wan notis blong tabu?
- Wanem nao oli stap yusum blong soem tabu?
- From wanem nao ol jif o ol man blong envaeromen i stap putum ol tabu, eksampol tabu long solwota?
- Taem yu luk wan tabu, wanem nao yu sud mekem?

Askem ol studen blong raetem ol ansa blong olgeta long pepa we yu givim long wanwan grup blong olgeta.

Go raon blong helpem wanwan grup blong ansarem kwesten blong olgeta. Oli save droem ol piya olsem ansa blong olgeta.

Taem oli finis oli prisentem ansa blong kwesten blong olgeta long klas.

Opotuniti blong Asesmen

Lisen long ol gudfala fasin we ol studen oli talem.

Lesen 2: Pefoming At (30 min)

Fokas blong Aktiviti: Teouma Brij i stap Foldaon

Ol Risos: Jat blong song blong Teouma Brij i stap Foldaon (luk **Apendiks 21**)

Vokabulari: Brij, foldaon, bildim bak, aeian, hapi, wari, brikis, silva, gol

Not blong Tija: Yu save jenism nem blong brije i go long wan nem blong wan brije long ples blong yu. Mo yu save jenism ol materiel blong bildim brije we i stret long konteks blong yufala.

Askem ol studen blong singsing long *Hemia Wei blong Wasem Klos* wetem ol defren wok we oli no bin singsing long hem long las lesen.

Askem wanem samting nao yumi stap yusum blong bildim brije. Raetem daon ol ansa long bod.

Nao, tijim *Teouma Brij i stap Foldaon* long ol studen. Yusum ol samting we ol studen oli talem blong jenism ol materiel blong bildim brije we i stap long singsing ia. Singsing song ia wetem ol niufala samting we oli studen i talem.

Long en blong lesen, singsing *Tata*.

Opotuniti blong Asesmen

Luk se ol studen oli singsing gud song ia.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Sefti (30min)

Fokas blong Aktiviti: Tekem responsibiliti long akseni blong yu

Oi Risos: Bana o posta we i talem se, “Tekem responsibiliti long akseni blong yu”

Vokabulari: Responsibiliti, akseni, hapi

Soem ol studen toktok ia we i talem se, “Tekem responsibiliti long akseni blong yu” mo ol studen mo tokbaot mining blong toktok ia.

Talem wan storian blong yu long hao yu bin tekem responsibiliti long akseni blong yu.

- Wanem nao mining blong toktok ia?
- Yu save givim wan eksampol long wan taem we yu bin tekem responsibiliti long akseni blong yu?
- From wanem hem i impoten blong yu tekem responsibiliti long akseni blong yu?
- Yu ting se narafala man bae i filim olsem wanem taem yu wan yu tekem responsibiliti long akseni blong yu?
- Olsem wanem long ol famle blong yu, yu ting se bae oli glad long yu taem yu soem wan fasin we yu duti long akseni blong yu?

Mekem ol grup blong tritri mo letem olgeta oli givim wan eksampol long hao nao wanwan long olgeta oli bin tekem responsibiliti long ol akseni blong olgeta. Wanwan grup i serem ol eksperiens blong grup memba blong olgeta.

Askem ol studen:

- Hem i wan gudfala fasin blong yu duti long aksen blong yu?
- Yu ting se i oraet blong yu letem wan narafala studen o man i duti long ol aksen blong yu?

Raetem ol ansa blong sam studen long tufala kwesten ia.

Opotuniti blong Asesmen

Lisen long ol studen long wanwan grup i talem hao oli bin tekem responsibiliti long aksen blong olgeta.

Lesen 5: Tekem plante kea long Envaeromen blong yumi (45min)

Fokas blong Aktiviti: Mekem wan garen blong flawa

Ol Risos: Ol defren saes kotena, ol sid blong flawa, han blong flawa, ol smolsmol plan blong flawa, ol kontena blong planem flawa, wan baket blong wota, wan smol kontena, wan tul blong mekem gud graon

Vokabulari: Sid, han, plan, wota, kontena, tul, graon

Not blong Tija: Askem ol studen blong karem wan naes flawa long haos blong hem i kam long skul. Oli mas askem ol famle blong olgeta fastaem bifo oli tekem ol flawa ia.

Tekem ol studen oli go raon long skul blong lukluk ol defren flawa mo plan we i gro insaed long eria blong skul.

Insaed long klasrum, askem ol kwesten ia:

- Wanem nao yu luk taem yumi stap wokbaot raonem skul?
- Wanem kala blong ol flawa we mi gat long han blong mi?
- Yu laekem wan skul we i nogat flawa mo plan long hem o no?
- From wanem nao yumi planem ol flawa mo plan insaed long yad blong skul?

Talem long ol studen se ol flawa i mekem skul, haos mo ol viley i luk naes tumas. Ol flawa yumi stap yusum blong mekem klasrum, haos, ofis mo garen i luk naes.

Askem ol studen blong oli klinim wan ples aotsaed long klasrum blong olgeta mo bae oli planem flawa. Yufala i save mekem gud wan garen blong flawa we i stap finis. Mekemsua se oli givim wota long ol flawa we oli jes planem.

Talem long ol studen hao blong lukaotem gud garen blong flawa blong olgeta:

Oli mas pulumaot ol gras long garen blong flawa blong olgeta

Givim wota long ol flawa evri moning mo aftanun afta klas kasem ol plan i gro gud
Putum ol ded gras raon long stampa blong ol flawa sapos san i strong tumas
Taem yufala i finis, evriwan i mas wasem gud ol tul we yufala i yusum mo wasem gud han
blong olgeta wetem sop.

Opotuniti blong Asesmen

Luk se ol studen oli save gud hao blong planem flawa yusum ol sid, branis, ruts mo ol
potplan.

Lesen 6: Pefoming At (30 min)

Fokas blong Aktiviti: *Insi Winsi Spaeda*

Ol Risos: Jat blong singsing blong *Insi Winsi Spaeda* (luk **Apendiks 21**)

Vokabulari: Spaeda, ren, klaem, bakegen

Ol studen oli singsing *Halo*.

Putumap jat blong *Insi Winsi Spaeda* i go long bod.

Askem ol studen: hu i fraet mo hu i no fraet long spida?

Folem ol step blong tijim wan niufala song blong tijim song ia.

Mekem aksen blong song ia wetem ol studen.

Askem ol studen blong spelem sam wod blong singsing olsem: spaeda, san, tri, kamaot mo
wota.

Oli singsing *Tata*.

Opotuniti blong Asesmen

Lisen long ol studen oli talem gud ol toktok long song ia.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30min)

Fokas blong Aktiviti: Mekem ol trap blong kasem faol o pijin


Ol Risos: (**Apendiks 20**) Ol smol stik (olsem han blong haebiskas) o bambu, rop blong bus o
string o lif blong pandanas o rop we oli mekem wetem skin blong branj blong burao, wan smol
naef, sisik

Vokabulari: Trap, stik, rop, fasem, bambu

Not blong Tija: Talem ol studen we oli stap long grup blong olgeta long las lesen blong wok tugeta. Ol studen long wanwan grup i katem ol stik o bambu mo karem i kam long skul blong grup blong olgeta i wok wetem. Soem longfala blong ol stik we yu wantem olgeta blong karem i kam.

Askem ol studen

- Hu i luk samting ia finis?
- Hu i bin mekem wan olsem finis?
- Hu i laekem blong mekem wan olsem?



Talem long olgeta se hemia nao wanem bae oli mekem long lesen ia.

Askem ol studen oli stanap klosap mo mekemsua se evriwan i save luk wanem yu stap mekem. Soem hao blong mekem trap ia. Talem long olgeta se long stat ol stik i mas longfala afta i stap kam sot blong go finis. Mo tu ol fofala stik blong wanwan level i mas longfala semak. Soem hao blong fasem stik long wan o tu level afta talem olgeta blong oli go mekem long grup blong olgeta.

Serem ol string o rop long wanwan grup blong oli yusum blong fasem ol stik o bambu blong trap blong olgeta. Givim sisis long wanwan grup sapos oli nidim. Go raon blong helpem olgeta. Taem oli finisim trap blong olgeta bae oli go aotsaed mo traem ol trap blong olgeta aotsaed. Askem wanem bae oli putum insaed long trap blong pijin o faol i luk blong ol faol o pijin i luk mo kam from.

Talem long olgeta se i no wan gudfala fasin blong mekem trap blong kasem faol blong wan narafala man. Oli save karem i go long garen o bus blong kasem wael faol o pijin.

Askem ol studen:

- Hu i lanem wan niu samting long lesen ia?
- Wanem wan valiu we yu lanem taem yufala i stap mekem trap ia?

Opotuniti blong Asesmen

Luk se ol studen oli save fasem ol stik wetem rop

Lesen 10: Siviks mo Komyuniti Rilesensip A (45min)

Fokas blong Aktiviti: Ol Wok long Klas Pat 2 i kontiniu

Ol Risos: Jat blong “Ol wok long Klasrum”, wan folda o buk blong putum ol ripot blong ol grup blong Wik 6, Wik 8 mo Wik 10, glu, niuspepa, kala, sanbij, glita, mak, ol drae lif o stik o eni samting we ol studen oli save yusum blong flasem log buk blong olgeta.

Vokabulari: Gud, helpem, flasem, mekem i naes

Not blong Tija: Long Wik 10, gat wan bigfala toktok wetem ol defren grup afta oli

ridim ol ripot long folda blong olgeta.

Leten ol studen oli save se tede bae oli raetem ripot blong wanem we oli bin mekem blong wik we i pas.

Go tru long ol kwesten ia bakegen blong rimaedem ol studen hao blong raetem ripot blong olgeta:

- Wanem nao wok blong yufala?
- Hao nao yufala i bin oganaesem yufala blong wok long tufala wik we i go?
- Yufala i ting se yufala i bin mekem wan gudfala wok? Yes o no? From wanem?
- From wanem nao yumi stap mekem ol wok ia long klasrum blong yumi?
- Wanem nao yu lanem long ol responsibiliti ia?
- Yu ting se sapos oli givim wan moa responsibiliti long yu, bae yu mekem olsem wanem?
- Yu ting se yu save mekem kaen wok olsem tu long haus blong yu? From wanem?

Tokbaot ol kwesten we i stap mo lisen long wanwan grup blong givim ansa blong olgeta. Taem wanwan grup i ripotem ol ansa blong olgeta, yu talem ol gudfala toktok long ol studen from ol gudfala ansa blong olgeta.

Ol studen oli wok wetem ol grup memba blong raetemap wan ripot blong ol responsibiliti blong olgeta we oli bin mekem long wik we i pas. Oli save yusum templet long Wik 6.

Oli studen i yusum ol samting we yu provaedem blong flasem folda blong olgeta.

Taem oli finis, oli putum ripot blong olgeta i go long folda blong olgeta. Afta oli putum blong ol narafala grup oli save ridim.

Opotuniti blong Asesmen

Jekem sapos wanwan grup i wok tugeta blong raetem ripot blong olgeta.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 1 – Wik 9



Lesen 1: Spirituel mo Karakta Dvelopmen (30min)

Fokas blong Aktiviti: Tekem not long ol mesej

OI Risos: Storian blong *No Mekem Olsem Mi* (**Apendiks 12**), bana we i talem taetol ia: “Tekem not long wan mesej” (o yu save raetem long bod)

Vokabulari: Mesej, mesenja, wan, mekem, talem

Talem stori blong *No Mekem Olsem Mi* long ol studen. Taem yu finisim talem storian askem long ol studen:

- Wanem nao yu bin lanem long storian ia?
- Yu ting se i stret blong apu ia i talem long Wokot blong no smok be hem i stap smok?
- Yu ting se bae Wokot i lisen long apu?
- Yu ting se toktok blong apu ia i stret?

Talem long ol studen se, “Plante taem yumi stap talem ol samting we yumi wanwan i no stap mekem tu. Yumi olsem apu ia long storian ia. Yumi talem ol samting long narafala pipol be yumi no stap mekem.”

Askem wanwan studen blong tingbaot wan samting we oli stap talem long ol fren blong olgeta o brata o sista blong olgeta blong mekem be olgeta wanwan i no stap mekem, olsem no sakem doti olbaot, no kakae swit tumas, no klaem long tri, mo samfala moa.

Askem wanwan studen blong talem wan samting we oli strong blong talem long ol narafala man be olgeta i no save mekem.

Oi narafala studen oli lisen long taem oli stap toktok.

Opotuniti blong Asesmen

Lisen long wan samting we oli stap talem long ol narafala be olgeta oli no stap mekem samting ia.

Lesen 2: Pefoming At (30 min)

Fokas blong Aktiviti: *Yumi Kam Tugeta Moa*

OI Risos: Jat blong *Yumi Kam Tugeta Moa* (luk **Apendiks 21**)

Vokabulari: Tugeta, moa, hapi, fren, bae

Oi studen oli singsing *Halo*.

Askem ol studen

- Hu i laekem blong stap go tugeta wetem ol narafala pipol blong selebretem wan ivent o mekem wan samting? From wanem?

Putum jat blong song blong *Yumi Kam Tugeta Moa* long bod. Poentem long ol wod mo ol studen oli talem ol wod ia. Helpem olgeta long ol wod we oli no save ridim. Askem sapos eni studen i save song ia finis. Sapos i gat studen i givhan blong tijim ol narafala studen long singsing song ia.

Tijim song ia long ol studen we oli no save singsing ia yet.

Singsing song mo poentem ol wod. Afta singsing wan laen mo ol studen oli singsing bihaen folem yu. Afta, singsing song ia wetem ol studen.

Askem ol studen blong oli stanap mo holem han long wan sekel. Soem ol aksen ia blong singsing long ol studen.

Ol wod blong song	Aksen we i stret long wod
<i>Yumi kam tugeta moa</i>	Stanap long wan bigfala sekol mo holem han o solda blong fren long tufala saed blong yu
<i>Tugeta</i>	Wokbaot 2 step i go long midel
<i>Tugeta</i>	Wokbaot 2 step i go bak aotsaed
<i>Yumi kam tugeta moa</i>	Stanap long bigfala sekel mo holem han mo solda
<i>Bae yumi hapi</i>	Seksek tu taem i go long raet mo tu taem i go long lefsaed
<i>fren blong yu</i>	Klapem tugeta han (olsem hae faev) wetem fren long raetsaed blong yu
<i>i</i>	Tanem yu
<i>fren blong mi</i>	Klapem tugeta han (olsem hae faev) wetem fren long lefsaed blong yu
<i>Fren blong mi</i>	Klapem tugeta han (slapem han) wetem fren long lefsaed blong yu
<i>i</i>	Tanem yu
<i>Fren blong yu</i>	Klapem tugeta han (slapem han) wetem fren long raetsaed blong yu.
<i>Yumi kam tugeta moa</i>	Stanap long bigfala sekol mo holem han mo solda
<i>Bae yumi hapi</i>	Seksek tu taem i go long raetsaed mo tu taem i go long lefsaed.

Askem olgeta, Hu i laekem song ia?

Ol studen oli singsing *Tata*.

Opotuniti blong Asesmen

Luk se ol studen oli singsing mo mekem gud aksen blong song.



Lesen 3: Muvmen mo Gem (20 min) Jusum wan aktiviti long pej 27-32

Lesen 4: Helti Individuel mo Komyuniti (30 min)

Fokas blong Aktiviti: Ol insaed pat blong bodi

Ol Risos: Jat blong ol insaed pat blong bodi (**Apendiks 11b**)

Vokabulari: Insaed, pat, bodi, bren, dram blong sorae, hat, ol intestaen

Talem ol studen, "Bifo las wik, yumi bin lanem ol pat blong bodi aotsaed blong yumi. Long wik ia bae yumi lukluk ol bodi pat blong yumi we i stap insaed."

Askem olgeta, "Hu i save talem wan pat blong bodi blong yumi we i stap insaed long bodi blong yumi?"

Mekem list blong ol insaed pat blong bodi we ol studen oli talem long bodi.

Helpem ol studen blong putum ol defren bodi pat ia long wan tebol olsem hem ia aninit.

Wanem ol bodi pat we oli stap insaed long hed?	Wanem ol bodi pat we oli stap insaed long jes?	Wanem ol bodi pat we oli stap insaed long bel?
Dram blong sorae	Hat	Ol intestaen

Askem:

- Hao nao yumi save lukaotem long ol pat blong bodi we oli stap insaed long bodi blong yumi?

Lisen long ol studen taem oli stap ansa mo tokbaot ol mein poen blong hao blong lukaotem gud ol pat ia.

Askem ol studen:

- From wanem yumi mas lukaotem long bodi blong yumi?
- Wanem bae i hapen taem yumi no lukaotem gud bodi blong yumi?
- Wanem nao yumi save mekem blong lukaotem gud ol insaed pat blong bodi long yumi.
- Wanem bae i hapen sapos evri bodi blong yumi oli hed nomo?

Tokbaot ol ansa blong ol studen

Opotuniti blong Asesmen

Ol studen oli save talem sam insaed pat blong bodi mo ol yus blong olgeta.

Lesen 5: Tekem plante kea long Envaeromen blong yumi (45 min)

Fokas blong Aktiviti: Planem ol flawa blong putum insaed long klasrum

Ol Risos: Ol sid, ol han blong tri o plan, ol kontena blong planem flawa, ol sut blong ol flawa, gudfala graon, wan baket blong wota, ol kontena olsem ol emti plastik blong raes, tin blong melek, flawa pot o wan olfala dis

Vokabulari: Planem, wasem, putum, fulumap, gudfala, graon

Not blong Tija: Sapos ol studen oli wantem karem wan flawa long haos blong olgeta o blong wan narafala man i kam long skul, oli mas askem fastaem long ol peren o ona blong flawa ia. Mekemsua se yu redi long bag blong gudfala graon mo baket blong wota i stap rere aninit long wan tri klosap long klasrum.

Askem long ol studen blong oli tekem wan flawa o plan we oli laekem tumas blong kam long sku. Flawa ia bae oli putum insaed long klasrum blong mekem insaed blong klasrum blong olgeta i naes.

Tekem Ol studen oli go long ples we yu rere long baket blong wota mo graon i stap long hem. Soem hao blong planem flawa long kontena. Ol studen oli lukluk gud afta oli mekem semak olsem we yu soem long olgeta.

Opotuniti blong Asesmen

Ol studen oli planem ol flawa we oli laekem tumas long kontena blong planem flawa.

Lesen 6: Pefoming At (30 min)

Fokas blong Aktiviti: *O Josefín*

Ol Risos: Jat blong *O Josefín* (luk Apendiks 21)

Vokabulari: Wea, stap, Josefín, popo, kokonas, fulap

Askem ol studen blong stanap mo singsing *Yumi Kam Tugeta Moa*.

Putumap jat blong *O Josefín*, ridim mo poentem ol wod. Singsing song mo ol studen oli lisem long tun blong singsing.

Singsing wan laen mo ol studen oli singsing bihaen folem yu. Singsing wetem ol studen. Afta, ol studen oli singsing olgeta nomo.

Jenisim sam long olgeta wod long song ia olsem:

Josefin i go long ol defren nem blong ol studen long klas.

Freswota i go long ol defren nem blong ol ples we Ol studen oli stap long hem.

Papaia mo kokonas i go long ol narafala frut o lokol kakae we i stap long ol ples blong olgeta.

Singsing wetem ol studen mo putum ol defren nem we ol studen oli talem. Ol studen oli talem



se ol defren nem ia i saon i stret o i no saon stret long song ia. Oli talem ol nem we i saon i stret mo ol nem we i saon no stret.

Ol studen oli singsing *Tata*.

Opotuniti blong Asesmen:

Ol studen oli talem ol nem we i saon stret long song mo ol nem we i no saon stret long song ia.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Ol lokol meresin

Ol Risos: Yang sut blong naus mo grin lif blong wandei, o ol tri o plan we oli yusum blong tbit ol defren sik long ples blong olgeta

Vokabulari: Lokol, meresin, lif, rus, skin, flawa, yang, olfala

Givim tufala lif ia long ol studen blong smelem.

Afta askem ol studen

- Tufala lif blong wanem plan ia?

Ol studen oli talem ol ansa blong olgeta.

Infomesen blong Tija

Taem yumi sik yumi stap go long hospital blong ol dokta i givim meresin long yumi. Evri meresin blong hospital oli mekem long ples blong ol waetman we yumi no save se oli mekem olsem wanem. Mo plante long yumi no save wanem oli yusum blong mekem ol meresin ia.

Yumi evriwan i no stap klosap long wan hospital. Sam long yumi oli stap farawe tumas long ol hospital mo klinik. Sam oli stap klosap nomo long wan klinic we wan nes i lukaotem.

Yumi gat sam sik we yumi save tritim olgeta wetem ol lokol meresin. Plante long ol lokol meresin blong yumi hem i kam long ol lif blong ol tri o plan we yumi go karem long bus o sam we yumi planem raonem ol haos blong yumi mo sam yumi karem long solwota.

Hem i impoten tumas blong yumi tingbaot se yumi no save go karem eni kaen lif nomo mo yusum olsem meresin from sam lif i posen tu we i save mekem yumi sik o save kosem ded tu. Hem i impoten tumas blong yumi mas askem ol paren blong yumi fastaem.

Tokbaot taem yumi sik wetem ol studen mo askem:

- Yufala i yusum tufala lif ia blong meresin o no?
- Yufala i yusum yang lif blong naos blong tritim wanem?
- Hao nao yufala i yusum lif blong wandei?

Lisen long ol ansa blong ol studen mo tokbaot ol ansa blong ol studen.

Talem long ol studen taem oli go long haos, oli askem papa, mama o apu blong olgeta blong talem wan lokol meresin we oli i stap yusum. Askem sapos hem i oraet wetem olgeta blong talem hao oli priperem meresin ia. Mo taem oli kam tumoro oli save talem long klas abaot lokol meresin ia.

Askem:

- Yu save karem eni lif nomo mo yusum olsem meresin? From wanem?

Opotuniti blong Asesmen

O studen oli tokbaot sam lokol meresin we olgeta i stap yusum.

Lesen 10: Siviks mo Komyuniti Rilesensip B (45min)

Fokas blong Aktiviti: Ol yang pipol oli kontribut i kam long skul

Ol Risos: Ol maka o jakol, ol bigfala pepa, fo yangfala

Vokabulari: Tijim, singsing, lisen, narafala

Not blong Tija: Bifo lesen ia askem hed blong skul blong mekem wan leta o toktok wetem lida blong ol yang pipol long komyuniti blong hem i jusum sam yangfala blong kam tijim ol studen long wan song long lanwis blong olgeta. Sapos yu stap long tufala taon o ol hedkwota we i gat ol man narafala aelan i stap long hem, yu save askem ol peren o bigfala brata o sista o wan famle blong Ol studen olia long klas blong yu blong kam tijim olgeta.

Welkamem ol yangfala we oli kam blong tijim ol studen. Ol yangfala bae oli tijim wan song long ol studen. Askem olgeta blong introdiousum olgeta. Ol studen oli klapem han blong soem se oli glad se ol yangfala ia i kam blong tijim olgeta.

Serem ol studen oli go long wanwan yangfala ia. Talem long olgeta blong jusum eni ples we oli wantem praktis long hem mo wanem instramen oli wantem yusum. Talem taem blong evriwan i kambak insaed long klasrum. Go raon long wanwan grup blong luk hao ol studen oli stap wok long grup blong olgeta.

Taem oli kambak long klasrum bae wanwan grup i singsing song blong olgeta.

Afta, talem tangkiu long ol yangfala bakegen long taem blong olgeta. Talem ol studen blong givim wan bigfala klap long ol yangfala ia mo singsing Tata.

Askem ol studen:

- Yufala i laekem taem ol yangfala i tijim song long yufala?

Talem se hem ia i wan wei we ol pipol blong komyuniti i kontribut i kam long skul blong yumi olsem yumi bin lanem long wan lesen blong yumi.

Opotuniti blong Asesmen

Luk se ol studen oli stap lan gud long grup blong olgeta.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 1 – Wik 10



Lesen 1: Spirituel mo Karakta Divelopmen (30 min)

Fokas blong Aktiviti: Asensen Dei

Ol Risos: Bigfala pepa saes A3 we yu foldem i go long wan smol buk o wan nara fala wei blong displei, ol kala

Vokabulari: Asensen, go antap, Jisas, tabu spirit, selebretem, tingbaot

I gat wan pablik holidei we yumi stap selebretem 40 dei afta long Ista. Hu i save talem wanem dei ia?

Talem se yumi stap selebretem dei ia long namba 5 Mei. Hem i Asensen Dei. Askem hu i save talem wanem i bin hapen long dei ia plante taosen yia i pas. Lisen long ol ansa blong olgeta mo tokbaot moa wanem ol studen oli talem.

Askem ol studen:

- Taem Jisas i stap go long heven i talem wanem long ol disaepol blong hem?
- Yu ting se from wanem Jisas i mas go long heven?
- Hao nao yufala wanwan i stap selebretem dei ia long jos o haos blong yufala?

Ol studen oli wok fofo blong talem wanem oli bin mekem las yia sapos oli save tingbaot o oli talem wanem oli bin mekem long dei ia long yia ia.

Taem oli talem ol stori blong olgeta finis, askem wanwan grup blong rae tem storian ia long smol buk blong olgeta we yu bin givim long wanwan grup. Ol studen long wanwan grup i joenem ol storian blong olgeta tugeta blong mekem wan smol storian.

Helpem ol studen blong rae tem stori blong olgeta. Ol studen oli talem wanem blong rae tem long smol buk blong olgeta. Afta olgeta i droem mo kalarem ol pi ja blong stori blong olgeta.

Opotuniti blong Asesmen: Lisen long ol studen oli talem wanem oli mekem blong tingbaot dei ia.

Lesen 2: Pefoming At (30 min)

Fokas blong Aktiviti: Lanem ol song long lanwis blong olgeta

Vokabulari: Lanwis, lokol, singsing

Singsing tufala song ia: *Halo mo O Josefina*.

Long taon o ol skul we i gat ol studen we oli kam long ol nara fala aelan: Serem ol studen oli go long ol aelan blong olgeta. Yumi save se long wan aelan i gat plante defren lanwis. Talem long ol studen we i kamaot long wan aelan blong oli singsing long wan lanwis nomo. Bae olgeta i jusum wanem lanwis blong singsing long hem.

Long ol aelan o viley we lanwis i semak: Serem ol studen blong oli singsing wan song blong jos, kastom storian, kastom danis, kastom pleplei, wan song blong stringban long lanwis blong olgeta, ol raem long lanwis mo ol song blong mekem bebe i silip.

Sendem olgeta i go aotsaed blong oli lanem song blong olgeta. Givim taem long lesen ia blong oli lanem gud song blong olgeta.

Long las faev minit blong lesen, singaotem olgeta i kam bak insaed mo askem sapos evri grup i gat wan song blong singsing long hem long nekis lesen.

Singsing *Tata*.

Opotuniti blong Asesmen: Luk se ol studen oli save singsing wan song long ol lanwis blong olgeta.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Sefti (30 min)

Fokas blong Aktiviti: Save risal blong ol aksen blong olgeta

Vokabulari: Duti, responsibiliti, tekem

Talem long ol studen long bifo las wik oli bin lanem abaot wan toktok ia we i talem se “yumi responsibol long ol aksen blong yumi”.

Oli mas lisen gud long ol sentens ia mo talem se man o woman ia hem i responsibol long aksen blong hem o no. Talem tu, “From wanem oli ansa olsem?”

Meri hem i no askem ol peren blong hem afta i folet ol fren blong hem oli go long solwota.

Pita hem i mestem akis nao i katem leg blong hem. Hem i go hem wan long hospital.

Wesli hem i krae blong folet mami mo dadi blong hem blong go long taon. Taem oli kasem long taon, hem i taet tumas nao i silip mekem se mami blong hem i mas tekem hem i kambak long haos.

Sam hem i kakae ol loli mo ol rabis kakae oltaem mekem se hem i gat ol hol long ol tut blong hem.

Jim i wantem yusum mira blong Susan. Hem i no askem hem afta i yusum mira ia. Taem we hem i wantem givimbak be hem i mestem i foldaon mo i brok.

Opotuniti blong Asesmen: Lisen long hao ol studen oli talem ol ansa o tingting blong olgeta.

Lesen 5: Tekem plante kea long Envaeromen blong yumi (45 min)

Fokas blong Aktiviti: Klinim ol defren envaeromen long skul

OI Risos: Korel, sanbij, ol sel, ol frut, ol kabis, ol plan, ol flawa, plastik blong doti o wan basket o bag, ol olfala klos, sam brum, rek, sped, baket blong wota

Vokabulari: Klinim, defren, envaeromen, pulumaot, kompos, draelif, ol doti

Putum ol studen blong oli wok long ol grup. Taem oli stap klinim ol ples we oli wok long hem oli lukaotem wanem i nid blong gat blong mekem envaeromen i kam moa gud.

Eksampol:

Long garen blong flawa i nidim wan fanis from ol faol i stap skrasem graon mo karemaot ol flawa.

Grup wan: Oli wok long skul. Askem ol studen blong oli putum gud ol samting we oli stap insaed long klasrum blong olgeta.

Grup tu: Oli wok long garen blong flawa. Askem ol studen blong oli go wok insaed long flawa garen blong olgeta. Oli pulum gras mo oli putum sam wota long ol flawa o oli putum ol drae liv raon long ol flawa.

Grup tri: Oli wok long eria blong skul. Askem ol studen blong go raon long skul mo pikimap ol doti we oli no save roten mo putum long ples we bae oli karem i go long ples blong doti. Oli save pikimap ol drae liv mo han blong tri mo putum long kompos o putum ol drae lif long ol garen blong flawa.

Grup fo: Oli wok long garen blong olgeta. Askem ol studen blong pulumaot ol gras long garen mo givim wota long ol plan we oli nidim.

Grup faev: Oli wok long ofis blong skul o laebri blong skul o wan narafala ples we oli jusum. Askem ol studen blong klinim ples ia mo karemaot doti. Oli save putum sam flawa long kontena long ples ia o planem sam flawa raonem ples ia.

Go raon blong luk hao ol studen oli stap klinim ol defren eria blong olgeta. Helpem olgeta blong soem hao blong oli save mekem gud moa wok blong olgeta. Askem wanwan grup long wanem i nid blong gat long eria blong olgeta blong mekem i kam moa gud. Jekem wok blong olgeta mo fulap asesmen fom.

Taem oli finis oli wasem gud han mo kambak long klas blong olgeta.

Opotuniti blong Asesmen: Luk se ol studen oli save klinim gud ol defren envaeromen blong olgeta.

Lesen 6: Pefoming At (30 min)

Fokas blong Aktiviti: Singsing long lanwis blong olgeta Pat 2

Vokabulari: Lanwis

Ol studen oli singsing *Halo*.

Givim faev minit blong oli praktisim song blong olgeta wan las taem. Singaotem evriwan i kam insaed mo askem eni grup i wantem go singsing fastaem. Fasfala grup bae i singaotem nekis grup, mo namba tu grup i singaotem namba tri. Oli mekem olsem kasem evri grup i singsing.

Talem bigfala tangkiu long ol studen long gudfala pefomens blong olgeta.

Ol studen oli singsing *Tata*.

Opotuniti blong Asesmen: Ol studen long wan grup oli singsing song blong olgeta.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Planem kon

Ol Risos: Ol drae sid blong kon, bigfala naef, stik blong oli sapenem blong digim graon, wan stik we hem i 30 sentimeta we hem i soem spes blong planem kon mo long stik makem 3 sentimeta blong soem hamas i go insaed long graon blong planem kon, baket blong wota, wan smol kontena

Vokabulari: Kon, planem, digim, graon, sid

Talem se tedei bae oli go aotsaed blong planem kon.

Askem long olgeta:

- Hu i laekem blong kakae kon?
- Hu i planem kon finis?

Karem ol studen oli go long wan ples we i stret blong oli planem kon long hem. Pulumaot ol gras wetem ol studen long ples ia. Taem ples i klin, givim tri sid long wanwan studen.

Eksplenem se longfala blong stik ia i 30 sentimeta we i soem spes bitwin tu hol blong kon mo 3 sentimeta mak we i stap long hem i soem hao dip i go insaed long graon blong planem kon.

Ol step blong planem kon:

Stat long wan saed blong ples we yufala i klinim, digim wan hol mo makem dip blong hem.

Putum tri sid blong kon long hol ia.

Berem gud wetem graon mo givim wota.

Yusum 30 sentimeta stik blong makem nekis ples blong hol blong planem kon long hem. Digim hol wetem mo wan studen i putum ol sid mo givim wota.

Studen ia we i planem bae i stap makem ol nekis ples blong planem kon mo yu digim hol blong olgeta mo hem i kam jekem se i no dip tumas.

Mekem olsem kasem evri studen i planem kon blong olgeta.

Taem oli finis, askem ol studen:

- From wanem yumi putum tri sid long wan hol?
- From wanem yumi no putum ten sid long wan hol?
- Naoia we yumi planem ol kon finis wanem nao bae yumi mekem naoia i go?

Ol studen oli talem ol ansa blong olgeta mo tokbaot gud ol ansa blong kwesten ia wetem ol studen.

Opotuniti blong Asesmen: Luk se ol studen oli save hao blong planem kon.

Lesen 10: Siviks mo Komyuniti Rilesensip A **(45 min)**

Fokas blong Aktiviti: Ol wok long klasrum: ridim ol ripot mo tokbaot

Ol Risos: Jat blong “Ol wok long klasrum”, folda o buk blong putum ol ripot blong ol grup blong Wik 4 kasem Wik 10.

Vokabulari: Impruv, mekem gud, ol wok

Talem long ol studen, “Tedei bae yufala i raetem las ripot blong wanem yufala i bin mekem long tu wik we i jes pas.”

Ol studen long wanwan grup i toktok tugeta blong wanem bae oli raetem long las ripot blong olgeta. Taem oli finis oli putum i go long log buk o folda blong olgeta.

Talem: “Taem yufala i finis, yufala i ridim ol ripot blong yufala stat long fas wan we hem i Wik 4 kasem las wan we yufala i jes raetem. Taem yufala i stap ridim yufala i luk se grup blong yufala i impruv long ol responsbiliti o no mo from wanem? Afta yufala i ridim finis bae yumi tokbaot ol ripot ia, bae mi askem ol kwesten long ol grup mo ol wanwan memba tu.”

Ol studen oli sidaon yet long ol grup blong olgeta yet mo tokbaot ol ripot long bigfala grup.

Ol kwesten blong askem wanwan grup mo wanwan memba:

- Wanem nao ol wok we grup blong yufala i bin mekem?
- Yufala i ting se yufala i bin mekem wan gudfala wok? Yes o no? From wanem?
- From wanem nao yumi stap mekem ol wok ia long klasrum blong yumi?
- Wanem nao yu lanem long ol responsibiliti ia?
- Yu ting se sapos oli givim wan moa responsibiliti long yu blong nekis tem, hao nao bae yu mekem nao?
- Long nekis tem, bae yu wantem wok bakegen wetem grup blong yu naoia o yu wantem wok wetem sam naraefala fren bakegen? From wanem?
- Yu ting se yu save mekem wok olsem tu long haos blong yu? From wanem?

Taem ol studen oli finis tokbaot ol ripot ia, talem bigfala tangkiu long ol studen blong mekem ol wok blong olgeta mo hop blong oli mekem i gud moa long nekis tem.

Ol studen oli klapem ol silebol long ol toktok ia taem oli stap talem:

Tugeta: Mifala i mekem gud tumas long tem ia!

Ol boe: Hiphop!


Ol gel: Hurei!

Opotuniti blong Asesmen: Lisen long ol ripot blong wanwan grup long kwesten blong nambatu poen antap.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 2



TEM2

Ovaviu

SAB-STRAN	SPIRITUEL MO KARAKTA DIVELOPMEN	PEFOMING AT	MUVMEN MO GEM	HELTI INDIVIDUEL MO KOMYUNITI	SEFTI
Lesen	Lesen 1 30min	Lesen 2, 6 30 min	Lesen 3, 8, 12 20 min	Lesen 4 (W1) 30 min	Lesen 4 (W2) 30 min
Wik 1	Dedikesen blong wan bebe we i jas bon	Ol defren miusik	Jusum ol aktiviti blong Muvmen mo Gem	Hao blong klinim tut	
		Kriitem wan instramen blong miusik			
Wik 2	Dedikesen blong wan niu haos, bas, masin o miusikel instramen	Danis long kastom	Jusum ol aktiviti blong Muvmen mo Gem		Etkwek
		Mekem wan danis folem wan stori			
Wik 3	Fasin blong go long ded	Mekem aksen blong wan kastom danis	Jusum ol aktiviti blong Muvmen mo Gem	Ol ples blong karem ol kakae	
		Mekem aksen blong wan anamol			
Wik 4	Tanksgiving	Danis long paten	Jusum ol aktiviti blong Muvmen mo Gem		Ol saen blong taedol wev
		Posisen danis			
Wik 5	From wanem yumi selebretem Dei blong ol Pikanini	Danis yusum ba-long	Jusum ol aktiviti blong Muvmen mo Gem	Trifala grup blong kakae	
		Danis folem bambu			
Wik 6	From wanem yumi selebretem Indipendens Dei	Danis long miusik jea	Jusum ol aktiviti blong Muvmen mo Gem		Ol raet blong ol pikinini
		Danis long wan skit			
Wik 7	Ol dei blong prea o wosip	Danis long wei long olgeta	Jusum ol aktiviti blong Muvmen mo Gem	Wan gudfala kakae	
		Danis long slo miusik			
Wik 8	Baptaes	Danis wetem fren	Jusum ol aktiviti blong Muvmen mo Gem		Sam samting we oli save kam wan denja
		Kastom danis			
Wik 9	Holi Komunien o Lodsapa	Danis long limbo	Jusum ol akt. blong Muvmen mo Gem	Ol tri grup blong kakae	
		Brekdanis			
Wik 10	Fasting/ No kakae	Danis long singsing blong Do Re Mi	Jusum ol aktiviti blong Muvmen mo Gem		Sam denjares situesen
		Mekem skit long singsing blong Papa Abraham			



LUKAOTEM GUD ENVAEROMEN BLONG YUMI	VISUEL AT	KALJORAL HERITEJ MO AEDENTITI	SIVIKS MO KOMYUNITI RILESENSIP A	SIVIKS MO KOMYUNITI RILESENSIP B
Lesen 5 45 min	Lesen 7, 11 30 min	Lesen 9 30 min	Lesen 10 30 min	Lesen 10 30 min
Mekem neseri blong kabij	Jusum ol aktiviti blong Visuel At	Taem laen	Ol yang pipol oli help long skul	Wik 1
Wanem i stap long en-vaeromen ia	Jusum ol aktiviti blong Visuel At	Mekem ol tradisional klos	Wik 2	Wok folem rul blong klas
Lukaotem gud ol defren en-vaeromen	Jusum ol aktiviti blong Visuel At	Mekem ol simpol samting wetem lif pandanus o lif kokonas	Ol volentia	Wik 1
Transplanem kabij	Jusum ol aktiviti blong Visuel At	Lanem wan tradisional gem o pleplei	Wik 2	Wok folem rul blong klas
Trifala R: Ridius, riyus, risaekol	Jusum ol aktiviti blong Visuel At	Ol tradisional wei blong wasem doti klos	Ol Jif	Wik 1
Yusum ol lokol samting blong ridiusum doti	Jusum ol aktiviti blong Visuel At	Ol gudfala fasin long komyuniti	Wik 2	Wok folem rul blong klas
Riyusum fo defren samting	Jusum ol aktiviti blong Visuel At	Ol gudfala fasin	Ol Polis	Wik 1
Hao blong risae-kol niuspepa	Jusum ol aktiviti blong Visuel At	Hao blong mekem natanggura blong haos	Wik 2	Wok folem rul blong klas
Ol tri mo plant oli impoten tumas	Jusum ol aktiviti blong Visuel At	Ol kastom bilif	Ol narafala komyuniti helpa	Wik 1
Wota i impoten tumas	Jusum ol aktiviti blong Visuel At	Ol fasin blong welkam	Wik 2	Wok folem rul blong skul

Ovaviu Tem 2

Ol Lening Aotkam

Stran	Sab-Stran	Lening Aotkam	
Helti Laef	Helti individuel mo komyuniti	HLH.2.V1	Dimonstretem save blong helti praktis blong laef
	Muvmen mo Gem	HLM.2.V1	Dimonstretem kodinesen mo balens tru long patisipesen long ol defren aktiviti
	Sefti	HLS.2.V1	Aedentifaem mo diskraebem ol wei blong mekemsua se olgeta mo ol narafala wan i sef
Laef tugeta	Siviks mo Komyuniti Rilesensip (A)	LTR.2.V1.A	Karemaot gud ol responsibiliti blong olgeta long bihaf blong klas
	Siviks mo Komyuniti Rilesensip (B)	LTR.2.V1.B	Diskraebem hao sam memba blong komyuniti i kontribut long skul mo komyuniti laef
	Tekem plan-te kea long envaeromen blong yumi	LTC.2.V1	Protektem mo divelopem lokol envaeromen we oli liv long hem
	Spirituel mo Karakta Divelopmen	LTS.2.V1	Aedentifaem mo diskasem impoten kaljoral mo relijes ivent long komyuniti blong olgeta
Wei blong laef	Kaljorol heritej mo aedentiti	WLC.2.V1	Aplaem stret skil long sam kaljorol aktiviti long komyuniti
	Visuel At	WLV.2.V1	Yusum save mo skil blong talemaot ol aedia mo filing tru long at
	Pefoming At	WLP.2.V1	Krietem mo pefomem ol aksen blong ekspresem olgeta tru long danis, drama mo miusik

Tem 2 ol Aktiviti blong Muvmen mo Gem



Aktiviti 1: Lokomoto

Ol Risos: Kaliko blong fasem ae

Raetem namba long ol kona blong klasrum. Jusum wan lida mo fasem ae blong lida ia wetem kaliko.

Lida i stanap long medel mo kaont stat long 10 go bak kasem siro. Taem hem i stap kaont ol narafala studen oli sud stap wokbaot sloslo oli go long eni kona long rum. Taem lida i talem siro evriwan i sud stap long wan kona finis. Lida bae i talem namba blong wan kona mo ol studen we oli stap long kona ia bae oli aot long gem.

Gem i kontinu bakegen mo lasfala studen we i stanap hem i win. Wina bae i kam lida.



Aktiviti 2: Lokomoto

Talem ol ples we bae ol studen oli wokbaot i go long hem olsem stat long klasrum i go kasem wan narafala bilding o wan tri long eria blong skul. Ol studen oli wokbaot hariap i go mo wokbaot hariap i kambak.

Aktiviti 3: Stabiliti o Balens

Ol Risos: Wan spes we i bigwan gud mo i fri long eni objek

Ol studen oli putum han blong olgeta long ol hip blong olgeta. Taem yu talem wan leta, bae oli raetem leta ia wetem raet hip blong olgeta. Oli save yusum ol narafala pat blong bodi blong olgeta tu blong mekem wan leta. Taem yu talem wan namba, bae oli raetem namba ia wetem lef hip blong olgeta.

Aktiviti 4: Lokomoto

Ol Risos: Wan gudfala open spes we i fri blong ol studen oli plei long hem

Ol studen oli stanap long wan open spes. Talem wan aksen we Simon i wantem oli mekem mo ol studen oli mekem aksen ia.

Eksapol: Yu talem se “Simon i talem se jam” mo ol studen oli jam.

Be sapos yu no talem nem blong Simon mo ol studen oli mekem aksen bae oli aot long gem mo go sidaon.

Eksapol: Yu talem se “tajem hed blong yu” mo studen we i tajem hed blong hem i aot long gem.

Aktiviti 5: Objek Kontrol

Ol Risos: Wan bigfala fri spes, slipa mo wan balong

Makem wan laen o mak long gras yusum wan slipa. Stat long mak ia mekem faev step mo putum wan baket o katen long wan jea o long gras nomo. Givim ol smol balong long ol studen mo mekem oli stanap long mak. Ol studen oli sakem balong i go insaed long baket o katen. Hemia we i sakem i go insaed i win. Olgeta we oli no sakem i go insaed oli gat tu mo janis blong sakem balong i go insaed.

Aktiviti 6: Stabiliti o Balens

Ol Risos: Ol lif, slipa o doti pepa mo wan open spes

Putum sam lif o slipa o doti pepa we i stap 50sm longwe long narawan. Putum 20 lif o slipa o doti pepa long wan stret laen.

Mekem tu laen. Serem ol studen long tu grup. Wan grup i stanap klosap long wan laen blong lif o slipa o doti pepa ia. Ol studen bae oli wokbaot long ol lif ia. Rul hem i oli mas stanap nomo long lif mo no mas stanap long gras o flo sapos oli plei insaed long klasrum.

Fas studen i stanap long fas lif afta i putum narafala leg i go long nekis lif. Bifo hem i leftistemap fas leg blong hem blong putum long namba tri lif, fren blong hem bihaen long hem i mas putum fas leg blong hem finis long fas lif. I minim se naoia bae i gat tu leg long evri lif; wan blong fren we i go fastaem mo wan blong fren we i stap kam bihaen.

Bae oli no mas holem olgeta taem oli stap wokbaot long ol lif ia. Sapos i gat wan lif i fri i stap o i gat wan leg nomo long wan lif bae oli mas stat bakegen.

Aktiviti 7: Lokomoto

Ol Risos: Wan kaliko blong fasem ae

Mekem ol studen oli sidaon long wan open spes long grup blong sikis. Letem ol studen oli familia wetem grup memba blong olgeta. Long wanwan grup ia, fasem ae blong wan volentia.

Studen ia i sidaon long medel mo wan memba blong grup blong hem bae i go tajem hem. Volentia ia bae i ges se hu i tajem hem. Sapos hem i ges i stret bae i fasem ae blong fren we i tajem hem mo fren ia bae i go sidaon long medel mo gem i stat bakegen.

Aktiviti 8: Objek Kontrol

Ol Risos: Ol slipa mo wan balong

Putum wan mak long gras afta mekem faev step putum wan narafala mak. Putum ol slipa olsem ol mak. No yusum kokonas o ston olsem mak from ol studen oli save gat kil sapos olgeta i kikim.

Putum ol mak blong evri grup. Serem ol studen oli go long tu o tri grup. Givim wan balong long wan grup. Mekemsua se balong i no strong tumas long leg blong olgeta. Soem hao blong oli kikim balong stat long wan mak i go kasem mo raonem narafala mak mo kambak. Taem oli kambak, oli kikim balong i go long narafala fren we i redi long laen blong olgeta. Gem i kontiniu olsem kasem evri studen i pas. Grup we i finis fastaem hem i win.

Aktiviti 9: Lokomoto

OI Risos: Fil blong plei aotsaed

Ol studen oli jusum wan patna. Wan long tufala bae i talem wan wod. Narafalawan bae i jam long stret namba blong leta blong wod we hem i talem.

Eksampol: Long ol wod “ron” o “jam” studen bae i jam tri taem.

Aktiviti 10: Lokomoto

OI Risos: Fil blong plei aotsaed

Ol studen oli mekem ol muvmen olsem jam mo klapem han. Taem yu talem “tri” oli mekem ol aksen olsem wan tri stanap. Afta, oli jam mo klapem han bakegen mo yu talem “pensel” oli putum ol han daon long saed blong olgeta blong mekem aksen olsem wan pensel.

Aktiviti 11: Objek Kontrol

OI Risos: Fil aotsaed, wan balong mo ol maka blong makem baondri blong sekel blong plei
 Ol studen oli stanap long wan longfala laen. Sakem balong i go long ol studen mo oli kilim balong long tufala han blong olgeta i go bak long yu. Jusum wan studen blong kam tekem ples blong tija. Oli save kilim balong wetem tufala han mo wan han nomo.

Aktiviti 12: Stabiliti o Balens

Wan studen i stanap long fored mo talem se, “Mi luk wan samting?”

Ol narafala studen bae oli askem se, “Yu luk wanem?”

Hem bae i talem wan samting mo ol narafala studen i mekem aksen folet wanem we hem i luk.

Eksampol: Studen i talem se “mi luk pijin” mo hem i mekem aksen blong wan pijin we i flae.
 Ol narafala studen tu oli flae olsem pijin.

Givim janis long evri studen blong talem wanem we oli save luk.

Aktiviti 13: Lokomoto

OI Risos: Wan olfala wil blong trak o wan samting we i raon mo ol studen oli save go tru long hem

Ol studen oli krol tru, jam ova mo resis blong karem ol defren objek. Mekemsua se ol objek we ol studen bae oli go tru long hem i no save givim kil long olgeta.

Aktiviti 14: Objek Kontrol

OI Risos: Balong mo eni objek

Rolem balong i go long wan objek. Studen we i kasem objek ia i gat wan poen.

Muvum objek i go long ol defren daerekseen.

Aktiviti 15: Stabiliti o Balens

Ol studen oli stanap mo yu talem, “Hed, Solda, Ni mo Tow”. Studen i mas tajem stret pat blong bodi ia. Afta, jenisim smol, olsem “Hed, Nos, Ni mo Maot”. Stat slo mo talem hariap. Studen we i no mekem stret aksen i aot long gem. Afta oli save singsing song blong *Hed, Solda, Ni mo Tow* (luk long **Apendiks 21**).

Aktiviti 16: Lokomoto

Ol Risos: Lif o jea, miusik

Putum ol jea o ol lif blong soem ples blong ol studen blong sidaon long hem long wan sekel.

Ol studen bae oli wokbaot o skip i go raon long ol jea o lif we oli stap taem yu plei o singsing song. Karemaot wan jea o lif afta ofem song. Taem song i stop, ol studen oli mas faenem wan jea o lif blong sidaon. Hemia we i no faenem wan jea o lif i go sidaon long midel.

Statem song bakegen, ol studen oli wokbaot o skip bakegen mo yu karemaot wan jea o lif bakegen. Mekem olsem gogo i gat wan las studen nomo i stap mo hem nao i win.

Aktiviti 17: Objek Kontrol mo Lokomoto

Ol Risos: Wan smol sofsof balong, mak blong makem poen

Sakem balong i go long ol studen mo oli kilim balong wetem han blong olgeta. Studen we i kilim balong i mas ron i go kasem wan mak blong gat poen. Sapos ol narafala studen oli sakem balong kasem mak ia fastaem bifo hem i kasem mak, hem i aot long gem.

Aktiviti 18: Stabiliti mo Balens

Jusum wan patna mo plei ol fingga-pleplei-raem wetem hem. Oli jenisim patna afta long evri faev minit.

Aktiviti 19: Lokomoto

Ol Risos: Wan mak olsem kon o jea

Go aotsaed mo plei gem blong “Wanem taem Mista hos?”.

Gem ia i olsem: putum wan mak mo mekem wan narafala mak we i stap 20 meta long we long fas mak. Mista Hos hem i wan studen we i stanap long fas mak ia mo lukluk i go long wan daereksem we bae i no save luk ol narafala studen we oli stanap i longfala folem nara mak. Ol narafala oli stanap long stret laen mo oli stap luk baksaed blong Mista Hos nomo.

Ol narafala studen oli talem bigwan se, “Wanem tem Mista Hos?”

Mista Hos i talem se “tu klok” mo ol narafala studen oli wokbaot tu step i go klosap long Mista Hos. Taem Mista Hos i talem fo klok o sikis klok, ol studen oli tekem step folem namba blong taem we Hos i talem.

Taem Mista Hos i talem se “Hem i taem blong kakae!”, bae hem i tanemraon mo ronem ol studen. Hamas studen we hem i tajem bae oli joenem hem. Bae oli mekem olsem gogo wan o tu las studen i stap mo olgeta nao oli kam wina.

Aktiviti 20: Objek Kontrol

Oi Risos: Tu balong, fo kon o fo mak

Serem ol studen long tu grup. Mekemsua se namba blong ol studen long wan grup i semak long ol narafala grup. Givim balong long tufala we i stanap long fored blong tufala grup. Taem yu se “stat” studen long fored i pasem balong antap long hed blong hem i go bihaen long studen bihaen long hem. Hemia bihaen i pasem balong bitwin leg blong hem i go long studen bihaen long hem. Sikwens ia i kontiniu kasem las studen. Grup we i finis faswan i win.

Oli save kompit long ol smol grup.

Aktiviti 21: Stabiliti o Balens

Helpem ol studen blong mekem ol defren muvmen wetem ol defren pat blong bodi blong olgeta.

Eksampol: Oli save stanap strong long leg blong olgeta, twistim leg i go raon, muvum leg i go antap mo go daon, jam mo fulap narafala wei moa.

Aktiviti 22: Lokomoto

Oi Risos: Ol maka o kon

Makemaot wan eria blong faev meta. Ol studen oli hop long raet leg stat long wan poen i go long narafala poen. Taem oli kasem en blong mak bae oli hop long lef leg kam bak long fasfala mak. Oli save mekem aktiviti ia long ol smol grup.

Aktiviti 23: Objek Kontrol

Oi Risos: Ol mabol mo sid

Serem ol studen oli go long grup blong fo o faev studen long wan grup. Givim sam mabol o sid long ol studen long wanwan grup. Ol studen oli putum ol mabol o eni sid we i raon gud long wan stret laen long wan open mo level spes. Oli sidaon long narafala en mo rolem wan mabol o sid i go blong traem kasem ol narafala sid we oli stap long laen. Studen we i kasem wan sid i tekem sid ia blong hem. Aktiviti i kontiniu kasem mabol o sid long laen i finis. Hemia we i gat fulap sid o mabol, hem i wina.

Aktiviti 24: Stabiliti o Balens

Stretem han long semak level long tugeta saed mo wokbaot long siksak wei.

Aktiviti 25: Lokomoto

Oi Risos: Ol slipa

Serem ol studen long tu grup. Ol grup oli stanap long stret laen 10 meta farawei. Putum wan slipa long medel blong tufala grup. Givim namba long ol studen. Mekemsua se namba blong

tufala grup i semak. Taem yu singaoatem wan namba, tufala studen long tugeta grup we i gat namba ia i ron oli go long medel blong karem slipa we i stap long medel. Wan we i tekem slipa i go long saed blong hem, mo fren blong hem i no tajem hem, i kasem wan poen blong grup blong hem.

Aktiviti 26: Objek Kontrol mo Lokomoto

Ol Risos: Ol sel kokonas, wan balong blong tenis

Serem ol studen oli go long tu grup. Ol studen oli plei “Stonem sel kokonas” wetem wan balong. Wan grup blong stonem ol sel blong kokonas.

Oli gat tri janis blong stonem ol sel blong kokonas i foldaon. Taem tri janis blong olgeta i finis bae oli jenis mo narafala grup nao i go blong stonem ol sel blong kokonas. Taem oli stonem sel blong kokonas i foldaon bae oli traem blong bildimap bakegen, be ol studen blong narafala grup i mas traem blong stonem olgeta. Sapos balong i kasem wan long olgeta hem i aot. Oli mas kasem evri wan long olgeta bifo oli save jenis bakegen. Taem wan grup i bildimap bak sel kokonas bakegen hem i gat wan poen mo bae hem i stonem sel kokonas bakegen.

Aktiviti 27: Stabiliti O Balens

Ol Risos: Ol kon o mak blong makemaot baondri blong plei insaed

Ol studen oli jusum wan fren blong wok wetem. Makemaot wan eria blong faev meta blong stat mo finis long hem. Studen A i putum tufala han blong hem daon mo Studen B i holem tufala leg blong studen A. Tufala i mekem wilbaro wok long stat blong laen kasem en blong laen. Yu save mekem ol studen oli kompit long gem ia.

Aktiviti 28: Lokomoto

Ol Risos: Ol mak o kon blong makem baondri blong plei insaed

Jusum wan studen blong ronem ol narafala studen. Taem hem i tajem wan studen, studen ia i joenem han wetem hem blong tufala i ronem ol narafala studen. Lasfala studen we i stanap hem i win.

Aktiviti 29: Objek Kontrol

Ol Risos: Faev smolsmol smut ston

Faenem wan klin ples blong plei long hem. Soem ol studen hao blong pleplei gem blong faev ston.

Aktiviti 30: Stabiliti O Balens

Ol Risos: Wan longfala rop

Raetem wan laen long graon o mekem wan laen wetem wan longfala rop. Laen ia i mas go long evri daereksem. Ol studen oli wokbaot long laen mo mekemsua se oli no mas go ova long wan narafala pat long laen ia. Studen we i go ova long laen i aot long gem. Oli save mekem ol defren aksen olsem singsing o klapem han taem oli stap wokbaot long laen ia.

Tem 2 Oi Aktiviti blong Visuel At



Aktiviti 1: Pent mo Dro

Oi Risos: Grin mo blu paoda pent, wota, pepa, doti pepa or olfala niuspepa

Miksem blu mo grin pent wetem wota. Ol studen oli skwisem pepa i go olsem wan balong. Tajem pent wetem pepa balong ia mo prestem i go long pepa blong yu blong mekem klaod o skaes, bus, o solwota o reva o wan pul long rif. Taem oli finis, oli karem pepa blong olgeta i go aotsaed long san blong drae.

Taem pent i drae, oli karem i kam bak insaed mo droem ol samting we i liv insaed long hem.



Aktiviti 2: Fri droing

Oi Risos: Pepa, ol pensel mo kala

Ol studen oli droem wan pi ja we oli laekem. Enkarejem olgeta blong mekem ol droing blong olgeta i bigwan gud. Afta oli droem ol defren sep blong fulumap wanem we oli droem. Afta kala antap long hem.

Aktiviti 3: Kolaj

Oi Risos: Glu, bigfala pepa, ol olfala magasin o pepa

Ol studen oli wok long smol grup. Ol studen oli katemaot ol pi ja blong ol pipol blong narafala ples aot long ol defren niuspepa o magasin. Oli putum glu aninit long ol pi ja mo pestem i go long pepa long eni wei we oli wantem. Oli putum ol pepa blong olgeta long wan ples blong glu i drae.

Aktiviti 4: Pent

Oi Risos: Pent, wota, pepa, rola o bras o skin blong kokonas, ol lif, olfala niuspepa, kontena

Miksem pent i go long ol kontena bifo taem blong aktiviti ia. Mo spredem ol olfala niuspepa long ples we ol studen bae oli wok long hem. Ol olfala niuspepa ia i olsem wok spes blong olgeta we ol kontena blong pent i stap long hem.

Mekem ol studen oli go aotsaed mo faenem wan lif we oli laekem sep blong hem mo karem i kam insaed. Ol studen oli yusum bras o skin blong kokonas blong putum pent aninit long lif blong olgeta mo prestem saed we oli pentem i go long pepa blong olgeta long we we oli

wantem. Oli livim pent blong i drae.

Aktiviti 5: Skalpja

OI Risos: Baten blong klos, ol sel, ol sid, ol olfala klos we oli terem i longfala, glu, sisis, stepla, skin blong kokonas, rop

Ol studen oli katem wan han blong tri (branj) we oli save yusum blong mekem wan skalpja blong wan anamol o pesen o eni narafala samting we oli save mekem. (Han blong tri ia bae i help blong givim strakja long wanem we bae olgeta oli wantem wok long hem). Oli karemaot skin blong han blong tri ia. Putum skin blong kokonas raon long strakja blong skalpja mo fasem i go raon wetem rop. Ol studen oli yusum ol olfala klos we oli terem i longlongfala blong raonem blong mekem sep blong skalpja blong olgeta. Taem oli kasem sep we oli glad long hem, oli fasem en blong kaliko. Oli save gluem ol sid o sel o baten blong klos olsem ae sapos hem i wan anamol o man.

Aktiviti 6: Lisin mo Dro

OI Risos: Miusik, pepa, pensel

Ol studen oli lisin long wan singsing we tija i plei long hem. Taem i finis oli talem hamas saon oli harem mo droem wanem instramen i mekem saon ia.

Aktiviti 7: Pent wetem kom

OI Risos: Pent, pepa, kontena blong miksim pent, rola, kontena blong bata/plastik botel blong katkatem olsem kom mo sis

Miksim pent wetem wota. Pent i mas tik smol blong mekem i isi blong rolem. Ol studen oli yusum rola blong pentem pepa blong olgeta. Bifo pent i drae, ol studen oli karem ol smol kom we yu bin katem mo yusum blong dro long pent wanem we oli wantem blong dro.

Afta oli putum long wan ples blong pent i save drae gud.

Aktiviti 8: Droem

OI Risos: Pepa, kala o pensel mo kreyon

Ol studen oli karem sikis pepa mo wan kala mo go aotsaed mo jusum sikis tri. Oli putum pepa blong olgeta long wan pat blong stampa blong tri mo kalarem. Taem oli finis oli muv i go long nekis tri gogo oli finisim sikis tri ia. Yusum wanwan pepa long wanwan tri.

Oli karem pepa i kam bak mo tija i helpem olgeta blong raetem nem blong ol tri ia.

Aktiviti 9: Kolaj

OI Risos: Glu, sisis, rop, katen, kaliko mo mat

Ol studen oli wok long smol grup. Ol studen oli kolektem piya o ol ril samting we yumi yusum blong sidaon o silip long hem insaed mo aotsaed long haos olsem matres, mat o pilo.



Karem i kam long klasrum mo oli yusum glu blong pestem o yusum rop blong fasem long bigfala pis blong katen o wan olfala mat o wan kaliko.

Aktiviti 10: Disaen pent

OI Risos: Kumala, smol grin popo, ol pent, kontena, rola, bras o skin blong kokonas o spanj, pepa

Ol studen oli werem ol klos blong haos blong pent i no spolem yunifom blong olgeta.

Miksim ol pent wetem wota.

Katem ol vejtebol ia i go long stret saes we studen i save holem mo katem wan disaen long hem. Pentem disaen blong olgeta wetem kala blong pent we oli wantem afta oli prestem disaen ia i go long pepa blong olgeta. Taem oli finis oli putum pepa long san blong pent i drae gud.

Aktiviti 11: Smel

OI Risos: Vetsin, kari paoda, mint lif, jinja, lai o galik, oel blong kokonas, vejtebol oel, soyo sos, sop blong wasem plet, sol, suga, vanila bin, tebol blong raetem ol nem blong smel

Putum ol sampol blong ol samting we yumi yusum long kitjin long ol smolsmol kontena mo putum long wan tebol long fored.

Ol studen oli go smelem mo filim ol sampol ia. Oli no mas testem. Afta oli fulumap tebol we yu givim long olgeta.

Taem oli finis, go tru long ol sampol mo wanem i stap long tebol. Ol studen oli jekem ol ansa blong olgeta long pepa blong olgeta.

Aktiviti 12: Skalpja

OI Risos: Rol blong toelet pepa, manila kad or katen, glu, sanbij, sisis, ol doti pepa, pent, bras blong pent o skin blong kokonas, emti plastik botel

Ol studen oli mekem ol anamol blong solwota riva o bus olsem krab, snek blong solwota mo fulap moa. I gud blong soem ol piya blong ol anamol ia. Ol studen oli wok long grup. Afta, wetem ol materiel, oli jusum wan anamol blong mekem. Taem oli mekem ol anamol ia finis, oli jusum stret pent blong pentem. Afta, oli karem i go aotsaed blong pent i drae.

Aktiviti 13: Bataflae Pent

OI Risos: A4 pepa, pent, bras o wan plastik spun blong spredem pent

Miksim ol pent wetem wota. Givim wan pepa long ol studen. Soem hao blong mekem “bataflae pending”:

1. Foldem pepa long haf.
2. Openem pepa bakegen mo putum pent long medel, folem mak blong laen.

3. Afta foldem bak pepa wetem pent long medel. Yusum fingga blong spredem pent blong mekem ol wing blong bataflae.
4. Openem pepa mo livim i stap blong drae.
5. Taem pent i drae, yusum kala pensel mo pensel blong flasem gud.

Naoia ol studen oli pentem bataflae blong olgeta.

Aktiviti 14: Laen droing

OI Risos: A4 pepa, ol pensel

Givim wanwan pepa long ol studen. Soem “laen droing” long bod wetem jok. Ol studen oli droem eni samting we oli intres long hem long pepa blong olgeta. Oli yusum pensel blong olgeta blong droem eni kaen laen; stret laen, kruked laen, laen olsem wev, laen we i siksag blong fulumap spes insaed long pi ja blong olgeta insted blong oli yusum kala blong kalarem pi ja ia.

Aktiviti 15: Kolaj

OI Risos: Ol olfala koen blong Vanuatu olsem 1vt, 2vt, 5vt mo ol koen blong ol narafala kaontri, glu, ol smol pis blong katen, waet o kala pepa

Ol studen oli karem wan katen i kam long skul. Katemaot wan fes blong klok long eni sep. Pestem wan pepa blong kavremap wan saed blong katen we bae oli yusum blong dro long wan klok. Oli katem tu (2) han blong klok. Katem wan i sot mo wan i long wan. Taem glu i drae, oli yusum ol olfala 1, 2 mo 5 vatu koen blong mekem ol namba blong klok. Olsem blong mekem namba tu (2) long klok oli save yusum tu 1 vt o wan 2vt selen. Taem oli finis oli save flasem fes blong klok blong olgeta i naes mo olsem we oli wantem.

Aktiviti 16: Print

OI Risos: Foam o polistaerin, A4 pepa, rola, pent, stensel naef, pent o pensel, jakol, trai blong pent

Yusum jakol or maka blong droem disaen, be no prestem strong foam. Droem ova ol laen wetem pent o pensel o stensel naef blong mekem mak o hol. Yusum bras o skin blong kokonas o rola blong pentem disaen long hem.

Prestem disaen blong olgeta i go long pepa blong olgeta. Mekemsua se oli prestem evri pat blong foam blong disaen i kamaot gud long pepa. Leftemap foam blong luk disaen long pepa. Mekemsua taem yu leftemap foam, no mekem i glis long pepa.

Aktiviti 17: Filim mo testem

OI Risos: Soyo sos, lemon jus, wota, jus, sop blong wasem plet miksim wetem wota, oel blong kokonas, oel blong kuk, ol smolsmol kontena, ol pis blong kaliko blong fasem ae

Ol studen oli wok long ol smol grup. Putum ol likwid ia i go long ol smol kontena. Givim wan

pis kaliko i go long evri studen blong fasem ae blong olgeta. Askem ol studen blong kam tajem o filim wetem fingga blong olgeta. Afta oli testem smol nomo. Afta oli droem hao yumi stap yusum ol likwid ia mo raelem nem blong olgeta long wan bigfala pepa.

Aktiviti 18: Tingbaot mo Talem

Mekem ol studen oli go sidaon long wan sekol aninit long wan tri. Ol studen oli klosem ae mo tingbaot wan samting we taem oli luk, i mekem oli wantem traot o bel blong olgeta i tantanem. Taem oli tingbaot finis bae oli stanap mo talem long evriwan wanem samting ia. Talem blong yu fastaem afta jusum nekis studen blong talem blong hem. Afta nekis wan i jusum nekis wan, mekem olsem kasem evriwan i talemaot blong olgeta.

Aktiviti 19: Skalpj

OI Risos: A4 pepa blong wanwan studen, tred o string, ol kala o pent

Givim wanwan pepa long ol studen mo talem long olgeta blong oli mekem eni samting wetem pepa ia. Oli mekem wan samting we oli ting se fren blong olgeta i no save. Taem oli finis oli flasem wanem oli mekem. Afta oli fasem tred long hem mo hangem insaed long klasrum.

Aktiviti 20: Pent

OI Risos: Pent, wota, ol olfala tutbras, ol lif we oli go kolektem

Givim pepa long ol studen. Ol studen oli go aotsaed mo kolektem ol lif we oli wantem yusum. Oli karem i kam insaed mo putum long pepa blong olgeta. Afta oli putum tutbras i go insaed long pent we oli laekem blong yusum. Afta oli skrasem hea blong tutbras blong pent i kamaot smolsmol i go long pepa mo lif. Taem oli finis oli karemaot ol lif blong luk sep blong ol lif we i stap long pepa.



Tem 2 – Wik 1



Lesen 1: Spirituel mo Karakta Dvelopmen (30min)

Fokas blong Aktiviti: Dedikesen blong wan bebe we i jas bon

OI Risos: OI foto blong ol bebe

Vokabulari: Prea, blesem, jos, famle, bebe

Long evri komyuniti blong yumi long Vanuatu, taem wan bebe i bon i kam insaed long wan famle, famle ia i mas tekem bebe ia i go long jos blong pasta i prea mo blesem hem bifo mama blong bebe i save karem hem i go aotsaed o long ol narafala famle o long haos blong wan fren o go long garen, solwota o long ol eni narafala ples.

Askem ol studen:

- Hu pasta blong jos blong hem i bin prea long hem long jos taem hem i bebe?
- Hu i bin go long jos taem pasta long jos blong hem i bin prea blong blesem wan bebe?
- Wanem nao oli mekem afta we pasta i prea mo blesem bebe ia?
- Hu i neva luk pasta o wan lida blong jos i blesem wan niubon bebe?

Putum ol studen long ol grup mo givim ol kwesten ia blong oli diskasem mo wan memba i kam long fored mo talemaot ol ansa blong olgeta long klas.

Opotuniti blong Asesmen: Ol studen oli save se oli stap prea from ol bebe long jos blong olgeta.

Lesen 2: Pefoming At (30 min)

Fokas blong Aktiviti: Ol defren miusik

OI Risos: OI defren miusik long fon blong yu o laptop o fon blong wan fren

Vokabulari: Rege, rok'n'rol, hiphop, kastom, stringban, slo, kaontri miusik mo miusik blong jos.

Ol studen oli lisen long ol defren miusik from fulap risen, sam pipol oli lisen long stringban from oli laekem stringban, samfala man oli laekem lisen long rege miusik from oli laekem blong danis rege. Sam pipol oli laekem ol slo mo ol instrumental miusik from oli wantem rilaksem tingting blong olgeta afta long wan had wok. Sam oli laekem blong stap lisen long ol singsing o miusik blong jos mo sam oli laekem kaontri miusik.

Askem ol studen:

- Wanem kaen miusik nao yu laekem?

Putum ol studen long grup blong fo (4) mo askem olgeta blong oli mekem wan list blong from wanem oli lisen long ol defren miusik. Afta, plei sam singsing long fon blong yu mo ol studen oli talem se ol singsing ia oli wanem kaen miusik. Grup we i talem plante oli raet i win.

Opotuniti blong Asesmen: Ol studen oli lisen long ol defren kaen miusik insaed mo talem se hem i wanem kaen miusik.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Helti individuel mo Komyuniti (30 min)

Fokas blong Aktiviti: Hao blong klinim ol tut

OI Risos: A4 pepa, glu, manila kad

Vokabulari: Tut, maot, brasem, tutbras, kakae, sugaken

Talem long ol studen se long las tem oli i bin lukluk long ol pat blong bodi blong olgeta we oli stap insaed long bodi. Insaed long maot i gat tang mo ol tut. Ol studen we oli gat seven yia o bitiim seven yia oli nid blong brasem tut blong olgeta evri dei.

Ol studen oli wok long grup blong faev. Bae oli tokbaot ol defren wei we ol studen oli stap brasem tut blong olgeta mo raetem daon long pepa. Ol studen bae oli tokbaot ol kwesten we i stap daon:

Askem ol studen:

- Hu i bin helpem yu long fasfala taem we yu bin brasem tut blong yu mo hem i yusum wanem?
- Wanem nao yu save mekem blong lukaotem gud tut blong yu?
- Raetem daon ol samting we yu stap yusum blong brasem tut blong yu?
- Wanem bae i save kasem yu sapos yu no lukaotem gud tut blong yu?

Afta long diskasen blong ol grup, wanwan lida i ridimaot ol ansa blong grup long klas. Pestem wok blong ol grup long wan jat mo putumap blong evri wan i save ridim wok blong olgeta.

Opotuniti blong Asesmen

Ol studen oli tokbaot mo raetem ol wei blong lukaotem gud tut blong olgeta.

Lesen 5: Tekem plante kea long envaeromen blong yumi (45 min)

Fokas blong Aktiviti: Mekem neseri blong kabij

OI Risos: Wan sped o fok, ol sid blong kabij, sam wota long baket, eit stik we i gat fok long hem, eit stret stik, sam drae lif blong kokonas, wan emti tin we i gat ol smol hol aninit long hem, 30sm rula, 1m stik

Vokabulari: Kabij, neseri, sentimita, mita, fok, sped, ol sid

Karem ol studen oli go aotsaed long ples blong mekem neseri o garen. Makemaot tu smol rektanggel blong 1m x 50sm long graon.

Askem ol studen: Hu i bin planem waetbun kabij finis?

- Serem ol studen oli go long tu grup. Soem ol studen hao blong yusum sped o fok blong



digim graon blong neseri. Yu nomo bae i digim graon wetem tufala tul ia from hem i wan denja long ol studen.

- Taem yu finisim digim graon, soem olgeta hao blong mekem graon i sofsof. Karemaot ol gras, stik mo ston taem oli stap mekem gud graon.
- Askem long ol studen se: From wanem bae graon i mas sofsof gud?
- Taem oli mekem gud graon finis, yu mekem gud sep blong hem.
- Askem ol studen se: From wanem yumi mekem ol bed blong graon ia olsem?
- Yusum stik blong mekem ol laen long bed we bae oli putum ol sid insaed long hem. Soem long olgeta wei blong putum ol sid stat long wan en blong laen go kasem narafala en blong laen. Yusum 30sm rula blong makem spes. Afta oli planem narafala sid i go.
- Taem oli putum ol sid oli go long graon finis, berem wetem graon. Yusum tin we i gat ol hol long hem blong kasem wota mo wotarem ol bed.
- Yusum fo stik we i gat fok long hem blong mekem wan selta blong neseri mo yusum ol drae lif blong kokonas blong putum antap. Askem: From wanem yumi mas mekem smol selta ia?

Talem long ol studen se stat long tedei i go bae oli stap wotarem ol bed evri moning mo aftanun mo pulumaot eni gras we i gro long bed. Mekem wan list blong ol duti blong ol studen blong wotarem ol sidbed blong olgeta evridei. Putum rosta antap long notis bod blong ol studen.

Askem ol studen blong wasem gud han mo leg blong olgeta afta we oli wok long garen.

Opotuniti blong Asesmen

Ol studen oli lanem olsem wanem blong priperem graon blong wan bed blong wan neseri.

Lesen 6: Pefoming At (30min)

Fokas blong Aktiviti: Krietem wan instramen blong miusik

Ol Risos: Ol tul we ol studen oli save mekem instramen olsem ol sid, ol lid blong botel, ol ston, plastik botel, ol stik, bambu

Vokabulari: Krietem, miusikel, instramen

Wetem help blong yu, askem ol studen blong oli mekem sam instramen blong miusik yusum ol risos we i stap raon long skul blong olgeta.

Opotuniti blong Asesmen

Ol studen oli krietem wan instramen blong miusik.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30min)

Fokas blong Aktiviti: Taemlaen

Ol Risos: Eksasaes buk blong olgeta, pensel, ol kala pensel

Vokabulari: San, girap, draon, mun, antap, stret

Askem ol studen:

- Bifo san i girap yumi stap mekem wanem?
- Taem san i girap yumi stap mekem wanem?
- Taem san i stap stret antap yumi stap mekem wanem?
- Taem san i stap go daon yumi stap mekem wanem?
- Taem san i draon yumi stap mekem wanem?
- Taem ples i tudak mo mun i kam antap yumi stap mekem wanem?

Askem ol studen blong droem wan taemlaen blong olgeta wanwan long buk blong olgeta. Taemlaen ia i stat long taem oli girap ko kasem taem oli silip. Oli droem ol piya blong soem wanem aktiviti oli stap mekem long ol defren taem long dei.

Opotuniti blong Asesmen

Ol studen oli droem wan taemlaen blong wan dei mo droem wanem i hapan long ol defren taem truaot long dei.

Lesen 10: Siviks mo Komyuniti Rilesensip B (45min)

Fokas blong Aktiviti: Ol yang pipol oli help long skul

Ol Risos: Ol maka o jakol, ol bigfala pepa, fo yangfala o yut blong komyuniti

Vokabulari: Tijim, singsing, lisén, narafala, instramen

Not blong Tija: Long tu wík blong holidei, askem prinsipol blong skul blong mekem wan leta o toktok wetem lida blong ol yut long komyuniti blong jusum sam yangfala blong kam tijim ol studen long wan singsing long lanwis blong olgeta. Oli save karem wan instramen i kam sapos oli gat. Sapos skul i stap long tufala taon o ol hedkwota we i gat ol pipol blong narafala aelan i stap long hem, yu save askem ol bigfala brata o sista o wan famle blong ol studen long klas blong kam tijim olgeta.

Welkamem ol yangfala we oli kam blong tijim ol studen. Ol yut ia bae oli tijim wan singsing long ol studen. Askem olgeta blong introdiumsum olgeta. Ol studen oli klapem han blong soem se oli glad se ol yangfala ia oli save kam blong tijim olgeta.

Serem ol studen oli go long ol grup we i stret long namba blong ol yut we i kam. Talem long



olgeta blong jusum eni ples we oli wantem praktis long hem mo wanem instramen oli wantem yusum. Talem taem blong evriwan i kambak insaed long klasrum. Go raon long wanwan grup blong luk olsem wanem ol studen oli stap tekpat. Givim ten minit blong oli lanem singsing blong olgeta.

Talem oli kambak long klasrum bae wanwan grup i singim singsing blong olgeta.

Talem evri grup i singim singsing blong olgeta finis, talem “tangkiu” long ol yangfala bakegen long taem blong olgeta. Talem ol studen blong givim wan bigfala klap long ol yangfala ia mo singsing, *Tata*.

Askem long ol studen se: Yufala i laekem taem ol yangfala o ol narafala memba blong komyuniti i kam blong tijim yufala?

Talem se hemia wan wei we ol pipol blong komyuniti oli kontribut i kam long skul blong yumi olsem yumi bin lanem long wan lesen blong yumi.

Opotuniti blong Asesmen

Luk se ol studen oli stap lan gud long grup blong olgeta.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 2 – Wik 2



Lesen 1: Spirituel mo Karakta Dvelopmen (30min)

Fokas blong Aktiviti: Dedikesen blong wan niu haos, bas, masin o wan miusikel instramen

Ol Risos: Ol foto blong wan dedikesen blong wan haos, bot, trak

Vokabulari: Dedikesen, prea, haos, bot, trak, miusikel instramen

Long evri aelan blong yumi long Vanuatu, taem yumi gat wan niu samting bae oli mas dediketem o prea from bifo oli yusum. Eksampol, sapos yumi gat wan niu haos, bot, trak o miusikel instramen, bae pasta i mas mekem wan prea blong dedikesen blong ol samting ia bifo oli save yusum.



Askem ol studen ol kwesten ia:

- Hu i bin luk oli dediketem wan samting long ples blong hem finis?
- Hu nao i prea blong dediketem samting ia?
- Wanem nao oli mekem afta oli dediketem samting ia?
- Yu ting se oli stap prea from wan niu samting from wanem?
- Hu i neva luk o witnisim oli prea long wan niu samting? From wanem yufala i no stap prea long ol niu samting fastaem?

Opotuniti blong Asesmen

Ol studen oli mekem toktok mo soem oli save se i gat sam pipol oli stap prea from ol niu samting bifo oli save yusum.

Lesen 2: Pefoming At (30 min)

Fokas blong Aktiviti: Danis long kastom

Ol Risos: Tul o intramen blong pleplei miusik olsem mobael fon o sidi pleia, ol kastom singsing

Vokabulari: Danis, kastom, tamtam, muvmen, han, leg

Yu save askem wan memba blong komyuniti blong help long lesen ia.

Mekem ol studen oli danis long wan kastom singsing we i popula long komyuniti blong olgeta.

Opotuniti blong Asesmen

Ol studen oli danis long wan kastom singsing o kastom danis.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Sefti (30min)

Fokas blong Aktiviti: Etkwek

Ol Risos: Tufala envelop, one wetem taetol blong “Long taem blong etkwek” mo narawan i gat “Afta long etkwek”, ol sentens we i stap long tufala list daon, tu pis bigfala pepa wetem “Wanem blong mekem” mo “Wanem blong NO mekem”

Vokabulari: Sefples, aninit, etwek, klia, praktis, hae ples o graon

Putum ol sentens ia oli go long stret envelop.

Taem blong etkwek:

Sapos yu stap insaed long haos, go aninit long wan tebol o bed.

Stanap aninit long wan tri.

Sapos yu stap insaed long haos, stanap o sidaon aninit long wan doa frem.

Go aninit long wan tebol sapos yu stap long skul.

Go long wan sef mo klia ples.

Stap long sefples gogo taem graon i stop blong muvmuv.

Haed aninit long ol self o kapbod we i no gat ol glas plet mo sospen long hem.

Afta long etkwek:

Sapos eni wan i gat kil, givim fas aed long hem.

Lisen long wan tija o perens long wanem hem i harem long radio.

Go storian wetem wan fren. Talem ol fraet blong yu.

Klinim ol samting we etkwek i mekem o oli brokbrok.

Muv i go long wan hae graon o ples sapos yu luk solwota i muv i go daon kwiktaem o i drae.

Askem long ol studen se putum han blong yu i go antap sapos yu fraet long etkwek.

Talem long ol studen se, “Vanuatu i stap long wan ples we bae yumi filim etkwek plante taem long wan yia. Etkwek i wan najoral disasta we i minim se yumi no gat kontrol long hem o no save kontrolem. Be yumi save stap sef sapos yumi folem sam wei blong stap sef taem graon i stap muvmuv. I gat wanem blong mekem bifo wan etkwek, long taem blong etkwek mo afta long wan etkwek.”

Askem wanwan studen i ansarem wanwan long ol kwesten ia:

- Taem graon i stap muvmuv, wanem nao yumi sud mekem?
- Taem graon i stop blong muvmuv bae yumi mekem wanem?

Serem ol studen oli go long tu grup. Givimaot wan envelop i go lo wanwan grup. Ol studen

long wanwan grup bae oli putum ol sentens insaed long envelop blong olgeta long tu grup: “Wanem blong mekem” mo “Wanem blong no mekem”.

Givim taem blong olgeta i tokbaot wanwan sentens mo putum aninit long stret taetol. Go raon blong jekem mo helpem olgeta blong putum ol sentens blong olgeta aninit long stret taetol.

Stat long grup we i wok long “Taem blong etkwek”. Grup ia i talem long evriwan hao oli bin putum ol sentens blong olgeta. Ol fren oli save askem kwesten long olgeta. Afta, muv i go long narafala grup.

Opotuniti blong Asesmen

Ol studen oli putum ol sentens aninit long stret taetol.

Lesen 5: Tekem plante kea long Envaeromen blong yumi (45 min)

Fokas blong Aktiviti: Wanem i stap long envaeromen ia

Ol Risos: Bigfala pepa, ol glu, ol A4 pepa, sisis, ol kala pensel mo kreyon, ol pensel

Vokabulari: Envaeromen, solwota, reva, bus, haos, skul, taon, viley

Ol studen oli wok long faev grup:

Grup 1: Envaeromen blong solwota

Grup 2: Envaeromen blong skul

Grup 3: Envaeromen blong bus

Grup 4: Envaeromen blong haos

Grup 5: Envaeromen blong taon o viley

Wanwan grup bae oli nidim wan bigfala pepa, glu, A5 pepa (A4 we yu katem long haf), sisis, ol kala pensel mo kreyon mo ol pensel.

Wanwan studen long grup bae i droem wan pijs blong wan samting we hem i save tingbaot we i stap insaed long envaeromen we oli wok long hem long pis pepa blong hem mo i kalarem gud. Afta hem i katemaot pijs blong hem mo pestem i go long bigfala pepa.

Taem oli finis, oli tokbaot smol posta blong olgeta long klas; wanem nao ol samting we oli droem.

Opotuniti blong Asesmen

Ol studen oli droem ol samting we i stap long ol defren envaeromen blong olgeta.



Lesen 6: Pefoming At (30 min)

Fokas blong Aktiviti: Mekem wan danis folet wan stori

Ol Risos: Vanua rida blong *Man Faol blong Mi*, mobael fon, bambu tamtam, tin dram, ol instramen we oli bin mekem long Tem 1

Vokabulari: Ritem, defren, muvmen, aksen, i stret, folet

Not blong Tija: Yu save yusum wan narafala stori buk blong mekem ol aktiviti ia.

Ridim stori long klas afta mekem ol studen oli danis folet stori blong *Man Faol blong Mi*. Wan studen i kilkilim bambu mo ol narafala studen oli klapem han mo danis. Talem long ol studen blong kriitem ol ritim mo muvmen o aksen wetem ol bodi blong olgeta we i stret long stori long buk ia.

Bae hemia we i kilim bambu nao bae i stap mekem ol defren bit long bambu mo mekem ol defren muvmen wetem bodi blong hem mo ol narafala wan i mekem olsem. Bae oli danis mo semtaem lisen long stori mo mekem ol aksen we i stret gud.

Opotuniti blong Asesmen

Ol studen oli save kriitem ol ritem mo bodi muvmen blong olgeta we i stret long ol defren pat blong stori ia.

Fokas long Literasi

Ol studen oli soem andastaning long bit taem wen oli mekem danis folet wan storian.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30min)

Fokas blong Aktiviti: Mekem ol tradisonal klos

Ol Risos: Skin blong burao o rafia rop, lif blong nanggaria, lif blong pandanus mo drae lif blong banana

Vokabulari: Grasket, rop, mesarem, fasem rop, tradisonal, klos, nambas

Askem tu yut; wan boe mo wan gel blong help long lesen ia.

Helpem ol studen blong oli mekem ol tradisonal klos blong olgeta.

Ol boe blong mekem nambas mo gel blong oli mekem grasket.

Yusum rop blong mesarem raon long bel blong ol gel mo ol boe. Blong mekem wan grasket katem tri pis wetem semak longfala blong oli wivim blong mekem rop we i go raon long bel i strong gud. Mekemsua se i no taet tumas mo livim smol spes i fri blong klosem grasket.

Fasem rop long wan leg blong tebol, katem ol rop blong mekem grasket folet longfala we ol

studen oli laekem

Fasem ol rop i longlongfala long wan en blong rop i go kasem narafala en. Livim smol rop long tugeta en blong oli yusum taem oli fasem grasket raonem bel blong olgeta.

Ol boe oli nidim wan o tu lif nomo blong mekem nambas blong olgeta.

Opotuniti blong Asesmen

Ol boe mo ol gel oli mekem ol tradisonal klos.

Lesen 10: Siviks mo Komyuniti Rilesensip A (45 min)

Fokas blong Aktiviti: Wok folem rul blong klas

Ol Risos: Jat blong ol rul blong klas, eksasaes buk, pensel

Vokabulari: Klasrum, rul, olsem, wanem, poem, impotens

Long lesen ia, klas i stadi long ol rul long klas. Blong karem ol studen oli kam long lesen ia, yu harem ol tingting blong olgeta fastaem. Letem ol studen oli talemaot ol rul we klas i gat. Putum jat blong rul blong klas i go antap mo evriwan i rid tru tugeta.

Ol kwesten daon i blong mekem oli givim ol stamba tingting from wanem yumi gat ol rul. Oli mas save se ol rul blong wan ples i helpem ol pipol we oli stap long ples ia blong oli stap gud tugeta mo oli stap sef.

Askem ol studen:

- From wanem nao yumi gat ol rul?
- Insaed long wan klasrum bae i olsem wanem sapos i no gat ol rul blong klasrum?
- Wanem bae i helpem yumi blong save folem gud oltaem taem tija i no stap long klas?
- Sapos mi no folem ol rul long klasrum wanem bae i save happen long mi?

Afta we oli studen oli tekpat long diskasen mo harem impotens blong ol rul, naoia askem olgeta blong raetem wan sot poem abaot ol rul long eksasaes buk blong olgeta.

Opotuniti blong Asesmen

Ol studen oli raetem wan sot poem long taetol ia: *Ol Rul*.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32



Tem 2 – Wik 3



Lesen 1: Spirituel mo Karakta Divelopmen (30 min)

Fokas blong Aktiviti: Fasin blong go long ded

Ol Risos: Sam pi ja blong soem hao ol pipol oli go long wan ded

Vokabulari: Respek, sori, Mat, kaliko, flawa, blak, bedsit, blanket

Askem ol studen:

- Hu i bin go long wan ded finis?
- Wanem nao ol pipol oli karem taem oli go long wan ded?
- From wanem oli karem ol samting ia?
- Wanem nao ol pipol oli mekem taem oli stap long ples blong ded?

Askem ol studen blong raetem wan rikaon long wan ded we olgeta i bin go long hem long buk blong olgeta.

Opotuniti blong Asesmen

Ol studen oli raetem wan rikaon long wan ded we oli bin go long hem.

Lesen 2: Pefoming At (30 min)

Fokas blong Aktiviti: Mekem aksen blong wan kastom danis

Ol Risos: Ol singsing blong kastom danis, mobael fon o sidi pleia

Vokabulari: Singsing

Yu save invaetem wan man o woman long komyuniti blong tijim ol studen long wan kastom singsing mo danis blong hem.

Sapos yes, welkamem memba blong komyuniti we i kam blong tijim ol studen mo askem ol studen blong lisem gud long hem we i stap tijim olgeta long singsing mo danis blong singsing ia.

Taem oli finis talem tangkiu long spesel ges ia bifo hem i go.

Sapo yu no gat wan man o woman long komyuniti, tijim ol studen wan kastom danis blong komyuniti blong yufala.

Opotuniti blong Asesmen

Ol studen oli singsing mo danis gud long wan kastom danis.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Helti individuel mo Komyuniti (30min)

Fokas blong Aktiviti: Ol ples blong karem ol kakae

Ol Risos: A4 pepa, ol kala, ol pensel

Vokabulari: Garen, stoa, maket, solwota, bus, reva

Blong faenem gudfala kakae, i gat sam ples we ol pipol oli save go blong tekem ol kakae long hem. Taem ol pipol oli go long solwota, oli save karem fis mo selfis.

Long garen, ol pipol oli save tekem ol kakae we oli planem.

Maket hem i wan narafala ples be kakae i no fri. Ol pipol oli mas pem kakae wetem mani bifo oli save karem ol kakae, hemia i semak olsem stoa.

Stamba tingting we ol pipol oli mas gat hem i blong jusum ol nambawan kakae blong famle blong olgeta.

Serem ol studen blong oli wok long grup blong faev. Ol studen oli tokbaot ol kakae we oli karem long ol defren ples blong karem kakae. Oli mas tingbaot se kakae we grup i jusum bae i kakae blong sapa blong olgeta. Ol studen oli droem ol piya blong ol kakae wetem nem blong olgeta insaed long stret bokis long tebol daon.

Oli mas jusum ol gudfala kakae olsem toktok ia i talem, “Ademap kala! Ademap kala! Ademap kala long basket blong yu. Ademap kala long plet blong yu.”

Ples blong karem kakae

Garen	Solwota	Maket	Reva	Stoa

Oli jusum wan long olgeta long grup blong i presentem wok blong olgeta long klas. Ol narafala grup oli save talem se grup ia i gat wan gudfala kalaful kakae long plet blong olgeta o nogat.

Opotuniti blong Asesmen

Ol studen oli tokbaot mo droem ol nambawan kakae.

Lesen 5: Tekem plante kea long Envaeromen blong yumi (45 min)

Fokas blong Aktiviti: Lukaotem gud ol defren envaeromen

Ol Risos: Ol posta blong envaeromen, ol smol pis blong pepa, glu, bigfala pepa we yu droem mo kalarem wan pi ja blong wan najoral envaeromen olsem solwota, sanbis, bus, reva o viley

Vokabulari: Najoral, envaeromen, lukaotem, gud, raetem, wei

Sapos yu faenem ol posta blong envaeromen, yu save yusum blong tokbaot wetem ol studen. Sapos yu no faenem wan posta blong envaeromen, yu save tekem ol studen long wan smol wokbaot mo tokbaot ol doti we yufala i faenem.

Askem ol studen abaot wanem nao oli save taem we yumi stap sakem doti long solwota o reva, long bus? O taem yumi bonem doti – wanem nao i hapan long ea? Mo wanem nao i hapan taem yumi stap katemdaon ol tri long ol bus blong yumi.

Eksplenem long olgeta from wanem nao hem i impoten tumas blong yumi mas lukaotem gud envaeromen blong yumi mo wanem nao ol fasin nogud blong yumi blong no save lukaotem gud envaeromen blong yumi i save afektem helt o laef blong anamol mo yumi tu bakegen.

Givim wanwan pis pepa long ol studen. Long ol smol pis blong pepa wanwan studen i raetem wan samting we bae hem i mekem blong lukaotem envaeromen blong hem. Oli raetem nem blong olgeta long pis pepa ia tu. Afta oli pestem i go long wan bigfala pepa we yu redi long hem finis i stap.

Afta oli talem long klas wanem oli raetem long pis pepa blong olgeta.

Opotuniti blong Asesmen

Ol studen oli raetem wan wei we olgeta wanwan i save mekem blong help lukaotem gud envaeromen blong olgeta.

Lesen 6: Pefoming At (30 min)

Fokas blong Aktiviti: Mekem aksen blong wan anamol

Ol Risos: Ol singsing we oli tokbaot ol anamol olsem *Old Makdonald had a Farm* o wan narafala singsing

Vokabulari: Pig, faol, nanigot, buluk, dog, hos

Talem long ol studen se, “Tedei yumi danis blong mekem sam aksen blong sam anamol.”

Yu save plei wan singsing olsem mo talem long ol studen blong mekem ol aksen blong anamol we i stap long singsing ia mo mekem saon blong olgeta.

Ol studen oli danis mo mekem aksen blong pijin we i flae o fis we i swim, puskat i ronron, buluk i ronron o eni narafala muvmen blong ol narafala anamol.



Opotuniti blong Asesmen

Ol studen oli mekem noes mo aksen blong ol anamol we oli singsing long hem.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Mekem ol simpol samting wetem lif pandanus o lif kokonas

Ol Risos: Drae lif blong pandanus o grin lif kokonas

Vokabulari: Wivim, waj, lif, kokonas, mat, pandanas

Yu save invaetem sam mama mo yangfala gel blong kam givhan long lesen ia.

Yu o wan mama we i kam blong givhan i save soem long olgeta olsem wanem blong wivim wan samting olsem wan waj. Askem ol studen blong oli wivim waj, hedban o eni narafala samting we oli save yusum lif kokonas o lif blong pandanas. Taem oli finis oli raetem nem blong olgeta long handikraf blong olgeta mo yu putum long wan ples blong displei.

Opotuniti blong Asesmen

Ol studen oli save wivim wan simpol samting long lif kokonas o lif pandanas.

Lesen 10: Siviks mo Komyuniti Rilesensip B (30 min)

Fokas blong Aktiviti: Ol volentia

Ol Risos: Ol foto blong ol volentia we oli stap kam long skul sapos skul i gat sam o sam olfala niuspepa o magasin we ol studen oli save katemaot ol piya blong soem hao ol volentia oli stap helpem yumi

Vokabulari: Volentia, Piskop, Japanis, Franis, Ostrelia, Amerika, kaontri

Not blong Tija: Sapos yufala i gat wan volentia long skul blong yufala yu save invaetem hem blong storian long hao hem i help long skul blong yufala. Sapos yufala i nogat wan volentia long skul blong yufala be i gat wan i wok long wan naraples klosap long skul blong yufala, yu save intaevem hem mo tekem foto blong hem sapos hem i agri blong yu save yusum long lesen ia.

Brenstrom wetem ol studen blong oli save tingbaot i go bak long ol taem we oli luk sam visita we oli bin kam long skul blong mekem sam wok long skul.

Sapos yufala i gat wan volentia long skul blong yufala, askem ol kwesten ia:

- Wanem nem blong volentia we i stap long skul blong yumi?
- Volentia we i stap long skul blong yumi i kam long wanem kaontri?
- Wanem nao hem i stap mekem long skul blong yumi?

Sapos yufala i nogat wan volentia long skul blong yufala, askem ol kwesten ia:

- From wanem ol pipol blong narafala kantri oli stap kam long ol skul blong yumi o ol narafala skul tu?
- Hao nao ol volentia oli kam blong stap help long ol skul o narafala ples?
- Hao long nao oli save stap long wan ples?
- Hu i stap pem olgeta blong olgeta long ol wok blong olgeta?
- Ol volentia ia oli help long ol skul nomo o long ol narafala ples tu?
- Sapos oli wantem stap sam moa yia, wanem nao bae oli mekem?

Tokbaot wetem ol studen wan opotuniti olsem i wan blesing long skul from tedei laef blong yumi hem i mani mo taem wan blesing olsem i kam hem i wan presen we i kam long skul. Yumi mas harem gud mo talem tangkiu long wanem we oli stap mekem, askem eni samting we yumi no save blong oli eksplenem long yumi mo yumi mas givhan gud blong lukaotem gud olgeta taem oli stap wetem yumi.

Kastom blong Vanuatu hem i go gud wetem ol kaen fasin olsem. Fasin blong ol pipol blong Vanuatu hem i yumi laekem givhan wetem glad hat blong givhan long ol narafala man.

Raetem sentens ia long bod we bae ol studen oli kopi i go long buk blong olgeta:

“Oltaem yumi mas gat glad hat long ol man we oli kam blong mekem volentia wok long skul o komyuniti blong yumi. Yumi soem glad hat blong yumi taem yumi lukaotem gud olgeta.”

Ol studen oli katemaot wan pi ja long magasin o niuspepa mo pestem aninit long tufala sentens we oli raetem.

Opotuniti blong Asesmen

Ol studen oli raetem gud tufala sentens ia i go long buk blong olgeta.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 2 – Wik 4



Lesen 1: Spirituel mo Karakta Dvelopmen (30min)

Fokas blong Aktiviti: Tanksgiving

Ol Risos: Ol kakae olsem yam, banana, aelan kabij, kumala, taro

Vokabulari: Yam, olta, jos, kakae, prea blong tangkiu, Eprel, Julae

Long sam relijen blong yumi, eksampol long Presbitrin jos, oli stap mekem Tanksgiving seves long manis Eprel kasem manis Julae long taem blong digim ol niu yam.

Long taem ia ol memba blong jos oli tekem ol niu yam we oli digim long garen blong olgeta i kam long jos, be olgeta we yam blong olgeta i no gud, oli save tekem eni aelan kakae we i redi long garen blong olgeta, olsem aelan kabij, sugaken, banana, taro, kumala, maniok, ol kokonas, aranis, tomato mo ol nrafala kakae, oli tekem oli go long jos.

Taem ol memba blong jos oli tekem ol yam o ol kakae blong olgeta oli go long jos, oli mas tekem go putum insaed long olta long fored blong jos. Taem evri kakae i stap long fored long jos, pasta i mekem seves blong talem tangkiu long Papa God from ol kakae we hem i givim long yumi, afta i mekem wan spesel prea blong blesem ol kakae ia mo ol ofering blong seves ia.

Afta long seves, ol dikon ol lida blong jos oli putum praes blong ol kakae ia mo ol memba blong jos oli pem mo mani i go long jos. Long dei blong Thanksgiving i gat ol spesel mit blong kakae long dei ia, eksampol olgeta long Maskelyn aelan olgeta long evri Thanksgiving oli stap go daeva blong totel nomo blong kakae wetem yam blong niu garen blong olgeta.

Long ol defren aelan oli gat mit we oli stap kakae be i no mit blong bus be ol mit blong solwota nomo.

Putum ol studen long ol grup mo enkarejem olgeta blong diskasem trifala kwesten ia.



- Hu i bin go long wan Thanksgiving seves finis long jos blong hem?
- Wanem nao oli mekem long ol kakae blong Thanksgiving ia?
- Hu i neva luk kaen praktis ia?

Opotuniti blong Asesmen

Ol studen oli save wanem kakae nao oli tekem oli kam long Thanksgiving seves.

Lesen 2: Pefoming At (30 min)

Fokas blong Aktiviti: Danis long paten

Ol Risos: Sidi pleia, mobael fon mo ol singsing yu save

Vokabulari: Tantanem, sekol, kamdaon

Long aktiviti ia yu save mekem eni kaen paten yu tingbaot. Talem long ol studen se, “Tedei bae

yumi danis mo mekem ol paten.”

Taem yu plei miusik mo yu stat blong danis ol studen oli folem yu, yufala i save danis fas taem blong mekem wan sekol, o yufala i danis i go antap, yufala i save danis tantanem yufala i go daon long graon mo kambak antap.

Opotuniti blong Asesmen

Ol studen oli save danis mekem wan sekol o danis i go antap mo kamdaon.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Sefti (30 min)

Fokas blong Aktiviti: Ol saen blong taedol wev

Ol Risos: Pija blong taedol wev (**Apendiks 13**) tu bigfala pepa

Vokabulari: Tsunami, taedol wev, spid, hae graon, noes, hariap

- Askem ol studen: Hu i stap klosap long solwota?

Talem long ol studen se taedol wev i semak olsem tsunami (pronaonsem sunami) we hem i wan Japanis toktok we “tsu” i minim “harbour” mo “nami” we i minim wev.

Infomesen blong Tija

Tsunami hem i wan bigfala wev we i save tolfala i save bitim 10 mita, hem i spid klosap i semak olsem wan bigfala plen blong Air Vanuatu o wan we yu save luk wanwan taem we i flae antap we antap long skae ol jet plen.

Long stamba tingting ia nao, hem i impoten tumas blong yumi we i stap klosap long solwota o ples we yumi stap long hem i flat i semak long level blong solwota, taem yu harem se i gat wan woning blong tsunami yu mas muv hariap i go long wan hae ples mo stap gogo taem ol jif oli talem se i sef blong kambak long haos blong yumi.

Tsunami i save hapen sapos i gat:

Wan etkwek aninit long solwota

Wan volkenu aninit long solwota i faerap

Graon, aes, o wan ston blong spes i foldaon i go long solwota


Soem long ol studen piya blong taedol wev (**Apendiks 13**) taem yu eksplenem ol infomesen antap.

Serem ol studen oli go long tu grup mo askem olgeta blong tokbaot wan long ol kwesten ia. Go long tufala grup mo tokbaot kwesten ia wetem olgeta.

Ol kwesten blong ol studen oli save tokbaot long grup blong olgeta:

- Wanem i save mekem tsunami?
- Wanem ol saen blong tsunami i kam?
- Wanem bae yu mekem taem yu harem woning blong tsunami?

Ol studen oli raetem ol ansa blong olgeta olsem wan web map olsem hemia daon. Narafala grup tu i mekem semak. Afta oli presentem wanem we oli bin tokbaot long bigfala grup.



Opotuniti blong Asesmen: Ol studen oli tokbaot kwesten ia long grup blong olgeta.

Lesen 5: Tekem plante kea long Envaeromen blong yumi (45 min)

Fokas blong Aktiviti: Transplanem kabij

Ol Risos: Sped, baket blong wota, tin we i gat hol long hem, ol stik blong we spes blong kabij i stap long hem.

Vokabulari: Transplanem, yang, kabij, garen, wasem, priperem

Not blong Tija: Wan wikk bifo long lesen ia, yu wetem ol studen oli klinim wan ples blong mekem garen blong kabij. Lesen ia bae i kam long wan las lesen long dei we san i stap go daon.

Talem long ol studen wanem hem i “transplan” mo talem long olgeta se lesen blong tedei bae oli mekem hemia nao. Putum ol studen long ol semak grup blong olgeta we oli bin wok tugeta long Wik 1, Lesen 5.

- Priperem graon: Soem long ol studen hao blong digim mo mekem gud graon blong garen we bae oli planem ol kabij i go long hem. Digim graon mo mekem i sofsof gud. Karemaot eni ston o gras o wud long graon ia.
- Transplanem kabij: Talem long ol studen wataem i stret taem blong transplanem kabij. Mo soem long olgeta olsem wanem blong digimaot ol yangfala kabij blong no damejem rus blong olgeta. Karemaot wan big wan blong planem. Putum smol wota long hol blong planem kabij mo planem kabij i go. Afta kavrempa gud wetem graon.

Yu digim ol hol mo ol studen oli priperem gud graon blong transplanem wan o tu kabij blong olgeta. Afta we evriwan i planem ol kabij blong olgeta finis, kasem smol wota long tin we i gat hol long hem mo wasem graon raonem ol kabij we yufala i jas transplanem.

Putumap wan rosta blong ol studen blong wotarem kabij mo pulumaot ol gras long garen blong kabij blong olgeta. Ol studen bae oli wotarem ol kabij long moning mo aftanun.

Askem long ol studen:

- From wanem yumi transplanem ol kabij ia long aftanun be i no long moning?
- Hu i save eksplenem hao yumi karemaot ol yang kabij long neseri blong planem long garen? Mo from wanem yumi karemaot olsem?

Hem i impoten blong ol studen oli save se oli save yusum ol smol ples long envaeromen blong skul mo haos blong planem ol helti vejtebol we oli save kakae. Plante taem yumi lego gras nomo i stap gru mo spendem plante mani blong mekemsua se gras i sot taem yumi pem bensin, masin blong katem gras o wan man blong kam katem gras o ol paren blong yumi oli katem long naef. Taem gras i gru bigwan tumas, hem i save kam haos blong ol rat mo moskito.

Opotuniti blong Asesmen

Ol studen oli talem from wanem oli transplanem ol kabij long aftanun be i no long moning.

Lesen 6: Pefoming At (30 min)

Fokas blong Aktiviti: Posisen danis

Ol Risos: Ol sidi blong singsing, singsing long mobael fon, o ol singsing yu save

Vokabulari: Parel, lefsaed, bihaen, fored, raetsaed

Plei wan miusik mo askem ol studen blong oli danis folet yu, yu danis mo priten se yu stap parel wan saed blong wan bot, parel go long fored, parel i go bihaen, parel kwiktaem mo parel sloslo.

Opotuniti blong Asesmen

Ol studen oli save danis long ol posisen.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljorol Heritej mo Aedentiti (30 min)

Fokas blong Aktiviti: Lanem wan tradisonal gem o pleplei

Ol Risos: Ol samting oli nidim blong mekem pleplei

Vokabulari: Aktem, pleplei

Tijim ol studen wan tradisonal gem o pleplei. Sapos yu no save wan tradisonal gem o pleplei, askem wan pesen long komyuniti blong kam tijim ol studen. Mo tu yu save askem ol studen sapos eniwan long olgeta i save wan, bae i tijim ol narafala studen long hem.

Opotuniti blong Asesmen

Ol studen oli mekem wan tradisonal gem o pleplei.

Lesen 10: Siviks mo Komyuniti Rilesensip A (45 min)

Fokas blong Aktiviti: Wok folem rul blong klas

Ol Risos: Wan bigfala pepa olsem wan A2 saes pepa o manila pepa

Vokabulari: Rul, talem, responsibiliti, folem, klasrum

Not blong Tija: Lesen ia i kontiniu nomo long las lesen.

Askem ol studen:

- Wanem topik yumi bin tokbaot long lesen blong Wik 2, Lesen 10?

Raetem toktok ia “Ol niu rul blong klas” long wan konsep map long bod mo askem ol studen blong givim ol tingting blong olgeta long ol rul we oli ting se oli sud gat long klasrum blong olgeta. Oli save talem sam long ol rul we i stap finis long Tem 1.

Raetem ol tingting blong olgeta long wan konsep map. Diskasem ol tingting ia tugeta wetem ol studen.

Raetem ol rul ia long bigfala pepa. Taem yu finis holem jat ia i go antap blong evriwan i save luk mo ridim. Putum jat ia long wol blong oli stap ridim evri dei biffo oli save statem ol lesen blong olgeta. Afta talem long olgeta se from we olgeta oli help blong talem ol rul ia oli tekem responsibiliti blong folem gud ol rul ia.

Opotuniti blong Asesmen

Ol studen oli kontribut blong talem ol rul we oli ting se oli sud gat long klasrum.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32



Tem 2 – Wik 5



Lesen 1: Spirituel mo Karakta Divelopmen (45 min)

Fokas blong Aktiviti: From wanem yumi selebretem Dei blong ol Pikinini?

Ol Risos: Ol pi ja blong Dei blong ol Pikinini, A4 pepa, ol kala, ol pensel

Vokabulari: Selebretem, presen, pikinini, gif, 24 Julae, papa, mama

Putum ol studen oli go long fo grup. Askem ol studen blong tokbaot kwesten ia:

- From wanem yumi stap selebretem Dei blong ol Pikinini?

Givim smol taem long olgeta blong talem wanem oli bin tokbaot long grup blong olgeta.

Askem ol studen blong oli raetem ol smolsmol storian blong olgeta long A4 pepa abaot wanem ol papa mo mama o hu we i lukaotem olgeta i stap mekem long olgeta long Dei blong ol Pikinini. Afta yu putum ol storian ia long wol insaed long klasrum

Infomesen blong Tija

Fulap kaontri long wol tedei oli stap selebretem Dei blong ol Pikinini. Long evri yia, long 24 Julae, yumi long Vanuatu i stap selebretem Dei blong ol Pikinini.

Dei blong ol Pikinini i no blong ol papa o mama o eniwan i givim wan presen long yu nomo be hem i moa long hemia.

I gat ol stamba tingting from wanem nao yumi selebretem Dei blong ol Pikinini. Ol pikinini oli impoten tumas long wan famle, aelan mo nesen blong olgeta. Ol pikinini oli gif we papa God i givim long ol papa mo mama. Ol pikinini oli ol namba wan hop blong fiuja we papa God i givim.

Stret tingting blong selebretem Dei blong ol Pikinini hem i blong andastanem impotens blong kea long laef blong wan pikinini. Dei blong ol Pikinini hem i blong rimaenem ol yangfala pikinini mo ol bigbigfala man mo woman ol raet blong ol pikinini blong enjoem taem blong olgeta olsem wan smol pikinini. Hem i gud wan taem blong enkarejem olgeta oli mas gat gudfala edukesen mo karakta taem oli kam bigwan long fiuja.

Wan mo risen blong selebretem Dei blong ol Pikinini hem i blong givim awenes i go long ol papa, mama mo pablik long ol trabol we ol pikinini oli stap fesem olsem, ol pikinini wetem disabiliti, ol isiu long ol smolsmol grup, ol pikinini we oli fosem olgeta blong mekem wok, wipim nogud ol pikinini, pikinini i no go long skul, ol pikinini i no go long hospital taem hem i sik, ol pikinini oli no gat wan big man o woman blong tekem gud kea mo lavem olgeta.

Opotuniti blong Asesmen

Ol studen oli raetem wanem nao ol perens o olgeta we i lukaotem olgeta i stap mekem long olgeta long Dei blong ol Pikinini.

Lesen 2: Pefoming At (30 min)

Fokas blong Aktiviti: Danis yusum balong

Ol Risos: Wan balong we i laet long ol studen, ol singsing

Vokabulari: Balong, stret, kasem, holem, stael, mobael

Plei wan singsing we i stret long aktiviti ia.

Mekem ol studen oli stanap long wan sekol. Yu holem balong mo taem miusik i ple bae yu stat danis. Taem yu danis yu mekem wan stael blong yu wetem balong ia. Afta yu sakem balong i go long wan narafala studen, hem i holem balong mo hem i mekem wan stael danis wetem balong ia afta i sakem i go long narafala studen. Bae i kontiniu olsem kasem taem evri studen i danis wetem balong.

Opotuniti blong Asesmen

Ol studen oli save mekem wan stael danis blong olgeta wetem balong.

Lesen 5: Muvmen mo Gem (20 min) Jusum wan aktiviti long pej 27-32

Lesen 4: Helti individuel mo Komyuniti (30 min)

Fokas blong Aktiviti: Trifala grup blong kakae

Ol Risos: A4 pepa, ol kala pensel, sam defren kakae blong trifala grup blong kakae

Vokabulari: Mit, waet, kakae, kala, putum, plet, gudfala

Askem ol studen blong karem wanwan kakae long haos blong olgeta i kam long lesen ia. Putum ol kakae long wan tebol long fored blong ol studen oli save lukluk ol kakae taem oli stap mekem ol aktiviti blong olgeta.

Talem long ol studen se, “Long las lesen, yumi bin tokbaot ol defren ples we ol pipol oli save go blong karem o pem ol kakae long hem. Oltaem ol pipol oli mas tingbaot ol gudfala kakae blong fidim famle blong olgeta. Long sem tingting ia, ol studen oli mas save wanem hem i ol gudfala kakae blong pem mo kakae.”

Ol studen oli wok long grup blong faev. Givim wan A4 pepa i go long wanwan grup blong oli raetem ol nem blong ol kakae long hem. Givim faev minit blong oli raetem list blong olgeta.

Trifala grup blong kakae we bae ol studen oli wok long hem i stap daon:

- Ol kakae blong givim paoa
- Ol kakae blong bildimap bodi
- Ol kakae blong blokem sik


Afta long faev minit, wanwan grup i talem ol nem blong ol defren kakae we oli listim long grup

blong kakae we oli wok long hem. Oli pestem pepa blong olgeta i go long bod blong ol narafala studen oli save luk ol nem blong ol kakae taem oli mekem nekis aktiviti.

Givim A4 pepa long wanwan studen. Askem wanwan studen blong kopi ol droing daon i go long pepa ia. Bae oli droem wan kakae nomo long wan sekol folem nem we i stap aninit sekol. Oli raetem nem blong ol kakae ia insaed long ol sekol tu.

Ol studen oli droem evri kakae we oli droem long trifala sekel long plet blong olgeta. Jekem sapos ol studen oli droem ol defren kala kakae long plet blong olgeta.

Eksampol:



Putumap ol pepa blong ol studen long klas blong oli save luk.

Opotuniti blong Asesmen

Ol studen oli jusum ol kakae long tri defren grup blong mekem kakae blong olgeta i balens.

Lesen 5: Tekem plante kea long Envaeromen blong yumi (45 min)

Fokas blong Aktiviti: Trifala R: Ridius, Riyus, Risaekol

OI Risos: Ol tin blong sofdrink, ol glas mo plastik botel, plastik blong raes, tin blong tinfis, twisti, ol pepa blong loli o jewinggam, wan olfala dis, ol olfala klos, pis glas, batri, ol doti kakae mo samfala moa, trifala wod long kad: **Ridius, Riyus, Risaekol**

Vokabulari: Ridius, riyus, risaekol, tin, plastik, bag, pepa, dis, botel, glas

Putum ol samting we yu kolektem long wan tebol long midel blong klasrum we evri studen i save luk.

Talem long ol studen se taem i gat ol pipol i gat doti. Taem i gat plante pipol bae i gat plante doti. I gat sam wei we yumi save mekem sam samting wetem ol doti we yumi mekem.

Raetem trifala wod ia; **Ridius, Riyus** mo **Risaekol** long wanwan kad mo putum antap long bod. Tokbaot wanem trifala wod oli minim.

Trifala R

Ridius	Katemdaon, daonem; olsem katemdaon ol toslaet we i yusum batri mo yusum olgeta we i yusum san blong jajem.
Riyus	Yusum bakegen; olsem ol plastik botel blong wota we yu pem long stoa, yu save yusum bakegen blong fulumap wota.
Risaekol	Mekem wan narafala samting wetem; olsem ol doti blong kakae we yu save putum long kompos mo yusum bakegen long garen.

Ol studen oli go long fo smol grup. Askem wanwan grup blong kam putum fo doti we i stap long tebol long trifala tebol we trifala wod ia i stap long hem. Ol studen long wanwan grup oli tokbaot doti ia bifo oli putum long tebol we oli ting se wanwan doti ia i sud go long hem. Askem wanwan grup from wanem oli putum ol doti ia long ol tebol ia.

Sapos i gat sam doti i stap yet, tokbaot wanwan doti ia wetem ol studen bifo oli putum long ol tebol.

Opotuniti blong Asesmen

Ol studen oli putum ol doti long ol stret tebol blong Ridius, Riyus mo Risaekol.



Lesen 6: Pefoming At (30 min)

Fokas blong Aktiviti: Danis folet bambu

Ol Risos: Wan bambu mo wan stik blong kilim bambu

Vokabulari: Tapem, rabem, bel, fingga, snapem, nodem

Soem ol fo defren stael blong kilkilim bambu mo soem ol fo defren stael blong danis. Ol studen oli lukluk gud ol muvmen blong yu mo rimemba stael blong kilim bambu.

Afta kilim bambu long fo defren stael mo luk se ol studen oli danis long ol stret stael. Naoia kilim bambu mo ol studen oli danis. Taem yu stap kilim bambu long ol defren stael ia bae oli studen oli save wanem stael blong danis blong oli mekem.

Opotuniti blong Asesmen

Ol studen oli danis folet ol defren stael blong kilim bambu.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Ol tradisonal wei blong wasem doti klos

Ol Risos: Ol doti klos blong olgeta, sop, dis, wan o tu bras, sam blak ston blong reva, wota o sapos reva i stap klosap, memba blong komyuniti

Vokabulari: Wasem, doti, klos, brasem, draon, baket, dis

Invaetem wan mama o apu woman blong viley o komyuniti blong kam storian wetem ol studen long tradisonal wei blong wasem klos long komyuniti blong yufala. Hem i save karem ol samting we oli yusum blong wasem klos i kam long klas. Askem ol studen blong oli karem wan doti klos blong olgeta i kam long skul.

Askem ol studen:

- Hao nao yufala i stap wasem ol doti klos blong yufala sapos i no gat sop, bras, mo dis?
- I gat wan nem we yufala i yusum taem yufala i stap talem stael blong wasem klos olsem?

Storian long ol tradisonal wei blong wasem klos. Sam long ol wei blong wasem ol doti klos i go olsem:

Yusum ston o skin blong kokonas olsem bras blong brasem ol klos long hem long reva.

Wasem klos long reva yusum ol tul olsem wan stik blong kilkilim klos long hem blong mekem

klos i klin.

Yusum wan plank blong putum klos mo brasem.

Was insaed long dis o baket yusum stik blong sperem klos blong mekem klos i klin.

Draonem klos insaed long dis o basin afta yu stanstanap long ol klos blong mekem oli klin.

Draonem klos wetem sop long dis afta rabrabem wetem han blong mekem klos i klin.

Yusum sam kaen rop long bus blong was wetem olsem sop.

Askem ol studen:

- Yu ting se hem i wan gud mo sef aedia blong yusum sop blong wasem ol klos long reva?

Sapos yufala i gat wan reva blong wasem klos, hem i wan sef mo waes samting blong no yusum sop blong wasem klos long reva. Oli mas yusum wan narafala wei blong wasem klos.

Opotuniti blong Asesmen

Ol studen oli wasem ol doti klos blong olgeta long wan long ol wei ia.

Lesen 10: Siviks mo Komyuniti Rilesensip B (30 min)

Fokas blong Aktiviti: Ol Jif

Ol Risos: Wan jif blong aelan o komyuniti ia, o wan bigfala piya blong wan jif, ol smol pis pepa, salusalu blong hangem long jif

Vokabulari: Paramaon, jif, bigfala, smolsmol, lukaotem, fiksim, problem

Not blong Tija: Go luk Paramaon Jif blong viley o wan smol jif long komyuniti blong yufala blong save kam storian wetem ol studen long lesen blong tedei. Prinsipol blong skul i save saenem wan leta blong yu karem i go long jif. Mekem hemia sam dei bifo long lesen ia.

Talem long ol studen se long las lesen blong yumi, yumi bin tokbaot wan grup blong ol pipol we oli kam blong helpem yumi long ol skul blong tijim Matematiks, miusik, Inglis, Franis mo spot mo sam oli go help long ol hospital mo fulap narafala ples. Plante long olgeta we oli stap long ol aelan blong yumi oli kam long Amerika mo Japan mo Franis.

Long lesen blong tedei, yufala i tokbaot wan memba blong komyuniti we i kontribut bigwan long laef blong komyuniti blong yufala.

Welkamem jif long klas mo askem wan studen blong hangem salusalu long hem. Talem se yufala i glad tumas blong gat jif wetem yufala tedei blong hem i tokbaot hao ol jif oli kontribut bigwan long laef blong komyuniti blong yumi.

Askem jif blong givim wan smol toktok long wanem nao wok blong hem olsem wan jif long komyuniti blong hem. Ol studen oli sidaon kwaet mo lisem gud.

Afta long toktok askem wan studen blong klas blong givim wan toktok blong talem “tangkiu” long jif.

Opotuniti blong Asesmen

Ol studen oli raetem long pepa ol wei we ol jif oli kontribut long komyuniti. Oli kalarem mo pestem long bigfala pija blong jif we yu droem long bigfala pepa mo stap long bod.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 2 – Wik 6



Lesen 1: Spirituel mo Karakta Dvelopmen (30 min)

Fokas blong Aktiviti: From wanem yumi selebretem Independens Dei?

Ol Risos: A4 pepa, ol pensel, ol kala

Vokabulari: Independens, selebresen, flag, maj, Ingland, selebretem

Askem ol studen:

Wanem nem blong Vanuatu bifo i kasem independens?

Wijwan kantri i bin rulem Vanuatu bifo independens?

Wanem dei nao yumi stap selebretem independens blong Vanuatu?

Wanem kaen aktiviti nao i stap hapen long Independens Dei?

Talem long ol studen se, “Yumi stap selebretem independens blong Vanuatu from hem i wan impoten mo gudfala samting. From wanem hem i gud?”

Tokbaot smol ol kwesten ia wetem ol studen bifo oli raetem tingting blong olgeta long pepa.

- I gud from yumi nomo ol pipol blong Vanuatu i rulum kantri blong yumi.
- Yumi, ol pipol blong Vanuatu i mekem ol disisen long ol nakamal olsem palimen o miting ples blong yumi.
- Ol pipol blong Vanuatu oli mekem ol wok we fastaem ol waet man nomo oli stap mekem.

Talem long olgeta se, “Olsem ol fuija lida blong yumi, bae yufala ol studen oli raetem wan samting we yufala i wantem luk i kam moa gud long fuija. Tingbaot wan samting we yu bin luk o harem long komyuniti o aelan blong yu we yu wantem se long fuija bae i kam moa gud bitim naoia.”

Givim pepa long ol studen blong raetem daon tingting blong olgeta mo droem piya blong soemaot tingting blong olgeta.

Wan studen i save tokbaot tingting blong hem wetem wan narafala fren bifo hem i raetem long pepa.

Sapos i gat taem yet wanwan studen i ridim wanem we hem i raetem long klas. Kolektem pepa blong olgeta blong putum antap long wol.

Opotuniti blong Asesmen

Ol studen oli raetem wan samting we oli wantem luk i kam moa gud long fuija.



Lesen 2: Pefoming At (30 min)

Fokas blong Aktiviti: Danis blong miusik jea

Ol Risos: Ol jea, mat, sidi pleia o mobael fon, ol singsing

Vokabulari: Jea, raon, tekemaot, stopem, faenem, sidaon

Talem long ol studen se danis blong tedei bae oli mas danis gud long laen mo bae oli no mas pusum olgeta long taem blong sidaon long wan jea.

Putum ol jea long wan sekol be mekemsua se yu nogat inaf blong evri studen, olsem yu putum fotin jea be fiftin studen oli tekpat long danis ia.

Askem ol studen blong stanap raon long ol jea ia. Taem yu plei long miusik bae ol studen oli danis long wan laen i go raon long ol jea ia. Taem oli stap danis yu tekemaot wan jea long sekol. Taem yu stopem miusik ol studen oli oli mas faenem wan jea blong sidaon long hem. Sapos wan studen i no faenem wan jea hem i aot long danis.

Kontiniu blong mekem danis ia kasem taem wan studen nomo i stap.

Opotuniti blong Asesmen

Ol studen oli harem taem wen miusik i stop mo oli traem blong faenem wan jea.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Sefti (30 min)

Fokas blong Aktiviti: Ol raet blong ol pikinini

Ol Risos: Ol piya we i soem ol studen oli stap mekem ol defren aktiviti (**Apendiks 14**), wan smol basket blong putum ol piya long hem, ol bigfala pepa

Vokabulari: Raet, skul, helti kakae, laef, selta, klin wota

Askem ol studen:

- Long tingting blong yufala, wanem hem i wan raet blong ol pikinini?

Kopi **Apendiks 14** mo katemaot ol defren aktiviti we ol pikinini oli mekem mo putum insaed long basket.

Pikimap wan piya long basket mo soem long ol studen mo askem olgeta wanem oli luk long piya ia. Lisen long olgeta mo talem wanem raet blong pikinini ia piya i soem. Pestem piya long bod mo raetem raet blong ol pikinini klosap long hem.

Askem ol studen blong wok long tutu. Karem basket i go raon mo ol studen oli pikimap wan piya blong tufala i tokbaot. Afta faev minit ol studen oli soem piya blong olgeta mo talem wanem raet blong ol pikinini we piya ia i stap soem.

Givim wan bigfala pepa mo askem ol studen blong pestem pijs mo raezem raet we pijs blong olgeta i soem long bigfala pepa ia. Afta putum antap long wol.

Opotuniti blong Asesmen

Ol studen oli raezem ol raet blong olgeta we ol pijs oli soem.

Lesen 5: Tekem plante kea long envaeromen blong yumi (45 min)

Fokas blong Aktiviti: Yusum ol lokol samting blong ridiusim doti

Ol Risos: Tin o plastik blong jus blong stoa, plastik bag blong stoa, paket blong twisti, botel blong wota, tin blong pinat, botel blong oel blong kuk, bokis blong tekawei, batri blong toslaet, plet, wil blong trak, mo samfala moa

Vokabulari: Ridus, stoa, kakae, bus, garen, plastik, botel, tin

Putum sam kakae o paket blong ol snak we yumi pem long stoa long wan tebol long fored blong klasrum.

Pikimap paket blong twisti long tebol ia mo soem long ol studen.

Askem ol studen:

- Wanem ia?
- Wea nao yumi karem samting ia?
- Wanem i stap long samting ia?
- Hem i fulap yet o no?
- Hem i save roten o no?
- Tingbaot sapos tu hundred pikinini i pem wan evri dei blong kakae, bae tu hundred paket blong hem i stap go wea?

Talem long ol studen se, “Fulap doti we yumi mekem hem i stap kam long ol samting olsem ol kakae we yumi pem long stoa from oli mekem long ol narafala kantri. Ol paket o bokis blong fulap samting we yumi pem blong stoa i no save roten. Plante i endap long solwota. Fulap graon i berem mo fulap tu i stap olbaot long rod, bus, mo sanbij blong yumi.

“Yumi save ridiusum o katemdaon long doti ia taem yumi stop blong pem ol kakae blong stoa mo kakae wanem we i stap long garen o bus blong yumi. **Ol kakae we yumi karem long bus o garen i moa helti long bodi blong yumi.**

“Long tebol long fored ia, i gat sam kakae mo snak mo ol narafala samting olsem sop blong was we yumi stap pem long stoa mo ol paket o kontena o botel. Ol samting ia nao i stap kam olsem doti we i mekem envaeromen blong yumi i doti. Olsem paket blong twisti, naoia hem i wan doti nao, be nekis taem yumi save jusum wan frut o nat we i stap long garen o bus blong kakae we doti blong hem i save roten mo kam graon bakegen.”

Askem long ol studen se, “Wanem sam long ol kakae we i stap long bus o garen we yumi save kakae long ples blong wan twisti?”



Ol studen oli talem ol defren frut, nat o vejtebol we oli save kakae long ples blong wan twisti. Askem ol studen blong kam klosap long tebol we ol samting ia i stap long hem mo lukluk ol samting ia gud. Afta oli jusum wan samting nomo. Bae oli no karem samting ia be oli tingbaot nomo.

Long buk blong olgeta oli raetem ol samting we oli save yusum long ples blong samting ia we oli jusum. Oli save askem yu blong spelem ol wod we oli nidim. Taem oli finis karem buk blong olgeta blong makem. Afta go tru wanwan samting ia wetem ol studen.

Talem long ol studen se taem yumi yusum ol samting we yumi gat long bus o garen o solwota, ol doti blong hem i save roten mo kam graon bakegen. Hemia hem i wan wei blong ridiusim ol doti we yumi stap mekem.

Opotuniti blong Asesmen

Ol studen oli raetem ol defren samting we oli save yusum long ples blong ol samting we oli pem long stoa.

Lesen 6: Pefoming At (30 min)

Fokas blong Aktiviti: Danis long wan skit

Vokabulari: Skit, aksen, gud

Tijim ol studen blong mekem wan skit sapos yu no save wan skit askem ol studen blong tijim yu mo ol narafala studen.

Opotuniti blong Asesmen

Ol studen oli save mekem gud ol aksen long skit.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Ol gudfala fasin long ol komyuniti

Ol Risos: Ol defren kaen kakae, faeawud, rek, sed, naef

Vokabulari: Komyuniti, haos, jos, skul, garen

Askem long ol studen wanem nao sam gudfala fasin yumi stap mekem taem yumi liv long wan komyuniti?

Yumi mekem komyuniti wok olsem mekem jos haos, mekem fanresing blong skul, klinim ol



grev mo samfala moa.

Kam tugeta long mared, ded, sekomsisen mo ol narafala seremoni.

Yumi serem kakae, yumi respektem yumi wanwan, helpem ol olfala man mo woman long viley.

Yumi talem gud moning long wanwan long yumi taem yumi luk yumi long moning mo semak long naet, yumi talem gudnaet.

Yumi go visitim olgeta we oli sik long komyuniti blong yumi.

Yumi toktok gud long ol famle, yumi lavem yumi evriwan.

Opotuniti blong Asesmen

Ol studen oli save ol gudfala fasin we oli stap long ol komyuniti blong olgeta.

Lesen 10: Siviks mo Komyuniti Rilesensip A (45 min)

Fokas blong Aktiviti: Wok folem rul blong klas

Ol Risos: Jat blong ol rul blong klas, ol pepa

Vokabulari: Folem, rul, disaplin, helpem, panisim

Talem long ol studen se long las lesen blong yumi, yumi bin givim sam rul we yumi bin raetem i go long jat mo hem i kam rul blong yumi long klas. Ol rul i stap blong helpem yumi evri dei long hao yumi sud respektem ol fren blong yumi mo hao yumi save stap sef oltaem insaed long klasrum ia. Plante taem yumi stap fogetem ol rul mo stap mekem sam aksen we i no folem ol rul ia.

Naoia taem yu no folem wan long ol rul ia, wanem nao bae klas i mekem blong helpem yu blong yu folem gud ol rul ia nekis taem?

Raetem toktok ia “Taem mi no folem ol rul...” long wan konsep map long bod mo askem ol studen blong givim ol tingting long ol wei blong disaplin taem oli no folem wanwan long ol rul blong klas.

Raetem ol tingting blong olgeta long wan konsep map. Diskasem ol tingting blong olgeta tugeta long klas.

Givimaot ol pepa long wanwan studen mo askem olgeta blong droem ol piya blong soem wan wei blong disaplin o panismen we oli ting se ol studen sud kasem taem oli no folem wanwan long ol rul ia.

Tingbaot se ol panismen o disiplin ia bae i sud mekem ol studen oli lanem wan samting olsem oli rid, lanem speling, mekem sam wok blong Matematiks o Lanwis, helpem olgeta blong planem flawa, helpem olgeta blong planem sam kakae long garen blong olgeta o samfala moa we yu save tingbaot. Bae i moa gud sapos wanwan rul i gat wan disaplin blong hem. Serem wanwan rul i go long wanwan studen.

Eksapol:

Rul: 1: Askem samting blong wan narafala studen bifo yu tekem o yusum.

Disaplin: Mekem ekstra wok blong Matematiks long klas.

Askem ol studen blong droem wan pijsa soem wan disaplin olsem eksampol antap. Oli tokbaot smol ol pijsa blong olgeta mo yu raetem wan sentens o sam wod blong talem wanem pijsa ia i stap talem. Tokbaot wetem ol studen sapos wanwan pijsa blong wanwan disaplin i stret.

Kolektem ol pijsa blong ol disaplin we ol studen oli bin droem. Long saed blong wanwan rul putum ol pijsa blong olgeta blong soem wanem kaen disaplin bae studen i save fesem taem hem i no folem wanwan long ol rul ia.

Tokbaot ol rul wetem ol pijsa blong disaplin wetem ol studen blong oli save gud abaot wanem bae oli fesem taem oli no folem wan long ol rul ia.

Opotuniti blong Asesmen

Ol studen oli kontribut long talem wanem bae i happen long olgeta taem oli no folem ol rul blong klasrum.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 2 – Wik 7



Lesen 1: Spirituel mo Karakta Divelopmen (30 min)

Fokas blong Aktiviti: Ol dei blong prea o wosip

Ol Risos: Ol piya blong ol defren jos mo ol wei blong wosip

Vokabulari: Relijen, prea, wosip, ol nem blong ol jos

Askem ol studen:

Hamas defren jos o relijen, yufala i gat long vilej o komyuniti blong yufala?

Raetem ol nem blong jos long bod.

Vanuatu hem i wan kristien kantri mo hem i gat plante relijen mo oli gat ol defren dei blong kipim mo blong stap prea o wosip long hem.

Ol relijen olsem SDA mo Jos blong God olgeta oli wosip long Sarere be ol narafala relijen olsem Presbitrin, AOG, Unaeted Pentekostol, Jos blong Kraes, Katolik, Anglikan, NTM, Protestan, Jehovahs Witnes, Apostolik Jos olgeta oli wosip o prea long Sande.

Long Vanuatu i gat Muslim tu, ol Muslim oli wosip long evri dei mo oli prea faev taem long wan dei, be long evri Fraede afternun hem i dei blong harem semon mo wosip blong olgeta.

Yumi wosip o prea long ol defren dei be yumi wosip o prea long semak God nomo mo yumi mas respektsem wanwan jos blong yumi mo ol dei we oli prea long hem.

Serem ol studen oli go long ol grup. Wan grup i blong wan jos o relijen. Askem ol studen blong oli tokbaot ol dei blong wosip o prea blong olgeta mo hao oli prea o wosip.

Opotuniti blong Asesmen

Ol studen oli save wijwan dei ol defren religen oli stap wosip long hem.

Lesen 2: Pefoming At (30 min)

Fokas blong Aktiviti: Danis long wei long olgeta

Ol Risos: Sidi pleia o mobael fon, o wan singsing we yu save

Vokabulari: Fri, stael

Talem long ol studen se long lesen tedei bae yumi danis nomo.

Wanwan studen i danis long stael blong hem.

Plei long wan singsing mo askem ol studen blong oli danis long singsing ia. Letem oli save se taem blong danis ia bae oli mas danis long wan distens we i longwe long ol fren blong olgeta. Taem oli stap danis oli mekemsua se bae oli no mas bangem ol narafala studen.

Opotuniti blong Asesmen

Ol studen oli danis long wan stael blong olgeta.



Lesen 3: Muvmen mo Gem (20 min) Jusum wan aktiviti long pej 27-32

Lesen 4: Helti individuel mo Komyuniti (30min)

Fokas blong Aktiviti: Wan gudfala kakae

Ol Risos: Fo smol naef, fo dis, fo sospen, fo bigfala spun, sol, oel, anian, faeawud

Vokabulari: Gudfala, kakae, selfis, nat, fis

Not blong Tija: Givim wan notis blong ol studen oli karem i go givim long ol peren blong olgeta tu dei bifo long lesen ia. Long notis ia, yu talem wanem kakae bae ol studen oli karem i kam long skul. Yu save askem help blong ol peren tu blong kam helpem ol studen long wanwan grup.

Long las tu lesen, ol studen oli bin lanem abaot ol gudfala kakae. Ol studen oli sud luksave kakae we oli gat waet kala, ol kakae we oli gat ol defren kala mo ol defren mit we i kam long ol anamol, nat, selfis mo fis.

Long lesen ia, bae ol studen oli priperem wan gudfala kakae. Serem ol studen long grup blong sikis. Wan dei bifo long lesen ia ol studen oli tekem ol kakae i kam long skul.

Long wanwan grup:

- Tu studen oli tekem kakae we i gat waet kala
- Tu studen oli tekem kakae we i gat ol nara kala
- Tu studen oli tekem mit, fis, nat o selfis (wan kaen mit nomo)

Serem ol mama we oli kam blong help blong kuk wetem ol studen long ol defren grup.

Wanwan grup i putum ol kakae blong olgeta long wan ples mo jekem sapos oli gat tri grup blong kakae. Ol mama oli helpem ol studen blong priperem ol kakae mo kukum. Ol studen oli mas tek pat blong priparem kakae wetem ol mama.

Taem ol kakae i tan, ol mama long wanwan grup i seremaot kakae long ol plet mo ol studen oli go wasem han. Evriwan i sidaon blong kakae tugeta.

Bifo ol studen oli kakae askem:

- Hamas kala yu save luk long plet blong yu?
- Yufala i ting se taem yu gat waet kakae nomo long plet blong yu i gud o no?
From wanem?

Evriwan i singem singsing blong prea blong kakae. Taem evriwan i kakae finis, talem tangkiu long evriwan blong mekem lesen i sakese.

Opotuniti blong Asesmen

Ol studen oli talem from wanem taem oli gat waet kakae nomo long plet blong olgeta hem i no helti long olgeta.



Lesen 5: Tekem plante kea long Envaeromen blong yumi (45 min)

Fokas blong Aktiviti: Riyusum fo defren samting

OI Risos: Sam defren plastik botel o kontena, ol glas botel blong waen o ol drink, emti botel blong pinat bata, ol pepa; olfala niuspela mo wespepa, emti bag mo plastik blong raes, sisis, naef, ol saensaen, glu, kala pensel mo samfala moa we yu wantem yusum

Vokabulari: Riyusum, yusum, bakegen, glas, plastik, botel, pepa, kontena

Askem wanem wei blong katemdaon doti nao yumi bin lukluk long las lesen. OI studen oli talem wanem oli save tingbaot. Talem gud long olgeta bakegen sapos oli fogetem.

Talem long ol studen se tedei bae oli lukluk long wan narafala wei blong mekem samting wetem ol doti we hem i “riyusum” mo wanem hem i minim. Long tebol i gat sam plastik botel, glas botel, plastik bag mo kontena we yumi pem blong yusum ol samting we i stap insaed long hem. Be naoia oli samting ia i finis be ol kontena o botel o bag blong olgeta i stap.

Ol samting ia yumi save yusum bakegen long wan narafala wei.

Eksapol: Plastik blong raes

Plante pipol oli yusum blong statem faea be hem i no wan gud wei blong yusum bakegen.

Askem long ol studen:

- From wanem?
- Wanem narafala wei nao yumi save yusum plastik bag blong raes?

Lisen long ol ansa blong ol studen.

Hemia hem i sam wei blong riyusum ol emti plastik blong raes:

- Yusum blong planem sandalwud, ol flawa mo ol sid blong ol tri insaed long hem.
- Yusum blong wivim paos blong mani mo ol basket.

Serem ol studen oli go long faev grup. Wanwan grup i go jusum wan samting long tebol we bae oli tokbaot long grup blong olgeta. Oli tokbaot olsem wanem oli save yusum samting ia bakegen. Wanwan grup i talem long klas ol wei we oli save yusum ol samting bakegen.

Taem evri grup i finis, bae wanwan grup i soem wan wei blong riyusum wanem oli tokbaot ia we bae oli yusum long klasrum. Oli save yusum ol narafala samting olsem saensaen, ol pi ja o kala blong flasem gud.

Evriwan i help blong putum gud ol samting.

Opotuniti blong Asesmen

OI studen oli tokbaot ol wei we oli save riyusum ol samting we oli pikimap long tebol.

Lesen 6: Pefoming At (30 min)

Fokas blong aktivi: Danis long slo miusik

Ol Risos: Sidi pleia o mobael fon, sloslo singsing

Vokabulari: Slo, danis, miusik

Plei wan miusik we bit blong hem i slo, mo askem ol studen blong oli danis wetem yu long slo bit blong miusik ia.

Opotuni blong Asesmen

Ol studen oli save danis long slo miusik

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Ol gudfala fasin long haos

Vokabulari: Gud, fasin, rispek, impruvum, laef

Talem long ol studen se ol gudfala fasin hem i wanem we ol papa mo ol mama oli wantem luk long ol pikinini blong olgeta. Hem i helpem ol pikinini blong gat plante respek long ol famle, ol lida blong vilej mo ol lida long jos, ol narafala pipol long komyuniti.

Ol gudfala fasin i helpem ol pikinini blong oli kam responsibol blong gat wan gudfala laef.

Tokbaot ol gudfala fasin long haos wetem ol studen.

Eksampol blong ol gudfala fasin long haos:

- Mekem gud bed blong yu taem yu girap long moning.
- Foldem gud ol klos blong yu long basket o kapbod blong yu.
- Putum ol ting blong yu long stret ples olsem hangem basket blong skul long nil, putum doti klos long ples blong ol doti klos mo mekem rum blong yu i klin oltaem.
- Sakem doti we yu mekem long stret ples olsem ol skin blong kakae long kompos.
- Mekem wanem oli askem long yu blong mekem nating sapos yu no laekem blong mekem.
- No tokbaot papa o mama o ol narafala big man o woman o big sista o brata.
- Serem wanem we yu gat wetem ol narafala brata mo sista.
- Wasemaot ol doti plet mo spun blong yu taem yu kakae i finis.
- Sidaon afta skul blong mekem ol homwok we tija i givim.
- Prea bifio kakae, silip mo taem yu girap long moning.

Serem ol studen oli go long tu grup. Askem ol studen blong talem sam gudfala fasin long skul mo long vilej o komyuniti blong olgeta.

Taem oli finis, wanwan studen long grup i talem wan gudfala fasin we oli bin tokbaot.

Opotuniti blong Asesmen

Ol studen oli talem ol gudfala fasin long haos.

Lesen 10: Siviks mo Komyuniti Rilesensip B (30 min)

Fokas blong Aktiviti: Ol Polis

Ol Risos: Wan posta blong wan polis ofisa, piya blong tufala polis ofisa (**Apendiks 15**).

Vokabulari: Polis, ofisa, man, woman, yunifom, jif

Not blong Tija: Yu save invaetem wan polis blong gavman mo polis blong jif blong kam tokbaot wok blong olgeta long ol studen.

Long Vanuatu yumi gat ol polis we oli ol polis blong gavman mo tu yumi gat ol polis blong jif long ol viley blong yumi.

Storian wetem ol studen blong faenemaot hamas ol studen oli save abaot ol polis mo wok blong olgeta.

Ol kwesten we yu save askem:

- Hu i fraet long ol polis?
- From wanem yu fraet long ol polis?
- Hu i no fraet long ol polis?
- From wanem yu no fraet long ol polis?
- From wanem wok blong polis blong gavman i impoten?
- From wanem wok blong polis blong jif i impoten?
- Wijwan long tufala polis ia nao i stap werem yunifom?

Askem ol studen blong droem wan piya blong wan polis blong gavman mo wan polis blong jif mo raetem wan wok blong wanwan polis ia long buk blong olgeta.

Opotuniti blong Asesmen

Ol studen oli raetem wan wok blong polis blong gavman mo polis blong jif.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32



Tem 2 – Wik 8



Lesen 1: Spirituel mo Karakta Divelopmen (30 min)

Fokas blong Aktiviti: Baptaes

Ol Risos: Ol foto blong taem olgeta o wan famle i baptaes, ol pija blong baptaes

Vokabulari: Baptaes, baptaes, baebol, stadi, saksakem, wota

Not blong Tija: Yu save invaetem ol jos lida o wan memba blong ol defren religen o jos blong kam tokbaot praktis blong baptaes long jos o religen blong olgeta.

Long ol religen blong yumi, yumi gat ol defren wei blong baptaes. Sam jos oli mekem baptaes long ol bigfala man mo woman mo ol bigfala boe mo ol bigfala gel. Mo taem oli baptaes oli draonem pesen ia fulwan i go aninit long dip wota.

Sam narafala jos blong yumi oli mekem baptaes long ol smolsmol pikinini nomo. Mo oli saksakem wota long fes o hed blong ol pikinini. Be bifo wan man o woman, pikinini i wantem baptaes hem i mas go tru sam baebol stadi bifo hem i save baptaes.

Askem ol studen:

- Hu long jos blong olgeta i stap mekem baptaes?
- Hu long jos blong olgeta i no stap mekem baptaes?
- Hu i baptaes finis?
- Hu i bin luk wan baptaes finis?
- Hu i mekem baptaes long jos blong yufala?
- Yu save from wanem yu baptaes?

Opotuniti blong Asesmen

Ol studen oli save se i gat ol defren wei blong baptaes ol memba blong ol defren jos.

Lesen 2: Pefoming At (30 min)

Fokas blong Aktiviti: Danis wetem fren

Ol Risos: Wan singsing blong stringban

Askem ol studen gel blong oli werem ol aelan dres blong olgeta long dei ia mo ol studen boe oli werem wan aelan sot long dei ia.

Putum ol studen long grup blong ol boe mo gel. Soem long ol studen wanem gudfala fasin wan boe i save askem wan gel blong danis wetem hem. Eksampol wan boe i wokbaot i go long fored blong wan gel i bao daon long gel mo talem se “mi save danis wetem yu, plis” mo hem i putumaot han blong hem blong gel ia i holem. Afta hem i lidim gel ia i go long ples blong danis blong tufala i danis. Soem long olgeta wanem blong mekem.

Plei long stringban mo ol boe oli go askem ol gel mo yu danis wetem ol studen.

Opotuniti blong Asesmen

Ol boe oli save hao blong askem ol gel blong danis.

Lesen 5: Muvmen mo Gem (20 min) Jusum wan aktiviti long pej 27-32

Lesen 4: Sefti (30min)

Fokas blong Aktiviti: Sam samting we oli save kam wan denja

Ol Risos: Ol samting we oli save kam denja we i stap long haos olsem mabol, smol naef, frut blong pima, nidel, glas we i brok, resa, ol koen mani, ol sid, meresin, alkol o kerasin o bensin, sprej o pefum, blij, sop blong plet o was, lodsavel, asid, oel blong trak, olfala batri mo samfala moa we yu save tingbaot, mo tri bigfala pepa

Vokabulari: Mabol, resa, ol koen, mani, bensin, meresin, pima, batri, nidel, mo samfala moa Talem long ol studen se long haos blong yumi i gat fulap samting we yumi yusum be sapos yumi no putum gud i save kam wan denja long yumi o ol narafala sista o brata we i moa smol long yumi.

Askem ol studen:

- Wanem wan samting we yu save tingbaot we i save kam wan denja tu?

Putum ol samting ia long wan bigfala pepa o long wan tebol. Leftemap ol samting ia mo askem sam long ol studen blong talem wanem ol aetem ia.

Pikimap wan long ol aetem ia, olsem mabol, mo askem se sapos mabol i stap long flo mo i gat wan bebe we i stap krol long flo.

- Yu ting se i sef ia long smol bebe ia?
- Wanem bae bebe ia i mekem sapos hem i luk mabol ia?
- Wanem bae yu mekem blong i sef long bebe ia?

Ol studen oli kam mo jusum wan aetem blong oli talem ol denja blong hem mo wanem nao oli mas mekem blong hem i sef long evriwan long haos. Sapos ol aetem oli no inaf long wanwan studen bae oli save wok long tutu o wan smol grup.



Givim taem long ol studen blong talem tingting blong olgeta long wan narafala grup o narafala fren. Go raon mo toktok wetem ol studen abaot aetem blong olgeta.

Askem wan o tu studen blong wanwan grup blong tokbaot aetem blong grup blong olgeta long evriwan. Ol studen bae oli talem yus blong hem, hu i mekem, wea blong putum blong i sef long evriwan. Ol narafala memba blong grup i save givhan long eni samting we fren blong olgeta i fogetem blong talem.

Long wanwan bigfala pepa yu raetem:

- I sap
- I posen
- I save jok long trot

Putum wanwan pepa long wanwan tebol mo askem ol studen blong kam putum aetem blong olgeta long stret pepa.

Opotuniti blong Asesmen

Ol studen oli putum ol denjares aetem long stret pepa.

Lesen 5: Tekem plante kea long Envaeromen blong yumi (45 min)

Fokas blong Aktiviti: Hao blong risaekol niuspepa

Ol Risos: Ol olfala niuspepa o eni pepa we i no gat yus blong hem long skul, plen flaoa, wan baket blong wota, fo dis blong putum glu, fo smol dis o bolglas, oel blong kokonas o blong kuk, resipi blong flaoa glu

Vokabulari: Pepamase, flaoa glu, dis, bolglas, oel

Not blong Tija: Yu prierem flaoa glu i redi wan dei bifo long lesen ia. Hao blong mekem flaoa glu i stap long **Apendiks 16**. Serem flaoa glu ia i go long trifala grup. Wan grup blong wok long wan projek nomo. Terem ol niuspepa i redi i stap mo putum long tri basket. Askem ol narafala klas blong kipim gud ol wes pepa blong olgeta blong yufala i save yusum.

Askem long ol studen:

- Hu papa o mama blong hem i stap ridim niuspepa?
- Wanem nao yufala i mekem long niuspepa taem olgeta i ridim finis?

Talem long ol studen se tedei bae yu lanem wan simpol wei blong hao yumi save risaekolem niuspepa. Wei ia oli kolem “pepamase”. Long trifala tebol i gat ol samting we yufala i nidim blong mekem pepa mase blong yufala. Wan grup bae i wok long wan projek nomo.

Askem ol studen oli kam stanap o sidaon klosap blong lukluk gud wanem bae yu mekem. Soem



mo talem long olgeta olsem wanem blong mekem pepamase. Yu save eksplenem long olgeta hao yu mekem flaoa glu ia mo hao yu bin terem pepa. Soem tu wan pepamase trei o balong we yu bin mekem finis.

Taem yu soem finis, sendem olgeta i go long trifala tebol blong mekem blong olgeta. Go raon long ol grup blong givhan sapos oli nidim help.

Taem oli finis oli putum projek blong olgeta long wan ples blong glu i drae mo bae oli jas finisim gud long wan narafala taem.

Opotuniti blong Asesmen

Ol studen oli lanem hao blong mekem pepamase we hem i wan wei blong risaekolem niuspepa o weist pepa.

Lesen 6: Pefoming At (30 min)

Fokas blong Aktiviti: Kastom danis

Ol Risos: Ol singsing blong kastom

Vokabulari: Kastom, danis, komyuniti, yut, tijim

Askem ol studen sapos oli save danis kastom afta bae oli tijim yu mo ol narafala studen blong danis long kastom. Sapos yu mo ol studen oli no save, yu save askem wan memba blong komyuniti blong kam tijim ol studen blong danis long sam simpol muvmen blong kastom.

Ol studen mo trena blong olgeta oli danis kastom long wan singsing blong kastom.

Opotuniti blong Asesmen

Ol studen oli danis long ol simpol muvmen we trena blong olgeta i stap soem.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljorol Heritej mo Aedentiti (30min)

Fokas blong Aktiviti: Hao blong mekem natanggura blong haos

Ol Risos: Natanggura lif, drae o grin lif blong kokonas, be sapos i had blong faenem lif blong kokonas oli save yusum pepa, ol bambu o stik blong lif kokonas blong somap wetem, wan sap stik blong kokonas blong mekem hol, ol stik o bambu blong somap natanggura

Vokabulari: Natanggura, katem, lif, drae, grin, kokonas, fasem, bambu

Not blong Tija: Invaetem wan memba blong komyuniti blong kam blong soem long ol studen hao blong somap natanggura. Yu save askem memba blong komyuniti ia blong soem hao blong somap natanggura o lif kokonas be ol studen oli somap pepa nomo.

Wetem help blong yu, ol studen oli wivim natanggura folem ol step ia:

Step 1: Katem ol lif blong natanggura i kamdaon, katemaot o pulumaot ol lif blong natanggura aot long branj blong hem mo hipimap long wan ples. Fulumap olgeta insaed long lif kokonas we oli wivim mo fasem afta karem ol lif i go long haos.

Step 2: Karemotaot ol lif natanggura long basket afta tekemaot ol bun o smol stik bihaen long lif, mo fasem tugeta long wan hip. I redi blong somap nao.

Step 3: Jusum mita blong stik, sapos yumi wantem mekem o somap ol wan mita natanggura be yumi mas katem ol wan mita o tu mita bambu, mo ol stik blong natanggura lif i blong somap ol natanggura long hem.

Step 4: Sidaon long wan gud ples wetem bambu stik blong yu mo tekem tri lif natanggura mo putum ova long bambu stik afta yu yusum stik blong natanggura ia bakegen blong somap natanggura i go long bambu.

Opotuniti blong Asesmen

Ol studen oli save hao blong somap natanggura.

Lesen 10: Siviks mo Komyuniti Rilesensip A (45 min)

Fokas blong Aktiviti: Wok folem rul blong klas

Ol Risos: Pija blong wan hapi fas mo wan fas we i harem nogud, jat blong klasrum rul

Vokabulari: Hapi, envaeromen, klasrum, no wan hapi, aksen, fasin

Askem ol studen blong lukluk long wol we jat blong rul i stap long hem.

Askem ol studen: Ol pi ja narasaed long wanwan rul ia i soem wanem long yumi?

Droem, holem i go antap o putumap long bod pi ja blong hapi fes. Askem olgeta blong diskraebem fes ia. Raetem ol tingting blong olgeta long bod narasaed long hapi fas ia.

Mekem semak wetem fes we i harem nogud

Askem olgeta wanem kaen lening envaeromen nao bae oli gat oltaem sapos evriwan i folem gud ol rul blong klasrum. Mo askem wanem aksen nao i soem se klasrum i wan hapi ples blong lan gud blong evriwan.

Eksampol:

Askem ol studen:

Wanem kaen envaeromen blong lan nao yumi save gat taem yumi obei long ol rul oltaem?

Ansa: Hapi klasrum o envaeromen.

Wanem kaen aksen o fasin nao bae i soem se klasrum i wan hapi ples blong evriwan i lan gud long hem?

Ansa: Evriwan i wok tugeta, evriwan i gat rispek long ol narafala studen mo tija, sidaon mo lisen taem tija o narafala studen i stap toktok, ol studen oli bisi oltaem, taem oli no save wan samting oli askem tija o wan fren we i save, ol studen oli helpem olgeta we oli no save gud wok blong olgeta, klasrum i klin oltaem mo samfala moa.

Opotuniti blong Asesmen

Putum sam defren aksen we i stap hapan long klasrum long wan tebol olsem hemia daon. Ol studen bae oli kopi tebol ia i go long buk blong olgeta mo droem hapi fes long ol narasaed long ol aksen we i mekem klasrum i wan hapi ples blong lan mo fes we i harem nogud narasaed long ol aksen we i mekem klasrum i no wan hapi ples blong lan.

Ol aksen long klasrum	
Ol studen oli pleplei olbaot insaed long klasrum.	
Ol studen oli stap kwaet taem ol fren blong olgeta i stap wok yet.	
Wan studen i stilim wan pensel mo talem se hem i blong hem.	
Ol studen oli stap faet long ol narawan.	
Tija i helpem evri studen blong lanem gud ol wok blong olgeta.	
Klasrum i klin oltaem from evriwan i responsibol.	



Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 2 – Wik 9



Lesen 1: Spirituel mo Karakta Dvelopmen (30min)

Fokas blong Aktiviti: Holi Komunien o Lodsapa

Ol Risos: Pija blong Holi Komunien o Lodsapa

Vokabulari: Holi, komunien, prea, bred, waen, relijen, Lodsapa

Eksplenem long ol studen se ol relijen blong yumi long Vanuatu, taem yumi go tru long baptaes finis, nekis samting yumi tekpat long holi komunien o lodsapa. Holi komunien hem simbolaesem bodi blong masta Jisas Kraes we i ded from ol sin blong yu mo mi.

Long olgeta we oli stap prea o wosip long Sarere oli tekpat long Holi Komunien tri taem long wan yia. Long sabat, bifo oli tekem Holi Komunien oli mas wasem leg blong olgeta afta oli jas tekem holi bred mo holi waen blong olgeta.

I gat sam narafala relijen we oli tekem Holi Komunien tri taem long wan yia. Be sam relijen olsem Katolik mo Jos blong Kraes olgeta oli tekem Holi Komunien evri Sande. Olgeta long AOG olgeta oli mekem Holi Komunien long evri fas Sande blong manis. Oli tekem Lodsapa blong tingbaot bodi blong Kraes we i kam ded from ol sin blong yu mo mi.

Opotuniti blong Asesmen

Ol studen oli save se wanwan relijen oli gat ol defren taem blong tekem Lodsapa.

Lesen 2: Pefoming At (30 min)

Fokas blong Aktiviti: Danis long Limbo

Ol Risos: Sidi pleia o mobael fon, wan longfala stik o rop

Vokabulari: Limbo, benem, bak, bihaen, ni

Askem tu studen blong tufala i holem longfala stik o rop ia mo stanap. Askem ol narafala studen blong oli mekem wan longfala laen stret long medel blong stik ia. Oli mas benem gud bak blong olgeta taem oli stap danis i go aninit long stik o rop ia. Talem long olgeta se taem oli danis hed o eni pat blong bodi blong olgeta i no mas tajem stik o rop ia.

Tufala studen hu i holem stik o rop stat long level blong hed blong tufala fastaem. Taem yu plei long miusik, bae ol studen oli danis i go aninit long stik ia. Taem oli stap danis stik i muv go daon long solda, ol studen oli kontiniu blong danis nomo, be stik nomo i stap muv i go daon. Oli muvum stik i go kasem lowes level. Studen we i save danis gud i go aninit long rop ia long lowes level hem i jampion blong danis Limbo.

Opotuniti blong Asesmen

Ol studen oli save benem olgeta bihaen taem oli stap danis long Limbo.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Helti individuel mo Komyuniti (30min)

Fokas blong Aktiviti: Ol tri grup blong kakae

Ol Risos: Ol piya blong ol kakae o karem sam kakae blong trifala grup i kam long skul o yusum flaskad blong ol kakae we i stap long **Apendiks 17**

Vokabulari: Givim, blokem, paoa, sik, bildim, masel

Tokbaot wanem oli bin mekem long las lesen we oli bin kuk mo kakae tugeta. Askem long ol studen se, "Hu i laekem las lesen blong yumi?"

Talem long ol studen se tedei bae yumi lukluk moa i go insaed long ol kakae mo wanem nao ol kakae ia oli mekem long bodi blong yumi. Tokbaot wanem ol defren grup blong kakae oli mekem long bodi blong yumi taem yumi kakae olgeta.

Droem tebol ia long bod mo askem ol studen blong droem tebol ia i go insaed long buk blong olgeta. Insaed long ples we i se "Ol kakae" ol studen oli droem tri kakae long spes ia blong trifala grup ia. Mo long ples blong "Wanem oli mekem long bodi" oli droem wanem ol kakae ia i mekem long bodi blong yumi.

Ol waet kakae	Ol defren kalakala kakae	Ol defren mit mo nat
Taro Maniok Rice	Carot Wotamelon Manggo	Fis Faol Nangae
Wanem oli mekem long bodi blong yumi?		
Givim paoa long yumi blong save wokbaot i kam long skul mo pleiple wetem ol fren.	Protektem yumi long ol sik.	Bildimap ol masel blong yumi mo mekem yumi gru kam bigwan.

Taem oli finis oli givim buk blong olgeta long yu blong yu jekem.

Askem ol studen:

- Wanem nao ol waet kakae oli mekem long bodi blong yumi?
- Wanem nao ol kalakala kakae oli mekem long bodi blong yumi?
- Wanem nao ol mit mo nat oli mekem long bodi blong yumi?

Opotuniti blong Asesmen

Ol studen oli talem wanem ol tri grup blong kakae oli mekem long bodi blong olgeta.



Lesen 5: Tekem plante kea long envaeromen blong yumi (45 min)

Fokas blong Aktiviti: Ol tri mo plant oli impoten tumas

Ol Risos: Ol mat we ol studen oli save silip long hem, eksasaes buk blong olgeta, ol pensel mo ol kala pensel o kreyon

Vokabulari: Tri, plant, impoten, kakae, ea, selta

Tekem ol studen oli go aninit long wan bigfala tri we i stap long skul. Talem long ol studen blong silip daon long mat mo lukluk i go antap long tri. Taem oli stap silip long mat yu askem ol kwesten mo harem ol ansa blong olgeta. Askem olgeta blong putum han i go antap taem oli wantem toktok.

Askem ol studen:

- Wanem nao yu save luk we tri ia i gat?
- From wanem yu ting se oli planem tri?
- Yu ting se hu i planem tri ia?
- Yu ting se tri ia i gat hamas yia?
- From wanem ol pipol i stap katemdaon ol tri?
- From wanem ol tri o plan i impoten tumas?

Lisen long ol ansa blong ol studen mo tokbaot moa ol kwesten antap. Talem wanem ol plant mo tri oli mekem olsem:

Mekem gud ea o win we yumi stap britim mo hao

Givim kakae long yumi mo long anamol

Sam plan o tri yumi save yusum olsem meresin

Rus blong oli helpem blong holem graon long saed blong ol hil

Talem long ol studen blong oli girap mo go lukluk gud ol lif, stamba, o rus blong tri ia mo faenem wanem anamol i stap long hem. Oli mas lukaot long ol denjares anamol olsem sentipid o blak anis.

Ol studen oli droem wanem oli faenem long tri long buk blong olgeta. Oli raelem wanem pat blong tri nao oli faenem anamol ia long hem.

Opotuniti blong Asesmen

Ol studen oli talem from wanem ol plant o tri oli impoten.

Lesen 6: Pefoming At (30 min)

Fokas blong Aktiviti: Brekdanis

Ol Risos: Ol singsing blong brekdanis, sidi pleia o mobael fon

Vokabulari: Munwok, brekdanis, Mikhael Jakson, arier

Plei wan singsing blong brekdanis olsem wan singsing blong Mikhael Jakson mo tijim ol studen long brekdanis olsem munwok.

Be sapos yu no save, askem ol studen sapos oli save danis blong brekdans afta oli tijim yufala blong danis long brekdanis. Sapos yu mo ol studen oli no save, yu save askem wan yangfala boe o gel long komyuniti blong kam tijim long yufala long skul.

Opotuniti blong Asesmen

Ol studen oli save danis long munwok we hem i wan stael blong brekdanis.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30min)

Fokas blong Aktiviti: Ol kastom bilif

Ol Risos: Pepa, ol pensel, ol kala

Vokabulari: Tingting, biliv, samting, kam tru, kastom, mekem

Talem long ol studen se bilif hem i ol tingting yumi mekem abaot yumi wanwan, ol naraman o woman long viley, mo abaot hao yumi ekspekteblong samting blong oli mekem. Ol bilif oli abaot hao yumi tingting blong mekem ol samting o hao bae ol samting oli kam tru.

Luk ol eksampol ia:

- Taem mama we i gat bel i kakae lif blong pamkin taem bebe blong hem i bon bae i kasem sikras.
- No mas brum long naet, sapos yumi brum long naet yumi stap brum aot ol mani blong yumi. Afta bae yumi save wok hamas be yumi no stap gat mani.
- Taem ren i stap, hangem lif blong bredfrut blong ren i stop.
- Taem ol man oli wantem go huk woman we i gat bel i no mas luk olgeta, sapos hem i luk olgeta bae oli no save kasem wan fis nating.
- Taem wan nasiko i singaot long lefsaed blong wan man i minim se bae yumi harem wan nogud nius, be taem yumi harem nasiko i singaot long raetsaed hem ia i stap talem wan gud nius long yumi.
- Taem wan bataflae i flae i kam klosap o sidaon long yu, bae yu gat wan visita o wan gud nius.

Opotuniti blong Asesmen

Ol studen oli talem ol bilif we oli harem o save mo oli bilif long hem.



Lesen 10: Siviks mo Komyuniti Rilesensip B (30 min)

Fokas blong Aktiviti: Ol narafala komyuniti helpa

Ol Risos: Pija blong ol komyuniti helpa (**Apendiks 18**), wan bigfala pepa mo pent

Vokabulari: Haosgel, bildä, woman blong masaj, polis blong jif, stokipa, koj, fama, vilej, taon

Tokbaot wetem ol studen ol narafala helpa long wan komyuniti. Yusum posta olsem wan risos blong helpem ol studen oli save aedentifaem ol narafala helpa long wan komyuniti.

Diskasem hao ol narafala helpa ia oli kontribut long wan komyuniti olsem wan tija i stap tijim ol studen long skul.

Opotuniti blong Asesmen

Ol studen oli pentem han blong olgeta mo mekem ol han pent blong olgeta long bigfala pepa olsem wan sekol i go raon long bigfala toktok we yu raetem i stap long medel we hem i “Ol helpa insaed long wan komyuniti”.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 2 – Wik 10



Lesen 1: Spirituel mo Karakta Dvelopmen (30min)

Fokas blong Aktiviti: Fasting/no kakae

Ol Risos: Baebol

Vokabulari: Fasting, prea aktiviti, wota fasting, jus fasting, Daniel fasting, sosiol, media



Long Vanuatu, fasting i wan relijes praktis blong fulap relijen blong yumi. Fasting tu i gat helt benefit blong hem long bodi blong pesen we i fast.

Fasting hem i taem wan memba blong jos o ful kongrigesen o eni wan we i gat wan nid we i wantem mekem fast mo prea from i save mekem. No evriwan i save skipim kakae, so i gud yumi enkarejem olgeta we oli save fast nomo blong tekpat long fasting long moning kasem afterun long spesel dei ia. Ol pikinini oli save fast taem oli skipim brekfast mo kakae nomo long lanj.

I gat ol defren taep blong fasting. I gat wota fasting, jus fasting, fasting blong Daniel we hem i vejtebol fasting, diset o ol rij kakae fasting mo sosiol fasting.

Long fasting yumi enkarejem ol memba blong prea mo askem papa God wanem taep blong fasting nao oli wantem tekem. Stamba tingting blong dei blong prea mo fasting hem i blong putum yu wan klosap long God mo abaot wan nid blong yu.

Hem i wan spesel taem blong yu wetem God, taem we yu lukluk nomo long God from yu dipend nomo long hem.



Askem ol studen:

- Hu i bin tekpat long wan fasting finis?
- Hu i neva tekpat long wan fasting?

Talem story blong Daniel wetem ol fren blong hem long Baebol long ol studen.

Opotuniti blong Asesmen

Ol studen oli droem piya blong storian blong Daniel wetem ol fren blong hem long buk blong olgeta.

Lesen 2: Pefoming At (30 min)

Fokas blong Aktiviti: Danis long singsing blong *Do Re Mi*

Ol Risos: Jat blong singsing long (**Apendiks 21**)

Vokabulari: Dolfin, renbo, mifala, famle, ti, laplap

Mekem ol studen oli singsing mo danis long singsing blong *Do Re Mi*.

Opotuniti blong Asesmen

Ol save singsing mo danis long *Do Re Mi* singsing

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Sefti (30 min)

Fokas blong Aktiviti: Sam denjares situesen

Ol Risos: Ol piya we i soem sam situesen we i denja

Vokabulari: Denja, situesen, klaem, foldaon, krosem, reva

Askem ol studen se sapos yu klaem long wan tri afta yu nomo save kam daon,
wanem nao bae yu mekem?

Lisen long ol ansa blong ol studen afta tokbaot smol wanem oli blong mekem.

Serem ol studen oli go long fo grup. Givim wanwan piya o situesen blong denja long wanwan grup. Ol studen blong wanwan grup oli tokbaot gud situesen blong olgeta long grup blong olgeta. Go raon blong tokbaot moa wetem wanwan grup.

Sam aedea blong ol situesen we i maet denja tumas:

Taem yu go long wan bot o kenu

Krosem rod

Krosem reva

Stap go long wan trak

Afta wanwan studen long wanwan grup oli raetem ol simpol rul blong olgeta long buk blong olgeta. Taem oli finis askem sam long ol studen blong talem rul blong olgeta long klas. Karem buk blong olgeta blong jekem ol rul we oli raetem.

Wan simpol rul we yumi plante i save we hem i blong krosem rod:

“Lukluk long lef, lukluk long raet, lukluk long lef bakegen biffo yu krosem rod!”

Opotuniti blong Asesmen

Ol studen oli raetem wan simpol rul blong situesen blong olgeta.



Lesen 5: Tekem plante kea long envaeromen blong yumi (45 min)

Fokas blong Aktiviti: Wota i impoten tumas

OI Risos: Wan botel we i 80% fulap long wota, sam pi ja we i soem hao yumi ol pipol oli yusum wota, woksit blong “Wota i impoten tumas” (**Apendiks 19**)

Vokabulari: Wota, tank, drink, bodi, plan, anamol, wel, paep, swim

Askem long ol studen:

Yufala i karem wota blong drink mo kuk long wea?

Yufala i was long wanem wota?

Wanem wota nao yufala i yusum blong swim long hem?

Hemia sam kwesten we yu save askem ol studen mo lisen long ol ansa blong olgeta. Afta yu eksplenem gud long olgeta ol ansa blong ol kwesten ia.

Askem: From wanem wota i impoten tumas?

Talem long ol studen se:

Wota i impoten tumas from bitim haf blong bodi blong yumi hem i wota nomo. Olsem wan botel wota we i 80% fulap long wota (soem botel ia long ol studen).

Ol plant mo ol anamol tu oli nidim wota blong stap laef.

Yumi ol pipol oli no save laef bitim wan wikaot wota. I minim se yumi no kakae ol frut o ol kakae we oli gat wota long hem. Askem:

- Hao nao yumi stap yusum wota?
Ansa: Yumi yusum wota blong drink, kuk, swim, wasem klos, long toelet, brasem tut, wasem fes, wotarem ol vejtebol blong yumi long garen, wotarem ol flawa mo fulap narafala samting moa. Yufala i save tokbaot ol pi ja we i stap long woksit long **Apendiks 19**
- Wea nao yumi stap karem ol wota blong yumi blong mekem ol defren aktiviti ia?
Ansa: Yumi save karem ol wota blong yumi long paep, tank blong ren wota, long reva, long wan smol reva long krik, long wan pul, long solwota, ol wel we oli bildim long brikis o wel we oli digim long graon mo samfala moa we yufala i save tingbaot.

Talem ol wod blong vokabulari long ol studen mo aksem olgeta blong talem mo spelem ol toktok ia.

Givim woksit blong oli raetem ol sentens long bod mo ol studen oli kopi i go long buk blong olgeta. Ol studen oli komplitim ol sentens taem oli raetem gud ol leta blong ol wod long ol spes long ol sentens ia.

Talem long ol studen se from wota i impoten tumas long laef blong yumi, hem i impoten blong yumi tu i mas lukaotem gud ol wota blong yumi blong i stap klin mo sef oltaem.

Opotuniti blong Asesmen

Ol studen oli raetem gud ol leta long ol wod blong eksasaes blong olgeta.

Lesen 6: Pefoming At (30 min)

Fokas blong Aktiviti: Mekem skit long singsing blong *Papa Abraham*

Ol Risos: Jat blong singsing blong *Papa Abraham* (luk **Apendiks 21**)

Vokabulari: Papa, Abraham, plante, boe, raet, lef

Putum jat blong singsing i go antap mo ridim ol laen blong singsing ia. Ol studen oli ridim ol toktok blong singsing olgeta nomo. Singsing song ia tru blong ol studen oli harem hao blong singsing song ia. Yu wetem ol studen oli singsing song ia mo mekem aksen blong hem tugeta.

Opotuniti blong Asesmen

Ol studen oli save mekem skit blong singsing ia *Papa Abraham*.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljorol Heritej mo Aedentiti (30 min)

Fokas blong Aktiviti: Ol fasin blong welkamem

Ol Risos: Ol salusalu, piya blong welkamem ol man o woman

Vokabulari: Welkamem, visita, mitim, sekhan, halo, slapem han, glad, hangem, flawa

Talem long ol studen se i gat plante wei blong welkamem ol pipol, tedei yumi lanem hao yumi stap welkamem ol big man o ol visita we oli stap kam long ples blong yumi.

Taem yu mitim wan impoten pesen long fas taem, yu sekhan wetem hem mo yu talem halo long hem, mo yu talem nem blong yu. Afta yu talem se, "Mi glad blong mitim yu."

Be taem ol yangfala oli mitim olgeta, oli sekhan, slapem han o pulum fingga olsem wan saen blong welkam.

Yumi no sekhan wetem ol man we yumi stap save olgeta mo luk olgeta evri dei.

Taem i gat wan bigfala ivent i hapen long ples blong yumi, yumi hangem salusalu olsem saen blong welkam long ol impoten man ia.

Taem ol turis oli kam long ples blong yumi, yumi hangem flawa mo sekhan long olgeta tu.

Askem ol studen blong go tutu blong kreitem wan niufala stael blong sekhan wetem wan fren.

Opotuniti blong Asesmen

Ol studen oli save ol defren fasin blong welkam long ol situesen.

Lesen 10: Siviks mo Komyuniti Rilesensip A (45min)

Fokas blong Aktiviti: Wok folem rul blong skul

OI Risos: Kopi blong rul blong skul o polisi blong skul

Vokabulari: Rul, polisi, akseni, folem, brokem, disaplin

Mekem ol studen oli sidaon long mat. Talem stamba tingting blong mas gat rul hem i blong kipim ol pipol oli sef mo oli save stap gud tugeta.

Askem ol studen:

Sapos wan skul i no gat rul wanem i save hapen insaed long skul ia?

Ansa: Skul ia i wan ples we i no sef blong lan long hem mo ol studen bae oli mekem wanem olgeta nomo i wantem mo bae oli no tingbaot ol narafala fren blong olgeta. OI tija oli no lisem long prinsipol blong skul mo oli mekem tingting blong olgeta nomo.

Soem rul o polisi blong skul long olgeta mo talem long ol studen se skul blong yumi tu i gat ol rul blong hem. Sapos wan studen i no folem gud ol rul ia bae prinsipol blong skul i save tekem sam akseni blong disaplinim studen ia.

Hem i no nesesari blong ridim evri rul blong skul o polisi blong skul long olgeta. Ridim nomo ol rul o polisi we i aplae long ol studen mo ol narafala wan we yu i ting se i nid blong ol studen oli mas save from i aplae long evridei laef blong olgeta long skul. Raetem fo rul o polisi long bod mo ol disaplin akseni blong olgeta.

Serem ol studen oli go long fo grup mo givim wanwan rul ia long wanwan grup. Wanwan grup oli mekem wan rolplei blong wan situesen we i soem wan studen i brokem wan rul mo wanem disaplin nao skul i tekem blong mekem hem i lanem lesen blong hem.

Givim ten minit blong ol studen oli praktisim ol rolplei blong olgeta. Go raon long wanwan grup blong helpem olgeta long rolplei blong olgeta.

Sapos i gat taem yet askem ol studen blong soem rolplei blong olgeta long klas.

Askem sam kwesten abaot ol rolplei blong mekem ol studen oli tingbaot impotens blong edukesen blong olgeta mo hao oli sud rispektem ol rul taem oli stap skul.

Opotuniti blong Asesmen

OI studen oli wok gud long grup blong olgeta blong mekem wan rolplei.



Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 3

HAO BLONG LUKAOTEM GUD
KOMYUNTI BLONG YUMI



TEM 3



SAB-STRAN	SPIRITUEL MO KARAKTA DIVELOPMEN	PEFOMING AT	MUVMEN MO GEM	HELTI INDIVIDUEL MO KOMYUNITI	SEFTI
Lesen	Lesen 1 30min	Lesen 2, 6 30 min	Lesen 3, 8, 12 20 min	Lesen 4 (W1) 30 min	Lesen 4 (W2) 30 min
Wik 1	Logo blong ol jos haos	Pleplei blong faenem	Jusum ol aktiviti long Muvmen mo Gem	Helti wei blong laef	
		Drama long singsing blong <i>Bigfala Puskat</i>			
Wik 2	Oda blong wosip	Drama blong <i>Bigfala Taro</i>	Jusum ol aktiviti long Muvmen mo Gem		Swim long solwota o reva
		Aktem stori: <i>Wan Rat In-saed long Stoa</i>			
Wik 3	Ol prea praktis	Aktem poem blong <i>Banana</i>	Jusum ol aktiviti long Muvmen mo Gem	Klinim haos	
		Singsing wetem aksen <i>Piknik Ku</i>			
Wik 4	Ol klos blong werem i go long jos	Aktem karakta blong ol animol	Jusum ol aktiviti long Muvmen mo Gem		Ol aksen long taem blong etkwek
		Aktem singsing blong <i>Mi laek lukim bataflae</i>			
Wik 5	Sam kakae we sam religen oli no kakae	Mekem drama blong <i>Wan Doli we i Sik</i>	Jusum ol aktiviti long Muvmen mo Gem	Kontrolem ol filing	
		Aktem storian blong <i>Molse mo Molkas</i>			
Wik 6	Ol praktis blong kakae	Mekem ol namba	Jusum ol aktiviti long Muvmen mo Gem		Ol laet long naet
		Mekem aksen long singsing blong <i>Wan Wael dog</i>			
Wik 7	Selebretem Dei blong ol Mama	Aktem stori blong <i>Wan bigfala Taro</i>	Jusum ol aktiviti long Muvmen mo Gem	Ol saen blong ol komon sik mo wei blong stopem	
		Aktem stori blong <i>Man Faol Blong Mi</i>			
Wik 8	Helpem ol man long nid	Aktem stori blong <i>Yumi Kakae Popo long lans</i>	Jusum ol aktiviti long Muvmen mo Gem		Laetning i denja
		Aktem storian blong <i>Abu Kalua wetem Bigfala Blak Snek</i>			
Wik 9	Krismas Dei	Mekem drama long singsing blong <i>Jisas i Bon</i>	Jusum ol aktiviti long Muvmen mo Gem	Ol sefti praktis; wanem blong mekem	
Wik 10	Tanksgiving-Niu Yia	Mekem drama long singsing blong <i>Jisas i Bon</i>	Jusum ol aktiviti long Muvmen mo Gem		Ol flawa we oli gat posen
		Kristmas plei blong taem <i>Jisas i Bon</i>			

LUKAOTEM GUD ENVAEROMEN BLONG YUMI	VISUEL AT	KALJOROL HERITEJ MO AEDENTITI	SIVIKS MO KOMYUNITI RILESENSIP A	SIVIKS MO KOMYUNITI RILESENSIP B
Lesen 5 45 min	Lesen 7 , 11 30 min	Lesen 9 30 min	Lesen 10 30 min	Lesen 10 30 min
Wota blong yumi i no sef	Jusum ol aktiviti long Visuel At	Welkam wan ges long haos	→ Wik 2	Komyuniti
Hao blong lukaotem gud wota blong yumi	Jusum ol aktiviti long Visuel At	Talem tata long wan ges	Wok long Nasonal Antem blong Vanuatu	← Wik 1
Planem ol defren kala blong haebiskis flawa	Jusum ol aktiviti long Visuel At	Mekem ol simpol samting wetem lif pandanas	→ Wik 2	Famle
Ol plant we i gat plante yus	Jusum ol aktiviti long Visuel At	Ol tradisonal wei blong faenem mit long solwota Pat 1	Ol wok long Nasonel Antem blong Vanuatu	← Wik 1
Planem wan frut tri	Jusum ol aktiviti long Visuel At	Ol tradisonal wei blong faenem mit long solwota: Pat 2	→ Wik 2	Volentia
<i>Stori blong Pou mo Miri</i>	Jusum ol aktiviti long Visuel At	Ol fasin blong respektem wan ded	Plei wan gem	← Wik 1
Sam efek blong klaemet jenis	Jusum ol aktiviti long Visuel At	Havestem yam	→ Wik 2	Ol narafala helpa long komyuniti
Ol efek blong klaemet jens i kam mowas	Jusum ol aktiviti long Visuel At	Planem yam	Ol wok long haos	← Wik 1
Mekem mo no mekem	Jusum ol aktiviti long Visuel At	Nalot bredfrut, taro o maniok	→ Wik 2	Fas Praem Minista blong Vanuatu
Yus blong natongtong	Jusum ol aktiviti long Visuel At	Laplap sosor	Ol wok long komyuniti	← Wik 1



Ovaviu Tem 3

Ol Lening Aotkam

Stran	Sab-Stran	Lening Aotkam	
Helti Laef	Helti individuel mo komyuniti	HLH.2.V1	Dimonstretem save blong helti praktis blong laef
	Muvmen mo Gem	HLM.2.V1	Dimonstretem kodinesen mo balens tru long patisipesen long ol defren aktiviti
	Sefti	HLS.2.V1	Aedentifaem mo diskraebem ol wei blong mekemsua se olgeta mo ol narafala wan i sef
Laef tugeta	Siviks mo Komyuniti Rilesensip (A)	LTR.2.V1.A	Karemaot gud ol responsibiliti blong olgeta long bihaf blong klas
	Siviks mo Komyuniti Rilesensip (B)	LTR.2.V1.B	Diskraebem hao sam memba blong komyuniti i kontribut long skul mo komyuniti laef
	Tekem plan-te kea long envaeromen blong yumi	LTC.2.V1	Protektem mo divelopem lokol envaeromen we oli liv long hem
	Spirituel mo Karakta Divelopmen	LTS.2.V1	Aedentifaem mo diskasem impoten kaljoral mo relijes ivent long komyuniti blong olgeta
Wei blong laef	Kaljorol heritej mo aidentiti	WLC.2.V1	Aplaem stret skil long sam kaljorol aktiviti long komyuniti
	Visuel At	WLV.2.V1	Yusum save mo skil blong talemaot ol aedia mo filing tru long at
	Pefoming At	WLP.2.V1	Krietem mo pefomem ol aksen blong ekspresem olgeta tru long danis, drama mo miusik

Tem 3 Ol Aktiviti blong Muvmen mo Gem



Aktiviti 1: Lokomoto

Ol Risos: Ol kon o maka blong makem baondri blong plei o ol slipa blong ol pikinini Wan studen i ronem ol narafala studen. Taem hem i tajem wan, studen ia i mas leidaon mo putum tufala leg blong hem i go antap. Wan long olgeta we i stap resis yet i mas kam tajem tufala leg blong hem ia we i leidaon ia wetem elbo blong hem blong hem i resis bakegen.

Aktiviti 2: Objek Kontrol

Ol Risos: Eni objek we i smol mo i save haed gud long han olsem wan smol sid Ol studen oli jusum wan patna. Studen A i haedem wan smol objek long wan han blong hem mo Studen B i jusum wijwan han nao objek ia stap insaed long hem. Sapos hem i juseum stret hem i winim wan poen. Be sapos hem i jusum rong, fren blong hem i gat poen. Afta studen B i haedem objek long han mo Studen A i jusum.

Aktiviti 3: Stabiliti o Balens

Ol Risos: Ol kon o maka o jusum tu tri olsem ol poen blong muv long wan poen i go long narafala poen. Putum ol studen long grup blong faev o sikis. Wanwan grup i joenem han mo wokbaot long stret laen long wan poen i go long narafala poen. Grup we laen blong hem i no stret i mas go bak long stating laen. Grup we i kasem en blong laen faswan i win.

Aktiviti 4: Lokomoto

Ol Risos: Ol maka mo wan kon Wan studen i stanap long fored mo ol narafala studen oli stanap sam distens farawei long hem. Ol studen bae oli askem, “Hamas step?” Studen ia bae i talem namba blong step mo ol studen oli wokbaot long step ia kam klosap long hem. Studen we i muv ekstra step i mas go bak long stating laen. Studen we i go kasem hem fastaem i win.

Aktiviti 5: Objek Kontrol

Ol Risos: Ol skrap o doti pepa Skwisim ol doti pepa blong mekem wan balong. Mekemsua se ol pepa ia i no save givim kil long ol studen. Divaedem ol studen long tu grup mo givim semak namba blong pepa long wanwan grup.



Taem yu se, ‘stat’ bae wanwan grup i sakem pepa i go long narafala grup. Bae oli kontiniu gogo kasem yu se ‘stop’. Grup we i gat plante pepa, i lus mo bae grup ia i pikimap evri pepa i go long doti bin.

Aktiviti 6: Stabiliti o Balens

Ol Risos: Fo kon mo ol maka

Putum ol studen long grup blong faev o sikis. Wanwan grup bae oli stanap long wan stret laen. Oli putum raet han blong olgeta long solda blong fren blong olgeta we i stanap long raetsaed. Taem tija i se “Stat”, bae ol studen olia oli wokbaot stat long wan poen i go long narafala poen. Oli save wokbaot go long fored, bihaen o saed. Grup we i kasem en blong laen i win. Sapos han blong wan studen i kamaot long solda blong fren blong hem, grup ia i mas stat bakegen.

Aktiviti 7: Lokomoto

Ol Risos: Wan longfala lastik we i bitim faev mita

Tu studen i holem wan longfala lastik we hem i 5 mita mo ol narafala studen oli jam ova. Bae hae blong lastik i stat daon mo muv i go antap. Studen i mas jam ova wan hae bifo oli jam long narafala hae.

Aktiviti 8: Objek Kontrol

Ol Risos: Balun o plastik bag

Givim fo balun long ol studen. Sapos i nogat balun, fasem plastik bag mo yusum. Oli mekem ol fo balun i go antap semtaem wetem eni pat blong bodi blong olgeta. Mekemsua se ol fo balun ia i no mas foldaon long graon. Bae hem i aot long gem taem we wan balun i foldaon.

Aktiviti 9: Stabiliti o Balens

Ol Risos: Tu spun mo tu lemon

Karem ol spun mo lemon. Ol studen bae oli putum lemon long spun mo wokbaot wetem long wan distens i go long narafala distens. Oli save holem spun long tugeta han o holem spun long wan han nomo.

Aktiviti 10: Lokomoto mo Objek Kontrol

Ol Risos: Ol maka o ol slipa blong mekem tu smol sekol, tu balong

Mekem tu smol sekol ten mita longwe. Putum ol studen long tu grup. Wanwan grup i mas gat wan kapten. Tufala kapten i stanap insaed long sekol blong tim blong tufala. Wanwan tim i pasem balong blong go kasem kapten blong hem. Taem kapten blong olgeta i kasem balong, oli gat wan poen.

Aktiviti 11: Objek Kontrol mo Lokokomoto

Ol Risos: Wan balong blong tenis o wan smol sofsof bol.

Ol studen oli stanap tugeta long wan ples. Wan studen i sakem balong i go long olgeta mo oli traem trikim balong. Studen we balong i kasem hem i aot long gem. Studen we i aot bae i stap pasem balong i go bak long studen we i stap sakem balong.

Aktiviti 12: Stabiliti o Balens

OI Risos: Wan baondri we yu makem long ol maka, wan balong blong voleibol o netbol Stretem wan han. Putum wan bigfala balong long han ia mo wokbaot long wan open spes. Ol narafala studen oli kaont blong luk se wataem nao balong bae i foldaon. Sapos balong i foldaon, narafala studen i tekem balong mo mekem semak aktiviti.
Studen we i holem balong long taem antap i win.

Aktiviti 13: Lokomoto

OI Risos: Wan longfala stik o wan skipping rop
Tekem wan longfala stik. Swingim long graon i go long raet mo lef mo ol studen oli jam ova long stik.

Aktiviti 14: Objek Kontrol

OI Risos: Wan bigfala kaliko, jok o wan longfala rop, balong
Tekem wan bigfala kaliko mo droem wan laen blong divaedem kaliko long tu pat. Putum wan smol raon balong o objek insaed long laen long medel blong kaliko ia. Tufala tim i holem kaliko ia long oposit saed. Taem yu se ‘stat’ bae wan tim i traem mekem balong i rol i foldaon long saed blong kaliko blong narafala tim.
Narafala tim i mas traem blong mekem balong i go bak long saed blong kaliko blong narafala tim.

Aktiviti 15: Stabiliti o Balens

OI Risos: Wan longfala rop we yu fasem i tri mita hae, tu kon olsem stat laen mo poen blong resis kasem
Makemaot wan distens blong sikis mita. Fasem wan rop long distens blong tri mita we i no hae tumas mo ol studen oli save jam ova long hem. Putum ol studen long grup blong faev. Wanwan grup bae i resis i go, jam ova long rop, resis go long en blong mak, mo resis i kam bak, jam ova rop mo go long finis mak

Aktiviti 16: Lokomoto

OI Risos: Fo kon olsem ol gol, ol slipa o maka blong makem baondri
Divaedem klas long tu. Nem blong wan tim bae hem i ‘Tru’ mo narafala tim bae hem i ‘Giaman’. Wanwan tim bae i gat gol blong hem.
Sapos tija i talem wan toktok we i tru olsem, klas ia hem i klas 2 bae Tru tim i ronem Giaman tim. Kiaman tim i mas ron kwik kasem gol blong olgeta. Sapos tru tim i tajem olgeta, bae oli kam memba blong Tru tim. I semak sapos tija i talem wan kiaman toktok bae ol Giaman tim oli ronem ol tru tim mo olgeta we oli tajem olgeta oli kam memba blong kiaman tim.



Aktiviti 17: Objek Kontrol

Ol Risos: Wan balong mo tu kon blong mekem gol

Makemaot wan gol. Ol studen oli sutum balong i go insaed long gol. Stanap klosap mo muv i go farawei.

Aktiviti 18: Stabiliti o Balens mo Objek Kontrol

Ol Risos: Mekem wan bigfala spes instead long klasrum o sapos i gat nakamal blong skul yusum nakamal

Divaedem ol studen oli go long tu grup. Putum wan balong long medel blong rum. Tufala grup i krol i go from balong. Wanwan tim i mas traem blong pusum balong i go long saed wetem han o leg blong hem. Oli no mas holem balong o sidaon o stanap. Oli mas krol nomo tru long gem ia. Eni tim we i brekem ol rul, nrafala tim i karem wan fri pas. Tim we i mekem balong i go long saed blong hem i win.

Aktiviti 19: Lokomoto

Ol Risos: Wan open spes long skul

Jusum wan studen blong kam wan puskat mo nrafala wan i wan rat. Ol nrafala studen oli joenem han mo mekem wan sekol. Rat i stap insaed long sekol mo puskat i stap aotsaed. Ol studen oli mas traem blong blokem puskat i no kakae rat. Bae oli letem rat i ron fri insaed mo aotsaed long sekol blong ronwei long puskat.

Aktiviti 20: Objek Kontrol

Ol Risos: Wan bokis, baket o rabis bin, jea mo wan balong blong netbol, basketbol o soka

Putum wan baket o kontena o wan ring we balong i save go insaed long wan level we i hae. Wan studen i save stanap long jea mo holem bokis ia o baket o rabis bin. Ol studen oli sakem balong i go insaed long ol objek ia. Oli stanap klosap mo muv i go farawei.

Aktiviti 21: Stabiliti o Balens

Ol Risos: Tu kon blong makem wan poen mo nrafala poen

Makemaot wan eria blong faev mita. Ol studen bae oli stanap long wan step mo putum nrafala step long fored. Mekemsua se nrafala leg blong olgeta i fas gud long tow blong leg we i stap finis. Oli stat wokbaot long wan mak i go long nrafala mak.

Aktiviti 22: Lokomoto

Ol Risos: Fo kon blong makem ol kona blong wanwan anamol

Putum ol studen long grup blong fo. Givim nem blong wan anamol long wanwan grup olsem dog, puskat, pig mo rat. Wanwan anamol i jusum kona blong hem.

Jusum tri studen blong kam long fored. Taem yu singaotem nem blong wan anamol, ol anamol ia oli mas ron kwik i go long kona blong olgeta. Sapos trifala studen i ronem mo tajem olgeta, oli mas aot long grup mo go joenem trifala ia.

Aktiviti 23: Objek Kontrol

OI Risos: Wan balong

Ol studen oli jusum wan patna. Givim balong long tufala. Studen A i kikim balong i go long Studen B mo studen B i kikim balong i go bak long Studen A. Tufala i mekem “wan taj kik”. Studen we i mestem balong i aot mo narafala wan i tekem ples blong hem.

Aktiviti 24: Stabiliti o Balens

Ol studen oli plei Pepa, Sisis mo Ston.

Aktiviti 25: Stabiliti o Balens

OI Risos: Ol maka blong makem baondri blong plei long hem

Wan studen i stanap long wan klia eria. Hem i mekem wan noes. Ol narafala studen oli hop/skip/jam/krol blong kasem hem. Tija o studen i jusum wanem aksen blong mekem.

Aktiviti 26: Objek Kontrol

OI Risos: Wan balong

Putum ol studen blong wok wetem fren blong olgeta. Givim wan balong long studen A. Studen A i baonsem balong i go long studen B mo studen B i baonsem balong i go bak long hem.

Aktiviti 27: Objek Kontrol

OI Risos: Ol smol feta

Wanwan studen i sakem feta long ea mo blu long hem blong i stap long ea long taem. Feta blong wan we i foldaon fastaem hem i aot long gem. Las feta we i flae yet i win

Aktiviti 28: Lokomoto


OI Risos: Wan 30sm pis kaliko mo wan pin blong klos o wan sefti pin

Tekem ol pis kaliko we longfala blong hem i 30sm. Ol studen oli yusum pin blong hangem klos blong pinim kaliko ia long saed blong klos blong olgeta. Narafala haf i hang i kamaot. Taem yu se, “stat” ol studen bae oli mas traem blong tekemaot kaliko blong ol narafala studen be mekemsua tu se ol narafala studen oli no tekemaot kaliko blong olgeta.

Aktiviti 29: Objek Kontrol

OI Risos: Jok, fo balong

Droem fo skwea. Wan studen i stanap insaed long wanwan skwea. Givim fo balong long olgeta. Studen A i baonsem balong i go long studen B. Studen B i baonsem balong i go long studen C mo studen C i baonsem balong i go long studen D. Oli stat long semak taem.



Aktiviti 30: Objek Kontrol

Ol Risos: Ol maka, ol balong blong tenis

Ol studen oli go aotsaed long wan open spes we i klia. Oli sakem balong blong tenis i go long wan distens we i farawei. Luk se hu nao i sakem balong i go farawei moa bitim ol narafala wan.

Tem 3 OI Aktiviti blong Visuel At



Aktiviti 1: Treding

OI Risos: String o rop, ol sid, ol sel, ol korel, nil mo ston o hama

Ol studen oli wokbaot long bus o sanbij mo faenem ol sid we oli save mekem hol long em. Oli faenem ol sel mo korel we i gat hol finis long hem o oli save mekem hol long olgeta.

Givim string we i longfala inaf blong mekem wan nekles long hem, mo ol studen oli mekem nekles.

Aktiviti 2: Kala wetem kreyon

OI Risos: Kreyon,hevi pepa, paoda pent mo pent bras

Ol studen oli droem wan pi ja wetem kreyon. Taem oli stap droem oli mas prestem strong kreyon blong olgeta.

Oli wasem droing blong olgeta long pent, ples we oli kala wetem kreyon i no save stak long pent. Kala long ol pi ja blong aninit blong solwota o pi ja blong skae mo “wasem wetem blu pent.

Aktiviti 3: Mekem paten wetem kreyon

OI Risos: Kreyon,hevi pepa o kad bod mo ol pepaklip

Kala long wan pepa wetem ol braet kala blong luk olsem wan windo glas we i gat sten long hem. Naoia pentem antap long pepa ia wetem blak kreyon. Stretem pepaklip mo yusum en blong hem blong mekem paten, pi ja o ol disaen.

Aktiviti 4: Miusikel kreyon


OI Risos: Ol kreyon, pepa mo miusik

Plei sam miusik. Tekem kala blong yu mo mekem kala i danis krosem pepa folem bit blong miusik. Plei long defren kaen miusik olsem klasik, jas, kantri miusik, string ban. Askem ol studen blong sarem ol ae blong olgeta mo letem kreyon i danis long pepa.

Aktiviti 5: Maks blong kreyon

OI Risos: Waks pepa, ol olfala kreyon, rasras o greta, aean (blong aeanem klos) o hot wota long wan botel

Ol studen tekem wan waks pepa mo rasrasem ol olfala kreyon i go antap long hem. Afta, oli putum narafala waks pepa antap long hem. Givhan long ol studen blong rolem aean antap long pepa ia blong mekem ol kala i melt mo mekem wan paten o disaen long ol kreyon ia. Long ol ples we oli no save yusum aeyan yu save putum hot wota long wan botel mo rolem antap long pepa.



TEM
3



Aktiviti 6: Dot long pepa

OI Risos: Kreyon, pepa

Mekem ol dot long pepa. Yu konektem ol dot ia tugeta, luk se ol dot ia oli mekem wanem piya o disaen. Yu tekem kreyon mo yu kala long ol dot ia, mekem blong ol piya i kam mo klea. Askem ol studen oli mekem dot mo oli eksjenisim pepa wetem fren blong olgeta.

Aktiviti 7: Droem piya blong hemwan

OI Risos: Kreyon mo pepa

Long bigining blong yia, yu askem ol studen blong droem wan piya blong olgeta wan. Putum deit we oli dro long hem bakegen blong droem wan mo piya blong olgeta bakegen. Long medel blong yia yu askem olgeta bageken. Yu luk hao nao oli divelopem droing blong olgeta. Hem ia hem i wan interesting projek blong serem wetem ol perens.

Aktiviti 8: Bodi at

OI Risos: Kreyon, A3 saes pepa, glu mo sisis

Putum pepa long flo. Mekem wan studen i leidaon long pepa. Dro raon long bodi blong studen ia wetem kreyon. Kala long piya blong bodi ia, katemaot bodi ia long ol pisis blong mekem pasel.

Aktiviti 9: Haf mo haf

OI Risos: Kreyon, pepa, glu, ol olfala magasin

Tekem wan piya long magasin o eni piya yu luk. Katem piya ia long haf. Glu long haf piya ia long narasaed blong pepa. Naoia kalarem nrafala haf wetem kreyon.

Aktiviti 10: Fatfat kreyon

OI Risos: Ol olfala kreyon, baking trei, ol mafin kap

Askem ol studen blong teremaot ol pepa we oli kaveremap ol kreyon mo brekem ol kreyon i go insaed long ol smolsmol mafin kap. Fulumap olgeta wetem kreyon kasem taem kap i fulap gud long ol defren kala blong kreyon. Brekem ol kreyon ia kasem taem oli melt. Taem ol kreyon oli melt, yu save yusum olgeta nao. Yu save yusum ol sel blong solwota blong putum ol melt kreyon ia insaed blong mekem ol defren sep o paten.

Aktiviti 11: Rikod At

OI Risos: 9 pepa we oli katem long sep blong sekol, ol kreyon

Kala long ol sekol blong yu wetem semak disaen nomo. Mekem hol long medel blong ol pepa ia mo joenem tugeta. Plei wan singsing mo yu mo lukluk ol piya oli stap spin raon.

Aktiviti 12: Foldem

OI Risos: Pepa mo kreyon

Tekem wan pepa mo yu foldem fulap taem. Openem mo dro ova long ples we yu foldem wetem

blak kreyon. Kala long wanwan sep wetem ol defren kala, o disaen o paten.

Aktiviti 13: Smol kasem bigwan

OI Risos: Bigfala pepa, ol kreyon

Ol studen oli mekem wan smol pi ja olsem hat, eg o flawa long medel blong pepa mo tekem wan defren kala blong kreyon mo kala i go raon long smol pi ja we oli mekem. Kontinu blong yusum defren kala blong go raon long smol pi ja mekem se pi ja i kam bigwan evri taem oli kala raon long hem.

Aktiviti 14: Wetwet jok

OI Risos: kala jok, pepa, wan kap blong wota

Dipim o putum jok i go insaed long wota afta dro long pepa. Yusum ol defren kala jok blong dro long pepa.

Aktiviti 15: Stro penting

OI Risos: Stro blong drink o han blong popo, paoda, pent, pepa mo spun

Ol studen oli putum wan ful spun blong pent long pepa. Afta, oli tekem stro mo blo blong mekem wan disaen. Dropem fulap defren kala blong pent mo blo blong mekem “faea wok”. Oli save ademap ol droing long disaen blong olgeta yusum kreyon o pent.

Aktiviti 16: Mabol Penting

OI Risos: Pent, ol mabol, kad bod mo bokis

Katem pepa i stret gud blong putum daon long bokis. Putum fulap mabol long bokis. Ademap sam pent afta rolem ol mabol blong mekem ol disaen.

Aktiviti 17: Rop Peinting

OI Risos: Rop, wan kap blong pent, pepa

Holem en blong rop mo dipim i go insaed long pent. Putum rop long medel blong pepa mo foldem pepa long haf. Holem medel blong pepa mo putumaot rop.

Aktiviti 18: Sofmad pent

OI Risos: Graon, wota, plastik kontena, pent bras mo pepa

Miksim graon wetem wota blong mekem sofmad. Pentem wan pi ja wetem pentbras o wetem han. Yu save faenem ol defren graon blong mekem ol defren kala.

Aktiviti 19: Frut mo vegtebol Prin

OI Risos: Aranis, banana, kumala, taro, maniok, bredfrut mo ol narafala kakae. Trei, pent, pepa tawel, pepa

Katem ol frut mo vegetebol long medel. Yusum pepa tawel blong waepem wota blong ol frut



mo vejtebol ia. Dro yusum wan sap samting blong mekem ol pi ja o disaen long ol frut mo vejtebol ia. Dipim ol frut o disaen ia i go insaed long **pent** mo pestem i go long pepa.

Aktiviti 20: Kala Sanbij

Oi Risos: Sanbij, paoda pent, plastik kontena, spun, glu, pepa

Kalarem sanbij wetem ol defren kala blong pent. Miksim ol defren kala sanbij tugeta mo mekem wan disaen long pepa yusum glu. Saksakem ol kala sanbij long disaen we yu mekem wetem glu ia. Leftemap pepa blong ol sanbij we oli no glu oli kamaot long pepa. Putum long san smol taem blong i drae gud.

Tem 3 – Wik 1



Lesen 1: Spirituel mo Karakta Dvelopmen (30 min)

Fokas blong Aktiviti: Logo blong ol joshaos

Ol Risos: Pija blong ol logo blong ol defdefren jos

Vokabulari: Logo, joshaos, SDA, Katolik, Presbitirin, Yunaeted Pentikostel

Not blong Tija: Bifo lesen ia yu save askem ol studen blong karem i kam long klas ol logo blong ol jos blong olgeta.

Ol logo blong ol joshaos blong yumi oli no semak oli defdefren, olgeta long SDA blong olgeta i defren, blong Presbiterin i defren olgeta long Katolik blong olgeta tu i defren. Ol logo ia oli gat ol mining blong olgeta.

Askem long ol studen blong tingbaot logo blong jos blong olgeta mo droem, sapos oli save. Afta, komperem ol defren logo ia mo talem se wanem nao oli save luk i stap long evri logo we oli luk. Ansa: Hem i kros. Long evri logo blong ol defren jos ia, yu save luk kros long hem.

Opotuniti blong Asesmen

Ol studen oli save luk save logo blong ol defdefren jos.

Lesen 2: Pefoming At (30 min)

Fokas blong Aktiviti: Pleplei blong faenem

Vokabulari: Studen, instraksen, givim, noes


Mekem ol studen oli wok wetem wan patna. Wan studen i givim instraksen long fren blong hem mo fren blong hem bae i traem folem. Lisen long ol instraksen mo luk sapos ol studen oli stap yusum ol aksen. Mekemsua se i nogat noes.

Eksampl:

Putum raet han long hed, lef han antap long hem mo lukluk i go long windo.

Opotuniti blong Asesmen

Ol studen oli save folem instraksen blong faenem wan samting.



TEM
3



Lesen 3: Muvmen mo Gem (20 min) Jusum wan aktiviti long pej 27-32

Lesen 4: Helti wei blong laef (30 min)

Fokas blong Aktiviti: Helti individuel mo Komyuniti

Ol Risos: Ol olfala niuspepa, magasin o posta, seven bigfala pepa, pot blong glu, sisis, ol emti paket blong ol doti kakae olsem loli, jus, swit biskit mo samfala moa

Vokabulari: Kakae, helti, wei, eksasaes, drink, hapi

Talem long ol studen se yumi mas praktisim sam defren wei long laef blong yumi evridei blong yumi stap helti oltaem. Askem olgeat blong tingbaot ol defren helti praktis we ol studen mo yumi evriwan i nid blong mekem blong liv wan helti laef, olsem:

- Klinim gud yu
- Silip mo res plante
- Drink plante klin wota
- Eksasaes
- No putum rabis i go long bodi blong yu
- Kakae ol lokol kakae
- Liv hapi evri dei

Ol studen oli go long seven grup. Givimaot wan wei blong liv helti long wanwan grup i wok long hem. Givim ol olfala niuspepa mo magasin long ol studen blong katemaot ol piya we i stret long wei we oli wok long hem.

Grup 1: Ol defren wei blong eksasaes

Grup 2: Ol defren ples blong karem klin wota

Grup 3: Ol defren aktiviti blong stap hapi oltaem

Grup 4: Ol defren helti lokol kakae

Grup 5: Ol defren rabis kakae we i save spolem bodi blong yumi

Grup 6: Ol defren wei blong klinim yu

Grup 7: Ol stret taem blong res mo silip.

Givim wan bigfala pepa long wanwan grup. Long bigfala pepa ia oli droem wan bigfala simbol o samting we i stret long wei blong laef we wanwan grup i wok long hem. Wan eksampol, long saed blong ‘kakae ol lokol kakae’, droem wan bigfala wota taro long pepa. Ol studen bae oli pestem ol piya blong ol lokol kakae we oli katemaot o olgeta nomo i droem i go insaed long bigfala wota taro.

Taem oli finis oli givim pepa blong olgeta long yu blong putum i go antap. Askem wan memba blong tokbaot piya we oli pestem sapos i gat taem yet.

Opotuniti blong Asesmen

Ol studen oli droem o katemaot ol pija we i stret long wei blong stap helti we olgeta i lukluk long hem.

Lesen 5: Tekem plante kea long envaeromen blong yumi (45 min)

Fokas blong Aktiviti: Wota blong yumi i no sef

Ol Risos: A4 pepa, pensel, ol kala pensel o kreyon

Vokabulari: Sef, wota, wel, ren wota, solwota, pul

Askem ol studen:

- Hao nao wota blong yumi i sef blong drink o swim?

Talem long ol studen se long sam lesen i pas yumi bin tokbaot se taem yumi sakem ol **doti** i go long reva o solwota o saed blong solwota o insaed wan olfala we i save spolem laef blong ol anamol we i liv long ol ples ia mo tu i save mekem ol wota ia i no sef blong yumi yusum.


Askem ol studen:

- Wanem sam narafala wei we yumi, ol pipol oli stap mekem be no save se ol aksen blong yumi ia i stap spolem wota blong yumi o mekem ol wota blong yumi i no sef blong drink o swim?

Lisen long ol studen mo tokbaot moa wanem we oli save finis. Yu save tokbaot wetem ol studen sam long ol wei ia we i stap aninit.

Sam wei we ol pipol oli stap spolem wota o mekem i no sef:

- Sakem ol doti olsem ol rosta aean, tin blong tinfis o mit, mo plastik o glas botel long reva, solwota o insaed long wan olfala wel.
- Sakem ol doti olsem ol drae lif mo wud long saed blong solwota blong bonem.
- Bildim bus toelet long saed blong reva o wel.
- Wasem klos wetem ol sop long reva.
- Wasem ol trak wetem sop long reva.
- Swim wetem sampa o sop long reva o long ol smol pul blong wota long solwota.
- Oli no klinim doti ruf blong haos we i kasem ren wota.
- Ol drae lif oli fulap long ol paep we oli tekem ren wota i go long tank.
- Oli katem ol paep we oli tekem wota long sos i go long vilej.
- Oli no tekemaot ol sip we i rek long solwota kwiktaem bifofuel o oel blong sip i ron i go long solwota.



TEM 3



Tokbaot hao wota o solwota i no sef folem ol defren aksen blong yumi ol pipol we oli stap antap.

Givim wanwan pepa long ol studen o oli yusum eksasaes buk blong olgeta. Aksem ol studen blong droem wan wei we yumi ol pipol oli save mekem ol wota blong yumi i no sef. Serem ol defren poen ia long ol studen. Afta oli raetem wan sentens we piya blong olgeta i soem.

Opotuniti blong Asesmen

Ol studen oli droem wan aksen blong ol pipol we oli save mekem wota blong yumi i no sef.

Lesen 6: Pefoming At (30 min)

Fokas blong Aktiviti: Drama long singsing blong *Bigfala Puskat*

Ol Risos: Jat blong singsing (luk **Apendiks 21**)

Vokabulari: Bigfala, puskat, longfala, tel

Mekem ol studen oli singsing long song *Bigfala Puskat*, afta yu askem olgeta blong oli mekem drama long song blong *Bigfala Puskat*.

Opotuniti blong Asesmen

Ol studen oli save mekem drama long song blong *Bigfala Puskat*.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Welkamem wan ges long haos

Ol Risos: Wan bigfala sot o wan bigfala dres

Vokabulari: Ges, gritim, sekhan, bisu, kakae

Talem long ol studen se, taem wan ges i kam insaed long haos blong yumi, yumi mekem ol nomol samting we yumi stap mekem long haos. Sapos hem i wan famle o wan fren yumi sekhan wetem hem mo yumi gritim hem wetem tu bisu long ol jiks blong hem. Yumi storian wetem hem givim hem kakae, givim hem ples blong silip.

Taem yumi gat visita o fren long haos long taem blong kakae yumi askem fren blong yumi blong hem i tekem kakae blong hem fastaem long yumi. Yumi mas mekemsua se hem i mas filim semak olsem we i stap long haos blong hem.

Askem ol studen blong aktem fasin blong welkamem wan fren mo famle memba long haos.

Opotuniti blong Asesmen

Ol studen oli save hao blong welkamem wan visita o famle long haos.

Lesen 10: Siviks mo Komyuniti Rilesensip B (30 min)

Fokas blong Aktiviti: Komyuniti

OI Risos: A4 defren kala pepa, pi ja blong wan komyuniti o katem ol sep blong ol pipol mo joenem tugeta

Vokabulari: Komyuniti

Soem long ol studen pi ja blong komyuniti o pepa we yu katem blong mekem wan laen blong ol pipol.

Ol studen oli diskas long pi ja o pepa we yu mekem. Oli rivi bak long wok blong las Tem mo tokbaot ol helpa blong komyuniti we oli bin lanem olsem ol jif, ol polis mo ol yangfala. Samaraesem ol mein poen bageken long ol studen.

Opotuniti blong Asesmen

Ol studen oli save tekemaot Laef blong Komyuniti eksasaes buk blong olgeta mo save ridim ol wok we oli bin raetem long buk blong olgeta. Oli serem ol wok blong olgeta wetem evriwan. I givhan tu blong oli save luk impotens blong raetem gud ol wok blong olgeta blong stap yusum long ol lesen olsem blong rivi.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32



Tem 3 – Wik 2



Lesen 1: Spirituel mo Karakta Divelopmen (30 min)

Fokas blong Aktiviti: Oda blong wosip

Vokabulari: Prea, wosip, singsing, **jos**, kongrigesen, prija, pasta, lisen

Talem long ol studen se long saed blong ol Kristin wosip o prea blong yumi ol pipol blong God, yumi kam tugeta blong singsing, lisen mo respon long papa God tru long singsing, prea, mo givim ofering.

Kam tugeta

Taem yumi kam insaed long jos, yumi kam insaed long ples blong papa God long wan rispek fasin, olsem kwaet insaed, taem yumi sit daon long jos yumi baoem ol hed blong yumi. Taem yumi stap kwaet i kam long hed blong yumi ia. I helpem yumi blong yumi lisen gud, mo tu presens blong papa God i stap wetem yumi, mo i helpem ol narafala man we oli stap raonem yumi blong oli stap kwaet tu.

Taem prija o pasta i stap wokabot i kam insaed blong kam antap long olta, yumi evriwan i stanap mo singsing doksoloji, be long sam narafala jos pasta i singaotem kongrigesen oli stanap blong wosipim papa God blong ridim long nem blong papa God mo pikinini mo Tabu spirit. Afta oli nil daon long saelen prea, afta oli girap mo oli singim fas singsing blong olgeta. Afta oli singsing bakegen blong kolektem ol ofereing, bifo ol dikon oli kolektem ofering, wan elda o wan we i asistim prija nao bae i prea from ol ofering. Afta long ofering, oli singsing long nambatu singsing

Toktok blong papa God

Long taem ia evri wan oli lisen long toktok blong papa God we sevent blong hem i prijim.

Long taem blong semon pasta i prij, prokleim, tij mo eksplenem ol Baebol riding blong helpem yumi. Taem hem i prij finis, yumi singim las singsing afta yumi prea mo yumi go long ol haos blong yumi. Long taem blong dismis yumi singim wan prea singsing afta yumi go wanwan.

Askem long ol studen blong oli talemaot oda blong prea o wosip blong olgeta long ol ples blong prea blong olgeta.

Opotuniti blong Asesmen

Ol studen oli save se wanwan jos i gat fasin o oda blong wosip blong olgeta

Lesen 2: Pefoming At (30 min)

Fokas blong Aktiviti: Drama blong *Bigfala Taro*

Ol Risos: Vanua Rida blong *Bigfala Taro*

Vokabulari: Bigfala, taro, rat, puskat, lised, anis, pig

Ridim stori long ful klas mo askem ol student oli lisen gud.

Serem ol studen oli go long grup blong aktemao storian ia. Go raon long wanwan grup mo gaedem olgeta taem oli stap aktem stori, yu save ridim stori ia taem oli stap aktem.

Opotuniti blong Asesmen

Ol studen oli save aktem wan karekta long storian ia.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Sefti (30 min)

Fokas blong Aktiviti: Swim long solwota o reva

Ol Risos: Ol piya o ol foto blong solwota o wan reva

Vokabulari: Save swim, no save swim, draon, helpem, rop, stik, hang

Talem long ol studen: “Putum han blong yu i go antap sapos yu no save swim. Putum han blong yu i go antap sapos yu save swim.”

Serem ol studen oli go long tu grup. Grup we oli save swim blong tokbaot wanem ol pikinini we oli **no save swim** i mas tingbaot mo mekem taem oli go long solwota o reva wetem ol fren o ol famle.

Sam samting oli save tokbaot:

- Karem wan wil blong swim o wan narafala samting we i flot we oli save sakem mo hang long hem sapos hem i mestem i go long dip ples.
- Go wetem wan bigfala brata, sista, o bigfala man o woman we bae i save stap watjem yu taem yu swim.
- Swim long ol ples we i no dip tumas.
- Talem long olgeta tu we oli no save swim blong swim klosap long so nomo.
- Taem yu go long dip ples no hang long fren blong yu we i no save swim.
- Mo samfala moa.

Grup blong olgeta we oli no save swim i tokbaot wanem ol pikinini we oli **save swim** oli mas tingbaot mo mekem taem oli go long solwota o reva wetem ol fren o famle.

Ol samting we oli save tokbaot:

- Lukluk long olgeta we oli no save swim.
- Helpem olgeta we oli no save swim taem oli mestem mo go long dip ples.
- Talem olgeta we oli no save swim blong swim long so nomo.
- Oli swim long ples we i sef nomo blong swim from i gat ol denjares anamol mo fis tu long solwota.



- Helpem ol fren blong olgeta sapos wan i stap draon. Oli pusum wan longfala stik i go long hem blong holem o sakem wan wil o wan samting we i flot blong oli hang long hem.
- Mo samfala moa.

Go long tufala grup mo askem kwesten blong helpem olgeta blong toktok moa.

Afta askem olgeta blong tokbaot wanem we oli bin tokbaot long grup. Oli jusum wan long olgeta blong toktok long bihaf blong grup blong olgeta. Ol narafala fren oli save givhan blong talem sam samting we fren blong olgeta i fogetem blong talem.

Askem: “Wanem wan niu samting we yu lanem long lesen ia?”

Opotuniti blong Asesmen

Lisen long ol toktok blong ol studen taem oli stap toktok long grup blong olgeta.

Lesen 5: Tekem plante kea long envaeromen blong yumi (45 min)

Fokas blong Aktiviti: Hao blong lukaotem gud wota blong yumi.

Ol Risos: Pija blong olgeta blong las lesen, sam A3 saes pepa, pensel o kala

Vokabulari: I sef, aksen, duti, wota, solwota

Talem long ol studen se tedei bae yumi tokbaot hao blong lukaotem gud ol wota o solwota blong yumi blong i stap sef oltaem. Long las lesen yumi tokbaot ol defren aksen blong yumi ol pipol we oli stap mekem ol wota o solwota blong yumi i save kam mo sef blong yumi yusum mo ol narafala anamol tu we i liv long hem.

Askem ol studen we oli tokbaot semak poen long ol pija blong olgeta long las lesen blong oli wok tugeta long lesen ia. Tedei oli tokbaot sam duti wei we oli save talem long ol pipol blong oli mekem blong lukaotem gud ol wota o solwota blong olgeta long poen we oli tokbaot long las lesen.

Eksampol: Ol pipol oli sakem ol tin mo aean long solwota.

Duti aksen: Go karemaot ol tin mo aean long solwota mo oli digim wan bigfala hol mo berem. Nekis taem oli tingbaot ol narafala wei blong yusum ol aeyan ia bakegen o wanem oli save mekem wetem ol emti tin blong fis o mit ia.

Taem oli finis tokbaot ol responsibol aksen ia, ol studen oli aktemaot wanem ol pipol oli sud mekem blong lukaotem gud wota o solwota blong olgeta folem poen blong olgeta.

Opotuniti blong Asesmen

Ol studen oli aktemaot ol duti aksen we ol pipol oli sud mekem blong lukaotem gud wota o solwota blong olgeta.

Lesen 6: Pefoming At (30 min)

Fokas blong Aktiviti: Aktem stori: *Wan Rat Insaed long Stoa*

OI Risos: Ol samting blong putum long wan stoa

Askem ol studen blong oli mekem drama blong stori ia, Wan Rat Insaed long Stoa

Opotuniti blong Asesmen

Ol studen oli mekem drama blong *Wan Rat Insaed long Stoa*.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Talem tata long wan ges

Vokabulari: Tata, lego, haos, go bak, sekhan

Talem long ol studen se, “Yumi bin tokbaot ol fasin blong welkamem ol ges long haos blong yumi, tedei bae yumi tokbaot hao yumi talem ‘tata’ long wan fren o visita taem hem i wantem lego haos blong yumi blong hem i go bak long haos o ples blong hem.

“Taem wan visita o fren i kam long haos blong yumi mo wantem go bak, yumi kakae tugeta wetem olgeta, hangem flawa long olgeta, givim presen long olgeta mo talem toktok tangkiu long olgeta. Taem oli stap lego haos blong yumi, yumi sekhan long olgeta mo yumi givim tu kis/bisu long ol jiks blong olgeta mo talem tata. Evri taem yumi lego wan visita o fren blong yum i go bak hem i sori mo yumi tu yumi sori.”

Ol studen oli aktem ol fasin blong talem tata long wan ges.

Opotuniti blong Asesmen

Ol studen oli save ol fasin blong talem tata long ol ges.


Lesen 10: Siviks mo Komyuniti Rilesensip A (45 min)

Fokas blong Aktiviti: Wok long Nasonal Antem blong Vanuatu

OI Risos: Jat blong Nasonal Antem blong Vanuatu luk long (**Apendiks 21**), flaskad blong ol toktok ia: Wok long klasrum, Rul blong klasrum, mo Rul blong skul.

Vokabulari: Nasonal, antem, plante, aelan, wok, Vanuatu

Long lesen blong tedei, tekem faev minit blong helpem olgeta blong tingting bak long ol lesen blong Tem 2. Putum ol flaskad long tri defren ples long klasrum. Talem long ol studen blong muv i go long trifala ples we trifala flaskad i stap long hem.



**TEM
3**



Afta we evri studen oli muv i go long wan flaskad, letem oli diskasem topik ia tugeta blong helpem olgeta blong tingting bak. Oli gat tu o tri minit blong tokbaot topik blong olgeta. Givim taem long wan memba blong wanwan grup blong serem tu samting we olgeta i lanem long topik blong olgeta long klas.

Talemaot long olgeta se wanwan long yumi i kam long ol defdefren ples o sosel grup. Yumi pat blong wan famle, vilej, aelan, provins mo kantri. Blong wan man nara fala ples i luk save se yumi blong Vanuatu, i gat sam samting we yumi mas save abaot kantri blong yumi. Wan long olgeta i Nasonal Antem blong yumi.

Putumap jat blong Nasonal Antem mo rid tugeta. Ridim fastaem mo ol studen oli rid afta long yu. Evriwan i singsing tugeta. Afta long singsing askem olgeta wanem oli ting se Nasonal Antem i stap tokbaot.

Opotuniti blong Asesmen

Ol studen oli patisipet gud blong singsing long Nasonal Antem.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 3 – Wik 3



Lesen 1: Spirituel mo Karakta Divilopmen (30 min)

Fokas blong Aktiviti: Ol prea praktis

Ol Risos: Jat blong prea blong Masta Jisas Kraes

Vokabulari: Prea, masta, Jisas, tabu, kraes

Ol relijen blong yumi oli gat ol wanwan fasin long ol prea praktis blong olgeta, be ol Kristin oli gat wan komon prea we oli stap yusum: *The Lord's Prayer o Prea blong masta Jisas Kraes*. Yu faenem prea ia long buk blong Matiu 6:9-13.

Prea blong masta Jisas Kraes

Papa blong mifala. Yu yu stap long heven. Nem blong yu i tabu. Mifala i wantem we olgeta man oli ona long yu, mo we yu yu kam king blong olgeta man, olsem we olgeta long heven oli stap mekem. Plis yu givim kakae long mifala, inaf blong tedei. Yu fogivim mifala from ol sin blong mifala, olsem we mifala i stap fogivim ol man we oli mekem i no gud long mifala. Yu no letem ol samting oli kam traem mifala tumas, mo yu blokem setan i no kam spolem mifala. Yu nomo yu King, yu nomo yu gat olgeta paoa. Mo ol gudgudfala samting oli blong yu nomo. Gogo i no save finis. Amen.

Prea blong Masta Jisas Kraes hem i wan eksampol blong hao nao yumi prea. Sam falanara relijen oli gat ol kaen prea blong olgeta.

Long sam stadi blong prea long sam relijen oli gat:

- ol pepes blong prea
- ol paoa blong prea
- ol opotuniti blong prea
- ol bilif blong prea

Mo long ol stadi blong prea ia i inkrisim tingting blong prea blong yumi blong:

- taem yumi prea plante i mekem yumi kam mo klosap long papa God
- taem yumi prea i helpem yumi long ol prea we yumi mekem

Bakegen long ol prea i enkarejem yumi long:

- hao nao yumi sud prea
- wanem taem nao yumi sud prea
- hu nao yumi sut prea wetem hem

Bae yumi prea from wanem?



Hem i oraet nomo sapos yumi stap prea long taem finis i kam, afta yumi askem papa
God blong tijim yumi blong prea.

Askem ol studen blong oli go long tu o tri grup blong oli tokbaot ol prea praktis oli stap luk long
ol jos o long ol haos blong olgeta.

Opotuniti blong Asesmen

Ol studen oli save se wanwan relijen oli gat ol fasin blong prea praktis.

Lesen 2: Pefoming At (30 min)

Fokas blong Aktiviti: Aktem poem blong *Banana*

Ol Risos: Jat blong poem blong *Banana*

Vokabulari: Grin, red, raep, yelo, naes, swit

Ridim poem ia fastaem long ol studen afta askem sam studen blong oli aktem poem ia.

Taem yu ridim grin, wan piknini we i werem grin i kam stanap, taem yu ridim se red o yelo banana, bae ol piknini wetem red mo yelo i kam stanap, mo yu kontiniu blong ridim mo pikinini i mekem aksen, kasem taem yu ridim finisim ol toktok long poem ia.

Banana

Grin, red o yelo banana

Taem yu grin, yu red, yu grin banana

Taem yu raep, yu red o yu yelo banana

Grin, red o yelo banana

Yu oltaem naes mo swit banana

Opotuniti blong Asesmen

Ol studen oli save aktem *Banana* poem.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Helti individuel mo Komyuniti (30 min)

Fokas blong Aktiviti: Klinim haos

Ol Risos: Pija blong insaed blong wan haos

Vokabulari: Klinim, haos, win, san, pikimap, dastem

Putum ol studen long grup blong faev. Givim wanwan pijs long ol grup. Ol studen oli lukluk gud long ol pijs mo tokbaot kondisen blong haos ia. Oli talem wanem oli save mekem blong

impruvum kondisen blong haos ia. Oli talem wanem blong mekem blong mekem se wan haos i stap klin mo helti.

Raetem ol tingting long tri kolom olsem hemia daon. Haos hem i mein ples o envaeromen we yumi liv long hem evridei. Insaed long wan haos i gat ol defren rum olsem kitjin, bedrum, livingrum, batrum mo toelet. Sam famle i gat ol defren ol haos blong kitjin, toelet mo batrum. Mekem aktiviti blong bedrum wetem ol studen. Afta serem ol studen blong oli wok long grup long ol defren rum o haos. Givim smol taem blong olgeta oli tokbaot hao blong klinim rum ia. Afta askem wanwan blong talem wanem oli bin tokbaot. Raetem wanem oli talem long ol kolom long tebol ia.

Bedrum	Toelet	Batum	Kitjin	Livingrum
Dastem ol pilo, matres, bedsit, mat Putum mat, matres mo ol pilo long san Brum gud insaed mo karemaot ol doti Openem windo blong san i saen i kam insaed mo win i blo i kam insaed tu.				

Askem ol studen:

From wanem hem i impoten blong evri rum o haos we yumi yusum i mas klin oltaem?

Opotuniti blong Asesmen


Ol studen oli talem hao blong oli klinim ol defren rum o haos ia.

Lesen 5: Tekem plante kea long envaeromen blong yumi (45 min)

Fokas blong Aktiviti: Planem ol defren kala blong haebiskis flawa

OI Risos: Ol han blong ol defdefren kala mo taep blong haebiskis, ol plastik blong raes, gudfala graon, baket blong wota

Vokabulari: Defren, kala, naes, kalaful



Not blong Tija: Wan dei bifor long lesen ia askem ol studen blong karem han blong haebiskis long haos blong olgeta i kam long skul. Talem long olgeta blong askem ol peren o wan famle we i gat wan defren kaen haebiskis fastaem. Talem long olgeta blong talem long ol peren o famle blong olgeta blong katem han blong haebiskis ia.

Ol studen oli wok long grup. Wanwan studen i karem wan plastik blong raes o polibag. Oli yusum sped o sel blong kokonas blong fulumap graon i go long plastik blong raes blong olgeta.

Oli mekemsua se graon i sofsof gud.

Yu soem long olgeta wanem en blong han blong pusum i go insaed long graon. Afta we ol studen oli save wanem en blong pusum i go long graon oli planem ol han blong haebiskis flawa we oli karem i kam.

Ol studen oli yusum emti tin we i gat hol long hem blong wotarem graon insaed long plastik blong raes we ol han blong haebiskis i stap long hem.

Putum ol plastik blong raes long wan sef ples mo mekemsua se oli stap wotarem ol plant blong olgeta evri moning taem oli kam long skul mo evri aftunun taem skul i finis.

Ol studen oli mas wasem gud han blong olgeta afta long aktiviti ia.

Opotuniti blong Asesmen

Ol studen oli planem stret ol defdefren han o branj blong haebiskis.

Lesen 6: Pefoming At (30 min)

Fokas blong Aktiviti: Singsing wetem aksen blong **Piknik Ku**

Ol Risos: Jat blong singsing **Piknik Ku** (luk **Apendediks 21**)

Ol aksen blong **Piknik Ku**

Piknik ku, piknik ku, yu-mi go long piknik ku

Ol studen oli putum han blong olgeta long wes blong olgeta, muvum wanwan leg i go long fored olsem raet leg, lef leg, raet leg mo lef leg bakegen.

Piknik ku, piknik ku yumi go long piknik ku

Oli mekem aksen olsem antap.

Lukluk reva

Oli putum raet han blong long fes antap long ae blong olgeta, mo lukluk i go stret long fored.

Lukluk maonten

Oli putum lef han blong long fes mo lukluk i go antap.

Lukluk solwota

Putum raet han blong long fes mo lukluk stat long lef kasem raet.

Bae yu-mi fren bae yu-mi fren, bae yumi gudfala fren

Oli holem solda blong fren blong olgeta mo go long raet mo lef.

Opotuniti blong Asesmen

Ol studen oli save mekem aksen blong Pikinik ku.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Mekem ol simpol samting wetem lif pandanas

OI Risos: Drae lif blong pandanas

Vokabulari: Fan, hedban, waj, balong, winmil

Askem ol studen blong kam wetem lif pandanas blong olgeta long skul. Soem long ol studen blong wivim ol simpol samting olsem fan, hedban, waj, balong, winmil mo ol narafala simpol samting. Mekemsua se ol studen oli wivim wan smol samting.

Opotuniti blong Asesmen

Ol studen oli save mekem wan simpol samting long lif pandanas.

Lesen 10: Siviks mo Komyuniti Rilesensip B (30 min)

Fokas blong Aktiviti: Famle

OI Risos: Wan piya o foto blong wan famle, inaf lif blong evriwan, grin pent, pent bras, glu, bigfala murel blong wan tri, ol singsing long **Apendiks 21**.


Vokabulari: Duti, serem, uniti, pis, hapines, rispek

Not blong Tija: Long lesen ia, yu mas tingbaot se sam studen oli liv wetem ol apu blong olgeta. Sam oli liv wetem ol mama nomo o ol papa nomo o wan narafala famle. Sam oli liv long tu defren haos sapos mama mo papa i separat.

Tokbaot wan smol skel blong wan komyuniti tedei olsem lokol jos komyuniti o viley komyuniti blong ol studen oli luksave impotens blong wan famle we i wok olsem wan smol komyuniti.

Ol valiu we yu save luk taem wan komyuniti i wok gud oltaem:

- Hapines, pis mo uniti i stap oltaem
- Evri pipol i responsibol long ol defren wok we i stap long komyuniti
- OI pipol oli folem gud ol toktok blong ol lida
- Evriwan long komyuniti oli serem wanem we i kam long komyuniti olsem ol help we i kam aotsaed



**TEM
3**



Askem ol studen blong oli save serem eksperiens blong olgeta long wanwan haos blong olgeta, hao oli wok olsem wan famle long haos.

Askem ol kwesten ia taem ol studen oli stap tokbaot ol famle blong olgeta:

- Hu i lukaotem yufala long haos?
- Hao nao hem i stap lukaotem yufala?
- Hu ol narafala famle we oli liv wetem yu?
- Wanem wok blong yu long haos?
- Hao nao olgeta narawan i help long haos?
- Wanem i save hapen sapos wan memba blong famle i no mekem wok blong hem?
- Hua i wok moa bitim ol narafala long famle blong yu?

Afta long ol diskasen ia i gud blong fokas long wan gudfala komyuniti i wok olsem wanem.

Diskas tugeta mo mekem ol studen oli luk impotens blong wok tugeta olsem wan komyuniti mo save luk i kam long wan bigfala skel olsem hemia we oli bin stadi long hem long Tem 2.

Opotuniti blong Asesmen

Mekem ol studen oli kalarem ol lif mo raelem nem blong ol memba blong famle blong olgeta long ol lif ia mo mekem wan “Famle Komyuniti Tri blong Mi” aot long ol lif blong olgeta.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 3 – Wik 4



Lesen 1: Spirituel mo Karakta Divilopmen (30 min)

Fokas blong Aktiviti: Ol klos blong werem i go long jos

Ol Risos: Tekem sam klos blong jos i kam long klas

Vokabulari: Klos, werem, blak, sot, sket, traoses

Talem long ol studen se long ol wanwan jos blong yumi, oli gat ol fasin blong werem klos i go long jos. Eksampol sam jos blong yumi oli werem blak traoses mo waet sot, ol woman mo ol gel oli werem waet sot o blaos mo blak sket. Sam jos oli werem eni kaen kala klos nomo i go long jos. Sam long ol jos ol pris oli jenis i defren long ol memba blong jos.

Bakegen Baebol i no talem wanem kaen klos blong man mo woman bae oli werem i go long jos, be Baebol i talem nomo se jenis blong man mo woman insaad long jos i sud soem respek we papa God i ekspekteem insaad long presens blong haos blong hem.

Long Baptis jos i no gat unifom o wan spesel klos blong werem go prea long jos, man, woman, pikinini oli werem eni klos nomo blong go long jos.

Putum ol studen long grup mo askem olgeta blong oli storian long ol klos we oli werem i go long jos.

Opotuniti blong Asesmen:

Ol studen oli save wanem klos blong werem go long jos.

Lesen 2: Pefoming At (30 min)

Fokas blong Aktiviti: Aktem karakta blong ol anamol

Vokabulari: Anamol, hos, dog, rat, puskat, buluk, nanigot

Not blong Tija: Wanwan studen tu i save mekem ol defdefren karakta blong ol anamol ia

Putum ol studen long grup mo givim nem blong wan anamol long grup ia olsem Grup 1: buluk, Grup 2: pig mo Grup 3: pijin.

Taem yu se ‘stat’ ol grup ia oli aktem ol defren karakta blong ol anamol ia. Taem yu se ‘stop’ bae evriwan i stop mo jenis i go long narafala grup blong anamol.

Opotuniti blong Asesmen

Ol studen oli mekem karakta blong ol defren anamol.



Lesen 3: Muvmen mo Gem (20 min) Jusum wan aktiviti long pej 27-32

Lesen 4: Sefti (30 min)

Fokas blong Aktiviti: Ol aksen long taem blong etkwek

Vokabulari: Etkwek, muvmuv, seksek, kwaet, klia, aninit

Askem ol studen:

- Hu i fraet long taem blong etkwek?
- Wanem nao yu stap mekem taem graon i stap muvmuv?

Lisen long ol ansa blong ol studen mo tokbaot moa long tufala kwesten antap.

Hem i impoten tumas blong ol studen oli save hao blong respon long taem blong etkwek. Tokbaot hao blong akt o muv taem oli stap insaed long haos, long kijin o klasrum o eni narafala biling long hem long taem blong etkwek. Mo tu oli mas save wanem blong mekem taem oli stap aotsaed long taem blong etkwek.

Serem ol studen oli go long fo grup, tu grup blong aktemaot taem oli stap insaed long wan biling mo tu grup blong aktem taem oli stap aotsaed.

Grup 1: Oli stap insaed long wan haos semen.

Grup 2: Oli stap insaed long wan kijin.

Grup 3: Oli stap aotsaed aninit long wan tri.

Grup 4: Oli stap long fil blong futbol.

Ol studen oli save go aotsaed blong aktem ol situesen ia. Oli no go longwe tumas long klasrum. Go raon long wanwan grup blong jekem se oli oraet.

Talem wanem taem bae oli kambak insaed mo soem wanem oli aktem long evriwan.

Oli givim wan bigfala klap long olgeta. Evriwan i mekem komen long wanem oli aktem mo talem ol stret samting blong mekem long taem blong etkwek.

Opotuniti blong Asesmen

Ol studen oli aktem wanem blong mekem long taem blong etkwek; graon i stap seksek o muvmuv.

Lesen 5: Tekem plante kea long envaeromen blong yumi (45 min)

Fokas blong Aktiviti: Ol plant we oli gat plante yus

Ol Risos: A3 saes pepa o wan narafala wei blong disbleim ol pat blong plant

Vokabulari: Meresin, soa, wota, lif, bon, kukum, skwisim, skin

Tekem ol studen oli go wokbaot raonem skul o viley mo aedentifaem sam plan we oli gru klosap long ol haos we oli gat ol yus blong olgeta. Tokbaot ol plant ia mo talem ol yus blong olgeta. Ol studen tu oli save talem ol yus blong ol plan ia we oli save. Tekem wan o tu lif blong ol plant ia i kambak long klas.

Long wokbaot blong yufala, yufala i save askem ol man o woman o olfala we yufala i mitim abaot ol plant we oli gat long haos blong olgeta mo ol yus blong olgeta.

Taem yufala i kambak long klas, serem ol studen oli go long fo grup. Long ol grup blong olgeta, ol studen oli pestem ol lif o skin o wan narafala pat blong ol plant we oli karem i kam long klas long wan bigfala pepa. Oli raetem nem blong plan ia mo wanem ol yus blong hem.

Opotuniti blong Asesmen

Ol studen oli talem ol nem blong ol plant we i gru raon long haos mo ol yus blong olgeta.

Lesen 6: Pefoming At (30 min)

Fokas blong Aktiviti: Aktem singsing blong Mi Laekem Lukluk Bataflae

Ol Risos: Jat blong singsing Mi Laekem Lukluk Bataflae (luk long **Apendiks 21**)

Mekem ol studen oli singsing song ia fas taem. Afta, askem olgeta oli singim bakegen mo oli aktem singsing.

Aksen blong Mi Laekem Lukluk Bataflae

Mi laekem lukluk bataflae

Poentem yu mo mekem aksen blong olsem bataflae i flae

Flae antap

Stanap long toe mo sakem han olsem bataflae i flae.

Flae daon bilo

Nil daon mo sakem han olsem bataflae.

Mi laekem lukluk bataflae

Poentem yu mo mekem aksen olsem bataflae i flae.

Jisas i mekem hem


Poen i go antap, mo mekem aksen blong "mekem hem".

Opotuniti blong Asesmen

Ol studen oli save aktem ol toktok blong singsing.



TEM 3



Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Ol tradisonal wei blong faenem mit long solwota

Ol Risos: Ol pi ja blong ol tradisonal wei blong faenem mit long solwota o reva (**Apendiks 20**)

Vokabulari: Solwota, fis, nawita

Long taem blong yumi te dei yumi yusum ol tul blong waetman blong go kasem fis, selfis, krab, nawita mo ol narafala kakae long solwota. Long taem bifo ol apu blong yumi oli gat ol wei blong olgeta blong kasem o faenem ol mit long solwota o long reva.

Oli wivim ol smolsmol basket blong kasem fis, naura, nawita olsem hem ia (luk long **Apendiks 20**), mo oli putum kakae insaed long hem mo tekem i go putum long solwota, taem fis i kam kakae finis i nomo save go aot, i stap insaed. Afta oli kam tekem fis i go kakae. I gat fulap wei blong kasem fis long bifo.

Askem ol studen blong oli mekem wan list blong ol wei blong kasem o faenem fis long bifo.

Opotuniti blong Asesmen

Oli studen oli save ol wei blong kasem fis long bifo mo long naoia.

Lesen 10: Siviks mo Komyuniti Rilesensip A (45 min)

Fokas blong Aktiviti: Ol wok long Nasonal Antem

Ol Risos: Jat blong Nasonal Antem, A4 saes kopi blong nasonal antem, pi ja we i soem ol defren ples olsem viley, hil, reva, solwota, aelan, bus, taon, [ikja we i some uniti olsem sidaon long wan mat, holem han long wan sekol, diskas long grup, pleplei gud tugeta mo ol defren wok long ol aelan blong yumi olsem katem kopra, mekem garen, go huk, mekem haos, tri A3 saes pepa, glu, sis

Vokabulari: Wok, uniti, papa, glad, brata, fasin

Askem olgeta:

Wanem song yumi singsing long hem taem yumi pulum flag long wan impoten ivent?

Ansa: Nasonal Antem

Putumap kopi blong Nasonal long bod mo evriwan i ridim tugeta. Evriwan i singsing. Afta long singsing diskasem wanwan ves wetem ol studen.

Askem ol studen:

Ves ia i tokbaot wanem?

Wanem nao yu tingbaot taem yu harem ol laen blong ves ia?

Afta long diskasen, serem ol studen oli go long tri grup we wan grup i wok long wan ves olsem hemia daon:

- nambawan fes ves, putum ol piya blong soem ol defren ples
- nambatu ves, putum ol piya we oli soem uniti
- nambatri ves, putum ol piya blong ol defren wok

Givim wan A4 saes kopi blong Nasonal Antem long olgeta wetem ol piya blong soem ol trifala ves blong Nasonal Antem. Mekem ol studen oli kala mo pestem piya i go wetem ves long A3 saes pepa.

Taem oli finis oli givim pepa blong olgeta long yu blong putum i go antap long wol.

Askem ol kwesten olsem: Wanem nao yumi lanem tedei?

Opotuniti blong Asesmen

Ol studen oli givim tingting blong olgeta long long ol ves blong nasonal antem.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32



Tem 3 – Wik 5



Lesen 1: Spirituel mo Karakta Divelopmen (30 min)

Fokas blong Aktiviti: Sam kakae we sam relijen oli no kakae

Talem long ol studen se sam long ol religen blong yumi oli no kakae mo drink samfala kakae mo drink. Eksampol olgeta long SDA oli no kakae ol selfis long solwota o reva, pig, flaenggfokis o totel, mo oli no drink alkol o kava, kofi o lipton. Olgeta long Momon jos olgeta oli no drink alkol, kofi o lipton.

Samfala man oli no stap kakae mit, oli stap kakae kabis nomo wetem ol nat olsem nangae, pinat, kokonas mo ol narafala nat. Ol man we oli no kakae mit, oli singaotem olgeta se ol vegetarian. I gat ol man we oli vejeterien be oli stil kakae fis mo eg.

I gat sam riligiens we oli stap kakae mit be taem i kam long dei blong prea blong olgeta bae oli no kakae mit ia nao. Sam long ol religen blong yumi oli no kakae sol mo suka.

Putum ol studen long ol grup blong oli mekem wan jat long ol kakae mo drink we oli no save kakae mo oli no save drink.

Opotuniti blong Asesmen:

Ol studen oli save se sam relijen oli no save kakae mo drink samfala kakae mo drink.

Lesen 2: Pefoming At (30 min)

Fokas blong Aktiviti: Mekem drama blong *Wan Doli we i Sik*

Ol Risos: Vanua Rida blong *Wan Doli we i Sik*

Ridim storian ia tu taem long ol studen mo askem olgeta oli lisen gud. Askem sam studen blong oli aktem stori ia.

Opotuniti blong Asesmen

Ol studen oli save gud mo aktem stret stori.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Helti individuel mo Komyuniti (30 min)

Fokas blong Aktiviti: Kontrolem ol filing

Ol Risos: Sam piya we i soem ol pipol wetem defren ekspresen long ol fes blong olgeta, olsem angri, hapi o sad

Vokabulari: Kontrolem, kros, hapi, filing, emosen

Askem ol studen:

- Taem wan studen i tekem pensel blong yu be hem i no askem, bae yu filim olsem wanem?

Ol studen oli wok tutu blong tokbaot ansa blong kwesten antap. Wan long tufala i talem ansa blong tufala long klas. Oli talem filing blong olgeta long taem olsem.

Askem ol studen:

- Wanem ol gudfala wei blong stretem ol smol problem olsem we i folem skul rul?

Talem long ol studen se i nomol blong yumi gat ol defren filing. Yu save gat ol positiv mo negativ filing. Ol positiv filing hem i ol filing we i mekem yu harem gud olsem taem yu hapi mo i gat ol negativ filing we i mekem yu harem nogud olsem taem yu harem nogud. Plante taem yumi soem hao yumi filim tru long ekspresen long fes blong yumi.

Soem ol piya blong ol pipol we oli luk hapi, sad o angri. Askem ol studen blong tingbaot wanem i hapen blong mekem olgeta harem olsem. Ridim ol situesen long ol studen.

Karem ol pepa blong olgeta blong makem ol wok blong olgeta. Mekem tugeta wetem ol studen mo askem wanem nao i stret wei blong yu biheiv taem yu stap long ol situesen olsem.

Opotuniti blong Asesmen

Ol studen oli droem stret fes long ol defren situesen we yumi stap fesem.

Lesen 5: Tekem plante kea long envaeromen blong yumi (45 min)

Fokas blong Aktiviti: Planem wan frut tri

Ol Risos: Ol plastik bag blong raes, gudfala graon, wota, sam sid blong ol frut olsem mandarin, pamplemus, aranis, naus, mango, navele, nakatambol, nangae, kastapol, korosol (sosop), nakavika mo samfala moa

Vokabulari: Kakae, helti frut, planem, lukaotem, wotarem, san, sed

Pikimap wan sid long tebol mo askem se sid ia i blong wanem tri. Ol studen oli talem ol nem blong tri taem yu stap soem ol sid blong hem.

Soem long ol studen wanem blong mekem taem yu planem wan sid blong wan tri.

Ol studen oli fulumap ol plastik blong raes blong olgeta wetem graon mo wotarem graon gud.



Afta oli mekem wan hol wetem fingga blong olgeta. Oli putum ol sid blong olgeta insaed long ol hol ia afta oli berem wetem graon.

Oli karem ol plastik blong olgeta mo putum aninit long wan tri o sed. Oli no mas fogetem blong stap wotarem. Taem ol sid oli gru strong lelebet, putum long san mo kontinu blong wotarem kasem taem i redi blong tekemaot long plastik mo planem long graon long eria blong skul.

Oli mas wasem gud han blong olgeta.

Opotuniti blong Asesmen

Oli studen oli lanem hao blong planem ol sid blong ol frut tri.

Lesen 6: Pefoming At (30 min)

Fokas blong Aktiviti: Aktem storian blong *Molse mo Molkas*

Ol Risos: Pija blong kenu, piya blong totel, padel, huk, string, Vanua Rida *Molse mo Molkas*

Vokabulari: Kenu, parel, huk, string

Askem ol studen blong oli lisem gud taem yu ridim stori ia tu taem long olgeta. Afta, askem sam studen blong oli aktem stori ia wetem yu, yu aktem stori wetem ol studen we yu jusum olgeta ia, afta yu askem olgeta blong aktem olgeta nomo.

Ol narafala studen oli sidaon mo wajem drama.

Opotuniti blong Asesmen

Ol studen oli save aktem stori ia.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Ol tradisonal wei blong faenem mit long solwota

Ol Risos: Ol piya blong ol tradisonal wei blong faenem mit long solwota o reva

Vokabulari: Krab, trap, hol, basket

Not blong Tija: Yu save storian long ol studen ol wei blong faenem Nawita mo ol narafala kakae long solwota.

Long taem bifo, ol apu blong yumi oli gat ol wei blong blong kasem krab long bus mo long solwota. Oli wivim ol smolsmol basket blong kasem krab olsem hem ia, mo oli putum kakae

insaed long hem mo tekem go putum long bus o long solwota , taem krab i kam kakae finis i no mo save go aot, i stap insaed mo oli kam tekem i go kakae.

Wan moa narafala wei olsem, oli digim hol insaed long graon mo oli sakem maks blong kokonas raon long maot blong hol ia taem ol krab oli kam kakae klosap long hol, oli mestem be oli foldaon i go insaed long hol afta oli nomo save kambak antap, so man i kam tekem go long haos mo kukum.

Opotuniti blong Asesmen

Ol studen oli save hao blong kasem krab olsem ol pupu blong bifo.

Lesen 10: Siviks mo Komyuniti Rilesensip B (30 min)

Fokas blong Aktiviti: Volentia

Ol Risos: Ol volentia sapos oli save sam we oli stap kam long skul

Vokabulari: Ovasi

Tokbaot wetem ol studen ol volentia we oli stap kam ovasi blong helpem ol skul. Ol volentia ia oli stap kam blong helpem ol komyuniti.

I impoten blong ol studen oli save se ol volentia oli sevap blong samtaem bifo oli kam long wan trip olsem blong volentia blong helpem skul long wan divelopmen.

Tokbaot wanem kaen wok oli save mekem. Tokbaot hao nao oli save long skul mo kam blong helpem skul.

Opotuniti blong Asesmen

Oli serem wanem we oli harem long diskasen wetem grup blong olgeta.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32



Tem 3 – Wik 6



Lesen 1: Spirituel mo Karakta Divelopmen (30 min)

Fokas blong Aktiviti: Ol praktis blong kakae

Vokabulari: Relijen, kakae, bifo, tri, taem, tu, dei

Long ol relijen blong yumi, oli gat ol taem blong kakae, sam oli kakae tri taem long wan dei, sam oli kakae tu taem long wan dei folem ol relijes bilif blong olgeta. Sam long ol relijes bilif ia i mekem sam pipol oli drink bifo oli kakae, samfala oli kakae afta oli wet sam minit bifo oli drink wota. Sam long ol relijen blong yumi oli folet ol praktis blong kakae ia folet wanem i stap long holi tok blong Papa God long buk blong Fas Korin 3:16.

Opotuniti blong Asesmen:

Ol studen oli save ol praktis blong kakae blong wanwan relijen.

Lesen 2: Pefoming At (30 min)

Fokas blong Aktiviti: Mekem ol namba

Oganaesem ol studen long laen mo talem long olgeta se bae yufala i mekem ol namba yusum olgeta bakegen. Mekem oli maj long wan singsing mo fomem sep blong ol namba, olsem namba 1, 2 mo 3. Blong mekem namba 3 yu nidim 20–25 studen mo ol narafala namba.

Opotuniti blong Asesmen

Ol studen oli save fomem ol namba.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Sefti (30 min)

Fokas blong Aktiviti: Ol laet blong naet

Ol Risos: Ol samting we i givim laet olsem toslaet, batri, kandel, bokis masis, sola laet, stik faea, lif blong kokonas mo samfala moa o ol piya blong olgeta

Vokabulari: Denja, sef, givim, laet, naet, tudak

Talem long ol studen se long naet o taem ples i tudak yumi yusum laet blong mekem ol skul wok blong yumi, lukluk rod blong yumi blong go silip o blong go long toelet o swim o go long kijin blong kakae. Yumi yusum ol defren samting blong givim laet. Yumi kolem ol samting ia

“ol sos” blong laet i minim se laet i kamaot long olgeta.

Askem ol studen blong putum han blong olgeta i go antap mo talem sam wei o samting we yumi yusum blong givim laet long yumi long naet.

Ol studen oli save talem:

- toslaet
- lif blong kokonas
- stikfaea
- faea
- kandel
- hariken laet
- sola laet o toslaet
- laet blong Unelco
- kolman laet
- laet blong jenereta
- laet blong TV o komputa
- munlaet
- laet blong ol sta
- mo samfala moa



Raetem wanem ol studen oli talem long bod.

Talem long ol studen se sam long ol samting ia i sef blong yumi yusum mo sam long ol samting ia i denjares tumas taem yumi yusum. Samtaem bae yumi save silip mo fogetem blong kilim i ded.

Putum ol studen long ol grup mo askem wanwan grup blong droem wanwan sos blong laet. Afta, askem ol studen blong tingbaot wijwan sos blong laet i denjares. Askem oli blong putum ol sos blong laet long tufala grup: wan we i moa sef mo wan we i save denja.

Opotuniti blong Asesmen

Ol studen oli luksave ol sos blong laet mo wijwan oli denja.

Lesen 5: Tekem plante kea long envaeromen blong yumi (45 min)

Fokas blong Aktiviti: Stori blong *Pou mo Miri*

Ol Risos: Stori blong *Pou mo Miri*

Vokabulari: Klaemet jenis, flaengfokis, natongtong, fores, rif, korel

Talem long ol studen se, “Tudei bae yumi ridim wan storian blong wan smol boe we nem blong hem Pou mo wan smol flaenfoks we nem blong hem Miri.



TEM
3



Storian blong tufala i tokbaot wan topik o samting we evri ples long wol mo yumi tu long Vanuatu i stap tokbaot. Yumi stap tokbaot plante from yumi stap luk ol efek blong hem long ol aelan blong yumi.

Ol studen oli mas lisem gud from bae yu askem ol kwesten long olgeta long en blong storian. Talem long ol studen blong leftistmap han taem oli wantem toktok.

Ol kwesten we yu save askem:

- Wanem nem blong aelan blong Pou?
- Pou hem i wanem kaen boe?
- Wanem i gat long aelan blong Iteni?
- Wanem nao Pou i luk taem hem i stap wokbaot i go long taon?
- Wea ples nao Pou i faenem Miri?
- Miri i stap askem Pou blong helpem hem long wanem?
- Wanem nao yufala i luk we i mekem tufala i kof?
- Wea ples nao tija blong Pou i se tufala i save faenem Mama blong Miri?
- Skipa i stap singim singsing blong hem abaoat wanem?
- Wanem nao hem i talem long Pou blong mekem?
- Hu hem i Priti Kalafuli?
- Ol parotfis oli mekem wan impoten samting long rif. Wanem nao oli mekem?
- Hao nao Miri i go kasem antap blong tri blong luk Mama blong hem?
- Wanem nao Pou i mekem taem hem i kasem bak viley blong hem?

Yu save tokbaot smol stamba topik we stori ia i lukluk blong hem we hem i klaemet jenis.

Askem ol studen:

- I gat tu samting long stori we i kontribut long klaemet jenis?
- I gat tu samting long stori we yumi save mekem blong save liv wetem klaemet jenis?

Opotuniti blong Asesmen

Ol studen oli ansarem ol kwesten we yu stap askem abaoat storian blong *Pou mo Miri*.

Lesen 6: Pefoming At (30 min)

Fokas blong Aktiviti: Mekem aksen long singsing blong Wan Wael dog

Ol Risos: Jat blong singsing blong Wan Wael Dog (luk long **Apendiks 21**)

Vokabulari: Wael, tel, tanem, raon, wanem, wantem

Singsing song ia wetem ol studen tu taem. Taem yu stap singim, mekem aksen blong wanem

singsing i stap talem long yu. Askem ol studen blong singsing wetem yu mo mekem semak samting yu mekem.

Opotuniti blong Asesmen

Ol studen oli save mekem aksen blong ol singsing.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Ol fasin blong respektem wan ded

Ol Risos: Pija blong wan ded seremoni

Vokabulari: Berem, respek, grev, sori, blak klos, no kom

Infomesen blong Tija

Afta taem oli berem wan man, woman o pikinini long wan komyuniti evriwan i go long haos mo serem smol kakae. Afta long kakae i gat sam wei blong soem ol las respek long ol famle we oli stap sori long famle blong olgeta we i ded. Ol klos famle oli stap silip long haos blong man we i ded kasem faev dei o wan manis. Long dei we yumi berem man i ded bae ol stret famle mo ol pipol we oli stap sori wetem ol famle bae oli werem ol blak klos mo bae oli no swim o komem hea kasem faev dei.

Ol papa, bubu ol angkel mo ol boe oli no alao blong sevem mustas blong olgeta kasem wan manis. Afta long faev dei bae ol famle oli go putum flawa long grev afta oli go swim long solwota afta kam werem ol niu klos mo kam kakae tugeta.

Sam famle oli wantem stap kasem wan manis. Taem wan manis i pas, ol famle mo ol fren blong man we i ded bae oli kam tugeta bakegen mo oli mekem wan mo bigfala kakae blong talem tangkiu long ol man we oli kam stap serem sori wetem ol famle kasem wan manis.

Talem long ol studen se wanwan aelan i gat ol wei blong olgeta blong respektem ded.


Askem ol studen blong oli talem hao nao oli respektem ded long ol viley o komyuniti blong olgeta.

Opotuniti blong Asesmen

Ol studen oli save talem ol wei blong serem sori taem wan famle o fren we i ded.



**TEM
3**



Lesen 10: Siviks mo Komyuniti Rilesensip A

(45 min)

Fokas blong Aktiviti: Plei wan gem

Ol Risos: Ol flaskad blong ol defren ples olsem vilej, hil, reva, solwota, aelan, bus, taon, yuniti olsem sit daon long wan mat, holem han long wan sekol, diskas long grup, pleplei gud tugeta mo ol defren wok long ol aelan blong yumi olsem katem kopra, mekem garen, go huk, mekem haos mo fulap moa we yu save tingbaot

Vokabulari: Defren, ples, ves, flaskad, wok

Putum ap Nasonal Antem mo letem ol studen oli singsing long hem.

Talem long olgeta se long lesen blong tedei, klas bae i pleplei long wan gem we i beis long Nasonal Antem blong Vanuatu.

Talem instraksen long olgeta. Ol flaskad blong ol defren ples, yuniti mo wok long risos i go wetem ol ves long singsing olsem:

Nambawan ves: ol flaskad blong ol defren ples

Nambatu ves: ol flaskad blong soem uniti

Nambatri ves: ol flaskad blong ol defren wok

Evri studen i muv raon long klas.

Taem yu soem wan flaskad blong wan ples, ol studen oli stanap wanwan. Rison from long nambawan ves yumi singsing abaot ol ples long Vanuatu.

Taem yu soem wan flaskad we i soem yuniti ol studen oli muv i go long tu-tu from nambatu ves i tokbaot yuniti.

Taem yu soem flaskad blong wan wok oli muv i go wan nambatri from ves tri i wan we yu jusum, from plante taem yumi wok long grup blong mekem ol wok blong yumi olsem wok long garen, mekem natangura mo fulap moa.

Sapos ol studen oli mekemap grup we i no majem flaskad o namba we yu jusum, bae oli go sidaon long midel blong klas long flo.

Las tu o tri studen we i muv raon yet oli ol wina.

Ol narafala studen we oli no mekem kasem en blong gem oli mas singsing long Nasonal Antem bakegen.

Afta long gem, reviu long lesen blong tedei. Askem wan studen we i gat wan spesel nid blong talem wanem nao yumi mekem tedei.

Opotuniti blong Asesmen

Ol studen oli tekpat blong plei gud gem ia.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32

Tem 3 – Wik 7

Lesen 1: Spirituel mo Karakta Dvelopmen (30 min)

Fokas blong Aktiviti: Selebretem Dei blong ol Mama

Oi Risos: Foto blong mama o apu woman blong olgeta

Vokabulari: Selebretem, dei, mama, presen, kakae, tangkiu, laf

Infomesen blong Tija

Raon long wol yumi stap selebretem Dei blong ol Mama. Yumi selebretem long ol defren fasin. Ol fasin blong selebretem Dei blong ol Mama i depen long wanwan kantri.

Yumi long Vanuatu yumi selebretem Dei blong ol Mama long manis Mei. Sam sosaeti oli selebretem Dei blong ol Mama tugeta long ol wanwan jos blong olgeta, samfala oli selebret wetem ol famle blong olgeta, samfala oli selebret long vilej blong olgeta.

Yumi selebretem Dei blong ol Mama from yumi honarem olgeta mo yumi talem tangkiu long olgeta from lav blong olgeta, long fasin blong lukaotem gud yumi taem yumi stap long bel blong olgeta kasem taem yumi kam big man mo woman.

Long Dei blong ol Mama yumi selebret wetem bigfala kakae, yumi givim ol presen long ol mama blong yumi mo yumi raetem ol toktok tangkiu long ol mama blong yumi. Sam man oli toktok stret nomo long mama blong olgeta blong talem tangkiu long ol mama blong olgeta long fasin blong lav mo lukaot gud long olgeta.


Askem ol studen blong oli mekem wan stori jat aboatem hao oli selebretem Dei blong ol Mama blong olgeta long ol ples blong olgeta.

Tugeta wetem ol studen mekem wan prea blong ol mama olsem:


Tangkiu mama long evri samting yu mekem long mi mo yu stap go hed yet blong mekem ol samting blong mi. Tangkiu tu long Papa God we i givim yu long mi, tangkiu mama blong kam pat long laef blong mi. Yu tijim mi fulap gud gud samting, tedei mi kam wan big man o woman from yu nomo. Sapos i no yu bae mi no save laef i stap kasem tedei. Mama mi lavem yu tumas, mo papa God i stap wetem yu.

Opotuniti blong Asesmen:

Ol studen oli stori long hao oli selebretem Dei blong ol Mama.



TEM
3



Lesen 2: Pefoming At (30 min)

Fokas blong Aktiviti: Aktem stori blong *Wan Bigfala Taro*

Ol Risos: Vanua Rida blong *Wan Bigfala Taro*

Vokabulari: Bigfala, taro, pulum

Ridim stori blong *Wan Bigfala Taro* long ol studen mo askem long oli lisen gud. Jusum sam studen blong oli aktem storian o yu askem sapos eni studen i wantem volentia blong aktem stori. Yu gaedem ol studen taem oli stap aktem storian, bae yu ridim stori taem olgeta i stap aktem.

Opotuniti blong Asesmen: Ol studen oli aktem gud stori blong *Wan Bigfala Taro*.

Lesen 12: Muvmen mo Gem (20 min) Jusum wan aktiviti long pej 27-32

Lesen 4: Helti individuel mo Komyuniti (30 min)

Fokas blong Aktiviti: Ol saen blong ol komon sik; wei blong stopem

Ol Risos: Pija blong wan sik pikinini

Vokabulari: Komon, sik, saen, sikras, laus, kof

Tekem opotuniti we wan studen i sik blong tokabaot topik ia, o yu save yusum wan pija blong wan pikinini we i sik.

Askem ol studen:

Wanem sam long ol komon sik we i save pas kwik taem i go long wan narafala fren?

Wanem sam saen we i soem se wan i sik?

Talem ol sik we yu stap luk long skul: sik blong skin olsem ringwom, sikras mo waetspot, flu, redae, laus mo samfala moa.

Ol sik	Saen blong sik	Wanem blong mekem
Flu	Kofkof, nus i ron, fiva, hed i so	Blokem bodi from kolkol, rabem oel kokonas long trot mo jes, stimim yu long hot wota.
Red ae	Ae i red, wota blong ae i ron, i swolap, doti blong ae i plante long ae	Wasem ae we i sik long klin wom wata
Sik blong skin	Pikinini i sikrasem hem, skin i gat smosmol soa i gat doti wota i stap ron	Putum ol klos long san, wasem ol klos long hot wota. Swim oltaem, rabem oel blong kokonas long bodi. Go long hospital.
	Ol waet mak i kamaot long skin. Taem yu swet i save sikras.	Boelem ol klos mo putum ol blanket mo matres long san. No serem klos wetem ol narawan.
	Skin i sikras, ringwom i gru long skin mo i raon olsem ring	Swim evri dei, putum krim blong hospital folem oda blong dokta, no serem klos wetem narafala
Laus	Hed i sikras oltaem	Katem hea, katem lemon long 2 pis mo rabem long ful hed, faenem mo kilim ol laus

Opotuniti blong Asesmen

Ol studen oli talem sam long ol komon sik we oli stap luk long skul o long ples we oli liv.

Lesen 5: Tekem plante kea long envaeromen blong yumi (45 min)

Fokas blong Aktiviti: Sam efek blong klaemet jenis

Ol Risos: Sam piya o foto we i soem solwota i kam antap, ol fis i ded long sanbij from solwota i hot tumas mo damej blong saeklon, Posta 8: *The changing climate of Vanuatu/L'évolution du climat à Vanuatu, Learning about climate change the Pacific way/Etudier le changement climatique dans le contexte océanien, A visual guide/ Guide illustré*, 3 bigfala pepa, glu, pensel o maka

Vokabulari: Klaemet, jenis, efek, solwota, saeklon, antap, hot

Not blong Tija: Sapos skul blong yufala i stap long ples we ol efek blong klaemet jenis i stap long envaeromen blong yufala, karem ol studen oli go blong luk mo tokbaot wetem olgeta.



Talem long ol studen se long las lesen yumi bin ridim mo harem stori blong Pou mo Miri. Long storian ia i tokbaot fulap samting we yumi ol pipol oli stap mekem we i kontribut long klaemet jenis, sam aktiviti we yumi, ol pipol oli stap mekem we i mekem ol efek blong klaemet jenis i kam mowas mo sam wei we yumi save mekem blong katemdaon ol efek blong klaemet jenis long envaeromen we i stap afektem yumi tu.

Klaemet jenis i no hapen nomo long Vanuatu be long evri ples long wol be yumi long ol smolsmol aelan long Pasifik nao i stap fesem bigwan ol problem blong klaemet jenis.

Klaemet jenis olsem nem blong hem i talem; hem i wei we klaemet o weta blong yumi i jenis bigwan. Ol weta we yumi stap gat naoia olsem ol ren o san o hariken o win i nomo semak olsem we ol apu blong yumi bifo oli bin luk.

Tedei bae yu lukluk long ol efek blong klaemet jenis long envaeromen we i afektem yumi tu. Bae yumi lukluk long tri efek blong klaemet jenis. Leftemap wan piya mo tokbaot piya bifo yufala i go long narawan.

Serem ol studen oli go long tri grup mo givim wanwan piya long ol grup. Askem olgeta blong pestem long midel blong pepa. Ol studen oli raetem sam samting we efek ia bae i mekem long envaeromen. Ol studen oli raetem wan konsep map blong wanwan efek olsem hemia daon:



TEM 3



Sapos sam studen oli no wantem raet oli save droem pijsa blong talem tingting blong olgeta. Go raon long ol grup mo helpem olgeta. Sapos i gat taem yet ol studen oli save presentem ol wok blong olgeta blong ol nrafala fren oli save abaot efek we olgeta i wok long hem.

Opotuniti blong Asesmen

Ol studen long wanwan grup i droem wan konsep map blong wan efek blong klaemet jenis.

Lesen 6: Pefoming At (30 min)

Fokas blong Aktiviti: Aktem storian blong *Man Faol Blong Mi*

Ol Risos: Vanua Rida blong *Man Faol Blong Mi*

Vokabulari: Man, faol, drama

Ridim stori ia long ol studen mo askem long olgeta blong oli lisn gud. Jusum sam studen blong oli aktem stori o yu askem sapos eni studen i wantem volentia blong aktem stori. Yu gaedem ol studen taem oli stap aktem stori, bae yu ridim stori taem olgeta i stap aktem.

Opotuni blong Asesmen

Ol studen oli save aktem gud stori ia.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Havestem yam

Ol Risos: Pija blong nanggol (lan daeving)

Vokabulari: Havestem, yam, tolfala, taoa, kakae, Nakamal

Talem long ol studen se long ol aelan blong yumi, yumi gat ol spesel seremoni blong havestem yam, tedei yumi lukluk long hao ol man Saot Pentekos oli havestem yam. Long Saot Pentecost taem blong havestem yam blong olgeta hem i long manis blong Eprel mo long manis Jun evri yia.

Long taem ia oli mas jam long tolfala taoa (nanggol) we oli mekem long ol rop, long bilif blong olgeta se taem oli jam long taoa bae i mekem se taem oli havestem ol yam blong olgeta bae oli gat fulap yam. Afta we ol man oli jam long tolfala taoa ia, evriwan i go tugeta mo mekem bigfala lafet. Kakae ol yam mo ol nrafala kakae we oli redi long hem i stap long nakamal blong olgeta.

Askem ol studen blong oli storian long hao oli havestem yam long viley o komyuniti blong olgeta.

Opotuniti blong Asesmen

Ol studen oli save tokbaot ol wei blong havestem yam.

Lesen 10: Siviks mo Komyuniti Rilesensip B (30 min)

Fokas blong Aktiviti: Ol narafala helpa long komyuniti

Ol Risos: Jat blong ol komyuniti helpa (Apendiks X), envelop blong wanwan grup we i gat ol impoten wod blong wanem ol helpa ia oli mekem long wan komyuniti

Vokabulari: Narafala, helpa, mama blong 20vt, haosgel, bilda

Riviu long lesen blong Tem 2, Wik 9 bakegen. Go tru long ol helpa ia bageken wetem ol studen blong oli save tingbaot. Givim klia instraksen wanem wanwan grup i mas mekem. Oli karem ol envelop blong olgeta mo oli pestem ol wod long wan jat we oli labelem nem blong helpa blong olgeta long hem.

Wanwan grup i ridim ol wod blong olgeta afta oli pestem long jat blong olgeta. Oli mas lebelem jat blong olgeta. Oli mas save ridim ol wod ia. Finis wanwan grup i mas gat wan las toktok blong mekem abaot volentia blong olgeta long presentesen blong olgeta.

Opotuniti blong Asesmen

Grup wok presentesen.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32



Tem 3 – Wik 8



Lesen 1: Spirituel mo Karakta Divelopmen (30 min)

Fokas blong Aktiviti: Helpem ol man long nid

Ol Risos: Pija blong wan pesen i helpem wan we gat nid olsem kakae

Vokabulari: Hat, helpem, help, Kristin, papa God, fasin

Talem long ol studen se yumi ol man Vanuatu yumi gat hat we yumi save sori long narafala man we oli stap long nid. Yumi helpem olgeta we oli stap long nid, hem i wan gudfala samting yumi ol man Vanuatu i praod blong mekem mo hem i wan samting we yumi ol tru Kristin man blong Masta Jisas Kraes i stap mekem.

Masta Jisas Kraes i talem long tabu tok blong hem se sapos yumi wokbaot pasem wan man we hem i nidim help, yumi stap mekem fasin ia i go bak long Jisas.

Sapos yumi stap wosipim Papa God long spirit mo trut, bae yumi mas helpem eni man we i stap long nid. Hem i wan no gud fasin sapos yumi luk sam famle blong yumi oli no gat kakae be yumi no helpem olgeta. Long klasrum blong yumi, wan fren i no gat pensel be yu yu gat tu pensel, yu no wandem serem pensel, yu no wantem blong yu long fren blong yu. Yumi mas gat lav mo fasin blong helpem ol pipol we oli gat nid.

Yumi ol tru Kristin we yumi stap wosip long spirit mo trut, yumi sud stap lukluk blong helpem eni wan we i gat nid, yumi no stap tingting se sapos mi givimaot ol samting blong mi blong helpem man ia bae mi winim wanem long hem. Masta blong yumi i se yumi no mas gat ol kaen tingting olsem. Papa God i talem long tabu tok blong hem se mani blong yumi hem i blong hem, mo yumi stap lukaotem nomo blong hem, so yumi sud stap lukluk blong stap yusum mani ia long wan gudfala fasin blong helpem olgeta we oli stap long nid.

Askem ol studen ol kwesten ia:

- Hu i bin helpem wan man we gat nid finis?
- Man ia i gat wanem kaen nid?
- From wanem yu wandem helpem hem?
- Afta yu helpem hem wanem nao hem i talem o wanem nao hem i mekem?
-

Opotuniti blong Asesmen

Ol studen oli save from wanem oli helpem wan man we i gat nid.

Lesen 2: Pefoming At (30 min)

Fokas blong Aktiviti: Aktem stori blong *Yumi Kakae Popo long Lans*

OI Risos: Vanua Rida blong *Yumi Kakae Popo long Lans*

Ridim stori blong *Yumi Kakae Popo long Lans* long ol studen mo talem long olgeta blong mas lisun gud. Jusum sam studen blong oli aktem stori o yu askem sapos eni studen i wantem volentia blong aktem stori. Gaedem ol studen taem oli stap aktem storian, long taem yu stap ridim stori.

Opotuniti blong Asesmen: Oi studen oli save aktem gud stori ia.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Sefti (30 min)

Fokas blong Aktiviti: Laetning i denja

OI Risos: Wan pi ja blong laetning

Vokabulari: Tanda, laetning, denja, ren, foldaon

Talem long ol studen se laetning i kam oltaem wetem tanda. Tufala i kam semtaem be bae yumi luk laetning fastaem afta harem tanda afta. Long dei yumi no save luk gud laetning be bae yumi save harem tanda. So taem yumi harem tanda yumi mas go insaed long haos.

Plante taem taem yumi harem tanda be yumi gohed blong pleplei o stap aotsaed. Hemia i denjeras long yumi.

Yumi mas go insaed long wan bilding taem yumi luk se bae i gat laetning. Yumi mas tingbaot se sam bilding i no sef long taem blong laetning olsem ol smol selta blong kapa, lif kokonas o tapolin we saedsaed blong olgeta i open nomo, aotsaed long ol varanda blong haos, ol tent.

Yu save stap sef long taem blong laetning taem yu:

- Muvum ol aktiviti blong mekem aotsaed olsem pleplei o go long kamp o swim long reva o solwota i go long wan nara fala taem be i no long taem we i gat ren, tanda o laetning.
- Lukluk long skae blong luk se skae i dak o win i girap o yu harem tanda mo luk laetning. Taem yu luk ol saen ia yu no mas go aotsaed.
- Go long wan sef ples olsem insaed long wan bilding we i gat paep blong wota we i go insaed long graon, o go insaed long wan trak mo sarem windo blong hem.
- Stap farawei long ol samting we oli yusum elektri olsem aesbokis, elektrik fan, mo samfala moa.
- No swim long giaman ren o paep blong wota.



Askem ol studen blong droem wan bilding we i no sef long taem blong laetning long buk blong olgeta. Oli raetem wan sentens aninit long piya blong olgeta. Yu raetem stat blong sentens olsem hemia daon mo ol studen oli finisem sentens.

Sentens ia i save stat olsem: Long taem blong laetning bae mi

Opotuniti blong Asesmen

Ol studen oli droem wan selta we i no sef mo komplitim sentens we yu statem blong olgeta.

Lesen 5: Tekem plante kea long envaeromen blong yumi (45 min)

Fokas blong Aktiviti: Ol efek blong klaemet jenis i kam mowas

Ol Risos: Sam A5 saes pepa, maka, wan strong kad o pepa we yu raetem “Ol aktiviti blong ol pipol we oli mekem ol efek blong klaemet jenis i kam mowas”, *Posta 7: Interrelationships, Learning about climate change the Pacific way/Etudier le changement climatique dans le contexte oceanien, A visual guide/Guide illustre*

Vokabulari: Kontribut, klaemet, jenis, aktiviti, pipol

Tedei bae yumi lukluk mo tokbaot sam aktiviti we yumi, ol pipol oli stap mekem we i mekem ol efek blong klaemet jenis long envaeromen i kam mowas. Long storian blong *Pou mo Miri* i gat sam long ol aktiviti ia i stap long hem.

Askem: Hu i save talem ol aktiviti ia long storian ia?

Ol studen oli talem mo yu raetem long bod aninit long kad. Putum o holem i go antap blong evri studen i save luk.

Askem long ol studen: Wanem aktiviti long piya ia nao i stap mekem ol efek blong klaemet jenis i kam mowas?

Ol studen oli lukluk gud piya mo talem ol aktiviti we oli ting se i mekem ol efek blong klaemet jenis i kam mowas. Raetem ol aktiviti ia aninit long kad.

Putum kad blong “Ol efek blong klaemet jenis i kam mowas taem” long bod. Putum posta: 7 *Pasifika* long bod o holem blong evri wan i save luk.

Askem ol studen:

Wanem sam aktiviti long piya we yu ting se bae i mekem
ol ekfek blong klaemet jenis i kam mowas?

Ol studen oli lukluk gud piya mo talem ol aktiviti we oli luk mo yu raetem aninit long kad ia.

Ridim ol sentens mo askem ol studen oli ridim bihaen long yu. Askem wanwan studen blong jusum wan aktiviti mo droem pijsa blong hem long buk blong olgeta.

Opotuniti blong Asesmen

Luk se ol studen oli kopi ol sentens we yu raelem long bod i go long buk blong olgeta.

Lesen 6: Pefoming At (30 min)

Fokas blong Aktiviti: Aktem stori blong *Abu Kalua wetem Bigfala Blak Snek*

Ol Risos: Vanua Rida *Abu Kalua wetem Bigfala Blak Snek*

Vokabulari: Ol wod long stori ia.

Ridim stori blong *Abu Kalua wetem Bigfala Blak Snek* long ol studen mo askem long olgeta blong oli lisn gud. Jusum sam studen we bae oli aktem storian o askem sapos eni studen i wantem volentia blong aktem stori. Gaedem ol studen taem oli stap aktem storian, mo ridim storian taem oli stap aktem.

Opotuniti blong Asesmen

Ol studen oli aktem gud stori ia.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Planem yam


Ol Risos: Ol pijsa blong planem yam, tekem ol studen oli go long wan garen blong yam

Vokabulari: Planem, yam, kolkol, kakae, digim, hol

Infomesen blong tija

Long ol aelan blong yumi, yumi gat ol spesel fasin blong planem yam. Sam pipol bifo oli planem yam i gat ol rul we oli mas foolem kasem long dei we oli planem yam. Oli no mas kakae kolkol kakae o kakae blong yestedei, mo no mas swim long solwota, no kakae ol kakae long solwata mo no mas putum oel, krim, senta long bodi blong olgeta.

Taem blong go planem yam yumi mas kakae hot kakae. Taem blong go plan, man we i digim hol bae i mas yusum lokol sped o wud blong digim hol blong yam. Naoia i no semak yumi stap yusum sped blong digim hol blong yam. Taem yumi planem yam finis, evriwan i kam tugeta yumi kakae laplap long ol haf blong ol yam we oli go planem mo talem tangkiu long ol man we oli kam helpem yumi blong



**TEM
3**



planem yam.

Yam hem i wan krop we hem i nidim plante kea, mo i wan had wok blong klinim bus blong planem yam, yumi mas bonem ol doti, redi long graon o digim graon mekem i sofsof, ol fasin blong planem yam. Taem yumi planem yam finis bae yumi mas redi blong stap pulumaot ol doti gras long garen kasem taem ol yam oli redi blong yumi havestem.

Yumi komperem yam wetem ol nara krop, yam hem i nidim mo taem mo hadwok. Yam hem i wan spesel krop long man Vanuatu, hem i pat long sam bilif mo ol praktis olsem nangol long Pentekos.

Ol pipol oli laekem tumas yam from hem i tes gud, mo long taem blong wan lafet yam nao i mekem se wan lafet i kam sakeses. Yam i help tu long fud sikuriti long bifo, from taem oli havestem yam, oli putum sam i stap long wan smol haos kasem taem mo tu taem ol impoten visita oli kam long ples blong yumi.

Askem ol studen se oli save talem hao oli planem yam long ples blong olgeta, mekem wan jat long ol defren wei blong planem yam.

Opotuniti blong Asesmen

Ol studen oli talem ol rul blong planem yam.

Lesen 10: Siviks mo Komyuniti Rilesensip A (45 min)

Fokas blong Aktiviti: Ol wok long haos

Ol Risos: Ol smol foto blong ol memba blong famle blong olgeta o droem piya blong olgeta sapos oli nogat foto, A4 pepa

Vokabulari: Wok, papa, mama, sista, brata, mi

Long lesen blong tedei, askem ol studen blong talem wanem ves blong Nasenol Antem nao i tokbaot ol defren wok we yumi mekem long ol aelan blong yumi. Askem wanwan blong talem wan wok we oli faenem long ol aelan blong yumi.

Givim wan A4 saes pepa long olgeta evriwan. Askem blong oli raetem nem blong ol memba blong famle we oli silip long wan haos mo talem wanem wok nao oli stap mekem evri dei long haos.

Eksampol: Apu Kapere

Talem long mi blong skul gud evri dei.

Talem ol storian blong bifo taem mi redi blong silip.

Afta oli pestem pi ja blong olgeta o droem olgeta mo raetem wanem nao wok blong olgeta evri dei. Askem olgeta blong talem wanem olgeta wanwan oli stap mekem evridei long haos.

Kolektem ol pepa blong olgeta, makem mo putum i go antap long wol.


Askem ol studen: Sapos yumi evriwan i wantem mekem wan wok nomo, wanem bae i happen?

Opotuniti blong Asesmen

Ol studen oli soem mo talem wanem wanwan long olgeta i stap mekem evridei long haos.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32



TEM 3



Tem 3 – Wik 9



Lesen 1: Spirituel mo Karakta Divelopmen (30 min)

Fokas blong Aktiviti: Krismas Dei

Ol Risos: Sam pijs blong Kristmas

Vokabulari: Krismas, Fata krismas, presen, Disemba, flasem, balun, krimas tri, krismas laet

Disemba 25 hem i wan bigfala dei blong ol famle mo ol fren blong oli save stap tugeta blong selebretem taem Masta Jisas Kraes i bon. Long dei ia ol famle oli mekem bigfala lafet, ol papa mo mama oli pem ol Kristmas tri, balun, ol Kristmas laet afta oli flasem ol Kristmas tri. Ol papa mo mama oli pem ol presen blong ol pikinini, famle, fren mo putum ol presen ia long Kristmas tri. Long dei ia Fata Krismas tu i stap blong givim presen blong ol pikinini.

Sam famle oli no pem Kristmas tri long stoa be oli katem branj blong ol tri long bus afta oli kam flasem wetem ol flawa mo hangem ol presen long hem. Samfala ples oli no flasem wan wud blong putum ol presen long hem be oli tekem presen nomo afta oli go givim stret long ol famle. Long Kristmas dei evriwan long famle oli glad from oli gat wan presen.

Be from wanem krismas hem i impoten long fulap man tedei ? Yumi selebretem Kristmas from hem i wan event we ol Kristin oli selebretem dei wei Masta Jisas Kraes i bon long hem. Evri Kristin man long wol oli selebretem 25 Disemba.

Talem storian blong taem Jisas i Bon mo askem ol studen blong oli mekem drama long storian ia.

Opotuniti blong Asesmen

Ol studen oli save from wanem oli selebret long 25 Disemba.

Lesen 2: Pefoming At (30 min)

Fokas blong Aktiviti: Mekem drama long singsing blong *Jisas i Bon*

Ol Risos: Jat blong singsing (luk **Apendiks 21**)

Vokabulari: Jisas, bon, Kristmas, dei, bokis

Singsing ia i gat faev ves ia, be long wik 9 bae yu fala i singsing mo yu mekem ol studen oli aktem namba 1 mo 2 pat nomo.

Opotuniti blong Asesmen

Ol studen oli save aktem namba 1 mo namba 2 pat.

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Helti individuel mo Komyuniti (30 min)

Fokas blong Aktiviti: Ol sefti praktis; wanem blong mekem

Ol Risos: Emti plastik bag, wan plet kakae blong yestedei, bokis blong masis, naef, plet o kap we i brok, pija blong wan pikinini we i klaem

Vokabulari: Bon, posen, foldaon, blokem, win, elektrik, sok

Putum ol risos we yu karem long wan tebol long fored blong klas.

Askem ol studen:

Hu i save talem wan rul we papa o mama blong hem
i talem long hem evri taem blong hem i no kasem kil?

Ol studen oli talemaot ol wei o praktis we papa mo mama blong olgeta i talem o rimaendem olgeta long hem blong oli no kasem problem o aksiden taem oli stap long haos.

Soem ol samting mo talem se i gat sam samting we i save kosem kil long yu sapos yu pleplei wetem. Leftemap wan aetem long tebol mo askem hao wan pikinini i save kasem kil long aetem ia. Eksampol, yu pikimap bokis blong masis. Ol studen oli tokbaot ol wei we wan smol bokis blong masis i save mekem taem oli pleplei wetem.

Leftemap wanwan aetem long tebol mo ol studen oli talem wanem ia. Lisen mo helpem ol studen long toktok. Afta putum daon ol tingting long wan tebol olsem hemia daon.

Ol kat	Bon	Posen	Foldaon	Blokem win	Elektrik sok
Lukaot long naef, akis, botel, klas, plet we i brok	No pleplei long faea we i laet. No pleplei wetem masis	No kakae kakae blong hamas dei we i pas	No klaem long ol tri o olbaot long haos	No pusum hed insaed long plastik bag	No tajem ol rop o ples blong onem paoa wetem han we i wetwet

Askem ol studen: Sapos wan aksiden i hapen long yu o wan brata o sista, wanem nao bae yu mekem?

Praktis wetem ol studen bifo yu serem ol narafala situesen aninit long olgeta blong olgeta i storian long wanem bae oli mekem.



Wan asiden	Wanem bae yu mekem
Smol sista blong yu i katem han blong hem wetem smol naef.	<p>Singaot long help olsem ol peren blong olgeta o wan neiba klosap.</p> <p>Stopem blad; fasem han long wan klin kaliko. Putum wandei lif mo fasem wetem kaliko.</p> <p>Mas save namba blong mama o papa blong yu sapos tufala i wok.</p> <p>Tekem hem i go long klinik sapos i gat wan klosap long yufala.</p>

Bae ol studen oli wok tutu. Serem ol poen daon i go long ol studen:

- Wan brata i klaem tri mo foldaon i kam daon.
- Wan smol sista i putum plastik bag long hed blong hem.
- Yu stanap long wan brok glas taem yufala i stap plei futbol.
- Yu kakae bred blong fo dei i pas mo bel blong yu i so.
- Wan brata i pleplei wetem stik faea afta i bonem han blong hem.
- Wan smol gel i stap pleplei wetem masis.
- Smol sista blong yu i swim finis i kam blong ofem laet.

Ol studen oli toktok long poen blong olgeta blong smol taem. Askem wanwan i talem wanem bae oli mekem long situesen olsem. Ol impoten samting we ol studen oli mas save hem i mobael namba blong papa mo mama blong olgeta, wan neiba we i save help, wan viley dokta o nes klosap long yu, mo singaot help fastaem biffo yu mekem wan samting.

Opotuniti blong Asesmen

Ol studen oli save ol rul we papa mo mama i givim long olgeta taem oli stap olgeta nomo long haos.

Lesen 5: Tekem plante kea long envaeromen blong yumi (45 min)

Fokas blong Aktiviti: Mekem mo No Mekem

Ol Risos: Ol sentens we yu raetem long ol pis pepa, fo envelop, fo kad we yu raetem “Mekem” long hem mo fo kad we yu raetem “No mekem” long hem, ol sentens we yu raetem long bod o wan bigfala pepa.

Vokabulari: No, mekem, plastik, kokonas, pandanas, sola, laet

Not blong Tija: Sapos yu save faenem ol piya we i stret blong yusum long ples blong ol sentens bae i moa gud.

Putum ol sentens ia long fo defren envelop. Putum ol semak sentens long ol envelop. Yu save

jusum sam nomo wetem ol studen blong yu:

- Planem bak ol natongtong
- Katemdaon ol natongtong
- Mekem garen long ol saed blong hil
- Planem ol tri long ol saed blong hil
- Putum kompos long ol garen blong kakae
- Yusum ol meresin blong stoa blong kilim ol insek long garen
- Mekem ol bed blong planem ol vejtebol i silip krosem ol saed blong hil
- Mekem ol bed blong planem ol vejtebol i silip folet saed blong hil
- Planem ol plan we i ronemaot ol insek long garen
- Wokbaot i go long skul
- Go long skul long trak
- Yusum longfala net blong kasem fis
- Yusum ol raon net blong kasem fis
- Katemdaon fulap tri
- Planem bak ol tri
- Yusum ol meresin blong stoa blong mekem ol kakae long garen i gru gud
- Kakae lokol kakae
- Kakae ol kakae blong stoa
- Yusum ol basket blong lif pandanas mo kokonas taem yu go long stoa o maket
- Yusum ol plastik bag taem yu go long stoa o maket
- Yusum ol sola laet
- Yusum ol laet we i yusum batri

Talem long ol studen se i gat sam samting we i waes blong yumi mekem we i helpem envaeromen mo laef blong yumi tu. Mo i gat sam samting we i no waes blong yumi mekem from bae i spolem envaeromen mo laef blong yumi tu. Ol aktiviti we i no waes i helpem klaemet jenis o mekem ol efek blong klaemet jenis i kam mowas.

Serem ol studen oli go long fo grup. Givim wan envelop, wan kad blong "Mekem" mo wan kad blong "No mekem" long wanwan grup. Ol studen bae oli putum ol sentens we i waes blong mekem aninit long kad blong mekem mo ol sentens we i no waes blong mekem long no mekem. Taem oli finis jekem se ol sentens oli stap long ol stret ples wetem ol studen. Ridim wanwan sentens mo askem ol studen se sentens ia i stap long wanem taetol; "mekem" o "no mekem". Taem oli finisim evri sentens oli ridim afta yu.

Opotuniti blong Asesmen

Luk se ol studen long wanwan grup i putum ol sentens long stret taetol.



Lesen 6: Pefoming At (30 min)

Fokas blong Aktiviti: Mekem drama long singsing blong *Jisas i Bon*

Ol Risos: Jat blong singsing blong *Jisas i Bon* (luk **Apendiks 21**)

Vokabulari: Ol wod blong singsing ia

Askem ol studen blong oli singim tri mo fo ves , mo helpem ol studen blong oli aktem wanem we i stap long ves tri mo fo.

Opotuniti blong Asesmen

Ol studen oli save aktem namba tri mo fo ves blong singsing ia.

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Nalot bredfrut, taro o maniok

Ol Risos: Ol pijs blong nalot

Vokabulari: Nalot, taro, bredfrut, maniok, skinim, boelem, wuden plet, sperem

Infomesen blong Tija

Nalot hem i wan kastom kakae blong samfala aelan blong yumi. Sam aelan oli valiuim nalot tumas, oli stap mekem nalot long ol taem we ol visita oli kam long viley o komyuniti blong olgeta. Oli mekem nalot long ol spesel seremoni olsem wan betdei blong wan pikinini, oli sekomsaesem wan pikinini boe, mared, mo oli mekem nalot blong kakae long nomol taem blong kakae.

Nalot taro nao ol man oli valium tumas long ol spesel seremoni. Nalot bredfrut mo maniok oli stap mekem long ol evridei kakae be taro nao oli valium tumas.

Hao oli mekem nalot taro, oli tekem aot skin blong hem mo boelem long sospen gogo i tan, afta oli tekem aot putum long wan klin dis, afta oli kapsaetem i go long wuden plet blong hem, mo oli sperem wetem wan spesel stik blong hem. Oli sperem kasem taem taro i kam lastik. Afta oli mekem i kam smut gud mo putum melek kokonas long hem mo oli kakae.

Bredfrut nalot oli mekem semak olsem taro be oli rusum bredfrut, taem i tan oli tekem aot blak skin blong hem mo katem mo oli tekem aot sid blong hem, mo putum i go long wud blong nalot. I gat wan spesel wud blong mekem nalot bredfrut, afta oli tekem frut blong kokonas mo faetem bredfrut antap long wud ia. Oli faetem gogo kasem bredfrut i sofsof mo i lastik, afta oli mekem i smut gud mo oli melekem gud mo katem. Naoia hem i redi blong kakae.

Askem ol studen blong yufala i mekem nalot long skul blong yufala.

Opotuniti blong Asesmen

Ol studen oli save hao blong mekem nalot.

Lesen 10: Siviks mo Komyuniti Rilesensip B (30 min)

Fokas blong Aktiviti: Fas Praem Minista blong Vanuatu

Ol Risos: Foto blong foma praem minista let Fata Walter **Hayde Lini** (Apendiks X)

Vokabulari: Fata, Walter, Lini, praem, minista, foma

Wetem help blong foto, tokbaot hao man ia i help blong kontribut long laef blong nesen blong yumi Vanuatu.

Mekem wan faev minit toktok long ol studen blong oli luksave strong tingting we let Father Walter Hayde Lini i gat blong save mekem ol lida oli kamwan ples blong toktok mo faet from Indipendens blong yumi we naoia yumi wan fri nesen mo yumi stap rulum nesen blong yumi.

Opotuniti blong Asesmen

Wanwan studen i kalarem pi ja blong fes praem minista blong Vanuatu mo pestem i go long Siviks eksasaes buk blong olgeta. Raetem toktok ia aninit.

Papa blong Vanuatu. Tangkiu tumas long wok blong yu.

Lesen 11: Visuel At (30 min) Jusum wan aktiviti long pej 33-36

Lesen 12: Muvmen mo Gem (20 min) Jusum wan aktiviti long pej 27-32



Tem 3 – Wik 10



Lesen 1: Spirituel mo Karakta Divelopmen (30 min)

Fokas blong Aktiviti: Tanksgiving long Niu Yia

Ol Risos: Sam stori o foto o piya blong wan Tanksgiving seves

Vokabulari: Tanksgiving, Januare, yam, digim, kakae

Long evri yia long manis Januare sam relijen blong yumi oli stap gat wan ivent long ol jos blong olgeta blong taem tangkiu long Masta Jisas Kraes. Dei ia oli singaotem hem i tanksgiving Sande. Long taem ia oli mekem lafet long taem blong digim yam. Long dei blong Tanksgiving ol jos memba oli kam wetem ol yam blong olgeta sapos olgeta we oli no gat yam oli save tekem eni kakae blong olgeta long garen, olsem banana, aelan kabis, taro Fiji, wota taro, aranis, kumala mo ol nrafala kakae. Taem oli tekem ol kakae i kam oli go putum long fored.

Pasta i mekem semon blong hem folet topik ia Tanksgiving pasta i prea ova long ol kakae ia. Afta long semon oli kam aotsaed, ol dikon oli salem ol kakae, sam long ol kakae ia mo oli serem i go long pasta we i mekem seves blong tanksgiving. Ol nrafala kakae oli salem mo mane blong hem i go long offering blong Thanksgiving Sande.

Opotuniti blong Asesmen

Ol studen oli save from wanem oli mekem Tanksgiving seves.

Lesen 2: Pefoming At (30 min)

Fokas blong Aktiviti: Mekem drama long singsing blong *Jisas i Bon*

Ol Risos: Jat blong singsing blong *Jisas i Bon*

Vokabulari: Sam wod long singsing ia

Yu mo ol studen oli singim evri ves blong ol singsing ia, mo helpem ol studen blong aktem gud singsing ia.

Opotuniti blong Asesmen

Ol studen oli save aktem gud singsing

Lesen 3: Muvmen mo Gem (20 min) Jusum wan aktiviti long pej 27-32

Lesen 4: Sefti (30 min)

Fokas blong Aktiviti: Ol flawa we oli gat posen

Ol Risos: Ol flawa o plan we i stap long pijsa daon.

Vokabulari: Sik, ded, posen, plan, flawa

Not blong Tija: Sapos ol plan ia i stap klosap long klasrum blong yu, yu save tekem ol studen oli go blong oli lukluk gud ol plan ia o yu save karem flawa o lif blong hem i kam long skul sapos i no gat klosap long skul

Tri long ol plant aninit, ol mama blong yumi oli stap planem olsem flawa blong mekem aotsaed long ol haos blong yumi blong mekem eria blong haos blong yumi i naes o oli planem long kontena mo putum insaad long haos blong mekem insaad long haos i naes. Samtaem oli katem ol flawa blong ol plan ia mo putum insaad long jos.

Wan long ol plan ia ol mama blong yumi oli stap yusum lif blong hem blong kavremap ston blong laplap long hem.

Ol plant ia sapos yumi kakae ol flawa o sid o lif o branj blong olgeta i save mekem yumi sik bigwan mo i save mekem yumi ded tu.




Bel flawa Ol yelo flawa ia i naes tumas be wota blong flawa o lif o eni pat blong flawa i posen mo i save kilim yumi ded sapos yumi kakae.	Kasrael Ol lif blong plant ia yumi yusum blong kavremap ston blong laplap be sid blong hem i posen. Sapos yu kakae sid blong hem bae yu sik bigwan.	Flamingo Ol flawa blong plan oli naes tumas be evri pat blong plan ia i posen. Sapos yumi kakae, waet wota blong hem i save mekem yumi sik bigwan.
---	--	--


Askem ol studen blong droem wan long olgeta plant ia long buk blong olgeta. Oli save droem nomo lif o flawa blong plant ia sapos oli wantem mo oli raetem nem blong plant long lanwis blong olgeta o nem we oli yusum taem oli stap tokbaot plant ia.

Opotuniti blong Asesmen

Ol studen oli lukluk gud long ol plant ia mo droem plant ia o flawa o lif nomo long buk blong olgeta.



TEM
3



Lesen 5: Tekem plante kea long envaeromen blong yumi (45min)

Fokas blong Aktiviti: Yus blong natongtong

Ol Risos: Wan pi ja blong natongtong olsem hemia daon

Vokabulari: Natongtong, sofmad, rus, branj, flawa

Not blong Tija: Sapos yu stap klosap long solwota, yu save karem ol studen oli go long solwota mo tokbaot yus blong natongtong long olgeta. Mekem olgeta i planem ol sid o frut blong natongtong olsem aktiviti blong olgeta.

Putum wan pi ja blong natongtong antap long bod.

Talem long ol studen se natongtong i wan impoten plan tumas we i gru long sam long ol solwota blong yumi. Hem i gat bigfala yus blong hem. Naoia we klaemet jenis i stap afektem klosap evri aelan blong yumi natongtong hem i wan impoten plan.

Tokbaot ol yus blong natongtong ia:

- Ol rus i ples we oli fis mo ol narafala anamol blong solwota i bonem ol eg o bebe blong olgeta.
 - Ol frut i kakae blong ol pipol.
 - Ol rus i protektem ol so blong yumi long ol bigfala waev long taem blong hariken.
- Ol rus i holem taet ol sofmat we ren i wasem i kamdaon we i save kilim ol smolsmol korel.
- Ol lif mo branj i haos blong ol pijin, mo ol insek.
- Ol lif i foldaon mo kam kakae blong ol fis.
- Ol rus i holem taet ol graon o sanbij blong solwota i no wasemaot.
- Ol rus i haos blong fulap fis, krab mo sel blong solwota.
- Ol frut i foldaon mo gru bakegen

Opotuniti blong Asesmen

Ol studen oli droem wan tri blong natongtong long buk blong olgeta mo raetem ol yus blong ol pat blong natongtong.



Lesen 6: Pefoming At (20 min)

Fokas blong Aktiviti: Krismas plei blong taem Jisas i Bon

OI Risos: Baebol stori o DVD blong taem Jisas i Bon

Vokabulari: Ples, buluk, anamol, Betlehem, Mary, Josef

Ridim stori blong Jisas taem i bon long ol studen mo askem olgeta blong oli lisen gud. Mekem ol studen oli mekem wan Krismas pleplei we i tokbaot taem Jisas i Bon.

Opotuniti blong Asesmen

Ol studen oli save aktem storian blong Jisas taem hem i bon

Lesen 7: Visuel At (30 min) Jusum wan aktiviti long pej 33-36

Lesen 8: Muvmen mo Gem (20 min) Jusum wan aktiviti long pej 27-32

Lesen 9: Kaljoral Heritej mo Aedentiti (30 min)

Fokas blong Aktiviti: Laplap sosor

OI Risos: Pija blong laplap sosor, melekem, gredem, aelan, kakae

Vokabulari: Laplap, sosor, kakae, mit, fis, faol, maniok

Not blong Tija: Yu save invaetem wan mama blong Malekula i kam helpem yu blong mekem laplap sosor wetem ol studen.

Infomesen blong Tija

Laplap sosor hem i wan spesel laplap blong sam pipol blong Malekula, laplap ia sam pat blong Malekula nomo i stap mekem. Laplap sosor oli valiu long hem tumas, from oli yusum long evridei kakae blong olgeta mo oli stap yusum tu long ol seremoni mo long ol iven.

Naoia laplap sosor hem i kam popula tu long sam aelan blong yumi long Vanuatu. Laplap sosor oli stap mekem long yam mo banana nomo be nao ia sam man oli stap yusum maniok blong mekem laplap sosor long hem. Laplap sosor oli mekem olsem ol narafala laplap nomo be insted oli putum lif nalalas mo mit long medel mo ston long medel blong laplap.

Laplap sosor yu save yusum faol, buluk, fis mo eni mit yu wantem putum i go long medel blong laplap blong yu. Long Malekula oli gat tu wei blong mekem laplap sosor, long Saot Malekula oli putum lif laplap long medel blong laplap afta oli jas stap putum ston, mit, lif nalalas, anian mo oli melekem.

Long narafala pat long Malekula oli putum ol ingridien ia i go stret insaed long laplap nomo, taem laplap i tan oli tekemaot ston mo melek i go long medel. Yumi sidaon raon long laplap taem yumi kakae mo yumi brekem smolsmol pis blong laplap afta yumi putum i go insaed long melek kokonas afta yumi kakae.



Wetem help blong yu, yu mo ol studen olimekem wan laplap sosor long skul.

Opotuniti blong Asesmen

Ol studen oli luk hao oli mekem laplap sosor.

Lesen 10: Siviks mo Komyuniti Rilesensip A (45min)

Fokas blong Aktiviti: Ol wok long komyuniti

OI Risos: Pija blong ol memba blong famle blong famle blong olgeta o oli droem ol pija blong olgeta. A4 saes pepa

Vokabulari: Jif, elda, dokta, nes, gadena, haosgel

Givim wanwan pi ja we i soem ol memba blong famle oli stap mekem ol defren wok long hom. Askem olgeta blong lukluk pi ja blong olgeta mo soem long klas. Afta oli talem hu nao i stap mekem.

Afta long hemia, talemaot long olgeta se te dei bae klas i lukluk long ol wok blong ol memba blong famle we oli mekem long komyuniti.

Eksampol	Papa hem i:	- dikon blong jos - fiksim ol lonmoa long vilej	- memba blong kaonsel - tija
-----------------	-------------	--	---------------------------------

Givim wanwan A4 saes pepa long ol studen. Askem wanwan studen blong jusum wan memba blong famle blong hem mo droem pijsa blng hem mo raetem wanem wok hem i mekem long komyuniti blong olgeta. Afta olgeta i raetem wanem wok olgeta i mekem long komyuniti blong olgeta. Bae oli presentem wok blong olgeta olsem hemia antap.

Taem oli finis oli tokbaot ol wok blong memba blong famle blong olgeta mo ol wok we olgeta i mekem long komyuniti blong olgeta long evriwan long klas.

Askem ol studen:

Yu ting se ol wok we _____ (memba blong famle) i mekem long komyuniti oli impoten o nogat?

Yu ting se ol wok we yu mekem long komyuniti i impoten o nogat?

From wanem oli impoten?


Opotuniti blong Asesmen

Ol studen oli raetem ol wok we memba blong famle mo hem imekem long komyuniti blong olgeta.

Lesen 11: Visuel At (30 min) Jusum wan aktiviti long pej 33-36


Lesen 12: Muvmen mo Gem (20 min) Jusum wan aktiviti long pej 27-32

APENDIKS



APENDIKS 1 :

Kad blong Womap mo Womdaon





APENDIKS 2:

Saen ia i talem wanem ?


NO SAKEM DOTI OLBAOT





APENDIKS 3 : Kad blong bit

Bit 1



Bit 2






Bit 3





APENDIKS 4:

Hu i save talem ol pija oli soem wanem relijes ivent?





Ol nem:

- 1 Krismas, birth of Jesus
- 2 Resurrection
- 3 Ascension
- 4 Easter
- 5 Palm Sunday








APENDIKS 5:

Raetem ol namba blong ol nem blong instramen
long smol bokis klosap long pijs.



Ol nem:


1. Gita
2. Yukalele
3. Dram
4. Bonggo
5. Seka
6. Busbes
7. Elektrik gita
8. Kibod






APENDIKS 6:

Tufala pi ja i soem wanem?




Klasrum K



Klasrum L



APENDIKS 7: Hu ia man ia ?





APENDIKS 8:

Wan impoten pesen long laef blong mi...



1. Nem blong hem i
2. Hem i blong mi.
3. Hem i impoten pesen long laef blong mi from :
 - a.
 -
 - b.
 -



APENDIKS 9:

Kot blong Am blong Vanuatu




APENDIKS 10:


OL WOK LONG KLASRUM

Maurice Doa Dog Holem doa taem ol studen i kam insaed mo go aotsaed	David Doti kontrol king Sakem ol doti long stret ples	John Alan Lanj Liset Kolektem mani mo nem mo givim long kijin	Raela Buk Bataflae Kipim ol buk blong riding stret
Sophie Florida Toelet Totel Mekemsua se ol studen oli go long toelet wanwan	Leisel Simon Plant Bos Mekemsua se ol plant oli gat wota	Paul Vivid Klasrum Klina Mekemsua se klasrum i nit mo klin mo ol grup i brum insaed long klasrum.	Makai Sophie Leisava Helpem Han Helpem tija eni taem we tija i nidim.
Julie Henry Pepa Pesen Givimaot pepa long ol klas	Johanna Pensel Pijin Mekemsua se evriwan i gat sap pensel	Firi Arlyne Fren flae- ngfokis Talem long ol fren we oli absen wanem ol i bin mestem	Aghes Paoa Puskat Ofem ol laet taem skul i finis

APENDIKS 11a:
Ol pat blong bodi



APENDIKS 11b:
Ol pat blong yumi insaed





APENDIKS 12 :

No Mekem Olsem Mi

Wan Satedei moning, i gat wan papa mo smol boe blong hem, tufala i stap klinim garen blong yam blong olgeta. Tufala i wok gogo kasem lanstaem mo san naoia i strong tumas blong wok.

Afta papa i talem long smol boe, “Boe blong mi, yu bin wok had tumas blong helpem mi blong klinim garen blong yumi. Kam! Yumitu go spel aninit long tri blong Namambe long we.”

Taem tufala i sidaon gud, papa i givim wan grin kokonas long boe blong hem blong drink wota blong hem. Papa i karemaot smol botel blong wota we hem i karem long haos i kam mo drink smol wota.

Afta hem i karemaot stik tabak blong hem long basket blong hem mo laetem mo i stap smok. Smol boe i finisim wota blong kokonas blong hem afta i stap lukluk papa blong hem.

Papa blong hem i luk se boe blong hem i stap lukluk hem, afta i talem long hem se, “Boe blong mi, taem yu kam bigwan, mi no wantem yu smok olsem mi.”



Smol boe i askem se, “From wanem yu no wantem mi smok olsem yu?”

Papa blong hem i talem hem se, “Smok blong stik tabak i nogud long bodi blong yu. I save mekem yu kof tumas mo i save mekem yu kasem kansa long lang we i save kilim yu ded.”

Smol boe i askem long papa blong hem se, “Be from wanem yu stap gohed blong smok yet?”

APENDIKS 13:

Ol samting we i save mekem
WAN TAEDOL WAEV





APENDIKS 14 : Ol raet blong ol pikinini



Raet blong



Raet blong



Raet blong



Raet blong



Raet blong



Raet blong
mo



APENDIKS 15 :

Ol Polis





APENDIKS 16 :

Hao blong mekem

GLU LONG FLAOA

WANEM YU NIDIM

- 1/2 kap blong flaoa
- 1 kap blong wota
- 3/4 tispun sol
- 1 tispun oel blong kuk

OL TUL WE YU NIDIM

- Wan smol bolglas
- Wan tispun
- Wan spun blong sup
- Wan sospen
- Masis
- Faeawud











OLSEM WANEM BLONG MEKEM

1. Laetem faea.
2. Kapsaetem 1/2 wota long kap i go long sospen mo putum sospen long faea.
3. Makemaot flaoa mo sol i go long wan bolglas.
4. Kapsaetem narafala 1/2 wota long kap i go insaed long bolglas mo miksim gud wetem tispun.
5. Taem wota long sospen i boel, kapsaetem flaoa miksja long bolglas i go insaed long sospen mo miksim gud wetem tispun.
6. Taem flaoa glu ia i kam tik, adem sol mo oel i go mo miksim gud.
7. Karemaot long faea mo lego i stap blong i kolkol bifo yu save yusum.



APENDIKS 17 :


Ol lokol kakae





APENDIKS 18 : Ol helpa long komyuniti

Tija



Dokta



Bilda



Mama blong 20 vt



Haosgel



Gadena



Polis ofisa




Polis blong jif



Koj



Faol fama




Stokipa





APENDIKS 19 :

Hao yumi stap yusum wota



WOTA HEM I IMPOTEN TUMAS



Raetem gud long leta blong ol wod we oli stap andanit long spes antap.

1. Bitim haf blong blong yumi hem i wota nomo.
(obdi)
2. Mi mo yu i no save laef wetaotem bitim wan wik.
(taow)
3. Ol mo tu oli nidim wota blong laef.
(tnapl) (lanaom)
4. Yumi yusum wota blong , kuk,
(krind) (smiw)
mo blong mekem fulap narafala samting moa.



APENDIKS 20 :

Mekem ol trap blong kasem faol o pijin o fis o crab





APENDIKS 21 :

Ol singsing

Hoki Poki

Yu putum raet han insaed, yu putum raet han aotsaed,
Yu putum raet han insaed nao yu sekem olbaot.
Yu mekem Hoki Poki mo yu tanem raon, hemia nao olsem.
O Hoki Poki, o Hoki Poki, o Hoki Poki, hemia nao olsem.

Yu putum lef han insaed, yu putum lef han aotsaed,
Yu putum lef han insaed nao yu sekem olbaot
Yu mekem Hoki Poki mo yu tanem raon, hemia nao olsem.
O Hoki Poki, o Hoki Poki, o Hoki Poki, hemia nao olsem.

Yu putum raet leg insaed...
Yu putum lef leg insaed...
Yu putum raet solda insaed...
Yu putum lef solda insaed...
Yu putum raet hip insaed...
Yu putum lef hip insaed...
Yu putum ful bodi insaed...

O. B. E I

O.B. E. I
Obei long papa
O. B. E. I
Obei long mama
Obei gud evri dei
I mekem oli glad tumas
O. B. E. I
I mekem yu stap sef



APENDIKS 21 :

Piknik Ku

Piknik Ku Piknik Ku

Yumi go long piknik ku

Piknik Ku Piknik Ku

Yumi go long piknik ku

Luk luk reva

Luk solwota

Bae yumi fren

Bae yumi fren

Bae yumi gudfala fren

Malampa Eksesaes

Tufala JOCV volentia we oli bin stap long Lakatoro, Malekula, Ms Shisato Yamada (spot tija) mo Ms Yumi (muisik tija) tufala nao i bin komposem singsing ia. Singsing ia i yusum tiun blong Do Re Mi singsing:

Ni, mi benem ni blong mi

Stretem leg blong mi

Tajem graon mo luk bihaen

Tanem bodi blong mi

Tanem solda blong mi

Tanem han blong mi

Tan ris mo ankel

Tanem nek blong mi

(Ripitim 1 mo taem)

M (M) A (A) LAMPA MALAMPA

M (M) A (A) LAMPA MALAMPA

Ol Aksen:

M=Talem M mo mekem leta M wetem bodi

A=talem A mo mekem leta A wetem bodi

LAMPA = talem ol leta mo klapem han



APENDIKS 21 :

Malampa Strejing

Stretem han blong mi
Stretem saed blong mi
Wansaed han i go narasaed
Joenem han blong biaen
Karem leg biaen
Karem leg fored
Stretem wansaed leg
Pulum win blong mi
(Ripitim 1 mo taem)

Nasonal Antem blong Vanuatu

Yumi, Yumi, Yumi
(kores)
Yumi, Yumi, Yumi i glad blong talem se
Yumi, Yumi, Yumi i man blong Vanuatu!

God i givim ples ia long yumi
Yumi glat tumas long hem
Yumi strong mo yumi fri long hem
Yumi brata evriwan!
(kores)

Plante fasin blong bifo i stap
Plante fasin blong tedei
Be yumi i olsem wan nomo
Hemia fasin blong yumi!
(kores)

Yumi save plante wok i stap
Long ol aelan blong yumi
God i helpem yumi evriwan
Hem i papa blong yumi
(kores)



APENDIKS 21 :

Hanggri Namarae

(tun olsem Hanggri gorila)

Hanggri Hanggri Namarae

Hem i kakae nalumlum

Swim aninit long reva

Hem i kakae nalumlum

Swish, swish, swish, swish, swish

(makem hao namarae i muv long wota)

Gudfala kakae we

(mekem “tams up” or rabem bel)

Not: yu save jenisim “namarae” i go long “nawimba”

o eni nrafala anamol we i gat semak silebol long nem blong hem.

Hed, Solda, Ni mo Tow

Hed, solda, ni mo tow, ni mo tow

Hed, solda, ni mo tow, ni mo tow

Mo ae mo ea mo maot mo nus

Hed, solda, ni mo tow, ni mo tow

Sens Singsing

Wetem ae mi lukluk

Wetem sorae mi harem

Wetem nus mi smelem

Wetem maot mi kakae.. hmmmmmm

Yumi tajem evri wan i so spesel

Hemia Wei blong Wasem Klos

(Tun olsem This is the Way...)

Hemia wei blong wasem klos, wasem klos, wasem klos

Hemia wei blong wasem klos

Evri Mande moning

Hemia wei blong rakem lif.....Evri Tusde moning

Hemia wei blong brum long flo.....Evri Wenesde moning

Hemia wei blong katem wud.....Evri Tasde moning

Hemia wei blong swim gud.....Evri Fraede moning

Hemia wei blong katem gras..... Evri Satede moning

Hemia wei blong brasem tut.... Evri Sande moning



APENDIKS 21 :

Teouma brij i foldaon

(Tun i olsem London Bridge is Falling Down)

Teouma brij i stap foldaon

Stap foldaon, stap foldaon

Teouma brij i stap foldaon

Evri wan i warí

Bildim bak wetem aean

Aean, aean,

Bildim bak wetem aean

Evri wan i hapi

Bildim bak wetem brikis

Brikis, brikis,

Bildim bak wetem brikis

Evri wan i hapi

Bildim bak wetem wud mo nil

Wud mo nil, wud mo nil

Bildim bak wetem wud mo nil

Evri wan i hapi.

Insi Winsi Spaeda

Insi Winsi Spaeda i klaem antap wan tri

Ren i foldaon i wasem spaeda i go daon

Taem san i kamaot i draemap ren wota ia

Mekem Insi Winsi Spaeda i save klaem bakeken



APENDIKS 21 :

Yumi Kam Tugeta

(Tun i olsem When We all Get Together)

Yumi kam tugeta moa, tugeta, tugeta

Yumi kam tugeta moa, bae yumi hapi

Fren blong yu i fren blong mi

Fren blong mi i fren blong yu

Yumi kam tugeta moa, bae yumi hapi

Oh Josefín

(Tun i olsem *Oh Breneli*)

Bislama

Oh, Josefín haos blong yu i stap long wea?

Haos blong mi i stap long (Freswota)

Papaia, kokonas i fulap

Yaho, ho tu la la la, yaho, ho tu la la la, yaho, ho tu la la la, yaho, ho tu la la la

Ya-ho, ho tu la la la, ya ho, ho tu la la la, ya-ho, ho tu la la la. Ya-ho-ho!

Japanis

Oh, Josefín ana tano o u chiwa doko?

Watashino ou chiwa su it tu lando yo

Ki re ina kosui no hoto ri na noyo

Yaho, ho tu la la la, yaho, ho tu la la la, yaho, ho tu la la la, yaho, ho tu la la la

Ya-ho, ho tu la la la, ya ho, ho tu la la la, ya-ho, ho tu la la la. Ya-ho-ho!

Do Re Mi

DO ia dolfin fren blong mi

RE ia renbo long skae

MI ia nem blong mifala

FA ia famle blong yu

SO ia blu solwota

LA ia laplap blong kakae

TI ia ti long moning

Yumi go bak long Do Re Mi



APENDIKS 21 :

Papa Abraham

Papa Abraham i gat ol boe

Plante boe blong papa Abraham

Mi mi wan, mo yu tu

Yumi kam presem God, raet han

Papa Abraham i gat ol boe

Plante boe blong papa Abraham

Mi mi wan, mo yu tu, yumi kam presem God, raet han, lef han

Papa Abraham i gat ol boe

Plante boe blong papa Abraham

Mi mi wan, mo yu tu

Yumi kam presem God, raet han, lef han,raet leg

Papa Abraham i gat ol plante boe

Plante boe blong papa Abraham

Mi mi wan, mo yu tu

Yumi kam presem God, raet han, lef han, raet leg, lef leg

Papa Abraham i gat ol boe

Plante boe blong papa Abraham

Mi mi wan, mo yu tu

Yumi kam presem God, raet han, lef han, raet leg, lef leg, hed i go antap

Papa Abraham i gat ol boe

Plante boe blong papa Abraham

Mi mi wan, mo yu tu

Yumi kam presem God, raet han, lef han, raet leg, lef leg, hed i go antap, tanem raon

Papa Abraham i gat ol boe

Plante boe blong papa Abraham

Mi mi wan, mo yu tu

Yumi kam presem God raet han, lef han, raet leg, lef leg, hed i go antap, tanem raon, sidaon



APENDIKS 21 :

Bigfala Puskat

(Tun i olsem *Taem blong Kakae*)

Bigfala puskat, bigfala puskat
Hem i gat longfala tel
Go long antap bigfala tri ia
Naesfala ples blong plei
Go long lefsaed, miaow miaow miaow
Go long lefsaed miaow miaow miaow
hem i save lukluk long wei wetem bigfala ae

When We all Pull Together

English

When we all pull together
Together, together,
When we all pull together
How happy we will be
For your work is my work
For our work is God's work
When we all pull together
How happy we will be

Bislama

Taem yumi evriwan i pul
Tugeta, tugeta
Taem yumi evriwan i pul
Bae evriwan i glad
Ol wok blong yu hem i wok blong mi
Ol wok blong yumi hem i wok blong God
Taem yumi evriwan i pul tugeta
Bae evriwan i glad



APENDIKS 21 :

Mi Laekem Lukluk Bataflae

Mi laekem lukluk bataflae

Flae antap, flae daon bilo

Mi laekem lukluk bataflae

Jisas i mekem hem

Wan Wael Dog

I gat wan wael dog

I stap singaot long vilej

Wan wael dog

I mekem wanem i wantem mekem

I muvum tel blong hem

Mo i tanem raon

Bow wow wow

Sta ia bifo

Sta ia bifo, hem i saen we i saen gud

Hem i saenaot blong soemaot rod

Hem i stap lidim ol man oli go tru

Blong faenem ples ya we Jisas i stap

Jisas i stap silip long bokis blong drael gras

Ol buluk oli stap klosap long hem

Ol enjel oli stap ona gud long hem

Hem nao i King mo sevia blong wol



APENDIKS 21 :

Jisas i Bon

Sta ia bifo, hem i saen we i saen gud
Hem i saenaot blong soemaot rod
Hem i stap lidim ol man oli gotru
Blong faenem ples ya we Jisas i stap

Jisas i stap silip long bokis blong drael gras,
Ol buluk oli stap klosap long hem
Ol enjel oli stap ona gud long hem
Hem nao i King mo sevia blong wol

Evri gud samting blong yumi long wol ia
Yumi mas tekem blong givim long hem
I nogud yumi stap holem ol samting
Yumi mas rere blong givim long hem

Ol King bifo oli givim long Jisas
Mir wetem gol wetem insens blong ol
Nambawan samting we Jisas i laekem
Laef ya blong blong yumi, blong givim long hem

Sta ia bifo, hem i saen we i saen gud,
Hem i saenaot blong i soemaot rod
Hem i stap lidim ol man oli gotru
Blong faenem ples ia we Jisas i stap

GLOSARI

Bislama	Mining	Inglis	Franis
bit	Saon we i gat paten long hem	rhythm	le rythme
denja	Wan samting we i save kosem kil, damej o ded	danger	le danger
dedikesen	Givim yu wan blong mekem wan samting	dedication	engagement
disasta	Wan ivent we i kosem harem nogud o i kosem ded olsem hariken	disaster	les catastrophes
draot	Kakae i kamaot bakegen long maot taem wan man i sik o taem wan man i no laekem nating blong wan samting	vomit	vomir
fes aed	Tritim wan man bifo hem i go long dokta	first aid	premiers secours
feta	Gras blong faol	feather	une plume
handikraf	Wan samting we oli mekem wetem han olsem ol klos, ol mat, fan, tamtam o wan pig aot long wud	handicraft	L'artisanat
kea	Lukaotem gud mo provaedem ol nid blong hem	care	protection
kompos	Wan ples o Miksja blong ol roten kakae, plant, flawa blong putum go long graon	compost	composte- engrais
gritim	Talem halo mo talem tata	greeting	saluer
likwid	Wan sabstens we i flo o ron olsem olsem wota, melek o oel	liquid	liquide
lokomoto	Muvmen we i save muvum bodi i go long wan ples kasem narafala ples	locomotive	locomotion
neseri	Wan ples we oli planem o putum ol yang plant insaed	nursery	la pépiniere
patisipet	Tek pat	participate	participer
pesen	Wan man o woman o gel o boe	person	la personne
sefti	Blong stap sef aot o farawei long denja	safety	sécurité
stabiliti o balens	Save kontrolem hevi mo posisen blong wan samting semtaem	stability or balance	la stabilité
stampem	Stanap strong long graon wetem leg	stamp	Taper du pied
tanksgiving	Talem tangkiu long papa God	thanksgiving	action de grace
tow	Fingga blong leg	toe	l'orteil
wael	I liv long bus no long taon olsem wael faol, wael pig o wael hos	wild	sauvage
waks	Sabstens we i mel o ron taem kandel i laet	wax	cire
woksit	Wan pepa we i gat ol wok o aktiviti oli stap long hem	work sheet	feuille de travail

NOTES

